

Naqqiut

Siunnersuut 13. Oktober 2017-imeersoq taarserpaa

(Inatsisiliornermut tunngatillugu aaqqiinerit ilanngunneqarput, matuma ataani oqaasertaliornerit allanngortinneqarneri naqqinneqarnerilu, kiisalu innersuussussinerit iluarsineqarneri)

Inatsisissatut siunnersuummut nassuiaatit

Siunnersuummut nassuiaatit nalinginnaasut

1. Aallaqqaasiut

1.1. Siunnersuummut tunngaviusoq aamma siunertaa pingaarneq

Naalakkersuisut isumaqarput Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaat inunnut innarluutilinnut tapersiisarneq pillugu Inatsisartut inatsisissaattut siunnersuummut matumunnga tunngavigitinneqassaasoq.

Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaat, inuit innarluutillit allatulli inuit pisinnaatitaaffiini aamma tunngaviusumik kiffaangissuseqarnermut pisinnaatitaaffinnik tamakkiisumik atuisinnaanerannik siuarsaasussaavoq, illersuisussaavoq isumannaarisussaallunilu kiisalu inuit innarluutillit inuttut naleqassusaasa ataqqineqarnissaannut siuarsaasussaalluni.

Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaata suliassaqarfanni tamaginni inuit innarluutillit assigiimmik periarfissaqarnissaannik, inuit pisinnaatitaaffiinit maleruagassiivigineqartunik, siuarsaanissaanut Kalaallit Nunaat pisussaaffilerpaa. Tassani pineqarput ilinniartitaanerumut, peqqinnissaqarfimmit sullississutinut, sulinissamut aamma politikikkut aalajangeeqataanissamut assigiimmik periarfissaqarneq.

Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaat manna atorlugu innarluutilinnut suliassaqarfimmi nunani tamalaani nutaanik najoqqutassiisoqarpoq. Inuit innarluutillit innarluuteqarnertik kisiat naapertorlugu isiginiarneqarunnaartussaapput, kisianni innarluuteqarneq inuit innarluutillit ataasiakkaat inuiaqatigiillu naapeqatigiinneranni aporfittut isiginiarneqartussaalluni.

Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaanni tunngaviusut nalinginnaasut makkuupput:

1) Inuup pissusissamisoortumik ataqqinassuseqarnerata, inuttut nammineersinnaanerata

ataqqineqarnissaa, ilanngullugu nammineq aalajangiinissamut kiffaanngissuseqarnera, aammalu inunnut allanut isumalluuteqannginnera.

- 2) Immikkoortitsinnginneq.
- 3) Inuiaqatigiinni tamakkiisumik sunniuteqarluartumillu peqataaneq akuutitsinerlu.
- 4) Assigiinngissutsinut ataqqinninneq aamma inuit innarluutillit inuit assigiinngisitaartut inuppalaartullu ilagigaat akuersaarneq.
- 5) Naligiimmik periarfissaqarneq.
- 6) Tikikkuminassuseqartitsineq.
- 7) Angutit arnallu naligiissitaanerat.
- 8) Ineriartornissamut periarfissanik, inuit innarluutillit periarfissaannik, ataqqinninneq kiisalu kinaassutsimik attatiinnarnissaanut pisinnaatitaaffeqarnerannik ataqqinninneq.

Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaanni tunngaviusuni qitiutinneqartut ilaat tassaavoq tikikkuminassuseqartitsineq artikel 9-mi nassuiarneqartoq. Artikelip taassuma malitsigisaanik, inuit innarluutillit inuiaqatigiinni tikikkuminartuni inuunissaasa qulakkeernissaanut, naalagaaffik pisussaaffeqarpoq. Tikikkuminassuseqartitsineq atitoorujussuarmik paasineqassaaq, ilaatinneqarlutik nammineq ornigulluni, digitalikkut, attaveqaqatigiinnikkut aamma oqartussaaqatigiinnikkut tikikkuminassuseqartitsineq. Aammattaaq tikikkuminassuseqartitsinermi innuttaasut innarluutillit inuiaqatigiinni peqataanissamut periarfissaqarnerat tunngavissalerneqassaaq. Inuit innarluutillit, innuttaasut allat assigalugit nammineq orniguffissanut isersinnaanissaat, angallasserme periarfissaqarnissaat, paasissutissiinermi attaveqaqatigiinnermilu teknologiimik, ilanngullugit paasissutissiinermut attaveqaqatigiinnermullu teknologii aamma periaatsit, aammalu atortorissaarutinut neqeroorutinullu allanut, tamanut ammatinneqartunut imaluunniit periarfissaatinneqartunut, illoqarfiit sumiiffiini aammalu nunap immikkoortuini, atuisinnaanissaat, naalagaaffiup qulakkeertussaavai.

2009-mi Danmarkip Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaat Kalaallit Nunaannut tunuarsimaarnertaqanngitsumik atuuttussanngorlugu akueraa. 2012-mi inatsisartut isumaqatigiissutip atuutilernissaa akueraat.

2014-imi septembarimi Danmarki Naalagaaffiit Peqatigiit innarluutilinnut komitémi siullermeertumik misilitsippoq. Kalaallit Nunaat aamma Savalimmiut danskit nalunaarusiornerannut immersueqataapput, taamatuttaarlu misilitsinnermut danskit angalatitaannut ilaatinneqarlutik.

Misilitsinnermi Kalaallit Nunaat innarluutilinnut suliassa qarfiimmi nunami namminermi iliuusissatut pilersaarummik suliqaarnissamut pisussaaffeqalerpoq, tassani nunani tamalaani innarluutilinnut isumaqatigiissut naapertorlugu innarluutilinnut suliassa qarfiup iluani inatsisit tulluarsarneqarnissaat misissorneqassalluni.

Kalaallit Nunaata taamatuttaaq, Kalaallit Nunaat tapiliussatut isumaqatigiissummi pineqartunut ilaalernissamik kissaateqarnersoq akissuteqarnissaq Naalagaaffiit Peqatigiit innarluutilinnut komitémut ilimasaarutigaa. 2014-imi inuit innarluutillit pisinnaatitaaffii pillugit nunani tamalaani isumaqatigiissummut tapiliussatut isumaqatigiissummut nammineq

kajumissutsimik ilaaffigineqalersinnaasumut Danmarkip ilaalernissamik akuersinissaa Folketingimi akuerineqarmat, Danmark Kalaallit Nunaannut nunatut tunuarsimaarfeqartitsivoq. Tapiliussatut isumaqatigiissummi, inuit ataasiakkaat imaluunniit inuit eqimattakkuutaat Naalagaaffiit Peqatigiit innarluutilinnut komitémut Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaat unioqputinneqarsimanerarlugu naammagittaalliorsinnaanerat, atuutsinneqalerpoq.

Siunnersuummi isumaginninnermut suliassa qarfiup iluani inuit, kisianni aamma inatsisartut inatsisaat manna malillugu tapersiinnikkut suliassa qarfinni immikkuullarissuni allani, innarluutillit inuttut pisinnaatitaaffiisa piviusunngortinneqarnissaat kissaatigineqarpoq. Taamaattoq tassunga atatillugu oqaatigineqassaaq, aalajangersakkani innuttaasunut qaninnerpaamiilluni aalajangiinissamut tunngaviusoq imaluunniit suliassa qarfinni immikkuullarissuni akisussaasuuneq pillugu tunngaviusoq allanngortinneqanngimmata.

Inatsisip siunertaa pingaarneq siunnersuutigineqarpoq tassaassasoq:

- 1) innarluuteqarnerup malitsigisaanik ajornartorsiutit ikiorsiivigineqarnissaannut siunnersuineramik tapersersuinermillu neqerooruteqarneq.
- 2) ataasiakkaat nammineersinnaanermut periarfissaannik siuarsaaneq imaluunniit ulluinnarni inuunerannik oqilisaaneq aamma inuunermi atukkanik pitsaanerulersitsineq.
- 3) ataasiakkaat ineriartornissamut periarfissaannik aammalu ataasiakkaanut tamanna ajornanngippat, nammineq periarfissaqarfigisanik atorluanaanissamik siuarsaaneq.
- 4) inuit innarluutillit inuiaqatigiinni naligiimmik periarfissaqarnissaat kiisalu innarluuteqarneq pissutigalugu assigiinngisitsinermik pineqarsinnaanerp akerlilerneqarnissaa, tassuuna sapinngisamik tamatigut sunniuteqarluartumillu inuiaqatigiinni peqataatinneqarnissaat ilanngunneqarnissaallu qulakkiissallugu.
- 5) Ataasiakkaat suliffeqarnissamut periarfissaqarnerannik siuarsaaneq.

1.2. Inatsisip piareersarneqarnerani tunaartarineqartut pingaarnerit

Siunnersuummi ilaatigut Inatsisartunit politikikkut suliniutit arlallit, kiisalu inatsisini atuuttuni misilittakkat aallaavigalugit ajornartorsiutit aalajangersimasut, malitseqartinneqarput.

Tamatuma saniatigut innarluutilinnut suliassa qarfimmi suliqaartuusunit aammalu kommunini suliassanik sularinnittartunit aamma kommunini pisortaatitanit kissaatigineqartut inassuteqaatillu siunnersuummi eqqarsaatigineqarput.

Kiisalu sulianik ilinniagaralugu suliqaartut aamma qanigisaasut inunnut innarluutilinnut ikiorsiisarneq pillugu inatsisit nutarterneqarnissaat pitsaanerulersinnissaallu pillugit kissaataasut malitseqartinneqarput.

Isumalluutit kommunimeereersut pitsaanerpaamik atorluarneqarnissaannut nukittorsarneqarnissaannullu sinaakkutissiisumik siunnersuutip ilusilersorneqarnissaa Naalakkersuisut pingaartippaat.

Siunnersuutip inunnut innarluutilinnut tunngatillugu inatsisit sinaakkutaannik iluarsartuussinissaq annertoq imaraa, aammattaaq kommunit Naalakkersuisullu nutaanik pitsaanerusunillu inuit innarluutillit inuulluataarlutik naleqarlutik inuttullu allatut pisinnaatitaaffeqarlutik periarfissaqartitaallutillu ikorfartorneqarsinnaalissammata.

2. Siunnersuummi immikkoortut pingaarnertit

Akisussaaffiit suliassallu agguagaanera ersarissuutillugu, inunnut innarluutilinnut tamaginnut suliassanik suliarinnittarnerup aamma inatsisitigut isumannaatsuutitsinerup nukittorsarneqarnissaat, siunnersuummi pingaarnertut siunertaavoq.

Ataasiakkaanik aamma tamakkiisumik isiginnilluni tapersiisarnissaq aallunneqarpoq, tamatumalu siunissami malitsigissavaa, inuit innarluutillit angerlarsimaffiup avataaniittariaqartartut ikinnerulernerat, kiisalu Inatsisartut inatsisaat manna malillugu tapersiivigineqarsinnaanermik imalik, inunnut innarluutilinnut tamanut, tapersiivigineqarnissamik pisariaqartitsisutut, atorneqarsinnaalersinneqarluni.

Siunnersuummi inuit innarluutillit pisinnaatitaaffiisa nukittorsarneqarnissaat aamma ersarissarneqarput, aammalu ingerlatsivinni oqartussaasut, pingaartumik kommunalbestyrelsit aamma Naalakkersuisut akornanni suleqatigiinneq ersarissarneqarluni pisariinnerulersinneqarpoq.

Kommunalbestyrelsit siunnersuummi inunnut innarluutilinnut taakkualu ilaquutaannut amerlanerusunik pitsaanerusunillu tapersiinissamut periarfissaqalersinneqarput.

2.1. Sullinniakkat

Siunnersuummi Kalaallit Nunaanni inuit innarluutillit tamarmik, Kalaallit Nunaanni najugaqarallalarupata imaluunniit aalajangersimasumik najugaqartuuppata, kiisalu kalaallisut innuttaassutillit Kalaallit Nunaata avataani ulloq unnuarlu neqeroorummut innersuunneqarsimappata, tapersiivigineqarsinnaanerat periarfissiissutigineqarpoq. Siunnersuummi aammattaaq inunnut innarluutilinnut qanigisaasunut tapersiinissamut periarfissiisoqarpoq.

Meeqqat 18-it inorlugit ukiullit, Inatsisartut inatsisaat manna malillugu aamma Meeqqat tapersersorneqarnissaannut Inatsisartut inatsisaat malillugu tapersiivigineqarnissamut sullinniarneqassapput, taamaammallu Inatsisartut inatsisaat marluusut tamaasa malillugit pisariaqartumik tapersiivigineqarsinnaatitaapput.

2.2 Nakkutilliineq siunnersuinerlu

Kommunit nakkutilliisussaatitaanerat ullumikkut Annertuumik innarluutillit ikiorserneqartarnerat pillugu Inatsisartut peqqussutaanni § 21a-mi allassimavoq, inatsillu taanna Inatsisartut inatsisissanni matumani atorunnaarsinneqartussaavoq.

Tassani allassimavoq inunnut annertuumik innarluutilinnut, ulloq unnuarlu paaqqinniffimmi inissinneqarsimasunut kommunimi najugaqarfiusumi kommunalbestyrelsip pissutsit inuit atugarisai nakkutigissagai.

Kommunalbestyrelsit ataatsimut isigalugu aammalu inummut sammititamik nakkutilliisussaataanerat siunnersuummi aalajangersarneqarpoq erseqqissarneqarlunilu, taamatullu kimittuumik suliassaqaarfinni immikkuullarissuni nakkutilliinissamut aammalu ulloq unnuarlu neqeroorutini sunniuteqarluartumik nakkutilliinissamut akisussaaffik Naalackersuisuniittoq siunnersuummi erseqqissarneqarpoq.

Siunnersuummi nakkutilliinermik ingerlatsivimmik, kommunit ingerlatsiviinut taassumalu suliassaqaarfimmi immikkuullarissumi tassani innarluutilinnut isumaginninnikkut maleruagassanik taakku allaffissornikkut aqutsinerinut suliassaqaarfimmi nakkutilliisuusussamik, kiisalu ulloq unnuarlu neqeroorutinut nakkutilliisuusussamik, peqarnissamik Naalackersuisut pisussaaffilerneqarput. Nakkutilliinermik ingerlatsivik kommunini innarluutilinnut suliassat pillugit paasissutissanik attuumassuteqartunik tamaginnik pissarsisinnaassavoq aammalu kommunalbestyrelse qulaajaanernik aallartitsissasoq aamma iliuusissanik pilersaarutunik suliaqassasoq, imaluunniit suliat naammassereersut nutaamik suliarineqartussanngorlugit qaqeqqinnissaannik innersuussisinnaalluni imaluunniit peqqusissuteqarsinnaalluni. Suliani, kommunalbestyrelse najugaqaarfissatut neqeroorummiinnissaq pillugu neqerooruteqarluni tapersiisussaagaluartoq, tamannalu neqeroorutigineqarsimanngitsoq naliliisoqartillugu, kommunalbestyrelse qulaajaanernik aallartitsissasoq, Nakkutilliinermik ingerlatsiviup pisuni immikkut ittuni piumasaaqatigisinnaavaa. Nakkutilliinermik ingerlatsiviup pissutsinik isumanerlunnartunik paasisaqaaruni kommunalbestyrelse nalunaarfigissavaa, taamatullu sumiiffimi pissutsit tamanna pisariaqartippassuk, Nakkutilliinermik ingerlatsiviup najugaqaarfissatut neqeroorutini ataasiakkaani sukannernerusumik nakkutilliinissaq pillugu aalajangiisinnaavoq. Nakkutilliinermik ingerlatsivik tamatuma saniatigut, najugaqaarfissatut neqeroorutini pitsaassuseqartitsiinnarnissaq aammalu pitsaassutsinik ineriartortitsinissaq siunertaralugu, najugaqaarfissatut neqeroorutit malinnaaffigissavaa.

Taamatuttaaq siunnersuummi Isumaginninnermut Aqutsisoqaarfimmik kommuninut siunnersuisartussamik aammalu innarluutilinnut suliassat suliarineqarneranni ikorfartuinnermik suliaqartussamik, peqarnissamik Naalackersuisut pisussaaffilerneqarput. Suliassat suliarineqarneranni nuna tamakkerlugu assigiissaartumik pitsaassuteqartitsinerup, kommunini suliassanik suliarinninnermut piffissap sivikinnerulersinnissaanut aammalu kommunit ingerlatsivianni sulisut piginnaasaqaarfiinik inerisaanerup pitsanngorsarnissaata qulakkeernissaanut, Isumaginninnermut Aqutsisoqaarfik peqataassasoq naatsorsuutigineqarpoq. Najugaqaqatigiiffinnut, najugaqaarfinnut illersugaasunut aamma ulloq unnuarlu neqeroorutinut akuersissuteqarnissamut oqartussaasuunissaq Isumaginninnermut Aqutsisoqaarfiup suliassarissavaa pingaaruteqartoq.

2.3 Qulaajaaneq, sulianik suliarinninneq, iliuusissatut pilersaarut kiisalu oqaloqateqarneq
Qulaajaanerit aamma iliuusissatut pilersaarutit inatsisini atuuttuni maleruagassaqaartinneqarput. Qulaajaaneq aamma iliuusissatut pilersaarut sulianik suliarinninnermi sakkussaapput pingaaruteqartut, aammalu tapersiinnermi iliuusissat suut neqeroorutigineqassanersut aalajangiisuulluinnarlutik.

Immikkut ittumik tapersiinnissami qulaajaaneq suliamik suliarinninnermi tamarmiusumi tunngaviuvoq, iliuusissatulli pilersaarummi allaaserineqassalluni inuup innarluutillip ajornartorsiutai, isumalluutai ilaqutaanullu tunngassut, matumani suliniutini anguniagassat aalajangersarneqarneri ilanngullugit.

Siunnersuutip malitsigisaanik qulaajaanerup maleruagassiivigineqarnera aammalu iliuusissatut pilersaarutitut piumasaqaatit naleqqussarneqarlutillu annertusitinneqarput. Iliuusissatut pilersaarutit sulianik suliarinninnermi sakkussatut pingaaruteqartutut sammineqarput, aammalu qulaajaanerit assigiissaarnerulernissaat pingaartinneqarluni. Aamma iliuusissatut pilersaarutit suliaqarneq anigorniagassat inuup innarluutillip ulluinnarni nalaattagaasa iluarsiiivinissaanni ilaqutariit aamma qanigisaasut allat peqataanissamut periarfissinneqarnissaannut pingaaruteqarpoq. Isumaginninnermi sulianik suliarinninnermut aamma qulaajaanermut suut piumasaqaatigineqarnersut, kommunalbestyrelse ullumikkut taamaaqataannik ersarissunik maleruagassaqaanngilaq. Taamaattumik innarluutilinnut suliassat kommunimit kommunimut assigiinngitsumik suleriaaseqarfigineqarlutik paasissutissarsivigineqartarput suliarineqartarlutillu, taamaattumillu sulianik suliarinninnermut aamma inuit innarluutillit taakkualu qanigisaasa pisariaqartitaannik qulaajaanermut, Naalakkersuisut amerlassusissanut pitsaassusissanullu piumasaqaataannut maleruagassat assigiissaarneqarnissaat pisariaqartinneqarpoq.

Naatsorsuutigineqartariaqarpoq oqartussanit tamani aamma avataaneersunit suliaqartuusunit inunnik innarluutilinnik kalluaasartunit, innarluutilinnut suliassani tamakkiisumik isiginnittumik suliniuteqarnissami kommunalbestyrelse qulakkeerisussaasoq. Inuit ataasiakkaat aallaavigalugit naliliisoqassaaq, oqartussaasut aamma suliaqartuusut allat kikkut, suliniuteqarnermi akuutinneqassanersut. Oqartussaasut allat assersuutigalugu tassaasinnaapput ilinniartitaanermut aamma peqqissutsimut oqartussaasut il.il.

Kommunalbestyrelsip suliniuteqarneq ataqatigiissoq aaqqissuutissavaa, tassani ingerlatsiviit, najugaqarfissatut neqeroorutit, ilinniarfiit allallu inummut innarluutilimmuut tunngatillugu suleqataasut attuumassuteqartut akuusut, pineqartup ikiorserneqarnissaanut ataatsimoorlutik akisussaasuusallutik. Suliniuteqarnermi oqartussasut sorliit akuutinneqassanersut naliliinissamut kommunalbestyrelse akisussaasuuvoq. Ajornartorsiutit ilai kommunalbestyrelsimit aaqqiivigineqarpata pitsaanerpaasarpoq, allanilu suliaqartuusut allat annertunerusumik suleqatiginissaat pisariaqartarluni. Tamakkiisumik isiginnittumik suliniuteqarnerup oqartussaasut allallu suliaqartut attuumassuteqartut, inuk qanillugu suliaqartuusut, qanimut suleqatigiinnerisigut piviusunngortinneqarnissaa, inuup innarluutillip inissisimanerani ikiuunnissamut pingaaruteqarluni pisariaqarpoq. Suliniuteqarnermi inuup innarluutillip inuunermini inissisimanagera ikiorserneqassaaq, isumalluutai aamma ajornartorsiutai kiisalu tamatuma tunuliaqutai aallunneqassapput. Oqartussaasut suliaqartuusullu tamarmik siunertaasut suut suliaqarnermi anguniarneqarnersut aammalu

tamarmik immikkut inummut innarluutilimmut ataatsimoortumik suliniuteqarnermi qanoq inissisimanerlutik, ilisimaarissagaat pingaaruteqarpoq.

Amerlanertigut anigorniagassanut pillugit, inummut innarluuteqarnerata malitsigisaasa ataatsimoorlutik annertussusaat paasiniarniarlugu, oqartussaasunit suliaqartuusunillu arlalinnit ataatsimoortumik suliniuteqartoqassaaq, aammalu inuk innarluutilik anigorniagassanit akimmisaartinneqannginnissamut pitsaanerpaanik periarfissaqartinniarlugu oqartussaasut suleqatigiissasut naatsorsuutigineqarpoq.

Annertuumik innarluutillit ikiorserneqartarnerat pillugu Inatsisartut peqqussutaat nr. 7 3. november 1994-meersumut naleqqiullugu, tassani aalajangersakkat nalunaarutitut ilusillit arlallit tassaniipput, inatsisinut atuuttunut sanilliullugu, iliuusissatut pilersaarutit siunnersuutip oqaasertaanni pingaaruteqartutut ilaatinneqarput. Siunnersuummi nutaami iliuusissatut pilersaarutit pillugit piumasaqaatit malunnaatilimmik annertusitinneqarput. Kommunalbestyrelse qaqugukkut iliuusissatut pilersaarutitik suliaqartassanersoq, iliuusissatut pilersaarutit qanoq imaqassanersut, kiisalu iliuusissatut pilersaarutitik suliaqarnermut atatillugu pisortatigoortumik piumasaqaatit suut naammassineqarsimassanersut, maleruagassat siunnersuummi aalajangersarneqarput, ilanngullugu iliuusissatut pilersaarutit siunertaasup allassimaneranit annertunerussanngitsut.

Iliuusissatut pilersaarutitik suliaqarnissamik pisussaaffik malunnaatilimmik annertusitinneqarpoq, tamatuminngalu suliaqarneq inuit innarluutillit tapersiivigineqarnissaat pillugu ingerlatsivimmi suliassanik sularinninnermi pissusissamisoortumik ilaatinneqassasoq, naatsorsuutigineqarpoq.

Pineqartumut tapersiinissaq pillugu aalajangiisoqannginnerani, inuup innarluutillip oqaloqatigineqarnissaanut kommunalbestyrelse siunnersuummi pisussaaffilerneqarpoq. Oqaloqateqarnermi siunertaavoq inuup aalajangiinissatut eqqarsaatigineqartumut nammineq qanoq isumaqarnerata paasinarsisinnissaa, aammalu aalajangersakkami pingaartinneqarpoq oqaloqateqarneq siunertaasoq taanna aammalu inuk innarluutilik pineqartoq ataqqillugit ingerlanneqassasoq.

2.4 Tapersiinnermi iliuusissat, tapersiineq aamma immikkut ittumik tapersiineq

Inatsimmi atuuttumi tapersiinnermi iliuusissat arlallit, inummut annertuumik innarluutilimmut ikiorsiissutaasinnaasut, allattorsimapput.

Siunnersuummi inatsimmi atuuttumi tapersiinnermi iliuusissat ingerlateqqinneqarput itisiliivigineqarlutillu, taamatullu tapersiinnermi iliuusissanik suliniutinillu nutaanik pingaaruteqartunik atuutsitsisoqalerluni. Siunnersuut malillugu tapersiisarnerup periarfissaaneraniit, inummut innarluutilimmut annertuumik pisinnaatitaaffigitilernissaa, siunnersuummut ilaatinneqarpoq pingaaruteqartoq. Inatsisinut atuuttunut sanilliullugu aalajangiisuusumik allaassutaasoq alla tassaavoq, siunnersuut malillugu inunnut

innarluutilinnut, annertuumik innaarluuteqartuunngitsunut, tapersiisarnissaq periarfissaalissasoq.

Siunnersuummi tapersiissutit alloriarnerni tulleriinni aggulunneqarput, alloriarnerni pingasuniillutik: 1. Siunnersuineq aamma ilitersuineq, 2. Tapersiineq aamma 3. Immikkut ittumik tapersiineq. Immikkut ittumik tapersiinissaq pillugu aalajangiinermut atatillugu taamaallaat, inuk tapersiivigineqarnissamik qinnuteqartoq, annertuumik innarluuteqartuussasoq piumasaqaatigineqarpoq.

Tapersiisarneq aamma immikkut ittumik tapersiisarneq pillugu aalajangersakkat nutaat makkua siunnersuutip imarai:

§ 23-mi inunnt innarluutilinnut kommunalbestyrelsip tapersiinissaanut sinaakktissat pingaernerit aalajangersarneqarput. Aalajangersakkami pingaartumik kommunalbestyrelsip tapersiinissaq pillugu aalajangiinermut atatillugu sulianik suliarinninnermi pisariaqartunik suliaqarnissaa kiisalu nalilersuinnermi sakkussatut atorneqarnissaa, qulakkeerneqassaaq.

§ 24-mi inuup innarluutillip, tamakkiisumik nammineersinnaanngitsup, ikiorneqarnissamik isumassorneqarnissamillu neqeroorfigineqarnissaa qulakkeerniarneqarpoq, ilanngullugit inuttut suliaassat aamma suliaassat suliarineqartussat. Aalajangersakkami siunertaavoq innarluuteqarnerup malitsigisaasa annertuut ikiorserneqarnissaat kiisalu inuup innarluutillip piginnaasaqarfiisa tunngavissinneqarnissaat. Tapersiineq tapertaasussaavoq aammalu inuup innarluutillit pikkoriffii ataqqillugit tapersiissutaassalluni.

§ 27-mi aalajangersakkami aalajangersarneqarpoq, innarluuteqarnini pissutigalugu kisimiilluni angalaarsinnaanngippat, kommunalbestyrelse inummut innarluutilimmut qaammammut nalunaaquttap akunnerini aalajangersimasuni ingiaqateqartitsinissamik neqerooruteqassasoq. Ingiaqateqartitsineq, inuit innarluutillit inuiaqatigiinni inooqataallutik peqataanissamat assigiimmik periarfissaqarnerisa qulakkeernissaa siunertaralugu, taperseeriaatsit nutaatut siunnersuutigineqarpoq. Peqatigisaanik naliliisoqarpoq, inuit innarluutillit akornanni, tapersersorteqarnissaq naleqqutinngippat imaluunniit pisariaqanngippat, ingiaqateqarnissamik pisariaqartitsisoqartoq.

§ 38-mi kommunalbestyrelsip inunnt innarluutilinnut immikkut ittumik tapersiinissaanut killissaliussat pingaernerit aalajangersarneqarput. Aalajangersagaq § 23-mut assigiissuteqarpoq, kisianni immikkut ittumik tapersiinissaq annertunerummat, kommunalbestyrelsip sulianik suliarinninneranut, nalinginnaasumik tapersiisarnermit, annertunerusunik piumasaqaateqartoqarpoq, ilanngullugit qulaajaaneq aallartinneqassasoq, oqaloqateqarneq ingerlanneqassasoq aammalu iliuusissatut pilersaarut suliarineqassasoq. Piumasaqaatini sukannerneqarsuni, immikkut ittumik tapersiinnermi iliuusissat inummut innarluutilimmut pisariaqarnerisut paasinarsisinneqarnissaa siunertaavoq.

§ 39-mi kommunalbestyrelsip immikkut ittumik ulluunerani neqeroorutinik, kommunimi ulluunerani neqeroorutinut allanut tapertaasussanik, meeqqat annertuumik innarluutillit suli atualersimangitsut immikkut ittumik pisariaqartitsinerannik naammassinniffiusinnaasunik, pilersitsisinnaanerat periarfissiissutigineqarpoq. Ulluunerani neqeroorutit suliassarissavaat immikkut ittumik ikorfartuineq isumassuinerlu meeqqap meeqqat atuarfianni neqeroorummi tiguneqarsinnaaneranut tapersiinerit suut aallartinneqassanersut paasinarsisitsinissaq siunertaralugu, meeqqap malinnaavigineqarnissaa, assersuutigalugu perorsaanikkut tapersersorneqarneq, matumani allanngutsaaliuilluni sungiusarneq, sammisassaqarneq, isumassorneqarneq allatulli ilusilimmik ikiorneqarneq ilanngullugit.

§ 40-mi kommunalbestyrelsip immikkut ittumik klubbimik neqeroorummik pilersitsisinnaanera periarfissiissutigineqarpoq. Immikkut ittumik klubbimik neqeroorut, kommunimi sunngiffimmi neqeroorutinut allanut tapertaassaaq, neqeroorutini allani meeqqap annertuumik innarluuteqarnerata malitsigisaanik, meeqqap immikkut pisariaqartitsinera naammassineqarsinnaangippat, meeqqanut 18-it inorlugit ukiulinnut annertuumik innarluutilinnut neqeroorutigineqarsinnaasooq. Neqeroorut kommunalbestyrelsimut pisussaaffiunani kajumissuseq malillugu ingerlanneqarsinnaasooq, inuit innarluutillit allatulli periarfissaqartinneqarnissaat pillugu siunertaasumut ilaatinneqarpoq.

§ 42-imi meeqqamut annertuumik innarluutilimmut angajoqqaatut akisussaasunut nuunnissamut ikiorsiineramik neqerooruteqarnissamut, kommune periarfissaqartinneqarpoq. Siunertaavoq ilaqutariit kommunimi illoqarfimmut imaluunniit nunaqarfimmut allamut, meeqqap pisariaqartumik ikiorneqarsinnaaffianut, nuunnissamut piviusumik periarfissaqartinneqarnissaat. Tapersiineq tamakkiisumik ilaannakuusumilluunniit aningaasatigut tapersiineramik malitseqassaaq.

§ 43-mi kommunalbestyrelse inummut innarluutilimmut nuna tamakkerlugu inunnik innarluutilinnik sullissivimmi allanngutsaaliuilluni sungiusarnissamik neqerooruteqarnissamik periarfissinneqarpoq. Allanngutsaaliuilluni sungiusarneq sungiusaqqinnermit allaaneruvoq, allanngutsaaliuilluni sungiusarnermi siunertaammat inuup annertuumik innarluutillip piginnaasaqarnini aammalu ulluinnarni piginnaasaminik atuisinnaassuseqarnini attatiinnarsinnaassagai. Allanngutsaaliuilluni sungiusarneq sullissivimmiinnissatut imaluunniit ullukkuinnaq sungiusarnertut, neqeroorutigineqarsinnaavoq.

2.5 Nuna tamakkerlugu inunnik innarluutilinnik sullissivik

Nuna tamakkerlugu inunnik innarluutilinnik sullissivik pillugu kapitali nutaajuvoq. Nuna tamakkerlugu inunnik innarluutilinnik sullissivimmik, ilisimasanut ineriartortitsinermullu kiisalu sungiusaanermut qitiusumi sullissivittut atuuttussamik, pilersitsisoqarnissaa, politikikkut atituumik kissaatigineqarsimavoq. Nuna tamakkerlugu inunnik innarluutilinnik sullissiviup inunnut innarluutilinnut taakkualu qanigisaannut kiisalu kommunalbestyrelsinut Inatsisartut inatsisaat manna pillugu siunnersuinissaq ilitersuinissarlu ilaatigut suliassarissavaa. Tamatuma saniatigut sullissivik tapersiinnissamut periarfissat pillugit

siunnersuisassaaq, allanngutsaaliuilluni sungiusaanissamik neqerooruteqassalluni aammalu innarluuteqarneq aamma tapersiissutinut periarfissat pillugit pikkorissaanernik aallartitsisuusassalluni. Sullissivik tamatuma saniatigut suliani immikkut pisariusuni kommunit sullillugit qulaajaanernik ingerlatsisinnaavoq aammalu ilitersuissutaasunik oqaaseqaateqarsinnaalluni. Kissaatigineqarsimavoq, inuit innarluutillit sullissivimmiinnissaannik innersuussinissap tunuarsimaarfigineqarsinnaanera pitsaaliorniarlugu, sullissivimmut innersuussineq kommuninut atuinermut akiliisitsiviusassanngitsoq.

2.6 Immikkut ulloq unnuarlu neqeroorutit pillugit

Siunnersuummi oqaatsinik atuineq allanngortinneqarpoq, ulloq unnuarlu paaqqinniffimmik oqartarneq atorunnaarlugu ulloq unnuarlu neqeroorut atorineqalerluni. Paaqqinniffimmik oqartarnerup atorunnaarnissaa Naalagaaffiit Peqatigiit innarluutillit pillugit isumaqatigiissutaannut naapertuunnerpaasorineqarpoq, tassami oqaaseq naqissusiinermik inissitsitsisutut paasineqarsinnaammat, aammalu inunnut innarluutilinnut ulloq unnuarlu paaqqinniffimmiinneq piviusumik najugaqarfissatut neqeroorutitut isikkoqarmat, tassami ulloq unnuarlu neqeroorummiinnissamik pisariaqartitsineq, nammineq angerlarsimaffimmi ikiorsiinissamit, tapersorneqarnerunissamik aamma immikkut ilisimasaqarfiusumik tapersiivigineqarnissamik pisariaqartitsinerinnarmik pissuteqarmat.

§§ 52-53 naapertorlugu ulloq unnuarlu neqeroorutini isumannaallisakkani inersimasunik inissiisarneq pillugu kapitali ilanngunneqarpoq. Ulloq unnuarlu neqeroorutit isumannaallisakkat inissiisarfiupput, igalaat aamma matut silarliit parnaaqqatinnissaat akuerisaalluni. Inuit ulloq unnuarlu neqeroorummiittut inissinneqarsimasut tassani pineqaraluartut, paasineqarnissaa eqqarsaatigalugu assigiaartumik oqaatsinik atuinissaq aammalu oqaatsip ulloq unnuarlu neqeroorut matoqqasoq, atorineqarnissaa, aalajangiunneqarpoq.

2.7 Ineriartortitsinissamut pilersaarutit

Inatsisini atuuttuni inunnut annertuumik innarluutilinnut katsorsaanissamut pilersaarutit taaneqarput. Inatsisissatut siunnersuummi katsorsaanissamut pilersaarutit atorineqarunnaarput, tamatumunngalu taarsiullugu inunnut annertuumik innarluutilinnut ineriartortitsinermut pilersaarutit atuutsinneqalerput. Iliuusissatut pilersaarutip siunertaa aamma anguniakkat aallaavigalugit, ineriartortitsinermut pilersaarut perorsaanikkut suliaqarnerup, iliuusissatut pilersaarummi siunnerfiit pingaernerit naammassineqarnissaannik qulakkeerisussap, nassuiarneqarneranik imaqassaaq. Inunnut innarluutilinnut, ulloq unnuarlu neqeroorummiittunut tamanut ineriartortitsinissamut pilersaarutitik suliaqartoqassaaq.

Katsorsaanissamut pilersaarut oqaatsit atussallugu eqqunngilaq, inuup innarluutillip innarluuteqarnermigut peqqinnikkut qanoq issusaa siviisuujusinnaammat.

Ineriartortitsinissamut pilersaarut oqaatsit atorineqarpoq, Naalagaaffiit Peqatigiit innarluutillit pillugit isumaqatigiissutaanni inunnut isiginnittaaseq tunngavigineqarluni,

aammalu innuttaasup innarluutillip ulloq unnuarlu neqeroorummiinneranut siunissamut pilersaaruteqarnermut tunngatillugu paasiuminarnerulluni.

2.8 Inuit innarluutillit pisinnaatitaaffii sakkortunerusut

Aalajangersakkat arlallit, inuit innarluutillit pisinnaatitaaffiisa nukittorsarneqarnissaat siunertaralugu suliniutinik aallartitsinissamik kommunalbestyrelsinut aamma Naalakkersuisunut pisussaaffiliisut, siunnersuummi ilanngunneqarput.

§ 65-imi Naalakkersuisut ukiut sisamakkaarlugit ulloq unnuarlu neqeroorutini ineriartortitsinissamut periusissamik suliaqartarnissamut, pisussaaffilerneqarput. Siunertaavoq pingaartumik ulloq unnuarlu neqeroorutit innarluutilinnut suliaasaqarfimmi sulianut ilisimasassanik teknologiimillu ineriartornermi malinnaanissaasa qulakkeerneqarnissaa.

§ 85-imi kommunalbestyrelsit innarluutilinnut siunnersuisoqatigiinnik pilersitsinissamik pisussaaffilerneqarput, aammalu Innarluutillit pillugit Siunnersuisoqatigiit suliaasaat piginnaasaqarfissaalu aalajangersarneqarlutik, innarluutilinnut suliaasaqarfimmi pingaarnertigut tunaartarineqartut sulissutigineqarnissaat siunertarineqarluni. Innarluutilinnut siunnersuisoqatigiit ilaatigut suliaassaraat kommunalbestyrelsip innarluutilinnut politikikianik aammalu suliaasaqarfimmi allaffissornikkut aqutsinerannik ineriartortitsinermik eqeersimaartumik suliaqarnissaq, kiisalu kommunimi politikikkikut apeqqutini siunnersuinermi immersueqataanissaq.

§ 86-imi aalajangersarneqarpoq kommunalbestyrelsit innarluutilinnut politikkimik ilusilersuissasut. Innarluutilinnut politikkimut siunertaavoq, kommunimi qanoq iliorluni, pisortani suliaasaqarfiit immikkuullarissut akimorlugit aammalu kommunimi innarluutilinnut neqeroorutini sapinngisamik pitsaanerpaamik pitsaassuseqartitsinissaq siunertaralugu, inunnut innarluutilinnut tapersiinermt atattillugu sapinngisamik pitsaanerpaamik sullissinerup pitsaassuseqartinnissaanut, kommunalbestyrelsit isummertinnissaat.

§ 87-imi aalajangersarneqarpoq kommunalbestyrelse ilaatigut tapersiisarnermut, kommunip inunnut innarluutilinnut neqeroorutigisaannut tunngatillugu pitsaassusissanut malitassanik allaganngorlugu suliaqassasoq. Pitsaassusissanut malitassat kommunip nittartagaani tamanut saqqummersinneqassapput kiisalu Isumaginninnermt Aqutsisoqarfimmut ilisimatitsissutitut nassiunneqassallutik.

Tamanut saqqummiineq, pitsaassusissanut malitassat inunnut tapersiivigineqarsinnaatitaasunut pisinnaatitaaffittut isikkoqarnissaannut, iluaqutaassaaq. Tapersiinissamut periarfissat, innuttaasup atorsinnaasaasa, pitsaanerusumik paasiuminarnerulersinnissaat, aalajangersakkami siunertaavoq pingaaruteqartoq.

§ 92-imi aalajangersarneqarpoq, kommunalbestyrelsip Inatsisartut inatsisaat naapertorlugu ingerlatsivittut oqartussaasutut pisussaaffiinik naammassinninnissami annertuumik

imaluunniit arlaleriarluni sumiginnaanermut imaluunniit mianersuaalliornermut, pinngitsaaliissummik akiliinissamik Naalakkersuisut kommunalbestyrelse pisussaaffilersinnaagaat. Aalajangersakkami siunertaavoq inuit innarluutillit tapersiivigineqartarnerat pillugu Inatsisartut inatsisaanni aalajangersakkat sunniuteqarluartumik malinneqarnissaasa qulakkeerneqarnissaa.

3. Pisortanut aningaasaqarnikkut allaffissornikkullu sunniutaasussat

Innarluutilinnut inatsimmut nutaamut tunaartarisassat tassaapput Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaat aamma innuttaasut innarluutillit, taanna malillugu pisinnaatitaaffii. Inunnut innarluutilinnut inatsisip nutaap kingunerissavaa, innuttaasut innarluutillit arlalinnik nutaanik pisinnaatitaaffeqalernerat, tamatumalu aamma malitsigisaanik allaffissornikkut aningaasaqarnikkullu arlalinnik sunniuteqartussaalluni.

3.1 Sullinniakkat

Inatsisissatut siunnersuummi §§ 7-8-mi, Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaanni nassuiaassutinut naapertuuttumik, inatsisissatut siunnersuummi siunnerfigineqartut nassuiarneqarput. Inatsisip atuuttup paarlattuanik inatsisissatut siunnersuummi aalajangersakkani ukioqqortussutsit tamarmik pineqartunut ilaalerput. Taamaattoq taamatut allanngortitsineq utoqqalinersiutinik iluarsaaqqinnermut atatillugu atuutsinneqalereerpoq aammalu utoqqalinersiuteqartut innarluutillit, inuit innarluutillit allat assigalugit, pisinnaatitaaffeqarnerannik kinguneqarluni. Tamatuma saniatigut inuit annertuumik innarluutillit siunnerfigineqarnerat, inunnut innarluutilinnut, timikkut, tarnikkut, eqqarsartaatsikkut imaluunniit malussarissutsikkut sivisuumik piginnaanikillisimasunut allanngortinneqarpoq. Taamaattoq tamakkiisumik annertuumik amerlanerusut inatsisissatut siunnersuummi aalajangersakkani pineqartunut ilaalernerat, tamatuma kingunerissagunangilaa.

3.2 Nuna tamakkerlugu inunnik innarluutilinnik sullissivik

Nuna tamakkerlugu inunnik innarluutilinnik sullissiviup pilersinneqarnerani, inunnut innarluutilinnut neqeroorutit annertuumik pitsanngorsarneqarnissaat kiisalu kommunit inunnut innarluutilinnut suliassaqarfimmi suliniuteqarnerannik tapersiisarnerup pitsanngorsarneqarnissaat siunnerfigineqarpoq. Sammisat, ullumikkut IPIS-imit isumagineqartut, sullissiviup suliassaasa ilaattut ilaaterlugit, inunnik innarluutilinnik sullissivimmut ilanngutsinneqassapput. Inatsisissatut siunnersuummi sullissiviup suliassai annertusitinneqarput, pingaartumik kommuninut siunnersuinnermut tapersersuinnermullu tunngatillugu. Inunnik innarluutilinnik sullissivimmi sammisassat aningaasanut inatsimmi aningaasaliissutinit aningaasalersorneqassasut naatsorsuutigineqarpoq. Inuit innarluutillit sullissivimmiinnerannut siunissami qanittumi kommunit akigititamik akiliisalernissaannik atuutsitsilersoqarnissaa eqqarsaataangilaa. Taamaattoq tamanna naapertuuttoq pisariaqartorlu paasinarsissagaluarpat, akigititamut akiliuteqartarnissamik atuutsitsilersinnaanermut inatsimmi tunngavissaq ilanngunneqarpoq. Tamatuma

pisariaqartinneqarnera pilissappat, apeqqut kommuninut isumaqatiginninniarnermi qaqinneqassaaq.

Sullissiviup suliassaasa annertusinerannut atatillugu sulisut amerlinerannut aningaasartuuteqarnerulernissaq naatsorsuutigineqartariaqarpoq, missiliorlugu ukiumut piffissaq tamaat sulisartussat 3 nalingannik. Tamatumunnga aningaasaqarnikkut sunniutaasussat allaffissornermut ingerlatsinermullu isumalluutit ilanngullugit ukiumut 1,5 mio. koruuninut missiliorneqarput.

3.3 Inuttut ikiorserneqarnej aamma isumassorneqarnej

Inatsisissatut siunnersuummut tunngaviumik siunertaasut ilaat aamma tassaavoq, inuit innarluutillit nammineq angerlarsimaffimminniiginnarsinnaasut, tamatumunnga periarfissaqarnissaasa qulakkeerneqarnissaa. Nammineq angerlarsimaffimmiiginnarnissamut periarfissat pitsaanerulernerat, inuit innarluutillit amerlanerusut pitsaanerusumik inuuneqalernerannik peqatigisaanillu kommunit isumalluutinik pitsaanerujussuarmik atorluaasinnaalernerannik malitseqassaaq, tassami paaqqinniffinni inissiisarnarit annertoorujussuarmik aningaasartuuteqarfiusartut, paaqqutarisariaqarnerpaanut isumassorneqartariaqarnerpaanullu annertunerusumik inniminnerneqartalissapput. Taamaattumik kommunip inunnut inersimasunut innarluutilinnut nammineq angerlarsimaffimmini nerisassanik sullinneqarnissamik neqerooruteqarnissaa pillugu aalajangersagaq, inatsisissatut siunnersuummi atuutsinneqalerpoq. Aaqqissuussineq pingaartumik nammineq akiliuteqarnermit aningaasalersorneqassasoq naatsorsuutigineqarpoq. Taamaattoq kommunit aaqqissuussinermut aningaasartuuteqarnerulissasut naatsorsuutigineqartariaqarpoq, tassami nammineq akiliutip nerisassanik sullissinermut tunisassiornermut aningaasartuutiviusut matussusersinnaassanngimmagit. Inuit inersimasut innarluutillit angerlarsimaffimmini najugaqartut katillugit 1.000 -ingajaalluinnaapput, taakkunanga affaasa missaat nerisassanik sullissinermut aaqqissuussinermik pisariaqartitsisinnaassasut missiliorneqarluni. Nerinermut ataasimut ilanngaaseereerluni aningaasartuutit, nammineq akiliutissaq ilanngaatigereerlugu, ullormut 30 kr. missaanniissasut missiliorneqarpoq, ataatsimut katillugu aningaasartuutit naleqassallutik $30 \times 500 \times 365 = 5.475.000$ kr.

3.4 Ingiaqateqarnej

Inatsisissatut siunnersuummi assersuutigalugu pisiniarnermut il.il. atatillugu qaammammut nalunaaquttap akunnerini 15-ini ingiaqateqarsinnaatitaaneq erseqqissarneqarpoq. Ingiaqateqarnissamik pisariaqartitsineq maannamut tapersersortimut nalunaaquttap akunneri, innarluutilinnut taakkununga tunniunneqartartut, atorlugit naammassineqartarpoq. Tassa imaappoq, tapersersortimut atorneqartut aamma ingiaqateqarnermut atorneqartut agguarneqaannassapput, taamaattumik siunnersuut aningaasartuuteqarnerulernermik malitseqassanngilaq. Aalajangersagaq annertusititsinermik malitseqassaaq, taamaalilluni inuit innarluutillit, utoqqalinersiuteqalernissamut ukiussarititaasunik ukioqalersimasut, ingiaqateqartarnej pillugu aalajangersakkami maannakkut aamma pineqartunut ilaalerluni.

Kisiannili utoqqalinersiutillit innarluuteqartut ullumikkut inuit innarluutillit utoqqalinersiuteqanngitsut assigalugit ikiorserneqarsinnaatitaapput, utoqqalinersiaqarneq pillugu Inatsisartut inatsisaanni §16 naapertorlugu, ilanngullugit tapersersortit, ingiaqateqartarneq il.il.

Ataatsimut isigalugu aalajangersagaq taamaalilluni kommunit aningaasartuuteqarnerulersitsissanngilaq.

3.5 Oqilisaassineq

Inatsisissatut siunnersuummi kommunit oqilisaassinnermut inissanik neqerooruteqarnissamut pisussaaffilerneqarput. Aalajangersakkami siunertaavoq, inuup innarluutillip sapinngisamik sivisunerpaamik nammineq angerlarsimaffimmiinnarnissamut periarfissaqarnissaata qulakkeerneqarnissaa. Oqilisaassinnermut inissat taamaalillutik sapinngisamik inuit innarluutillit ikinnerpaat ulloq unnuarlu paaqqinniffimmi neqeroorummi inuunertik tamaat inissinneqartarnissaannut ikiuutaassaaq. Taamaalilluni siunnerfigineqarpoq ulloq unnuarlu paaqqinniffiit oqilisaassinnermut inissanik neqerooruteqartarnermut naleqqussartinneqassasut. Qanittumi naatsorsuutigineqartariaqarpoq kommunit oqilisaassinnermut inissanut aningaasartuuteqarnerulissasut, tassami kommunit maannamut oqilisaassivissanik neqerooruteqarnissamut tunuarsimaarpallaarsimapput, ulloq unnuarlu neqeroorummi inuuneq tamaat inissiinerit ikilisinneqarneranni inunnut innarluutilinnut pitsaanagerusumik isumalluutunik atuinissaq annertuumik anguneqarsinnaassalluni. Naatsorsuutigineqarpoq inuit innarluutillit 200-t ullut unnuallu 3, ukiup sisamararterutaata ingerlanerani oqilisaassinnermik pisariaqartitsissasut. Ilaqutariinni oqilisaassisartuni inisseqqarnermut akigititaq ulloq unnuarlu 1.000 kr.-qarpoq, namminersorlutik ingerlasuni ulloq unnuarlu neqerooruteqartuni, ulloq unnuarlu akigititaq 3.200 kr.-qarpoq. Namminersorlutik oqartussat ulloq unnuarlu neqeroorutaanni agguaqatigiisillugu akigititaq 3.200 kr.-qarpoq. Naatsorsuutigineqarpoq inuit innarluutillit 200-t affaat ilaqutariinni oqilisaassiffiusuni inissinneqarnissaminnut neqeroorfigineqarsinnaasut, naatsorsoraanni ukiumut 1.244.000 kr.-nik aningaasartuuteqarneruffiusussamik. Naatsorsuutigineqarpoq inuit innarluutillit affaat namminersortuni imaluunniit namminersorlutik oqartussat ingerlataanni neqeroorfigineqassasut, ukiumut 3.840.000 kr.-nik aningaasartuuteqarneruffiusussamik. Aningaasartuutissat ataatsimut 5.084.000 kr.-nik aningaasartuuteqarneruffiussapput.

3.6 Suliffissanik sammisassanillu neqerooruteqartarneq

Kommunit inunnut innarluutilinnut, nalinginnaasumik suliffeqarfeqarfimmi suliffeqalersinnaanngitsunut, naleqquttumik annertussusilimmik illersugaasumik suliffissaqartitsinissamik neqerooruteqarnissamik pisussaaffilerneqarput. Siusinaartumik pensionisianik iluarsaaqqinnermi kommunit innuttaasunut siusinaartumik pensionisialinnut sulisinnaassuseqartunut, taakkua suliffeqarnermi nalinginnaasumi suliffissarsinnaasi-manngippata, eqaatsumik suliffeqarnissamik neqerooruteqarnissamut pisussaaffilerneqarput, ilanngullugit oqitsumik suliffeqarnissaq aammalu iluaqutaasumik suliffeqarnissaq. Tassunga aningaasanut inatsimmi aningaasassanik immikkoortitsisoqarpoq. Innuttaasut innarluutillit amerlasuut aqqissuussinermi tassani pineqartunut ilaalissapput.

Tamatuma saniatigut inuit innarluutillit ilai sulisinnaassuseqanngillat imaluunniit annikitsuaraannarmik sulisinnaassuseqarlutik, taamaattoq sammisassanut neqeroorutit imaluunniit annikinnerusumik suliaqarnissamut neqeroorutit, ulluinnarni pisariaqartinneqartunik nalinginnaasunik pikkorissuseqartiinnarnissaannut, nuannaarutigisinnaassallugit. Sammissaqaqannginneq tamatumanilu inuunerup pitsaassuseqarunnaarnera aammalu nalinginnaalluinnartunik pikkorissuseerukkiartorneq, inuup innarluutillip paaqutarineqartariaqarneranik annertusiartortitsisarpoq. Taamaattumik sammisassanut neqeroorutit, ilanngullugit aamma iluaqutissatut suliffiit annikitsut, pitsaaliuilluni suliniutaapput, isumassuinermi nammagassanik kommunit isumagisarissallugit pisussaaffigisaannik annikillisitsisinnaasut. Tamanna pissutigalugu kommunit inunnut innarluutilinnut ulluinnarni nalinginnaasunik piginnaasaqarunnaannnginnissamut pitsaaliuilluni suliniutitut pilersitsisimapput. Taamaattoq naliliisoqarpoq suliniuteqarneq nukittorsarneqarsinnaasoq, taamaalilluni kommunit aningaasartuuteqarnerulernerannik malitseqartumik paaqutarisariaqarneq aammalu isumassorneqartariaqarneq inuit innarluutillit akornanni annertusitinneqassanani. Suliniuteqarnerup nukittorsarneqarnerani kommunit aningaasaqarnikkut iluanaarutissaat, aningaasaqarnikkut sunniutaasussani ilanngunneqanngillat, tassami sammisassaqaqtitsinermik suliffissaqaqtitsinermillu neqerooruteqarnissap kommunimit aallunneqarnera taakkununnga apeqqutaasussaammat.

Ulloq unnuarlu neqeroorutit arlallit neqeroorummut atasumik illersugaasumik suliffissaqaqtitsinissamik aamma sammisassaqaqtitsinissamik neqerooruteqarput. Kommunit aamma sannavinni assigisaannilu inunnut innarluutilinnut annertuumik suliffissaqaqtitsisarput sammisassaqaqtitsisarlutillu.

Pisussaaffeqarneq, sumiiffiit ilaanni neqeroorutinik pilersitsinissap suliaqarnermi ajornarsinnaanera aammalu aningaasaqarnikkut naleqqutinngissinnaanera, eqqarsaatigalugu ingerlanneqassaaq.

Tamatuma saniatigut kommunit sammisassanik ataatsimoortarfissanillu pilersitsisinnaanerannut periarfissaq atuutsinneqalerpoq, ilanngullugit ulluunerani sullissiviit aamma sannaviit illersugaasut. Kommunit oqaatigineqareersutut ullumikkut sannavinnik illersugaasuik allanillu neqeroorutinik peqareerput. Taamaattumik suliassaqaqarfimmi tassani annertuunik aningaasartuuteqarnerulertoqassasoq naatsorsuutigineqanngilaq.

3.7 Nuunnissamut ikiorsiissutit

Kommune meeqqamut innarluutilimmut angajoqqaatut akisussaasunut kommunip iluani najugaqarfiup nuunneqarneranut aningaasartuutitut matussutissanik aningaasatigut tapersiinnissamut, inatsisissatut siunnersuummi inatsimmi tunngavissaqalersinneqarpoq. Aalajangersagaq kommunimut pisussaaffiliinngilaq, kisianni tamanna pisariaqartoq naliliisoqarpat, periarfissaalluni.

Aalajangersagaq pisuni ikittuinnarni atorreqassasoq naatsorsuutigineqarpoq, taamaattumillu kommunit aningaasartuuteqarnerunissaa ataatsimut katillugu 0,5 mio. koruuninik annertussuseqassasoq missiliorneqarpoq.

3.8 Najugaqatigiiffiit aamma ulloq unnuarlu neqeroorutit siunissami Isumaginninnermut Aqutsisoqarfimmit akuerineqartassapput aammalu Naalakkersuisut ulloq unnuarlu neqeroorutinut suliaasaqarfiup ineriartortinneqarnissaanut periusissamik ukiut sisamakkaarlugit suliaqartassapput.

Isumaginninnermut Aqutsisoqarfik inatsisissatut siunnersuummi najugaqatigiiffinnik aamma ulloq unnuarlu neqeroorutinik akuersissuteqartarnissamik pisussaaffilerneqarpoq, aammalu tamatumunnga malittarisassat immikkoortut suliarineqassapput, pitsaassusissanut malitassanut aammalu aningaasaqarnermut tunngasunut, tunngatillugu. Peqatigisaanik Isumaginninnermut Aqutsisoqarfiup najugaqatigiiffiit taamatullu ulloq unnuarlu neqeroorutit sulinerat ingerlaavartumik malinnaaffigissavaa. Tamanna namminersortunut taamatullu kommunimit aamma Namminersorlutik Oqartussanit pigineqartunut atuuppoq. Tamanna periusissanik suliaqarnermut ilanngullugu ukiumut piffissaq tamaat sulisussanik marlunnik isumalluutinik pisariaqartitsinerup annertunerulerneranik malitseqassasoq missiliorneqarpoq, aningaasartuutaanerusussat 1,0 mio. koruuninik annertussuseqassallutik.

3.9 Illersorti

Inuit innarluutillippassuit piginnaasakillisismanerat ima annertutigisarpoq, sutigulluunniit nammineq soqutigisaminnik isumaginnissinnaanatik, taamaattumillu aamma kommunimit attaveqarnissartik isumagisinnaanagu. Peqatigisaanik amerlasuut ilaqutaqanngillat imaluunniit nukissakitsunik ilaqutaqarsinnaallutik. Inuit taakkua – minnerunngitsumik inatsisitigut isumannaatsuunissaat eqqarsaatigalugu – illersortimik pisariaqartitsippat, kommunip oqaloqatigineranik, naammagittaalliummik suliaqarnermik il.il. ikiuussinnaasumik. Taamaattumik kommunit illersortinut aaqqissuussamik, illersortinik arlaannaannulluunniit attuumassuteqanngitsunik inuttaqartumik, pilersitsinissamut pisussaaffilerneqarput.

Missiliorneqarpoq inuit innarluutillit 1.400-nik amerlassuseqartut affaasa missaat illersorteqarnissamik pisariaqartitsissasut, affai illersortitut atorreqarsinnaasunik ilaqutaqartut imaluunniit ilisarimasaqartut naatsorsuutigineqarluni.

Illersortit inummut innarluutilimmut ataatsimut ukiumut 5.000 koruuninik missiliukkamik aningaasarsiaqartinneqartussaassapput, aningaasartuutaanerusussat ataatsimut katillugit 3,5 mio. koruuninik annertussuseqassallutik. Tassunga ilanngutissapput pilersitsinerup nalaani ilinniartitaanermut ataasiartumik aningaasartuutit 1 mio. koruuniusut kiisalu ukiuni tulliini ilinniartitaanermut ingerlaavartumik aningaasartuutit ukiumut 0,5 mio. koruuniusut.

Illersortitut suliaqarneq assersuutigalugu meeqqat atuarfianni ilinniartitsisunit, politiinit, palasinit, innarluutillit kattuffiinit aallartitanit il.il. isumagineqarsinnaassaaq.

3.10 Nalinginnaasumik allaffissornikkut sunniutaasussat

Kommunit siunnersuinissamut ilitersuinissamullu pisussaaffeqarnerat inatsisissatut siunnersuummi erseqqissarneqarpoq, peqatigisaanillu kommunit qanigisaasunut siunnersuinissamik ilitersuinissamillu pisussaaffeqarnerat nutaatut atuutsinneqalerluni. Tamatuma saniatigut ataasiakkaat aammalu qanigisaasut ulluinnarni iliuuseqarsinnaalernissaat siunertaralugu, pikkorissaanernik atuartitsinernillu neqerooruteqarnissamut kommunit pisussaaffilerneqarput. Siunnersuutip atuutilernerani sulisunik amerlanerusunik isumalluutissaqalernissaq pisariaqartussaavoq.

Kommunalbestyrelsip, innuttaasoq annertuumik innarluuteqarnera aalajangerneqarluni, pineqartunut ilaalernissamut nalilersuineramik suliaqartussaalluni, maleruagassat atuuttut parlattuanik, innuttaasoq siunnerfigineqartunut nassuiaassutip iluaniittumik innarluuteqarnera suliatigut nalilersuisoqartarnissaa, inatsisissatut siunnersuummi siunnerfigineqarpoq.

Tapersiinissaq, immikkut ittumik tapersiinissaq, ulloq unnuarlu neqeroorummiinnissaq kiisalu tapersiinerup allangortinneqarnissaa aamma unitsinneqarnissaa pillugit aalajangiinermut atatillugu, inuk innarluutilik minnerpaamik ataasarluni oqaloqatigineqassasoq, inatsisissatut siunnersuummi kommunit pisussaaffilerneqarput. Sullitaq taamaalilluni annertunerusumik sullitap pisariaqartitaasa nalilersorneqarneranni, siusinnerusukkut pisartunit annertunerusumik, akuutinneqartussaavoq. Tamatumani allaffissornikkut isumalluutit annertunerulernissaat pisariaqartoq, naliliisoqarpoq.

Inuit innarluutillit annertunerusumik annertuumillu qulaajaavigineqarnissaannut kommunit inatsisissatut siunnersuummi pisussaaffilerneqarput. Qulaajaaneq nutaatut iliuusissatut pilersaarummik kinguneqassaaq.

Kommune taamaalilluni inunnut innarluutilinnut immikkut ittunik iliuuseqarnissaaq pillugu aalajangiinermut atatillugu qulaajaanermik suliaqartassaaq, ilanngullugit inuup siviisuumik timikkut, tarnikkut, eqqarsartaatsikkut imaluunniit malussarisutsikkut piginnaanikillismaneranut nassuiaaneq, inuup innarluutillip imaluunniit pineqartumik angajoqqaatut sinniisup imaluunniit angajoqqaatut akisussaasut oqaloqatigineqarneri. Inuk innarluutilik maannakkut innarluutilinnut peqqussummi atuuttumi, qulaajaanermik aammalu iliuusissatut pilersaarummik suliaqarnissaaq pillugu piumasaqaatinik imaqqangitsumi, pineqartunut ilaassanersoq kommunip nalilersuisarneranut, aalajangersagaq taartaassaaq.

Pisussaaffiit annertunerusut ataatsimut katillugit kingunerisaannik allaffissornikkut aningaasartuutaanerussat annertujaassapput. Taamaattoq allaffissornikkut suliakkersuutaanerulersussat eqqortumik nalilersoruminaapput. Missiliorneqarpoq kommunit ukiumut ulloq tamaat sulisut 8-t missaannik naleqartumik imaluunniit 4 mio. kr. missaannik aningaasartuuteqarnerulerfiusumik, allaffissornikkut suliakkersorneqarnerulissasut.

3.10.1 Sulianik suliarinninnermi piffissaq atorpeqartoq

Kommunalbestyrelse inatsisissatut siunnersuutip atuutilernerani suliassanik suliarinninnermut piffissanut atorpeqartunut killissaliussanik aalajangersaanissamat inatsimmi pisussaaffeqalissapput. Siunnersuummut siunertaavoq piffissap suliassanik suliarinninnermut atorpeqartartup sivikinnerulersinnissaa. Kommunit tamarmik suliassanik suliarinninnermut piffissaliussanik aalajangersaasalerpata, tamanna kommunimi allaffissornikkut sulisunik pisariaqartitsinerup annertusinissaa pisariaqassaaq. Suliassanik suliarinninnermut sulisut amerlisinnissaannik pisariaqartitsineq kommunimit kommunimut nikerassaaq, ilaatigut inuit innarluutillit amerlassusaat assigiinngimmata, ilaatigut inuit innarluutillit amerlassusaannut sanilliullugu maannakkut sulisoqarneq assigiinngitsuummat.

3.10.2 Innarluutilinnut siunnersuisoqatigiit, innarluutilinnut politikki aamma pitsaassusissanut malitassat

Kommunit tamarmik innarluutilinnut siunnersuisoqatigiinnik pilersitsereerput imaluunniit pilersitsileruttortulik aammalu kommunit tamarmik innarluutilinnut politikkeqarput imaluunniit suliaqaleruttortulik. Taamaattumik suliassa qarfinni taakkunani kommunit aningaasartuuteqarnerunissamik pisussaaffilerneqanngillat. Kisiannili kommune ataasiinnaq innarluutilinnut suliassa qarfinni sullissinernut tamanut pitsaassusissanut malitassanik inerisaasimavoq. Kommunit pitsaassusissanut malitassanik taamaattunik siunissami inerisaanissamat pisussaaffilerneqarput, tamatumalu kingunerisaanik kommuninit sisamaasunit pingasut allaffissornikkut suliakkorsorneqarnerulissapput. Missiliorneqarpoq siunnersuutip malitsigisaanik ukiumut tamakkiisumik sulisunut 3-nut naapertuuttumik allaffissornikkut suliakkorsorneqassasut aammalu 1,5 mio. koruuninik aningaasartuuteqarnerulissasut.

Pitsaassusissanut malitassat, Isumaginninnermut Aqutsisoqarfik suleqatigalugit inerisarneqartussaassasut naatsorsuutigineqarpoq, taanna taamaalilluni suliassa qarfinni siunnersortimik ikiuunnissamat sulisoqassalluni. Ukiumut tamakkiisumik sulisut ataatsimik ilaneqarnissaat pisariaqartinneqassasooq, 0,5 mio. koruuninik aningaasartuuteqarnerulernermik naleqartumik, missiliuisoqarpoq.

Aningaasartuutaanerusussat mio. kr.	2019	2020	2021	2022
Nuna tamakkerlugu inunnik innarluutilinnik sullissivik	1,5	1,5	1,5	1,5
Inuttut ikiorteqarneq aamma isumassuineq – nerisassanik sullissineq	5,5	5,5	5,5	5,5
Oqilisaassivimmiinneq	5,1	5,1	5,1	5,1

Nuunnermut ikiorsiineq	0,5	0,5	0,5	0,5
Akuersissuteqarnerit aamma periusissaq aammalu ineriartortitsinermik suliaqarneq	1,0	1,0	1,0	1,0
Illersortaasooq	4,5	4,0	4,0	4,0
Allaffissornikkut kingunerisassat nalinginnaasumik	4,0	4,0	4,0	4,0
Innarluutilinnut siunnersuisoqatigiit, innarluutilinnut politikkit aamma pitsaassusissanut malitassat	2,0	2,0	2,0	2,0
Allaffissornerup atuutilernerani aningaasartuuteqarneruneq	1,0	2,0	1,0	
Katillugit	25,1	25,6	24,6	23,6

4. Inuussutissarsiortunut aningaasaqarnikkut allaffissornikkullu sunniutaasussat

Siunnersuut inuussutissarsiortunut aningaasaqarnikkut imaluunniit allaffissornikkut kinguneqassanngilaq.

5. Avatangiisinut, pinngortitamut inuillu peqqissusaannut sunniutaasussat

Siunnersuut avatangiisinut pinngortitamullu sunniuteqassanngilaq.

Siunnersuutip kingunerisaanik inuit innarluutillit taakkualu qanigisaat atugarissaarnerulissapput. Tamanna inuit peqqissusaannut iluaqutaassaaq.

6. Innuttaasunut kingunerisassat

Siunnersuutip malitsigisaanik inuit innarluutillit pisinnaatitaaffii pitsaanerulersinneqassapput.

Siunnersuummi aalajangersakkat atorlugit siunertaavoq inuit innarluutillit tamarmik, meeqqat taamatullu inersimasut, nammineq isumalluutiminnik sapinngisamik pitsaanerpaamik atuinissamut periarfissaqarlutik, pitsaasumik toqqissisimasumillu inuunerminni atugaqarnissaat. Tamanna aqqutigalugu meeqqat innarluutilli pitsaasumik meeqqat atuarfianni atuarnissamut aamma ilinniartitaanermut periarfissaqassapput, taamaalilluni inersimasunngorunik ulluinnarni pitsaasumik inuuneqarnissamut kiisalu immaqa sulilernissamut, pitsaanerpaanik periarfissaqassallutik.

Inatsisartut inatsisaanni, inunnut innarluutilinnut suna pitsaanerunersoq, kiisalu akimmiffiit inuit innarluutillit sapinngisamik akimmiffigisinnaasaasa akimmiffigiunnaarnissaannut inuiaqatigiit pisussaaffeqarnerat ukkatarineqarpoq, taamaalillutillu inuiaqatigiinni sapinngisamik tamakkiisumik peqataallutillu ilaatinneqalerniassammata.

7. Kingunerisassat annertuut allat

Siunnersuut allanik annertuunik kinguneqassanngilaq.

8. Oqartussanut kattuffinnullu il.il. tusarniaaneq

Siunnersuut piffissami 19. juni 2017 – 22. august 2017 tusarniaassutigineqarpoq. Tamatuma saniatigut siunnersuut piffissami tassani tusarniaanermut nittartakkami tamanut saqqummersinneqarpoq.

Tusarniaanermut akissuteqaatit tiguneqartut suliarineqarnerat ilanngussaq 1-imi ittoq takuuk. Tusarniaanermut akissuteqaatit inatsisissatut siunnersuummut oqaaseqaatitaqartut, oqaasertaat tamakkiisuutillugit naqinneqarput aammalu siunnersuummut ilanngussaq 1-imi attuumassuteqarnera malillugu oqaaseqarfigineqarlutik. Tusarniaanermut akissuteqaatinut oqaaseqaatit uingasumik allassimapput.

Siunnersuummi aalajangersakkanut ataasiakkaanut nassuiaatit

§ 1-imut

Inatsisartut inatsisaata siunertaata pingaernerup siunertaasalu allanneqarnissaat, aalajangersakkami siunnersuutigineqarpoq.

Siunertaasooq siulleq tassaavoq, inuup innarluuteqarnerup malitsigisaanik ajornartorsiutit ikiorsiiviginiarlugit siunnersuineramik tapersersuinermillu neqerooruteqarnissaq. Oqaatsillu imarisaata siamasinnerusumik paasineqarnissaa.

Siunertaasup aappaa tassaavoq, ataasiakkaat nammineernissamut periarfissaasa imaluunniit ulluinnarni inuunerata oqinnerulersinnissaa aammalu inuunermit atugaasa pitsanngorsarnissaasa siuarsarneqarnissaat. Inatsisartut inatsisaat malillugu tapersiineq taamaalilluni, ikiorserneqartup nammineq isumalluutiminik atuisinnaanissaanut, iluaqutaassaaq, pineqartoq nammineersinnaatinneqarpat pitsaanerussalluni. Kisianni innuttaasut ilaannut tamanna piviusorsioruunngilaq. Taamaattumik erseqqissumik oqaatigineqarpoq, ilaannut Inatsisartut inatsisaat malillugu tapersiinermit siunertaasooq pingaerneq tassaassasoq, ulluinnarni atugaannik oqinnerulersitsinissaa aammalu inuunerissaarnissaannik pitsaanerulersitsinissaa.

Siunertaasooq pingajuat tassaavoq, ataasiakkaanut tamanna ajornanngippat, ataasiakkaat ineriartornissamut aammalu nammineerlutik periarfissaqarfimminnik atorluanaanissaasa siuarsarneqarnissaat. Inunnut annertuumik tarnikkut piginnaanikillisisamasunut, assersuutigalugu tarnikkut piginnaanikitsunut, Inatsisartut inatsisaat malillugu tapersiinerup ilaannut siunertaavoq, pineqartut nammineq pikkoriffimmini pikkorinnerulernissaat aammalu ulluinnarni nammineersinnaanissamut periarfissaqarnerulernissaat siunertaralugu tinnersarneqarnissaat, assersuutigalugu inuttut eqqiluitsuunissamut, nerinermit sungiusarnissamut aammalu atisalersornermut ikiorneqarnissamut pisiniarnissamut il.il. tapersiisarneq ikiorsiisarnerlu. Inuit sakkortuumik timimikkut innarluutillit eqqarsaatigalugit, tamanna eqqarsaatigalugu tapersiinermit siunertaavoq, ilaatigut inuup isumassorneqarnerata kiisalu pineqartup timikkut pikkoriffiisa attatiinnarneqarnissaat pitsaanerulersinnissaallu siunertaralugu sungiusarneqarneratalu qulakkeerneqarnissaa, ilaatigullu inuup inuttut ineriartornissamut aammalu inuttut pisinnaasaminik atuinissamut periarfissaasa uummarissarneqarnissaat, assersuutigalugu atortut ikiuutaasussat atorlugit aammalu ilinniarnermik naammassinninnissamut imaluunniit suliffeqalernissamut aammalu suliffeqarnerminik attassiinnarnissamut tapersersorneqarnissaa.

Siunertaasut sisamaat tassaavoq, inuit innarluutillit inuiaqatigiinni naligiimmik periarfissaqarnissaat kiisalu innarluuteqarneq pissutigalugu assigiinngisitsineramik pineqarsinnaanerup akerlilerneqarnissaa, tassuuna sapinngisamik tamatigut sunniuteqarluartumillu inuiaqatigiinni peqataatinneqarnissaat ilanngunneqarnissaallu qulakkiissallugu. Inatsisartut inatsisaat malillugu tapersiinermit taamaalilluni ilaatigut inuup

innarluutillip sapinngisamik ulluinnarni suliassat nalinginnaasut suliarisinnaanissaannut periarfissaqarnissaa aammalu inuiaqatigiinni sammisani nalinginnaasuni peqataanissaa, qulakkeerneqassaaq. Aalajangersagaq taamaalilluni aamma Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaanni inuit innarluutillit kulturikkut pisuni, sukisaarsaarnermut neqeroorutini, sunngiffimmi sammisani timersornermilu allat assigalugit peqataanissamut pisinnaatitaanerisa akuersaarnissaa pillugu artikel 30-mut ataqatigiissillugu isigineqassaaq. Pingaartumik, kisiannili taakkuinnaanngitsut, atortut ikiuutaasussat pillugit tapersiissutissatut periarfissat, ingiaqateqarneq aamma tapersersorteqarneq siunnersuutigineqartut, tassunga atatillugu pingaaruteqarput.

Kiisalu Inatsisartut inatsisaat malillugu tapersiinermi, ataasiakkaat suliffissaqartinneqarnissamut periarfissaasa siuarsarneqarnissaat siunertaavoq. Eqqarsaatigisassaaq taanna, tapersiisoqassanersoq, tapersiineq sorleq ikiorsiissutigineqassanersoq, aammalu tapersiineq qanoq aaqqissuunneqassanersoq aalajangiinermi pingaartinneqassaaq. Siunertaasoq taanna, assersuutigalugu atortut ikiuutaasussat suut tapersiivigineqassanersut, sunniuteqarsinnaavoq. Aammattaaq ilaatigut innuttaasup suliffeqalernissaa aammalu suliffeqaannarnissaa siunertaralugu, oqartussaasoq tamakkiisumik isiginnittumik, ataqatigiissumik ataqatigiissaagaa-sumillu innuttaasumut suliniuteqarnissamut pisussaaffeqartoq, isiginiassallugu pingaaruteqarpoq. Tassunga atatillugu oqartussaasup inatsisinut allanut ataqatigiissaarinissamik qulakkeerinissaa naleqqussinnaassaaq, taamaalilluni Inatsisartut inatsisaat manna malillugu tapersiineq, siuarsaanissaaq pillugu siunertaasumut sunniuteqarluarnerpaamik iluaqutaasinnaassalluni. Aalajangersakkap tassunga tunngasortaa aamma, Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaanni inuit innarluutillit suliffeqarnissamut suliffissaqartinneqarnissamullu pisinnaatitaaffeqarnerisa akuersaarneqarnera pillugu artikel 27 eqqarsaatigalugu isiginiarneqassaaq inuunerup ingerlannissaanut aningaasarsiorsinnaatitaaneq, artikelimi pineqarpoq. Inatsisartut inatsisaat manna malillugu tapersiineq, assersuutigalugu inummut innarluutilimmut suliffeqarnermi ikiuutaasinnaasunut atortunut ikiuutaasussanut tapersiineq imaluunniit qamutininut motorilinnut tapersiineq, taamaalilluni inuk angerlarsimaffimmi suliffimmilu akornanni ingerlasinnaanissamut periarfissaqalerluni, tamanna Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaanni artikel 27 malillugu pisinnaatitaaffeqarnerup piviusunngortinneqarnissaanut iluaqutaasinnaavoq.

§ 2-mut

§ 2-mi aalajangersakkat siunnersuutigineqartut Inatsisartut inatsisaannut tunngaviusumik ataatsimoortumik killissaliipput. Oqartussaasut tamarmik Inatsisartut inatsisaanni aalajangiisinnaatitaaffilerneqartut, killissaliussamut tassunga naapertuuttumik allaffissornikkut aqutsissapput. Tamatuma ilaatigut kingunerisaanik, oqartussaasut, ilanngullugit kommunit aamma Naalakkersuisut, inuit innarluutillit inuttut pisinnaatitaaffiisa aammalu tunngaviusumik kiffaanngissuseqarnermut pisinnaatitaaffiisa illersorneqarnissaat piviusunngortinneqarnissaallu pillugit Inatsisartut inatsisaanni siunertaasumut

naapertuuttumik aalajangiisassapput. Kisianni tamatuma aamma kingunerisaanik, oqartussaasut allatigut sulinerminni, ilanngullugit Inatsisartut inatsisaat malillugu tapersiinerup suliaqarnermi, Inatsisartut inatsisaata suliarineranit suliaqartunik atuartitsinerup aamma pikkorissaanerit aaqquissuunneqarneranni, aammalu isumaginninnermut suliaasaqarfimmi ineriartortitsinissamik pilersaarusiordermi, inuit innarluutillit inuttut pisinnaatitaaffii aammalu tunngaviusumik kiffaanngissuseqarnermut pisinnaatitaaffii aallaavigissavaat ataqquissallugillu.

Imm. 1-imut.

Inuk innarluutilik inuit pisinnaatitaaffii aammalu tunngaviusumik kiffaanngissuseqarnermut pisinnaatitaaffiisa tamarmik allatuulli atorsinnaanissaannut tamakkiisumik pisinnaatitaaffeqartoq, aammalu Inatsisartut inatsisaat manna tamatuma piviusunngortinneqarnissaanut iluaqutaassasoq, *imm. 1*-imi aalajangersakkami aalajangersarneqassasoq siunnersuutigineqarpoq. Aalajangersakkami Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaanni artikel 1-imi siunertanut isiginnittaaseq, aallaavigineqarpoq. Inatsisartut inatsisaanni isumaginninnermut suliaasaqarfiup iluani, kisianni aamma suliaasaqarfinni allani, Inatsisartut inatsisaat manna malillugu tapersiisarnikkut, inuit innarluutillit inuttut pisinnaatitaaffiisa piviusunngortinneqarnissaat kissaatigineqarpoq. Taamaattoq tassunga atatillugu oqaatigineqassaaq, aalajangersakkami qanitamilluni aalajangiinissamut tunngaviusoq imaluunniit suliaasaqarfimmut akisussaasuuneq pillugu tunngaviusoq allannngortinneqanngimmata.

Aalajangersagaq Inatsisartut inatsisaat malillugu tapersiinissaq pillugu aalajangiinnermut aammalu tapersiinerup piviusunngortinneqarneranut atatillugu taannaanaq isigalugu, aammalu isumaginninnermut suliaasaqarfimmi oqartussaasut allatigut sulinerannut atatillugu atitunerusumik isigalugu, pingaaruteqarpoq. Inatsisartut inatsisaat malillugu inunnut innarluutilinnut tapersiinermi pisariaqartitsinerit pingaaruteqartut ikiorsernissaat siunertaa-simasinnaavoq, assersuutigalugu inuttut eqqiluisaarnissap qulakkeerneqarnissaa, imaluunniit inuup innarluutillip nerisarnissaa. Taamaattunut tunngatillugu pingaaruteqarpoq kommune pisariaqartitsinernut pingaaruteqartunut taamaattunut tapersiinissaq pillugu aalajangiisoq, aammalu sulisut tapersiissummik ikiuuttut, inuup inuttut pisinnaatitaaffiisa taamaattut aallutissagaat. Tamanna ilaatigut tapersiineq qanoq ittoq aalajangiiffigineqassanersoq, aammalu tapersiineq qanoq tunniunneqassanersoq, inuup akuutinneqarneratigut ersersinneqarsinnaavoq. Tamatuma saniatigut siunertanut aalajangersakkami, tapersiinermi inuup pisariaqartitai pingaaruteqartuunnaangitsut, kisianni aamma tapersiinermi assersuutigalugu inuup inuiaqatigiinni peqataanissamut pisinnaatitaaffeqarnerata qulakkeerneqarnissaa, ilanngullugulu politikkimut tunngasutigut, qulakkeerneqassasoq, oqartussaasunut pissaaffiliisoqarpoq. Oqartussaasut atitunerusumik isigalugit isumaginninnermut suliaasaqarfimmi sulinerannut tunngatillugu, aalajangersakkami siunnersuutigineqartumi innuttaasut pisinnaatitaaffiisa sunut tamanut tunngasuni qulakkeerneqarnissaannut, oqartussaasut pissaaffilerneqarput. Kommune taamaalilluni assersuutigalugu innarluutilinnut suliaasaqarfimmi allannguutissat pillugit siunnersuutini, inuit innarluutillit

akuutinnissaannut pisussaaffeqarpoq. Tamanna assersuutigalugu, kommune allanngortitsinissamik eqqarsaateqarpat, najugaqatigiiffimmi najugaqartut akuutinnerisigut naammassineqarsinnaavoq. Pisussaaffeqarnejq ilaatigut innarluutilinnut siunnersuisoqatigiit aamma kommunit innarluutilinnut siunnersuisoqatigiit innarluutilinnut politikkimik inerisaanermi akuutinnissaannut pisussaaffeqarnerat pillugit § 85-imi aalajangersakkami siunnersuutigineqartumi oqaatigineqarpoq.

Aalajangersakkami inuit pisinnaatitaaffiinnut aamma tunngaviusumik kiffaanngissuseqarnissamut pisinnaatitaaffeqarnernut innersuussinermi, pingaartumik pisinnaatitaaffiit Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaat, ulloq 23. august 2009 Kalaallit Nunaannut atuutilersup, ataani illersugaasut, siunnerfigineqarput. Tassani immikkut pingaarutilittut taaneqarsinnaapput:

- Assigiinngisitsinnginnissaq
- Periarfissat assigiissut
- Tikikkuminassuseqartitsineq
- Angutit arnallu akornanni naligiissitsineq
- Meeqqat innarluutillit ineriartoqqinnissamut periarfissaasa ataqqineqarnerat aamma kinaassutsimik pigiinnarnissaanut pisinnaatitaafiannik ataqqinninneq
- Iluanaarniutigineqarnissamut, annersarnejqarnissamut aamma atonerlunnejqarnissamut illersugaaneq
- Timikkut tarnikkullu innarligassaannginnerup ataqqineqarnissaanik pisinnaatitaaffeqarnejq
- Nammineerluni inuuneqarsinnaatitaaneq aammalu inuiaqatigiinni akuutinnejqarsinnaatitaaneq
- Inunnut nikerarsinnaaneq
- Oqaaseqarsinnaatitaalluni isummanillu anitsisinnaatitaalluni kiffaanngissuseqarnejq
- Inuttut inuunerup ataqqineqarnissaa
- Angerlarsimaffiup aamma ilaqttat ataqqineqarnissaat
- Kulturikkut pisunut peqataasinnaatitaaneq

Taamaattoq aalajangersagaq pisinnaatitaaffinnut Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaata ataaniittunik illersuinissamuinnaq killeqanngilaq, kisianni aamma nunani tamalaani isumaqatigiissutit allat malillugit inuit pisinnaatitaaffii aamma tunngaviusumik kiffaanngissuseqarluni pisinnaatitaaffeqarnerit, Kalaallit Nunaanni atuuttut ilaatinnejqarlutik, pingaartumik, kisianni taakkuinnaanngitsut, Inuit pisinnaatitaaffii pillugit Europamiut isumaqatigiissutaat (EMRK), Inuit pisinnaatitaaffii pillugit Europamiut isumaqatigiissutaat pillugu inatsisip Kalaallit Nunaannut atuutsinneqalernissaa pillugu peqqussut nr. 814, 18. september 2001-imeersoq.

Matuma siulianiittunut nangissutigalugu Inatsisartut inatsisaat malillugu tapersiineq, inuup inuttut pisinnaatitaaffii aammalu tunngaviusumik kiffaanngissuseqarluni pisinnaatitaaffii

ataqqillugit, ikiorsiissutigineqassaaq. Aalajangersagaq Inatsisartut inatsisaat malillugu tapersiinnissaq imaluunniit immikkut ittumik tapersiinnissaq pillugit oqartussaasut aalajangiinnissaannut aammalu aalajangiinerup pinissaata tungaanut oqartussaasut suliassanik suliarinninnerannut, pingaaruteqarpoq. Oqartussaasut taamaalillutik ilaatigut inuit innarluutillit nammineq inuunertik pillugu aalajangiinerni akuutinneqarnissaat, aammalu ilaatigut inuit attaveqaatigiinnermut periarfissaasa qulakkeernerisigut, piviusumik akuutinneqarnissaat, qulakkiissavaat. Tamanna ilaatigut oqaloqateqartarnej pillugu §§ 74-imi aamma 75-imi aalajangersakkani siunnersuutigineqartuni oqaatigineqarpoq. Aalajangersagaq aamma oqartussaasut ingerlatsivimmi suliaqarnerannut pingaaruteqarpoq. Tamanna Inatsisartut inatsisaat malillugu siunnersuinerup, ilitsersuinerup, tapersiisarnerup aammalu immikkut ittumik tapersiisarnerup ingerlanneqarnerani atuutissaaq. Oqartussaasup tassani, tapersiineq il.il. inuup inuttut pisinnaatitaaffii ataqqillugit qanoq ataasiakkaatigut ikiorsiissutigineqassanersoq, aallutissavaa. Tamanna ilaatigut innuttaasup tapersiinerup aaqjissuunneqarnerani akuutinneqarnerani, aammalu tapersiinnermut atatillugu pissanermik atuinissap pisariaqalernissaata pinngitsoorniarneqarnissaa, ataasiakkaatigut ersersinneqarsinnaavoq.

Imm. 2-mut.

Tapersiineq ataasiakkaat pissusissamisoortumik ataqqinassuseqarnerat, inuttut nammineq aalajangiisinaanera, ilanngullugulu nammineq aalajangiinnissamut kiffaanngissuseqarnera, aammalu inunntut allanut attuumassuteqannginnera, ataqqillugu aammalu nukittorsarlugu ikiorsiissutigineqassasoq *imm. 2*-mi aalajangersakkami aamma siunnersuutigineqarpoq. Aalajangersakkap tassunga tunngasortaa § 2-mi aalajangersakkat siunnersuutigineqartut eqqarsaatigalugit isiginiarneqassaaq. Aalajangersagaq, § 2-mi aalajangersakkat siunnersuutigineqartut allat assigalugit oqartussaasut aalajangiinernik suliaqarnerannut, ingerlatsivimmi pissusiviusuni suliaqarnerannut kiisalu pilersaarusiormi aammalu suliassani allani nalinginnaasuni, pingaaruteqarpoq.

§ 3-mut

Imm. 1-imut.

Inuk innarluutilik ataqatigiissaagaasumik, ataqatigiissumik aamma tamakkiisumik isiginnittumik, inummut aammalu inuup inuuneranut tunngassutillit tamaasa mianerineqarlutik, tapersiiviigineqarsinnaatitaasoq *imm. 1*-imi aalajangersakkami aalajangersarneqassasoq, siunnersuutigineqarpoq.

Aalajangersakkap kingunerisaanik oqartussaasoq Inatsisartut inatsisaat malillugu aalajangiinnissamut imaluunniit siunnersuinissamut ilitsersuinissamullu piginnaatitaatinneqartoq, pisussaaffilerneqarpoq. Pisussaaffeqarnerup kingunerisaanik oqartussaasoq inuup pisariaqartitaannik, isumalluutaannik ajornartorsiutaannillu tamakkiisumik nalilersuinissamut pisussaaffeqarpoq. Tamakkiisumik nalilersuinissaq isumaqarpoq, oqartussaasoq aamma inummut innarluutilimmuinnaq tunngaassuteqanngitsunut, isummersussasoq. Taakkua assersuutigalugu tassaasinnaapput isumaginninnermi ajornartorsiutit, inuup ilinniagaqarneq

sunna ingerlanneraa imaluunniit aallartissallugu kissaatigineraa, inuup suliffissaqarnikkut inissisimanagera kiisalu periarfissai aammalu peqqissutsikkut inissisimanagera. §§ 74-imi aamma 75-imi aalajangersakkat siunnersuutigineqartut malillugit innuttaasup ataasiarluni arlaleriarluniluunniit oqaloqatigineqarnera tassunga ilaatillugu ingerlanneqassaaq. Oqartussaasup tapersiineq suna ikiorsiissutigineqassanersoq aammalu tapersiineq qanoq ikiorsiissutigineqassanersoq pillugu aalajangiinerani, oqartussaasup inuup tamakkiisumik naliliiffigineqarnera aallaavigissavaa. Tamatumunnga siunertaavoq, tapersiinerup inatsisit allat malillugit tapersiinermut ataqatigiissillugu, inuup pisariaqartitaasa sapinngisamik pitsaanerpaamik naammassiniarnissaasa qulakkeerneqarnissaa.

Pisussaaffeqarneq ilaatigut isumaqarpoq, oqartussaasooq Inatsisartut inatsisaat manna malillugu qanoq tapersiisoqassanersoq isumaliutersuuteqarnermini, inuup tapersiivigineqarnissamik pisariaqartitai, inatsisit allat malillugit naammassineqarsinnaasut, aammalu allat tapersiineq, inatsit manna aammalu inatsisit allat malillugit ikiorsiissutigineqartut, ilaatissagai. Siunertaavoq innuttaasunut ataasiakkaanut ataqatigiissumik ataqatigiissaagaasumillu suliniuteqarnerup anguneqarnissaa. Taamaattumik Inatsisartut inatsisaat manna malillugu tapersiineq, inatsisit allat malillugit suliniuteqarnermut annertunerpaamik tunngavissiissaaq. Taamaattumik oqartussaasooq, suna tapersiissutigineqassanersoq aammalu tapersiineq qanoq ikiorsiissutigineqassanersoq aalajangiinermini, tapersiineq qanoq tapersiinermut inuup inatsisit allat malillugit tigusartagaanut ataqatigiissinneqassanersoq, isummersussaaq. Ilaatigut kommunimi ingerlatsiviit assigiinngitsut akornanni aammalu oqartussaasut akornanni iluminni ataqatigiissaarinissamut oqartussaasooq tassani akisussaaffeqarpoq. Inatsisit allat malillugit tapersiinissamut periarfissat pillugit, imaluunniit oqartussaasooq sorleq inatsisit allat pillugit innuttaasumut siunnersuisinnaanersoq ilitersuisinnaanersorlu, siunnersuinissamut ilitersuinissamullu pisussaaffeqarneq aamma tassaniippoq.

Imm. 2-mut.

Tapersiinissaq pillugu aalajangiinermini innuttaasunut ataasiakkaanut innarluutilinnut suna pitsaanerpaanersoq aallaavigalugu oqartussaasooq aalajangiissasooq, *imm. 2*-mi aalajangersakkami aalajangersarneqassasooq, siunnersuutigineqarpoq. Aalajangersakkami siunertaavoq, tapersiinissaq pillugu aalajangiisoqartillugu, oqartussaasup inuup tapersiivigineqarnissamut pisariaqartitai, isumalluutai aamma ajornartorsiutai, ataasiakkaatigut aallaavigineqartassasut erseqqissarneqassaaq. Tassunga sakkussaavoq, ilaatigut § 74-imi aalajangersagaq siunnersuutigineqartoq malillugu innuttaasup oqaloqatigineqarnissaa. Aalajangersagaq aamma *imm. 1*-imi aalajangersakkamut siunnersuutigineqartumut, oqartussaasup tamakkiisumik isiginnittumik tapersiisarnissaanik pisussaaffiliisumut, ataqatigiissillugu isiginiarneqassaaq. Taamaalilluni tapersiinermini innuttaasut ataasiakkaat inissisimanagerat aallaavigineqassaaq, aammalu oqartussaasup aalajangiinermini innuttaasumut sapinngisamik pitsaanerpaamik ikiorsiisussamik tapersiisoqarnera qulakkiissavaa.

Oqartussaasup aalajangiinnermini mianerisassat piviusorsioortut allat ilaatiinnarsinnaavai. Tamanna assersuutigalugu tassaasinnaavoq, tapersiinissamut periarfissat suut innuttaasup sumiiffimmi angerlarsimaffigisaani ikiorsiissutigineqarsinnaanerisa, eqqarsaatigineqarnissaa.

Imm. 3-mut.

Aalajangersakkami siunertaavoq inunntu innarluutilinnut tunngatillugu inuup nammineq isumai, taamaattoq ukiui, inerisimassusaa aammalu silatussutsimini piginnaaneqarnera qajassuullugit aallaavigineqartassasut.

Inuk innarluutilik, inummut tunngasut pillugit aalajangiisoqarnerani, suliame paasissutissat attuumassuteqartut pillugit paasissutissinneqartassaaq. Inuk peqataaniarnersoq aammalu isummersuutiminik saqqummiussiniarnersoq nammineq kajumissutsimik pisassaaq.

4-mut

Imm. 1-imut.

Aalajangersakkami matumani *imm. 1*-imi siunnersuutigineqarpoq inuit annertuumik innarluutilit ikiorserneqartarnerat pillugu Inatsisartut peqqussutaanni § 1, imm. 3-mi tunngaviusoq ingerlatiinnarneqassasoq. Taamaalilluni siunnersuutigineqarpoq, inuup taassumalu angajoqqaatut sinniisuata imaluunniit angajoqqaatut akisussaasuisa tamanna kissaatigalugu oqaatigippagu, inuk innarluutilik sapinngisamik nammineq angerlarsimaffimminiiginnarsinnaanissamut tapersiivigineqarsinnaatitaasoq. Taamaattoq tunngavissaatinneqarpoq inuup nammineq imaluunniit allat atugarissaarnerat nammineq angerlarsimaffimmiiginnarnermi navianartorsiortinneqassanngitsut.

Inissamik allat assigalugit killilersugaanngitsumik toqqaasinnaatitaaneq, inuit innarluutilit tunngaviusumik inuttut pisinnaatitaaffigaat. Inuup tamanna kissaatigippagu, inuk innarluutilik nammineq najukkamini inuiaqatigiit akornanni angerlarsimaffimmini najugaqaannarsinnaanissaanut tapersiivigineqarnissaa annertuumik pingaartinneqarpoq. Tamanna aamma inuup assersuutigalugu ulloq unnuarlu neqeroorummut nuulluni pitsaasumik pitsaassusilimmik ikiorneqarsinnaalluni, pisoqarnerani atuutissaaq. Taamatut pisoqarnerani inuup tapersiivigineqarluni nammineq angerlarsimaffimminiiginnarnissaa pingaaruteqarpoq, pissutigalugu inuup pitsaassusilimmik paasissutissiiviusumillu tunngaveqartumik aammalu suliassanik sularinnittartuni suleqatigalugu, inuup nammineq angerlarsimaffimminiiginnarnissani kissaatigigaa, aalajangertussaammagu. Erseqqissarneqarpoq, inuup nammineq imaluunniit allat atugarissaarnerat, inuup nammineq angerlarsimaffimminiiginnarnerani, navianartorsiortinneqassanngitsoq, tunngavissarititaamat. Allat atugarissaarnerat tassaatinneqarpoq qanigisaasut, inuit inummut tapersiisut aammalu allat inuup avatangiisaanniittut, matumani sanilit il.il. ilanngullugit. Inuk Inatsisartut inatsisaat manna malillugu tapersiivigineqarluni nammineq angerlarsimaffimminiiginnarpat, inuup nammineq atugarissaarnera imaluunniit allat atugarissaarnerat navianartorsiortinneqarnerasoq, oqartussaasoq naliliisussaavoq.

Imm. 2-mut.

Imm. 2-mi aalajangersagaq siunnersuutigineqartoq nutaajuvoq aammalu *imm. 1-imi* aalajangersakkamut siunnersuutigineqartumut illuatungiliunneqassalluni. *Imm. 2-mi* aalajangersarneqarpoq, inuup pisariaqartitai naammassisinnaaniarlugit inuup innarluutillip nammineq angerlarsimaffimmini naammattumik tapersorsorneqarnissaa ajornarpat, inuk najugaqarfissatut neqeroorummi immikkut ilisimasaqarfiusumik tapersiivigineqarsinnaatitaasoq. Oqaatsimi najugaqarfissatut neqeroorummi Inatsisartut inatsisaanni kapitali 7 malillugu najugaqatigiiffiit, najugaqarfiit illersugaasut aamma ulloq unnuarlu neqeroorutit innersuussutigineqarput. Najugaqarfissatut neqeroorummi, Inatsisartut inatsisaanni tapersiinnissamut siunertaasut eqqarsaatigalugit, inuup innarluutillip immikkuullarissumik pisariaqartitsinera naammassineqassaaq. Taamaattumik inuup innarluutillip kommunip avataani najugaqarfissatut neqeroorummiinnissaa pisariaqarsinnaavoq. Aalajangersakkap aamma malitsigisaanik, inuk innarluutilik najugaqarfissatut neqeroorummi, inunnut innarluutilinnut siunnerfeqartinneqartumi, aammalu assersuutigalugu utoqqaat illuanniingitsoq, sapinngisamik neqeroorfigineqassaaq.

§ 5-imut

Aalajangersagaq inuit annertuumik innarluutillit ikiorserneqartarnerat pillugu Inatsisartut peqqussutaanni atuuttumi § 1, *imm. 2-mik* ingerlatitseqqiineruvoq. Tamatuma kingunerisaanik illutat tamanit ornigarneqartartut tamarmik sapinngisamik innarluutilinnit atoruminartunngortinneqassapput, ilanngullugu aamma inissialiortiternerni. Nutaanik illuliortiternernut tunngatillugu siunnersuutip kingunerisaanik illuliornermut maleruagassat il.il. naleqqussarneqassapput, taamaalilluni tamanit orninneqarsinnaasuni illuliornermut akuersissummik tunniussinnginnermi, illuliassaq inunnit innarluutilinnit atorneqarsinnaanngorlugu aaqqissuunneqarsinnaanersoq, isummertoqartassaaq.

Tamanna aamma assartuussissutinut tamanit atorneqartartunut atuutissaaq.

Aalajangersagaq Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaanni artikel 9-mik tunngaveqarpoq, tassani aalajangersarneqarpoq inuit innarluutillit avatangiisinut, assartuussinermi periarfissanik, paasissutissanik, attaveqaqatigiinnermik allanillu atortorissaarutinik tamanit periarfissarineqartunik atuisinnaanissaasa siuarsarnissaanut inatsisiliortoq pisussaaffeqartoq.

Tikikkuminassuseqartitsinissaq Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaanni tunngaviuvoq. Tamatuma saniatigut tikikkuminassuseqartitsineq inuiaqatigiinnik akuutitsiviusunik pilersitsinissamut pisariaqarpoq, tassani inuit innarluutillit tamakkiisumik sunniuteqarluartumillu peqataasinnaassallutik. Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaanni pisinnaatitaaffinnik amerlasoorpassuarnik atuinissamut, inuiaqatigiit tikikkuminartuunerat apeqqutaavoq.

§ 6-imut

Imm. 1-imut.

Inatsisartut inatsisaat manna malillugu meeqqamut tapersiinissaq pillugu aalajangiinerit, meeqqamut suna pitsaanerpaanersoq aallaavigalugu pisassasoq, *imm. 1*-imi aalajangersakkami aalajangersarneqassasoq, siunnersuutigineqarpoq. Meeqqamut pitsaanerpaanissaa pillugu tunngaviusumut, meeqqap pisinnaatitaaffii pillugit Naalagaaffiit Peqatigiit isumaqatigiissutaanni (Meeqqat pillugit Naalagaaffiit Peqatigiit isumaqatigiissutaa) artikel 3 aallaavigineqarpoq.

Aalajangersagaq isumaqarpoq, meeqqanut tapersiinissamut tunngatillugu suliniutini tamaginni, meeqqamut ataasiakkaamut, taassuma inuunermi inissisimanagera aalajangersimasoq aallaavigalugu, suna pitsaanerpaanersoq, eqqarsaatigineqartassasoq, ilanngullugu aamma inatsisit allat malillugit meeqqap tapersiivigineqarnissamut pisariaqartitai eqqarsaatigalugit. Aalajangersagaq taamaalilluni § 2-mi aalajangersakkamik siunnersuutigineqartumik erseqqissaaneruvoq naqissusiinerullunilu.

Oqaaseq “meeqqamut pitsaanerpaaq” piffissap ingerlanerani paasineqartarnera eqqarsaatigalugu allanngussasoq ilimanarpoq, aammalu oqaatsip atornerarneranut meeraq sorleq pineqarnersoq apeqqutaassaaq. Meeqqamut innarluutilimmut pitsaanerpaasussamik nalilersuineq, tamatigut meeqqat innarluutillit ataasiakkaat ataatsimut isigalugit atugaannik ataasiakkaatigut nalilersuinikkut tamatigut pisassaaq, ilanngullugu meeqqap nammineq isumaa aammalu isummorsornera inuussutissarsiutigalugu sulisuusut ilisimasaannut misilittakkanullu tunngavigisaannut pigineqareersunut imaluunniit assersuutigalugu meeqqanut immikkut ilisimasallit ilisimasaannik suliame pissarsiarineqarsinnaasunut, ataqatigiissillugu. Oqaaseq sukkulluunniit meeqqanut ataasiakkaanut aaqqiissutissatut eqqarsaatigineqarsinnaasunit pitsaanerpaatut paasineqassaaq.

Tunngavissat nalinginnaasut aalajangersimasut tamatigut meeqqamut pitsaanerpaajusussaapput, assersuutigalugu peroriartornermi toqqissisimanartumik isumassuisoqarnerup allanngorannginnissaannik aamma patajaatsumik pitsaasumillu inersimasunut attaveqarnissaanik qulakkeerinnineq, meeqqamut pitsaanerpaajusussaavoq. Tunngavissat allat meeqqamut pitsaanerpaasussat, meeqqap inuunermi inissisimanagera aammalu isumalluutit meeqqamut tunngassuteqartut apeqqutaallutik, allanngorarsinnaapput. Meeqqamut pitsaanerpaasusaaq aallaaviatigut tassaassaaq, angajoqqaat najorlugit angerlarsimaffimmi toqqissisimanartumik peroriartorneq. Kisianni ilaatigut meeqqap innarluuteqarnera tunngavigalugu tapersiivigineqarnissamut meeqqap pisariaqartitsinerata kingunerisinnaavaa, angerlarsimaffiup avataaniinnissaq meeqqamut pitsaanerpaajusinnaasoq. Pisumi aalajangersimasumi meeqqamut pitsaanerpaasusaaq taamaalilluni, pisuni amerlanerpaani tunngavissat arlallit apeqqutaasussaapput.

Imm. 2-mut.

Imm. 2-mi aalajangersakkami siunnersuutigineqartumi, pissutsini meeqqamut tunngassuteqartuni, meeqqap ukioqqortussusaa, piginnaasaqassusaa inerisimassusaa

apeqqutaatillugit meeqqap nammineq isumaasa eqqarsaatigineqarnissaasa erseqqissarnissaa, siunertaavoq. Maleruagassani Naalagaaffiit Peqatigiit meeqqat pillugit isumaqatigiissutaani artikel 12 aallaavigineqarpoq. Meeraq tamatumunnga ilanngullugu, pissutsit tassunga tunngasut pillugit aalajangiisoqartillugu, suliaq pillugu paasissutissat attuumassuteqartut pillugit, paasissutissinneqassaaq. Isummaminik saqqummiussinissaq kissaatiginerlugu, meeqqap nammineq aalajangertussaavaa, kisianni meeqqap isumaasa misissorneqarnissaat, suliap suliarineqarneranni oqartussat sapinngisamik anguniartassavaat. Meeqqanut innarluutilinnut tunngatillugu, oqartussaasup meeqqap attaveqaqateqariaasianik eqqumaffiginninnissaa, aammalu sapinngisamik allatut attaveqaqateqarnermi atortussanik, ilanngullugit teknologii atorlugu aaqqiissutissat, atugassiinissap anguniarnissaa, pingaartumik pingaaruteqarpoq.

§ 7-*imut*

Imm. 1-*imut*.

Aalajangersakkami *imm. 1* Inatsisartut inatsisaat malillugu siunnersorneqarnissamut, ilitserorneqarnissamut, tapersiivigineqarnissamut aamma immikkut ittumik tapersiivigineqarnissamut il.il. sullinniarneqartut nassuiaataannik imaqarpoq. Inatsisartut inatsisaat malillugu sullinniarneqarput, annertuumik innarluutillit ikiorserneqartarnerat pillugu Inatsisartut peqqussutaannut sanilliullugu annertusitinneqassasut siunnersuutigineqarpoq, taamaalilluni ukiussarititaasunut killiliussaq aalajangersarneqarluni. Inuit innarluutillit utoqqalinersiutit pillugit Inatsisartut inatsisaat malillugu utoqqalinersiuteqalernissamut ukiunut killiliussaq sinnerlugu utoqqaassusillit, tamatuma kingorna aallaaviatigut Inatsisartut inatsisaat manna malillugu ikiorserneqarnissamut pisinnaatitaassapput.

Imm. 2-*mut*.

Inatsisartut inatsisaanni sullinniarneqartut tassaapput inuit innarluutillit. Tamanna paasineqassaaq inuit sivisuumik timikkut, tarnikkut, eqqarsartaatsikkut imaluunniit malussarissutsikkut piginnaanikillimasut, akimmiffiit assigiinngitsut ilanngullugit inuk allatulli inuiaqatigiinni tamakkiisumik sunniteqarluartumillu peqataasinaanissaannut akornuserneqarsimasoq. Sullinniarneqartut killissalersorneqarnerat Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaanni artikel 1-imi allassimasut assigaat. Aalajangersagaq inuit innarluutillit naligiimmik periarfissaqarnissaat pillugu Naalagaaffiit Peqatigiit maleruagassani nalinginnaasuni (maleruagassat nalinginnaasut) "innarluutip" nassuiarneqarnera eqqarsaatigalugu aamma isigineqassaaq. Maleruagassani nalinginnaasuni inatsit nr. 18-imi allassimavoq "[o]qaaseq "innarluut" isumaqartoq allatulli inuiaqatigiinni peqataanissamut periarfissat annaaneqarsimasut imaluunniit killeqalersimasut. Tassani inuit piginnaanikillimasut taakkualu avatangiisaasa akornanni atassuteqarnerit nassuiarneqarput." Taamaalilluni aalajangersakkap atuunnerani inuup innarluutaa avatangiisuni akimmiffiit nalaanneranni pilertarpoq. Tamanna peqatigisaanik isumaqarpoq, oqaatsip innarluutillip atorneqartarnera allanngorartuusooq aammalu inuiaqatigiinni ineriartorneq ilutigalugu allanngoriartortussaasoq.

Inatsisartut inatsisaanni sullinniarneqartut killissalersorneqarneranni taamaalilluni sammineqassaaq, inuup ulluinnarni inuunermini periarfissaasa isigineqarneranni, allanut sanilliullugu inuup piginnaaneqarnera annikillisisimaneq - piginnaanikillisisimaneq -, tassani ilaalluni inuiaqatigiinni inuunermini. Inuk innarluuteqartoq oqartoqassappat, timikkut, tarnikkut, eqqarsartaatsikkut imaluunniit malussarissutsikkut piginnaanikillisisimaneq, inuup innuttaasut allat assigalugit inissisimanermi taamaaqataani ingerlasinnaanissamut nalimmassaavigineqarnissamut pisariaqartitsineranik pilersitsisimasoq, paasineqarsimassaaq.

Innarluuteqarneq timikkut, tarnikkut, eqqarsartaatsikkut imaluunniit malussarissutsikkut piginnaanikillisisimanermi tunngaveqarsinnaavoq. Inuk innarluutilik timikkut, tarnikkut, eqqarsartaatsikkut imaluunniit malussarissutsikkut piginnaanikillisisimanernik ataqatigiissunik tunngaveqartumik piginnaanikillisisimasinnaavoq. Timikkut innarluuteqarnermut assersuutissaavoq assersuutigalugu qamutiniq kaassuartakkanik atuisut, inuit pitsorluttut aamma inuit avatiminnik ataatsimik arlalinnilluunniit amigaatillit. Tarnikkut piginnaanikillisisimaneq assersuutigalugu sivisuumik uteqattaartumillu nikallungarujussuarnermik, ernumanermik nappaateqarnermik imaluunniit skizofrenimik nappaateqarnermik tunngaveqarsinnaavoq. Eqqarsartaatsikkut piginnaanikillisisimanermut assersuutissaapput inuit ineriartornermik kingusissut matumani Down's syndrommillit ilanngullugit. Malussarissutsikkut piginnaanikillisisimasunut assersuutitut tikkuarneqarsinnaapput tappiitsuuneq, isigiarsuttuuneq, tutsarluttuuneq, tusilarneq, tusilartuullunilu tappiitsuuneq aamma malugisaatsikkut ajornartorsiuteqarneq, assersuutigalugu qaratsakkut ajoqusersimaneq pissutigalugu.

Annertuumik innarluutillit ikiorserneqartarnerat pillugu Inatsisartut peqqussutaat malillugu tapersiivigineqarnissamut sullinniarneqartut killissalersorneqarnerannut atuuttumut sanilliullugu § 7, imm. 1-imi aalajangersagaq siunnersuutigineqartoq annertusititsinermik malitseqassaaq. Killissalersuinermini siunnersuutigineqartumi inuit innarluutillit, annertuumik innarluuteqartuunngitsut, tapersiivigineqarnissamut siunnerfigineqartuni pineqartunut ilaassapput. Tamanna isumaqanngilaq taakkua Inatsisartut inatsisaat malillugu tapersiivigineqarnissamut tamakkiisutut isigalugu pisinnaatitaalersut, tassami tapersiineq inuup tapersiivigineqarnissamut pisariaqartitsineranik, aammalu inuk piginnaanikillisisimaneq, inatsit malillugu tapersiinikkut ikiorsiivigineqarsinnaasumik, ataasiakkaatigut inummullu tunngasutigut nalilersuineq tunngavigalugu pisartussaammat. Siunnersuinermit ilitsersuinernullu tunngatillugu siunnersuutigineqarpoq, inuit innarluutillit tamarmik tamatumunnga pisinnaatitaasut. Annertusitinnissaannik siunnersuuteqarnermi sullinniarneqartut, Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaannut naapertuuttumik inatsisini inissisimalersitsisoqarpoq.

Imm. 3-mut.

Inatsisartut inatsisaanni sullinniarneqartut tassaapput inuit innarluutillit. Inuit innarluutillit katitigaasorujussuupput aammalu innarluuteqarnermut oqaaseq imm. 2-mi imaritinneqartoq

atituumik nassuiarneqarpoq, innarluutit sakkukinnerusut aammalu ilungersunarnerusut inuiaqatigiinni naligiinnngitsumik periarfissaqarnermik malitseqarsinnaasut nassuerutigineqarluni. Kisiannili imm. 3-mi sullinniarneqartut ikilisinneqarput, taamaalilluni imm. 2-mi innarluuteqarnermut oqaatsip naammassineqarnissaata saniatigut, inuk annertuumik innarluuteqartuussasoq, peqatigisaanik innuttaasut allat assigalugit inuiaqatigiinni peqataanissamut annertuumik aporfeqartitsisumik, piumasaaqatigineqarluni.

Piumasaaqatip imm. 3-mi allassimasup kingunerisaanik innarluutilinnut maleruagassat malillugit ikiorsiinissamut piumasarineqarpoq inuk annertuumik innarluuteqartuussasoq. Inuk annertuumik innarluuteqarpoq imaattoqarpat:

- 1) inuup piginnaasaqarnera annertuumik annikillisisimappat,
- 2) piginnaanikillisisimaneq timikkut, tarnikkut, eqqarsartaatsikkut imaluunniit malussarissutsikkut piginnaanikillisisimanermik pissuteqartoq, aamma
- 3) piginnaanikillisisimaneq inuup inuunermini atugaannut ataqatigiissillugu, ulluinnarni nalinginnaasumik inuunissamut aammalu innuttaasut allat assigalugit inuiaqatigiinni peqataanissamut periarfissanik annertuumik annasaqartitsisoq imaluunniit killiliisoq.

Imm. 4-mut.

Imm. 4-mi aalajangersakkami nutaajusumi siunnersuutigineqarpoq, inatsimmi §§ 19-imi, 20-mi, 22-mi, 33-mi, 42-mi, 66-imi aamma 67-imi aalajangersakkat aammattaaq inunnut innarluutilinnut qanigisaasunut atuutissasut. Taamaalilluni siunnersuutigineqarpoq inummut innarluutilimmut qanigisaasut pisinnaatitaasut:

- § 19 malillugu siunnersorneqarnissamut ilitsersorneqarnissamullu,
- § 20 malillugu atortut ikiuutaasussat pillugit siunnersorneqarnissamut,
- § 22 malillugu qanigisaasutut inissisimanermut siunnerfeqartinneqartumik siunnersorneqarnissamut, ilitsersorneqarnissamut, atuartinneqarnissamut pikkorissartinneqarnissamullu,
- § 33 malillugu angerlarsimaffimmi meeqqamik innarluutilimmik pilersuinermi aningaasartuutaanerisut matussuserneqarnissaannut,
- § 42 malillugu nuunnissamut ikiorneqarnissamut, kiisalu
- §§ 66-imi aamma 67-imi erseqqinnerusumik aalajangigaasumik tikeraarluni angalanissamut.

Inummut innarluutilimmut kikkut qanigisaasutut isigineqarsinnaanersut killissalersuinermi, suliami aalajangersimasumi ataasiakkaatigut nalilersuineq tunngavigineqassaaq.

Nalilersuinermi inummut innarluutilimmut pissusiviusuni atassuteqarneq pingaartinneqassaaq. Aammattaaq isumassuinermi inissisimaneq atuuffiillu, pineqartup inummut innarluutilimmut attuumassuteqarfii, pingaartinneqassapput. Taamaalilluni aallaaviatigut pineqartoq aammalu inuk innarluutilik imminnut atassuteqavittuussapput, akuttunngitsumik attaveqatigiittarlutik. Taamaattoq qanigisaasup oqaatsit atorneqarnera ikittuinnarnut tunngatillugu nassuiarneqartariaqanngilaq.

Imm. 5-imut.

Inuit innarluutillit, pisortat tapersiissuteqarneranni Kalaallit Nunaata avataani inissinneqarsimasut pillugit piumasaqaatip saneqqunneqarsinnaanera aalajangersakkami *imm. 5*-imi siunnersuutigineqarpoq, *imm. 1*-imi Kalaallit Nunaanni najugaqarnissamik piumasaqaateqaraluartoq. Aalajangersakkami qulakkeerneqarpoq §§ 49-51-imi Kalaallit Nunaata avataani ulloq unnuarlu neqerorummiinneq pillugu aalajangersagaq, aamma innarluuteqarnertik pissutigalugu tamatumalu malitsigisaanik tapersiivigineqarnissamik pisariaqartitsisut Kalaallit Nunaata avataaniinnissamik neqeroorfigineqartunut aamma atuutissasoq. Aammattaaq aalajangersakkami qulakkeerneqarpoq, najoqqutassat § 66, *imm. 8*, aamma § 67, *imm. 4* malillugit tikeraarluni angalasarneq pillugu aalajangersarneqartut, taakkununga aamma atuutissasut. Aalajangersagaq inatsisunik atuuttunik ingerlatitseqqiineruvoq, tassani Naalakkersuisut annertuumik innarluutilinnut Kalaallit Nunaata avataaniittunut ikiorsiisarnermut maleruagassanik aalajangersaanissamut piginnaatinneqarlutik.

§ 8-mut

Imm. 1-imut.

Aalajangersakkami nutaajusumi, innarluuteqarneq pissutigalugu inatsit manna malillugu tapersiivigineqarnissamik aammalu meeqqanut tapersiisarnermut Inatsisartut inatsisaat malillugu tapersiivigineqarnissamik pisariaqartitsisunut, tamakkiisumik isiginnittumik, ataqatigiissaagaasumik naammattumillu meeqqanut tapersiinissap qulakkeerneqarnissaa siunertaavoq. Aalajangersagaq taamaalilluni pingaartumik meeqqanut innarluutilinnut, peqatigisaanik inooqatigiinnermi ajornartorsiuteqarnermik misigisaqartartunut, pingaaruteqarpoq.

Imm. 1-imi siunnersuutigineqarpoq, meeqqat Inatsisartut inatsisaat manna aamma meeqqanut tapersiisarnermut Inatsisartut inatsisaat malillugit tapersiivigineqarnissamut siunnerfigineqartut, Inatsisartut inatsisai marluusut tamaasa malillugit pisariaqartunik tapersiivigineqartassasut, aalajangersarneqassasoq. Tamatuma pinissaa kommunalbestyrelsip akisussaaffigaa. Aammattaaq tapersiinerup ataqatigiissagaanissaa kommunalbestyrelsip akisussaaffigaa. Kommunalbestyrelsip taamaalilluni, meeqqap meeqqanut tapersiisarnermut Inatsisartut inatsisaat malillugu tapersiivigineqarnissaa, aammalu tapersiissutaasup meeqqap pisariaqartitaasa naammassinissaannut naammattumik annertussuseqarnissaa, kommunalbestyrelsip qulakkeersimangippagu, meeqqap pisariaqartitai meeqqanut tapersiisarnermut Inatsisartut inatsisaat malillugu naammassineqassasut innersuusutigalugu, Inatsisartut inatsisaat manna malillugu tapersiinissaq itigartissinnaanngilaa. Meeqqap meeqqanut tapersiisarnermut Inatsisartut inatsisaat malillugu tapersiivigineqarnissamut pisariaqartitsinera, meeqqap innarluuteqarnera pissutigalugu annertunerulersimasinnaasoq, kommunalbestyrelsimit eqqumaffigineqarnissaa, tassunga tunngatillugu pingaaruteqarpoq.

Meeqqanut Inatsisartut inatsisaat manna aamma Meeqqat tapersersorneqarnissaannut Inatsisartut inatsisaat malillugu tapersiivigineqarnissamik pisariaqartitsisunut tunngatillugu,

pisut ilaanni tapersiivigineqarnissamut pisariaqartitsinerup inatsisit suut ataanniissaneramik ersarissumik immikkoortitsiniarneq ajornarsinnaavoq. Taamatut pisoqarnerani, taper-siivigineqarnissamik pisariaqartitsineq Inatsisartut inatsisaat alla malillugu ikiorsiivigineqas-sasoq innersuussutigalugu, kommunalbestyrelsip tapersiinissaq itigartinngisaannassavaa. Kisiannili meeqqap pisariaqartitai, aammalu meeqqap pisariaqartitaannik naammassin-nittumik aammalu meeqqamut pitsaanerpaamik ikiorsiisussamik, qanoq tapersiisoqarnissaanut, aqutsisuusussaapput.

Imm. 2-mut.

Imm. 2-mi aalajangersakkami siunnersuutigineqartumi, Inatsisartut inatsisaat manna malillugu tapersiinerup aammalu suliniuteqarnerup Meeqqat tapersersorneqarnissaanut Inatsisartut inatsisaat malillugu imaluunniit inatsisit allat malillugit meeqqamut taassumalu ilaquataannut imaluunniit isumassuisuinut allanut aallartinneqartup imminnut ataqatigiinnissaasa ataqatigiissaarnissaanut qulakkeernissaannullu kommunalbestyrelse pisussaaffeqarpoq. Aalajangersakkami kommunip ingerlatsiviisa assigiinngitsut akornanni iluminni ataqatigiissaarisooqarnissaa suleqatigiittoqarnissaalu piumasaqaatineqarpoq. Kommunalbestyrelse ataasiakkaatigut ataqatigiissummik suliniuteqarnermik qanoq qulakkeerisassanersoq, aalajangersakkami ilitersuisooqanngilaq. Tamanna assersuutigalugu pisinnaavoq kommunalbestyrelsip Inatsisartut inatsisaat marluusut tamaasa malillugit meeqqanut tapersiinissaq pillugu suliassat sularineqartarnerinik suliassanik sularinnittartuni aalajangersimasuni ataatsimoortitsineratigut imaluunniit ingerlatsivinni assigiinngitsuni suliassanik sularinnittartut akornanni aalajangersimasunik suleqatigiiffeqalersitsinikkut ataqatigiissaarisartoqartitsilernikkut. Kommunalbestyrelsit tapersiinissamut periarfissaminnik, taakkuninngalu ineriartortitsinerminnik naleqquttumik annertussusilimmik ataqatigiissaarisasut, kaammattorneqarput.

§ 9-mut

Imm. 1-imut.

Imm. 1-imi siunnersuutigineqarpoq, inunnut innarluutilinnut Inatsisartut inatsisaat malillugu pisariaqartunik tapersiinissamut periarfissaqassasoq, aammalu inuit innarluutillit pisariaqartumik tapersiivigineqartassasut, kommunalbestyrelsip isumagissagaa. Aalajangersakkami aalajangersarneqarpoq, aallaaviatigut kommunalbestyrelse tassaassasoq Inatsisartut inatsisaat malillugu tapersiissutissatut periarfissanut pilersuinissamik akisussaasuussasoq.

Kommunalbestyrelsip tapersiinissamut periarfissanik, assersuutigalugu najugaqarfissatut neqeroorutinut tunngatillugu, kommuninit allanit pilersinneqarsimasunik ingerlanneqartunillu atuilluni, pilersuisussaataitanini naammassisinnaavaa. Tamanna pingaartumik najugaqatigiiffinnut aamma najugaqarfinnut illersugaasunut tunngatillugu pingaartumik naleqqutissaaq, tassani taamaalilluni qaffasinnerusumik immikkut ilisimasaqalernissaq aammalu pingaartumik siunnerfigineqartuni ikinnerusuni innuttaasunut pitsaassusilimmik tapersiinissaq qulakkeerneqarsinnaalluni.

Aalajangersakkat aamma atuunnerani, inuit tamatuminnga pisariaqartitsippata, Inatsisartut inatsisaat manna malillugu inuup innarluutillip tapersiivigineqarnissaata qulakkeernissaa, kommunimi angerlarsimaffigisami kommunalbestyrelsip akisussaaffigaa.

Kommunalbestyrelsip ilaatigut, Inatsisartut inatsisaanni kapitali 5 malillugu siunnersuineranut ilitsersuinernullu atatillugu, tamanna naleqquttutut isigineqarpat, tapersiinissamut periarfissat allat pillugit paasissutissiinermigut, aammalu kommunalbestyrelsip inatsisit allat malillugit siunnersuinermini ilitsersuinerminilu imaluunniit tapersiinermini, Inatsisartut inatsisaat malillugu tapersiinissamut periarfissanik ilanngussinermini, kommunimi tapersiissutissatut periarfissat pillugit Inatsisartut inatsisaanni siunnerfigineqartut innuttaasut ataatsimut isigalugu paasissutissiivigisarnerisigut, pisussaaffik taanna naammassisinnaavaa.

Aalajangersagaq siunnersuutigineqartoq annertunerpaatigut inatsisinik atuuttunik ingerlatitseqqiineruvoq.

Imm. 2-mut.

Imm. 2-mi aalajangersakkami siunnersuutigineqartumi aalajangersarneqarpoq, kommunalbestyrelse Inatsisartut inatsisaanni kapitali 6 malillugu tapersiinissaq pillugu aamma Inatsisartut inatsisaanni kapitali 7 malillugu immikkut ittumik tapersiinissaq pillugu aalajangiinissamut piginnaatitaasoq. Taamaattoq Kalaallit Nunaanni ulloq unnuarlu neqeroorummiinnissaq pillugu aalajangiinissamut Naalakkersuisut piginnaatitaapput. Tamanna meeqqanut aamma inersimasunut ulloq unnuarlu neqeroorummiititsineranut atuuppoq.

Aalajangersakkami kommunalbestyrelsit aamma Naalakkersuisut akornanni aalajangiisinnaatitaanerup agguarsimaneranik allanngortitsinissaq siunertaanngilaq. Taamaattoq kommunalbestyrelsit aalajangiisinnaatitaanerat pillugu Inatsisartut inatsisaanni ataatsimut isigalugu aamma immikkuullarissunut aalajangersakkamik allassimasoqarnissaa naapertuutsinneqarpoq.

Imm. 3-mut.

Imm. 3-mi aalajangersakkami siunnersuutigineqartumi § 11, imm. 1-imi aalajangersagaq siunnersuutigineqartoq illuatungilerneqarpoq, taamaalilluni kommunalbestyrelse inuup innarluutillip ulloq unnuarlu neqeroorummiinnissaa pillugu Naalakkersuisunut inassuteqaammik suliaqassalluni, tassani aalajangiisinnaatitaaneq Naalakkersuisuniitineqarluni. Aalajangersagaq annertuumik innarluutillit ikiorserneqartarnerat pillugu Inatsisartut peqqussutaanni § 16 malillugu inatsisinik atuuttunik ingerlatitseqqiineruvoq.

§ 10-mut

Imm. 1-imut.

Imm. 1-imi aalajangersakkami siunnersuutigineqarpoq, inunnut innarluutilinnut ulloq unnuarlu neqeroorummi inissanik pisariaqartunik amerlassusilinnik isumaginninnissamut Naalakkersuisut akisussaaffilerneqassasut. Taamaalilluni meeqqanut innarluutilinnut aamma inersimasunut innarluutilinnut ulloq unnuarlu neqeroorutitut tunngatillugu pilersuinissamut akisussaaffik Naalakkersuisuniippoq. Pilersuinissamut akisussaasuunerup naammassinissaata qulakkeernissaa, ilaatigut Naalakkersuisut ukiut sisamakkaarlugit ulloq unnuarlu neqeroorutitut suliaaqaarfiup ineriartortinneqarneranut nuna tamakkerlugu periusissamik suliaqartarnissamut akisussaasuunerat pillugu § 65-imi aalajangersagaq siunnersuutigineqartoq, eqqarsaatigalugu isigineqassaaq.

§ 11-imut

Imm. 1-imut.

Imm. 1-imi aalajangersagaq siunnersuutigineqartoq malillugu inuk innarluutilik ulloq unnuarlu neqeroorummiinnissamik neqeroorfigineqassanersoq, Naalakkersuisut aalajangiisinnaatitaatinneqarput. Aalajangersagaq meeqqanut aamma inersimasunut innarluutilinnut tunngatillugu atuuppoq.

Imm. 2-mut.

Kommunimi innuttaasup angerlarsimaffigisaani kommunalbestyrelsimit inassuteqarneq malillugu Naalakkersuisut aalajangiissapput.

Imm. 3-mut.

Kommunalbestyrelsip inassuteqaataani allassimassapput, suna tunngavigalugu innuttaasooq ulloq unnuarlu neqeroorummiinnissamik neqeroorfigineqassasoq kommunalbestyrelsip inassutigineraa, kiisalu § 46, imm. 1-imi imaluunniit § 48 imm. 1-imi piumasaqaatit siunnersuutigineqartut naammassineqarsimanerat pillugu paasissutissat sukumiisut, ilanngullugu inuup tapersiivigineqarnissamik pisariaqartitsinera.

Imm. 4-mut.

Imm. 4-mi siunnersuutigineqarpoq Naalakkersuisut kommunalbestyrelsip inassuteqartarnera pillugu maleruagassanik erseqqinnersunik aalajangersaassasut. Piginnaatitsissut kommunalbestyrelsit inassuteqaataasa ilusissaannut imarisassaannullu piumasaqaatinik erseqqinnerusumik aalajangersaanermut atorneqassaaq.

§ 9-mi aalajangersakkat siunnersuutigineqartut, annertunerpaatigut inatsisinik atuuttunik ingerlatitseqqiinerupput.

§ 12-imut

Imm. 1-imut.

Aalajangersakkami *imm. 1*-imi siunnersuutigineqarpoq Naalakkersuisut inissiinissamut qitiusumi innersuussisarfirmik (Inissiinissamut qitiusumi innersuussisarfik) pilersitsinissamut ingerlatsinissamullu pisussaaffilerneqartut. Inissiinissamut qitiusumi innersuussisarfirmut eqqarsaatigineqartoq tassaavoq, ulloq unnuarlu neqeroorutini Naalakkersuisunit pilersinneqartuni, § 59 naapertorlugu, ulloq unnuarlu neqeroorutitut suliassaqarfimmi isumalluutit pitsaanerpaamik atorluarneqarnissaat qulakkeerniarlugu kiisalu innuttaasup aamma ulloq unnuarlu neqeroorutip imminnut tulluarluinnarnissaat qulakkeerniarlugu, qitiusumit ingerlanneqassasut.

Imm. 2-mut.

Inissiinissamut qitiusumi innersuussisarfik ulloq unnuarlu neqeroorutini Naalakkersuisunit pilersinneqartuni, § 59 naapertorlugu, allatsinnerit pillugit, ilanngullugit allamut inissiinerit, aalajangiinissamut piginnaatitaaffilerneqassasoq *imm. 2*-mi siunnersuutigineqarpoq.

Inissiinissamut qitiusumi innersuussisarfik § 9, *imm. 3* siunnersuutigineqartoq malillugu kommunalbestyrelsip inassuteqaataa tunngavigalugu allatsinnissaq pillugu aalajangiissaaq. Taamaalilluni inissiinissamut qitiusumi innersuussisarfiup nammineerluni suliameerit paasissutissiissasoq tassani pineqanngilaq. Kisiannili innersuussisarnermut ataatsimiititaliap aalajangiisinaanissaanut, inissiinissamut qitiusumi innersuussisarfiup inassuteqaammi paasissutissanik suliameerit attuumassuteqartunik peqarnissaata isumaginissaa kommunalbestyrelsip akisussaaffigaa, ilanngullugu inuup tapersiivigineqarnissamik pisariaqartitsinerata naammattumik sukumiissusilimmik nassuiarneqarnera.

Inissiinissamut qitiusumi innersuussisarfiup allatsinnissaq pillugu aalajangiinermini ilaatigut inuk ulloq unnuarlu neqeroorummi siunnerfigineqartunut tulluunnersoq, ulloq unnuarlu neqeroorummi inuup tapersiivigineqarnissamik pisariaqartitsinera naammassineqarsinnaanersoq, aammalu ulloq unnuarlu neqeroorummi allatsinnissaq inummut pitsaanerpaassanersoq, pingaartissavai.

Inissiinissamut qitiusumi innersuussisarfiup aalajangiinermini, inummut innarluutilimmut aalajangiinermini pineqartumut suna pitsaanerpaassanersoq, aammalu ulloq unnuarlu neqeroorummi najugaqartunut allanut suna pitsaanerpaassanersoq, eqqarsaatigissavaa.

Inuit innarluutillit ataasiakkaat innersuunneqarnerat ulloq unnuarlu neqeroorutini ataasiakkaani pisortasut oqaloqatigalugit ingerlanneqassaaq.

§ 13-imut

Imm. 1-imut.

Imm. 1-imi siunnersuutigineqarpoq, kommunalbestyrelse inuup innarluutillip, najugaqarfissatut neqeroorummiittup, tassa imaappoq Kalaallit Nunaanni najugaqatigiiffimmi, najugaqarfimmi illersugaasumi imaluunniit ulloq unnuarlu

neqeroorummi, atugaannik inummut sammisumik, nakkutilliissasoq. Nakkutilliinermi, najugaqarfissatut neqeroorummi nalinginnaasumik ingerlatsinermut sammisumik nakkutilliineq, Nakkutilliinermik ingerlatsivimmit ingerlanneqartussaq, pineqartunut ilaanngilaq.

Siunnersuutigineqarpoq najugaqarfissatut neqeroorummiinnermi inuup timikkut, tarnikkut inooqatigiinnikkullu pisariaqartitaasa naammassineqarsimaannarnerat, kommunalbestyrelsip nakkutilliinermut ilaatillugu, qulakkiissagaat. Nakkutilliineq sapinngisamik inuk pineqartooq suleqatigalugu ingerlanneqartassaq. Kommunalbestyrelsip nakkutilliinermi najugaqarfissatut neqeroorummi sulisut tusarnaassagai suleqatigissagaalu, aammattaaq pingaaruteqarpoq.

Imm. 1 malillugu kommunalbestyrelsip inummut sammisumik nakkutilliinerani, sakkussaassaaq § 81-imi aalajangersagaq siunnersuutigineqartoq malillugu ulloq unnuarlu neqeroorummit ukiup affakkaartumik killiffimmut nalunaarusiaq. Kommunalbestyrelsip inummut sammisumik nakkutilliinissamut pisussaaffimminik naammassineqarnissaanut, killiffimmut nalunaarusiat naammangilaq. Tamatumunnga taarsiullugu killiffimmut nalunaarusiaq nakkutilliinerup aaqqissuunneqarneranut sakkussaassaaq.

Imm. 1 malillugu inummut sammisumik nakkutilliineq annertuumik innarluutillit ikiorserneqartarnerat pillugu Inatsisartut peqqussutaanni § 21 a malillugu kommunalbestyrelsip nakkutilliinissamut pisussaaffianik ilaannakortumik ingerlatitseqqiineruvoq. Taamaattoq aalajangersakkami kissaatigineqarpoq, pissutsit inuup atugaasa kisimik nakkutilliivigineqannginnissaat, kisianni aamma kommunalbestyrelse nakkutilliinermi isummissasoq, ulloq unnuarlu inissisimaneq kiisalu tapersiinerit aallartinneqartut allat inuup timikkut, tarnikkut inooqatigiinnikkullu pisariaqartitaannik naammassinniffiunerat atuutiinnarneraq. Taamaalilluni nakkutilliineq, suliniuteqarnerup allanngortinnissaa tunngavissaqarneraq nalilersuinerum tunngavigineqassaaq.

Imm. 2-mut.

Aalajangersakkami *imm. 2*-mi siunnersuutigineqarpoq kommunalbestyrelsip innuttaasumut najugaqarfissatut neqeroorummiittumut inummut sammisumik nakkutilliineranut atatillugu, najugaqarfissatut neqeroorummi pissutsit isumanerlunnartut paasigunigit, kommunalbestyrelse Nakkutilliinermik ingerlatsivik nalunaarfiginissaanut pisussaaffeqartoq. Nakkutilliinermik ingerlatsivik sunnuteqarluartumik nakkutilliinissamut najugaqarfissatut neqeroorummi pissutsit pillugit paasissutissanik pisariaqartunik tigusaqartarnissaa, aalajangersakkami qulakkeerneqassaaq. Taamaalilluni aalajangersakkami siunertaavoq, nakkutilliisooqatigiit iliuuseqarsinnaalerlutillu pissutsinik aaqqiisinnaalernissaanut, paasissutissanik pisariaqartunik pissarsinissaasa

Pissutsit isumanerlunnartut aalajangersakkami pineqartunut ilaasut, assersuutigalugu tassaasinnaapput najugaqartut akornanni imaluunniit sulisut aamma najugaqartut akornanni

persuttaasarneq pillugu paasissutissat imaluunniit pasitsaassinerit, najugaqartunit allanit imaluunniit sulisunit najugaqartunut kinguaassiutitigut innarliinerit pillugit paasissutissat imaluunniit pasitsaassinerit, sulisoqarnikkut inuttalersuineq naammanngitsoq imaluunniit illugisani pissutsit isornartoqartinneqartut.

Imm. 3-mut.

Imm. 3-mi siunnersuutigineqarpoq kommunalbestyrelse Naalakkersuisunit qinnuigineqarnermini paasissutissanik kommunalbestyrelsip inummut sammititamik nakkutilliinermik isumaginninnera pillugu Naalakkersuisut kissaatigisimasinnaasaannik tamaginnik nassiussinissamut pisussaaffeqassasoq. Taamaalilluni sammisanut sukumiissusaanullu tunngatillugu aalajangersakkami killilersuisoqanngilaq.

Imm. 4-mut.

Imm. 4-mi aalajangersakkami siunnersuutigineqarpoq, Naalakkersuisut inummut sammisumik nakkutilliinermut maleruagassanik erseqqinnerusumik aalajangersaanissamut piginnaatinneqassasut, ilanngullugit nakkutilliinerup ingerlanneqarnera, aaqqissuunneqarnera, nakkutilliinermut nalunaarusianik suliaqarnermut atugassarititaasut piunasaqaatillu pillugit maleruagassat aalajangersassavaat.

Nakkutilliinermut nalunaarusiaq, allakkiamut pisortat ingerlatsinerannut maleruagassat naapertorlugit, ilanngullugu allattuisussaataaneq, nakkutilliinermut sumulluunniit atatillugu suliarineqartussamut, taaguutaavoq.

§ 14-imut

Imm. 1-imut.

Imm. 1-imi siunnersuutigineqarpoq kommunalbestyrelsit ingerlatsiviini aamma Inatsisartut inatsisaannik matuminnga aqutsinerannik nakkutiginninnissamik kiisalu najugaqarfissatut neqeroorutini ingerlatsinermik nakkutilliinermik suliaqartussamik, immikkut nakkutilliinermut immikkoortortaqaarnissamik, Naalakkersuisut pisussaaffilerneqassasut.

Imm. 2-mut.

Aalajangersakkami *imm. 2*-mi siunnersuutigineqarpoq, Inatsisartut inatsisaanni matumani aalajangersakkat ingerlatsivimmi aqunneqarnerannik aammalu Inatsisartut inatsisaanni matumani pisussaaffiit pisinnaatitaaffiillu allassimasut kommunimit naammassineqarsimanerannik, nakkutilliisussani Naalakkersuisut qullersaasut. Maannamut inatsisini aalajangersagaanngitsumik Naalakkersuisut inunnut innarluutilinnut suliassaqarfimmi immikkuullarissumik nakkutilliisarnerat aalajangersakkami ingerlateqqinneqarpoq.

Imm. 3-mut

Nakkutilliinermik ingerlatsiviup najugaqaqatigiiffinnik, najugaqarfinnik illersugaasunik aamma ulloq unnuarlu neqeroorutiniq ingerlatsinermut tunngasumik nakkutilliisarnerat

erseqqinnerusumik maleruagassiivigineqassasoq, *imm. 3-mi* aalajangersakkami nutaajusumi siunnersuutigineqarpoq.

Aalajangersagaq § 16-imi aalajangersakkanut siunnersuutigineqartunut ataqatigiissillugu atuarneqassaaq.

Aalajangersakkami taamaalilluni siunnersuutigineqarpoq oqartussaasoq sorleq najugaqaqatigiiffiit aamma najugaqarfiit illersugaasut ingerlanneqarnerannut nakkutilliinissamut akisussaasuunersoq allanngortinneqassasoq. Allanngortitsinissamut pingaartumik, siunnerfilimmik, ingerlaavartumik aammalu nuna tamakkerlugu najugaqarfissatut neqeroorutit oqaloqatigalugit pitsaassusilimmik sulisoqarluni, najugaqarfissatut neqeroorutitut suliaasaqarfimmi ataatsimoortumik nakkutilliisarnissamik angusaqarnissamik kissaateqarneq, tunngavilersuutigineqarpoq. Tassunga ilanngutissaaq najugaqarfinnut illersugaasunut aamma ulloq unnuarlu neqeroorutitut siunnerfigineqartut ersarissumik killissalersugaannginnerat.

Nakkutilliinermik ingerlatsivik Inatsisartut inatsisaanni kapitali 9 malillugu inunnt innarluutilinnut najugaqarfissatut neqeroorutitut ingerlatsinikkut nakkutilliissaaq. Najugaqarfissatut neqeroorutit paasineqassaaq tassaasut najugaqaqatigiiffiit aamma najugaqarfiit illersugaasut, ulloq unnuarlu neqeroorutitut atorineqartut.

§ 13 naapertorlugu najugaqarfissatut neqeroorutip tamakkiisutut isigalugu aammalu najugaqartut najugaqarfissatut neqeroorummiittut atugarisaat nalinginnaasut, ingerlatsinermut sammititamik nakkutilliinissaaq, kisimi tassani pineqarpoq. Taamaalilluni najugaqartut ataasiakkaat najugaqarfissatut neqeroorummiittut nakkutilliivigineqarnissaat tassani pineqanngilaq. Inummut sammititamik nakkutilliinissamik pisussaaffeqarneq kommunalbestyrelsimiippoq.

Imm. 4-mut.

Imm. 4-mi aalajangersakkami siunnersuutigineqarpoq, nakkutilliinermi suliaasaq misissuineranut aammalu pitsaassutsinik inerisaanissamut tunngatinneqassasoq. Tamatuma kingunerisaanik Nakkutilliinermik ingerlatsiviup siullermik najugaqarfissatut neqeroorummi pissutsit misissussavaa, ilanngullugit illutanut, aningaasaqarnermut sulisoqarnermullu tunngasut kiisalu najugaqartunik isumassuinerup isumagineqarnera, najugaqarfissatut neqeroorutitut akuerineqarsinnaanissamut piumasaqaatinik naammassinniffiuersoq. Aamma tassaniippoq najugaqarfissatut neqeroorutip assersuutigalugu najugaqarfissatut neqeroorutip akuerineqarnerani najugaqartussat amerlassusissaannit najugaqartut amerlanerunnginnerat, misissorneqassasoq. Aappaattut aalajangersagaq isumaqarpoq, najugaqarfissatut neqeroorutip pitsaassusaata ineriartortinneqarneranik, najugaqarfissatut neqeroorutip suliaqarnerani, Nakkutilliinermik ingerlatsivimmit qanoq tapersersuisinnaanersut, najugaqarfissatut neqeroorutip oqaloqatiginerani Nakkutilliinermik ingerlatsiviup nakkutilliinermi ukkatarissagaa. Oqaloqatigiinneq najugaqarfissatut neqeroorummi pitsaassutsinik attassiinnarnissamut ineriartortitsinissamullu iluaqutaassaaq.

Imm. 5-imut.

Imm. 5-imi siunnersuutigineqarpoq imm. 2 aamma 3 malillugit nakkutilliineq nalunaarutigereerlugu aammalu nalunaaruteqarani nakkutilliinertut ingerlanneqarsinnaasoq. Nalunaarutigereerlugu nakkutilliineq paasineqassaaq tassaasoq, nakkutilliilluni pulaartoqarniartoq kommunalbestyrelse imaluunniit najugaqarfissatut neqeroorut sioqqutsisumik paasitinneqareerluni, nakkutilliilluni pulaarnej. Nalunaaruteqarani nakkutilliineq paasineqassaaq, nakkutilliilluni pulaartoqarniartoq, kommunalbestyrelse imaluunniit najugaqarfissatut neqeroorut sioqqutsisumik paasitinneqarsimangitsaq. Nalunaaruteqarani nakkutilliilluni pulaarnej maannakkorpiaq pisunik takutitsisinnaavoq, nalunaarutigereerlugu nakkutilliilluni pulaarnermut atatillugu aammalu ulluinnarni misigineqartartut imminnut naapertuunnersut, nalilersuineranut atorneqarsinnaalluni. Taamaattumik nalunaaruteqarani nakkutilliilluni pulaarnej, sumiiffiup inissiiviusup ataatsimut isigalugu paasiniarneranut tapertaasussatut aammalu allatut takunissaanut, atorneqarsinnaavoq.

Imm. 6-imut.

Imm. 6-imi siunnersuutigineqarpoq ingerlatsineranut sammisumik nakkutilliinerup aaqqissuunneqartarnera imarisaalu pillugit maleruagassanik erseqqinnerusunik Naalakkersuisut aalajangersaassasut. Piginnaatitsissut ilaatigut Nakkutilliinermik ingerlatsivik pissutsit erseqqinnerusut suut nakkutigissanerai, aalajangersaanissamut atorneqassaaq.

§ 15-imut

Aalajangersagaq nutaajusoq, § 14, imm. 2 naapertorlugu Nakkutilliinermik ingerlatsiviup kommunalbestyrelsip ingerlatsiviannik aamma Inatsisartut inatsisaat manna malillugu allaffissornikkut aqutsineranik nakkutilliinerannut, maleruagassiinernik erseqqinnerusunik, imaqarpoq.

Imm. 1-imut.

Aalajangersakkami *imm. 1-imi* siunnersuutigineqarpoq Nakkutilliinermik ingerlatsivik peqqissaartumik kinaassutsimut uppersaammik aammalu eqqartuussivimmit aalajangiinertaqanngitsumik, kommunip ingerlatsiviani Nakkutilliinermik ingerlatsiviup nakkutilliinerup ingerlanneqarnissaanut attuumassuteqartutut naliliiffigisaannut, isersinnaatitaasut. Nakkutilliinermik ingerlatsivik matumani paasissutissat inunntunngasut mianerisariaqartut kiisalu suliffiup iluani allattugaatigineqartut ilanngullugit, pissarsinissamut pisinnaatitaapput. Aalajangersakkami siunertaavoq, § 14, imm. 2-mi aalajangersagaq siunnersuutigineqartoq malillugu sunniuteqarluartumik nakkutilliinermik ingerlatsinissaasa qulakkeerneqarnissaa.

Imm. 2-mut.

Imm. 2-mi aalajangersakkami § 14, imm. 2 malillugu Nakkutilliinermik ingerlatsiviup nakkutilliisarnerannut erseqqinnerusunik maleruagassiisoqassasoq siunnersuutigineqarpoq.

Taamaallilluni aalajangersagaq, Nakkutilliinermik ingerlatsivik kommunalbestyrelsip ingerlatsiviani aammalu kommunalbestyrelsip Inatsisartut inatsisaanni matumani maleruagassanik allaffissornikkut aqutsineranik nakkutilliisarnerannut erseqqinnerusumut, tunngassuteqarpoq.

Siullermik siunnersuutigineqarpoq Nakkutilliinermik ingerlatsivik nakkutilliineq pillugu kommunalbestyrelsimut nakkutilliinermut allaganngorlugu nalunaarusiamik suliaqartassasut.

Aappaattut siunnersuutigineqarpoq Nakkutilliinermik ingerlatsivik nakkutilliinermut nalunaarusiami ilitsersuissutaasunik innersuussutinik aammalu peqqussutinik kommunalbestyrelsimut pisussaaffiliisunik saqqummiinissamut piginnaatitaatinneqassasut. Taakkua kommunalbestyrelsip ingerlatsivianut aammalu Inatsisartut inatsisaanni maleruagassanik allaffissornikkut aqutsinerannut ilitsersuussutitut innersuussinernut aammalu kommunalbestyrelsip peqqussutinut pisussaaffiliisunut tunngassuteqassapput. Taamaallaat imm. 2, nr. 1-mit 3-mut aalajangigaasunik imaqartumik pisussaaffiliisumik peqqussuteqartoqarsinnaavoq.

Kommunalbestyrelse inunnut innarluutilinnut tapersiisarneq pillugu suliani ataatsimi arlalinniluunniit inatsisartut inatsisaanni § 77-imi aalajangersakkat malillugit qulaajaanermik aallartitsissasoq imaluunniit inatsisartut inatsisaanni § 79-imi aalajangersakkat malillugit iliuusissatut pilersaarummik suliaqassasoq, ilitsersuissutaasumik peqqussuteqarnissamut Nakkutilliinermik ingerlatsivik imm. 2, nr. 1 periarfissaqarput. Tamanna naleqquppat, kommunalbestyrelse qulaajaanermik aallartitsissasoq aammalu iliuusissatut pilersaarummik suliaqassasoq peqqussuteqarnissamik Nakkutilliinermik ingerlatsivik periarfissaqarput. Nakkutilliinermik ingerlatsivik aamma qulaajaanermik aallartitsinissaq imaluunniit iliuusissatut pilersaarummik suliaqarnissaq pillugu peqqussuteqarnissamut periarfissaqarput. Taamaattoq kommunalbestyrelse qulaajaanermik aallartitsereersimappat suliaqareersimappallu iliuusissamik pilersaarummik suliaqarnissaq pillugu peqqussuteqarnissaq taamaallaat naleqqutissaaq. Suliassamik suliarinninnissaq peqqussutigineqartoq qaqugu naammassisimassanersoq, piffissamut killissaliussamik Nakkutilliinermik ingerlatsivik aalajangersaasinnaapput. Kommunalbestyrelsip suliaq imaluunniit suliap ingerlanera pillugu nakkutilliisooqatigiit ingerlaavartumik ilisimatittassagai, peqqussuteqarnermut ilaatillugu Nakkutilliinermik ingerlatsivik aalajangersaasinnaapput. Qulaajaanermi siunertaavoq, inuk Inatsisartut inatsisaat manna malillugu tapersiivigineqarnissamik maannakkut pisariaqartitsinersoq paasiniarneqarneqassasoq, ilanngullugu najugaqarfissatut neqeroorummiinnissamik neqerooruteqarneq pisariaqartinneqarnersoq.

Kommunalbestyrelsip inunnut innarluutilinnut tapersiinnissaq pillugu suliaq ataaseq arlallilluunniit nutaamik suliarineqartussanngorlugit qaqeqqissagai, pillugu Nakkutilliinermik ingerlatsivik aamma peqqussuteqarnissamik periarfissaqarpoq. Peqqussuteqarnermut piunasaqaataavoq kommunip inatsisartut inatsisaanni aalajangersakkat naammassisi-mannikkai. Tamanna assersuutigalugu § 77 malillugu qulaajaanani, inummut annertuumik

innarluutilimmut immikkut ittumik tapersiinnisaq itigartinneqassasoq aalajangiisimaneranut, tunngassuteqarsinnaavoq.

Nakkutilliinermik ingerlatsivik naliliippat inuk annertuumik innarluutilik, suliassaq tassunga tunngasoq ingerlasoq imaluunniit naammassineqareersimagaluartoq, najugaqarfissatut neqeroorummiinnissamik pisariaqartitsisoq, kisiannili tamanna neqeroorutigineqarsimanani, taava Nakkutilliinermik ingerlatsivik periarfissaqarpoq § 77 malillugu kommunalbestyrelse peequssallugu qulaajaanermik aallartitseqqullugit. Peqqussuteqarnermut siunertaavoq, inuk Inatsisartut inatsisaat malillugu tapersiivigineqarnissamik maannakkut pisariaqartitsinersoq paasinarsarnissaa, matumani najugaqarfissatut neqeroorummiinnissamik pisariaqartitsineq ilanngullugu. Nakkutilliinermik ingerlatsivik peqqussuteqarnermut ilaatillugu § 77 malillugu kommunalbestyrelse qulaajaanermik qaqugu aallartitsereersimassanersoq, piffissaliussamik aalajangersaasinnaavoq.

§ 16-imut

Aalajangersagaq nutaajusoq, Nakkutilliinermik ingerlatsivik najugaqaqatigiiffiit, najugaqarfiit illersugaasut aamma ulloq unnuarlu neqeroorutini ingerlatsinermut sammisumik nakkutilliinerisa erseqqinnerusumik maleruagassiivigineqarneranik, imaqarpoq.

Imm. 1-imut.

Imm. 1-imi aaqqissuussineq siunnersuutigineqartoq malillugu Nakkutilliinermik ingerlatsivik najugaqarfissatut neqeroorummit ingerlatsinermut sammititamik nakkutilliinissamut paasissutissanik pisariaqartunik tunineqarsinnaatitaapput.

Nakkutilliinermik ingerlatsiviup ingerlatsinermut sammititamik nakkutilliinermik suliaqarsinnaanissaannut suut pisariaqarnersut, Nakkutilliinermik ingerlatsivik naliliisussaapput.

Imm. 2-mut.

Imm. 2-mi siunnersuutigineqarpoq, Nakkutilliinermik ingerlatsivik najugaqarfissatut neqeroorummut peqqussuteqarnissaq pillugu aalajangiisinnaassasoq. Peqqussuteqarneq Nakkutilliinermik ingerlatsiviup najugaqarfissatut neqeroorummik ingerlatsinermut tunngasunut nakkutilliineranut ilaatillugu pissaaq. Nakkutilliinermik ingerlatsivik najugaqarfissatut neqeroorutip peqqusissummik naammassinninnissaanut piffissamut killiussamik aalajangersaasinnaavoq.

Peqqussummik naammassinninnissaq najugaqarfissatut neqeroorutip akuerineqaannarnissaanut piunasaqaatinngortinneqarsinnaavoq. Pisuni taamaattuni aamma Nakkutilliinermik ingerlatsivik naammassinninnissamut piffissamut killiussaliussamik aalajangersaappata, naleqqutissaaq, taamaalilluni peqqussutip naammassineqarsimannginnera pissutigalugu akuersissuteqarfigineqarnermi annaasinnaanera qaqugukkut aarlerinaateqarnersoq, najugaqarfissatut neqeroorummut ersarissalluni. Peqqussuteqarneq sukannernerusumik nakkutilliinissaq pillugu aalajangiinermut, aalajangersakkami imm. 3 naapertorlugu, atatillugu

tunniunneqassaaq, kisianni aamma sukannererusumik nakkutilliinissaq pillugu aalajangiisoqanngikkaluartuq tunniunneqarsinnaalluni.

Peqqussuteqarnissamut pisariaqarpoq, najugaqarfissatut neqeroorummi suliniutit suussusersineqarsinnaanissaat, taakkua naammassineqarpata najugaqarfissatut neqeroorutip siunnerfigineqartunut akuerisaaginnarnissaa, akuersarneqarsinnaassamat. Assersuutigalugu sulisut pingaaruteqarnerpaat soraarsimallutik pisoqarsinnaavoq, aammalu sulisut sinneruttut kisimiillutik suliassaq naammassisinnaagaat naatsorsuutigineqarsinnaanani, ikippallaarnerat pissutaalluni imaluunniit najugaqarfissatut neqeroorummi siunnerfigineqartut najugaqarfissatut neqeroorutip akuerineqarfigisaasa sullinnissaannut pisariaqartunik piginnaasaqartunik sulisuerussimalluni. Taamaattoqarpat peqqussuteqarneq sulisunik naleqquttunik atorfinitsitsinissamut tunngassuteqarsinnaavoq. Assersuutissaq alla tassaasinnaavoq, neqeroorummi naleqqutinngitsumik amerlasuunik pissaanermik atuisoqarsimasoq. Taamaattoqarpat siunissami pisariaqanngitsumik pissaanermik atuisarnissaq pinngitsoorniarlugu, najugaqarfissatut neqeroorut iliuusissatut pilersaarummik saqqummiissasoq aammalu sulisut naleqquttumik ilinniarteqqinneqassasut, Nakkutilliinermik ingerlatsivik peqqussutigisinnaavaat.

Peqqussutip neqeroorummi tamatuma naammassinissaanut periarfissaqartumik iluseqartinnissaa tunngavissaritinneqarpoq. Peqqussut naammassiniarlugu neqeroorummi qanoq iliortoqassanersoq ersareqqissaassaaq. Tamanna ajornarpat, tamatumunnga taarsiullugu akuersissuteqarnerup utertinneqarnissaa pillugu aalajangiisoqassanersoq isumaliutersuutigineqartariaqarpoq.

Pissutsit peqqussuteqarnissamik pissutissaqalersitsisimasut aallaavigalugit peqqussutip naammassinissaanut piffissamut killissaliussap sivisussusissaanik, Nakkutilliinermik ingerlatsivik aalajangersaasinnaapput. Assersuutigalugu sulisoq najugaqarfissatut neqeroorummi najugaqartunut kinguaassiutitigut innarliisimappat, sulisoq taanna neqeroorummi atorfeqaqqusaajunnaassasoq, peqqussutigineqarsinnaavoq. Peqqussut taamaattoq ingerlaannaq naammassineqassaaq, aammalu tamanna malillugu piffissamut killissaliussaq aalajangersarneqarsinnaavoq. Sulisunik aalajangersimasunik piginnaasaqarfeqartunik atorfinitsitsinissamik peqqussuteqarnermi, pisariaqartunik piginnaasaqartunik sulisoqannginneq qanoq ilungersunartiginersoq apeqquataatillugu, piffissamut killiliussaq sivisunerutillugu aalajangersarneqarsinnaavoq.

Peqqussuteqarnerup naammassineqannginnera, neqeroorutip akuersissuteqarfigineqarnerata utertinneqarneranik, imaluunniit neqeroorutip akuersissuteqarfigineqarnerata, assersuutigalugu siunnerfigineqartunut tunngatillugu, allanngortinneqarneranik, malitseqarsinnaavoq.

Imm. 3-mut.

Imm. 3-mi aalajangersakkami siunnersuutigineqarpoq, najugaqarfissatut neqeroorutini ataasiakkaani pissutsit tamanna pisariaqartippassuk, sukannernerusumik nakkutilliinissaq pillugu Nakkutilliinermik ingerlatsivik aalajangiinnaassasoq.

Sukannernerusumik nakkutilliineq, piffissap aalajangersimasup taaneqartup iluani immikkut nassuiagaasumik annertuumik nakkutilliinissaq pisariaqartinneqartoq Naalackersuisunit naliliisoqartillugu, aalajangiinermut takussutissaavoq. Sukannernerusumik nakkutilliineq annertunerusumik nakkutilliinermut takussutissaavoq aammalu qanoq pisoqaraluarpalluunniit nakkutilliilluni takusaanerit amerlanerusut ingerlanneqarnerannik malitseqassalluni. Soorlu Nakkutilliinermik ingerlatsiviup ataatsimut isigalugu pissutsit malillugit nakkutilliinerit aaqqissuuttussaagaat, taamatuttaaq Nakkutilliinermik ingerlatsiviup sukannernerusumik nakkutilliineq pissutsit ataasiakkaatigut pisut malillugit, aammalu pissutsit sukannernerusumik nakkutilliinissamut pissutaasut malillugit aamma aaqqissuuttussaavaat.

Nakkutilliinermik ingerlatsivik sukannernerusumik nakkutilliinissaq pillugu aalajangiinermut atatillugu, aamma imm. 2-mi aalajangersagaq siunnersuutigineqartoq malillugu peqqussuteqarneq pillugu aamma aalajangiissasut, piumasaqaataavoq. Peqqussuteqarneq imarisamigut pissutsinut sukannernerusumik nakkutilliinissaq pillugu aalajangiinermik malitseqarsimasanut, ataqatigiissinneqassaaq aammalu sukannernerusumik nakkutilliinerup atorunnaarnissaanut, aamma najugaqarfissatut neqeroorutip akuersissutiminik tigumminiinnarnissaanut susoqartariaqarnerisooq najugaqarfissatut neqeroorummi ilisimaneqarnissaa, qulakkeerneqassalluni.

Nakkutilliinermik ingerlatsivik najugaqarfissatut neqeroorummi pissutsit aammalu suliniuteqarneq pillugu isumanerluuteqarpata, matuma siuliani taaneqartutut Nakkutilliinermik ingerlatsivik peqqussuteqarnissaq pillugu aammalu najugaqarfissatut neqeroorummut akuersissuteqarnerup atorunnaarsinneqarneranik malitseqarsinnaasumik aalajangiisariaqarlutik, aatsaat Nakkutilliinermik ingerlatsivik sukannernerusumik nakkutilliinissaq pillugu aalajangiinnaapput. Tamanna assersuutigalugu najugaqarfissatut neqeroorummi sulisut pinerlunnermut tunngasunik pinerluttuliorsimanerannik pasitsaassinermi pisinnaavoq, assersuutigalugu peqquserlunneq, persuttaaneq imaluunniit kinguaassiutitigut innarliineq, imaassinnaavoq sulisut siunnerfigineqartunut tunngasunik ilinniagaqarsimasutuaasut soraarsimasut, imaluunniit piffissap sivikitsup iluani naleqqutinngitsumik amerlasuunik pissaanermik atuisoqarsimasooq.

Aamma imaassinnaavoq Nakkutilliinermik ingerlatsivik najugaqarfissatut neqeroorutip pitsaassusaanik nalilersuinerminnut atatillugu naliliisut, pitsaassutsit appasittut najugaqarfissatut neqeroorutip najugaqarfissatut neqeroorutitut akuerisaanissamut piumasaqaatit naammassisimajunnaarsimallugit. Taamatut pisoqarnerani Nakkutilliinermik ingerlatsivik nalilersuissapput, najugaqarfissatut neqeroorutip piffissap naleqquttup iluani piumasaqaatinik naammassinissinnaalernissaa ilimanaateqarnerisooq, imaluunniit

tamatumunnga taarsiullugu pissutsinut ingerlaannaq qisuariarneq tassaasariaqarluni akuersissuteqarnerup tunuartinneqarnissaanut suliamik aallartitsisoqartariaqartoq.

Sukannernerusumik nakkutilliinissaq pillugu aalajangiinissaq sioqqullugu Nakkutilliinermik ingerlatsivik aamma najugaqarfissatut neqeroorut pissutsit sukannernerusumik nakkutilliineq pillugu aalajangiinissamut tunngaviusut, oqaloqatigiissutigisariaqarpaat. Taamaattoq assersuutigalugu pissutsit pinerlunnermut tunngasut pillugit tassanngaannartumik ilisimasaqalerneq tunngavigalugu aalajangiisoqarpat, tamanna atuutissanngilaq.

Nakkutilliinermik ingerlatsivik ataatsimut isigalugu pissutsit malillugit nakkutilliinerminnik aaqqissuussisussaanerattut, Nakkutilliinermik ingerlatsivik aamma pissutsit aalajangersimasut malillugit aammalu pissutsit sukannernerusumik nakkutilliinissaq pillugu aalajangiinissamut pissutaasut malillugit, sukannernerusumik nakkutilliinissaq aaqqissuutissavaat. Taamaattoq sukannernerusumik nakkutilliineq qanoq pisoqaraluarpalluunniit, annertunerusumik nakkutilliinissamut takussutissaavoq, aammalu qanoq pisoqaraluarpalluunniit nakkutilliilluni takusaanerit aammalu paasissutissanik amerlanerusunik piniarnerit ingerlanneqarnerannik malitseqartussaalluni.

Imm. 4-mut.

Nakkutilliinermik ingerlatsivik najugaqarfissatut neqeroorummi pissutsinik isumanerlunnartunik aammalu inuit kalluarneqarsinnaanerannik misigisaqarunik, kommunalbestyrelsit, inuit ataasiakkaat najugaqarfissatut neqeroorummiinnerannut akisussaasuusut ilisimatinnissaannut Nakkutilliinermik ingerlatsivik pisussaaffeqarnerat atuutsinneqalissasoq, *imm. 4*-mi aalajangersakkami siunnersuutigineqarpoq. Tamanna assersuutigalugu najugaqarfissatut neqeroorummi pissutsit, najugaqarfissatut neqeroorummut tunngatillugu sukannernerusumik nakkutilliinissaq pillugu Nakkutilliinermik ingerlatsivik aalajangiinermannik malitseqarsimasut, pillugit paasissutissiinikkut, pisinnaavoq. Paasissutissat Nakkutilliinermik ingerlatsivimmit kommunimut inuup najugaqarfissatut neqeroorummiinnissaa pillugu aalajangiisimasumut ilisimatitsinermi ilaatinneqartut, amerlanertigut tassaassapput neqeroorummi pissutsit nalinginnaasut, kisianni aamma inuup nammineq inuttut atugai pillugit paasissutissaasinnaallutik.

Pisut tassaasinnaapput, pissutsit isumanerlunnartut Nakkutilliinermik ingerlatsiviup misigisaa, nalinginnaasunut tunngassuteqartut, aammalu assersuutigalugu najugaqarfissatut neqeroorutip sukannernerusumik nakkutigineqarnissaanut pissutissaqalersitsisimasut. Pisuni taakkunani paasissutissat kommunalbestyrelsinut, najugaqarfissatut neqeroorummiinnissamik innuttaasup neqeroorfigineqarnissaa pillugu aalajangiisimasunut tamanut attuumassuteqassapput. Kisianni aamma tassaasinnaapput paasissutissat kommunalbestyrelsinut aalajangersimasunut taamaallaat attuumassuteqartut, assersuutigalugu najugaqarfissatut neqeroorummi immikkoortortaqarfimmi aalajangersimasumi ajornartorsiutinut tunngassuteqartut.

Taamaalilluni aalajangersakkami siunertaasoq pingaarneq tassaavoq, Nakkutilliinermik ingerlatsiviup neqeroorut pillugu ilisimasaasa kommunalbestyrelsimut, innuttaasup najugaqarfissatut neqeroorummiinnissaa pillugu aalajangiisimasumut tunniunneqarnissaasa qulakkeerneqarnissaat, taamaalilluni kommunalbestyrelsip taassuma inummut sammisumik nakkutilliinerminut atatillugu pissutsit taakkua sillimaffigisinnaassallugit. Paasissutissat, innuttaasup najugaqarfissatut neqeroorummi inissisimanera eqqortuunersoq nalilersornissaanut, kommunalbestyrelsip atorsinnaavai.

Imm. 5-imut.

Imm. 5-imi siunnersuutigineqarpoq, Nakkutilliinermik ingerlatsivik qaqugukkut imm. 2 malillugu aalajangiisinnaanersut aammalu imm. 3 malillugu sukannererusumik nakkutilliinerup aallartinneqarnissaa pillugu aalajangiisassanersut, pillugu maleruagassanik erseqinnerusunik aalajangersaanissamut, Naalakkersuisut piginnaatinneqassasut.

§ 17-imut

Aalajangersagaq nutaajuvoq.

Imm. 1-imut.

Imm. 1-imi aalajangersakkami aalajangersarneqarpoq, Naalakkersuisut nuna tamakkerlugu inunnik innarluutilinnik sullissivimmik, kommunalbestyrelsit kiisalu inuit innarluutillit taakkualu qanigisaasa, ilaatigut siunnersuinerup, ilitsersuinerup aamma inuit innarluutillit allanngutsaaliuilluni sungiusarneqarnissaasa iluanni suliaasaqarfinni arlalinni erseqqinnerusumik aalajangersagaasuni, sullinneqarnissaannik suliaqartussamik, pilersitsissasut ingerlatsissasullu.

Imm. 1-imi atuuffiit, nuna tamakkerlugu inunnik innarluutilinnik sullissiviup isumagisassatut pisussaaffigisai, arlallit allattorneqarput.

Nr. 1-imut

Imm. 1, nr. 1, malillugu, inuit innarluutillit taakkualu qanigisaat nuna tamakkerlugu inunnik innarluutilinnik sullissivimmut siunnersorneqarnissami ilitsersorneqarnissamillu ujartuisinnaapput. Aalajangersagaq manna malillugu siunnersuinermi ilitsersuinermilu, ilaatigut inatsit manna aamma inatsisit allat paasineqarnissaat imaluunniit atorneqarnissaat pillugit saaffiginnissutit pineqartunut ilaapput.

Nr. 2-mut

Siunnersuineq ilitsersuinerlu nuna tamakkerlugu inunnik innarluutilinnik sullissiviup kommunalbestyrelsimut imm. 1, nr. 2, malillugu sullississutigisinnaasaa, assersuutigalugu Inatsisartut inatsisaanni matumani aalajangersakkat nassuiarneqarnerannut imaluunniit atuuffissaannut, tunngassuteqarsinnaavoq, ilanngullugu aamma Inatsisartut inatsisaata inatsisinut allanut ataqatigiinneranut atatillugu.

Nr. 3-mut

Nuna tamakkerlugu inunnik innarluutilinnik sullissivik inuit innarluutillit, timikkut imaluunniit tarnikkut piginnaanikillisisimaneq pissutigalugu tamatumunnga pisariaqartitsisut, timikkut imaluunniit tarnikkut pikkoriffimminnik allanngutsaaliuinerannut ikiorsiinissamik neqerooruteqassaaq. Neqeroorutit ataasiakkaatigut aalajangersimasumik nalilersuineq malillugu neqeroorutigineqassapput aammalu timikkut imaluunniit tarnikkut piginnaanikillisisimanagerup malittai annertuut ikiorsiiviginissaannut iluaqutaassallutik. Allanngutsaaliuilluni sungiusarnissamik neqeroorfigineqassapput, timikkut imaluunniit tarnikkut pikkoriffiit allanngutsaaliorsinnaanissat siunertaralugu aammalu ulluinnarni sapinngisamik pitsaasumik piginnaasaqalernissaq anguniarlugu, inuit ataasiakkaarlutik sungiusarnissamik pisariaqartitsisut.

Nr. 4-mut

Nuna tamakkerlugu inunnik innarluutilinnik sullissivik innarluuteqarneq aammalu inunnut innarluutilinnut tapersiisarneq pillugu, kiisalu inunnut innarluutilinnut tunngasut pillugit ilisimasanut nalinginnaasunut, ilisimasaaqarfittut atuutissaaq, ilaatigut sullissiviup siunnersuineramik atuartitsinermillu suliaqarnissaata tunngavissinnissaa siunertaralugu, nr. 1-2 aamma nr. 6 naapertorlugit.

Nr. 5-mut

Nuna tamakkerlugu inunnik innarluutilinnik sullissivik, inuit innarluutillit taakkualu qanigisaasa, ikiorserneqarnissaat siunertaralugu, inuup innarluuteqarnerata malitsigisaanik aporfiit anigorniarnissaannut, aammalu sapinngisamik, inuit innarluutillit inuiaqatigiinni naligiimmik periarfissaqarnissaat kiisalu innarluuteqarneq pissutigalugu assigiinngisitsinermik pineqarsinnaanerup akerlilernerneqarnissaa, tassuuna sapinngisamik tamatigut sunniuteqarluartumillu inuiaqatigiinni peqataatinneqarnissaat ilanngunneqarnissaallu qulakkeerniarlugu, pikkorissaanernik neqerooruteqassaaq. Pikkorissaanerit ilaatigut tapersiissutitut iliuusissat atorneqarnissaannut tunngassuteqarsinnaapput, imaluunniit innarluuteqarneq pillugu nalinginnaasumik paasinninnissamat tunngassuteqarsinnaalluni. Nuna tamakkerlugu inunnik innarluutilinnik sullissivik tamatuma saniatigut kommunini sulisunik ilinniartitsilluni pikkorissaasinnaavoq.

Nr. 6-imut

Nuna tamakkerlugu inunnik innarluutilinnik sullissiviup, kommunit ilisimasanik imaluunniit ilinniarsimasunik isumalluutinik, qulaajaanerup ingerlannissaanut pisariaqartunik, peqarsimanggippat, immikkut pisuni, kommune qulaajaanerup ingerlannissaanut ikiorsinnaavaa. Oqaatigineqassaaq, suliatut immikkut pisariusutut suut isigineqarnersut, kommunimi pineqartumi isumalluutaasut aallaavigalugit nalilersorneqassammat.

Nr. 7-imut

Ulloq unnuarlu neqeroorut inuup innarluutillip ulloq unnuarlu neqeroorummiinnerata unitsinneqarnissaa pillugu kommunalbestyrelsip aalajangiinera akerlilerlugu

oqaaseqaateqarpat, nuna tamakkerlugu inunnik innarluutilinnik sullissivik pissutsinik nalilersuilluni oqaaseqaateqassaaq, § 70 imm. 2 naapertorlugu.

Nuna tamakkerlugu inunnik innarluutilinnik sullissivimmit oqaaseqaat kommunalbestyrelsimut pisussaaffiliinngilaq. Ulloq unnuarlu neqeroorut isumaqanngippat ulloq unnuarlu neqeroorummiinneq unitsinneqartariaqartoq, taamaallaat kommunalbestyrelsip sullissivimmit oqaaseqaammik piniarnissamik pisussaaffeqarpoq. Taamaalilluni sullissiviup oqaaseqaataa apeqqutaatinnagu, angerlartitsinissaq pillugu kommunalbestyrelse aalajangiisinnaavoq. Kommunalbestyrelsip aalajangiinera naammagittaalliuutigineqassappat, sullissiviup oqaaseqaataa pingaaruteqartutut ilaatinneqartariaqarpoq.

Imm. 2-mut.

Imm. 2 Naalackersuisut kommunalbestyrelsip nuna tamakkerlugu inunnik innarluutilinnik sullissivimmit atuineranut akiliisarnissamut maleruagassanik aalajangersaasinnaaneranut, inatsimmi tunngavissamik, imaqarpoq.

§ 18-imut

Aalajangersagaq nutaajuvoq.

Imm. 1-imut.

Imm. 1-imi aalajangersarneqarpoq, nuna tamakkerlugu inunnik innarluutilinnik sullissiviup suliami aalajangersimasumi kommunalbestyrelsimut siunnersuineranut ilaatillugu, paasissutissat suliap suliarineqarneranut pingaaruteqarpata, kommunalbestyrelsip paasissutissat inummut tunngasut nuna tamakkerlugu inunnik innarluutilinnik sullissivimmut ingerlateqqissinnaagai, ilanngullugit paasissutissat inummut tunngallutik mianernartut. Tamanna siunnersuineq pillugu suliani taamatullu allanngutsaaliuilluni sungiusaaneq pillugu suliani naleqqussinnaavoq. Paasissutissat suliamut pingaaruteqartut kisimik ingerlateqqinneqarsinnaapput.

Imm. 2-mut.

Imm. 2-mi erseqqissarneqarpoq, paasissutissanik inummut tunngasunik ingerlatitseqqiinermi, ilanngullugit pingaartumik paasissutissat inummut tunngallutik mianernartut, aallaaviatigut inummit innarluutilimmit, taassuma angajoqqaatut sinniisuanit imaluunniit angajoqqaatut akisussaasuinit akuersissummik pinissaq pisariaqartoq. Inatsisartut inatsisaat manna paasissutissat inummut tunngasut suliarineqartarnerat pillugu inatsisip Kalaallit Nunaanut atuutsinneqalernissaa pillugu peqqussummi §§ 6-imi aamma 7-imi paasissutissat inummut tunngasut suliarineqartarnera pillugu maleruagassani pineqartunut ilaanera, aalajangersakkami erseqqissarneqarpoq.

Imm. 3-mut.

Imm. 3-mi, imm. 2 naapertorlugu akuersinissaq pillugu piumasaqaammi ilaatinneqanngitsut, aalajangersarneqarput. Ilaatitsinnginnermi, Inatsisartut inatsisaat manna paasissutissat

inummut tunngasut suliarineqartarnerat pillugu inatsisip Kalaallit Nunaannut atuutsinneqalernissaa pillugu peqqussummi §§ 6-imi aamma 7-imi paasisutissat inummut tunngasut suliarineqartarnerat pillugu maleruagassani pineqartunut ilaasoq, erseqqissarneqarpoq.

§ 19-imut

§ 19-imi aalajangersakkat siunnersuutigineqartut, inunnut innarluutilinnut nalinginnaasumik siunnersuisarnermut tunngassuteqarput.

Imm. 1-imut.

Imm. 1-imi aalajangersakkami siunnersuutigineqarpoq kommunalbestyrelse inunnut innarluutilinnut siunnersuissasoq. Aalajangersagaq malillugu siunnersuineq, ataasiakkaat ulluinnarni aporfiit, inuup innarluuteqarnerata malitsigisaasa, anigorniarnissaannut periarfissaasa nukittorsarneqarnissaannik siunertaqassaaq.

Inuup innarluutillip aalajangersagaq malillugu siunnersorneqarnissamik pisinnaatitaaffeqarneranut, inuk siunnerfigineqartuni ilaassasoq imaluunniit Inatsisartut inatsisaat malillugu tapersiivigineqarnissamik imaluunniit immikkut ittumik tapersiivigineqarnissamik pisariaqartitsissasoq, piumasaqaataanngilaq. Inuup inatsisartut inatsisaanni § 7, imm. 2-mi nassuiarneqartumik innarluuteqarnera, aammalu inuup ulluinnarni innarluuteqarnermi malitsigisaanik aporfeqartarnermik misigisaqartarnera, naammapput.

Siunnersuinissamik pisariaqartitsinerup annertussusaata nalilersornissaa kommunalbestyrelsip pisussaaffigaa aammalu periarfissat kommunimi atuuttut imaluunniit oqartussat allat suleqatigalugit periarfissaatinneqalersinnaasut naliliiffigineqarnerat aallaavigalugu siunnersuineq qanoq aaqqissuunneqassanersoq isummerfigisussaallugu.

Siunnersuineq paasisutissani ataasiakkaaniissinnaavoq, inuk oqaloqatigineqarsinnaavoq, suliassatigut ajornartorsiuteqarnerani ikiuunnerusinnaavoq, oqartussanut allanut attaveqartitsinermiissinnaavoq, imaluunniit pisariaqartitsineq apeqqaalluni ingerlaavartumik attaveqatigiittarnissaq pineqarsinnaalluni.

Imm. 2-mut.

Imm. 2-mi aalajangersakkami siunnersuutigineqartumi erseqqissarneqarpoq, imm. 1 malillugu siunnersuineq immikkoortutut ikiorsiissutaasinnaasoq imaluunniit Inatsisartut inatsisaat malillugu imaluunniit inatsisit allat malillugit tapersiinissamut imaluunniit immikkut ittumik tapersiinissamut atatinneqarsinnaalluni.

Imm. 3-mut.

Imm. 3-mi siunnersuutigineqarpoq, siunnersuineq, inuup tamanna kissaatigippagu, kinaassuseq taanagu ikiorsiissutigineqarsinnaasoq. Taamaattoq inuup Inatsisartut inatsisaat malillugu tapersiivigineqarneranut imaluunniit immikkut ittumik tapersiivigineqarneranut

atatillugu siunnersuineq ingerlanneqarpat, kinaassuseq taanagu siunnersorneqarnissaq periarfissaassanngilaq. Tamatumunnga pissutaavoq, siunnersuinerup imarisaa aammalu paasissutissat siunnersuinerup nalaani inuup saqqummiussai, inuup tapersiivigineqarnissamik pisariaqartitsinerata aammalu pissutsit tassunga tunngasut kommunalbestyrelsimit nalilersorneqarnissaannut pingaaruteqarsinnaanerat.

§ 20-mut

§ 20-mi aalajangersakkat siunnersuutigineqartut Inatsisartut inatsisaanni § 25 malillugu inunnut innarluutilinnut atortunik ikiuutaasussanut tunngatillugu siunnersuinermut tunngassuteqarput.

Imm. 1-imut.

Imm. 1-imi siunnersuutigineqarpoq, inuit innarluutillit atortunik ikiuutaasussamik toqqaanissaq pillugu siunnersuinissamik neqeroorfiginissaannut, kommunalbestyrelse pisussaaffeqartoq. Kommunalbestyrelse aammattaaq atortut ikiuutaasussat, inuup tigoreerpagit, atorneqarnissaannut ilitsersuinissamik neqerooruteqassaaq.

Inunnut annertuumik innarluutilinnut ikiorsiisarneq pillugu Inatsisartut inatsisaanni § 6-imi aalajangersagaq atuuttoq malillugu, atortunut ikiuutaasussanut atatillugu kommunalbestyrelsip siunnersuinissamut pisussaaffeqarnerata, erseqqissarneqarnissaa, aalajangersakkami tassani siunertaavoq.

Imm. 2-mut.

Imm. 2-mi siunnersuutigineqarpoq kommunalbestyrelse imm. 1 malillugu siunnersuinermik suliassaminik isumaginninnissamut nuna tamakkerlugu inunnik innarluutilinnik sullissivimmi ilitsersorneqarsinnaasoq. Kommunalbestyrelsip saaffiginnittarneranut imaluunniit nuna tamakkerlugu inunnik innarluutilinnik sullissiviup ilitsersuineranut ilusiliussassanut piunasaqaateqartoqassasoq naatsorsuutigineqanngilaq. Kisiannili ilitsersuinerup ilusaa, suliat ataasiakkaat eqqarsaatigalugit suut naleqqunnersut malillugu, aqqissuunneqassalluni.

§ 21-imut

§ 21 siunnersuutigineqartoq kommunalbestyrelsip pikkorissaanerni aamma atuartitsinerni peqataanissamik neqerooruteqarnissamik pisussaaffeqarneranut tunngassuteqarpoq.

Imm. 1-imut.

Imm. 1-imi aalajangersakkami siunnersuutigineqarpoq, inuup ulluinnarni innarluutiminik passussisinnaanerulernissaa siunertaralugu, kommunalbestyrelsip inuit innarluutillit pikkorissaanerni, atuartitsinerni il.il. peqataanissamik neqeroorfigissagai. Pikkorissaanerit, atuartitsinerit il.il. suut ilaatigut inuit ataasiakkaat innarluutaannut naleqqunnersut apeqqutaatinneqassapput. Aalajangersakkap annertussusaa assersuutigalugu tassaapput sapiillinissamut pikkorissaanerit aamma Braillemik atuartitsineq. Aalajangersakkami aamma, ilimagineqarpat taamatut ingerlataqarnermi inuup ulluinnarni inuunini

ingerlassinnaanerulissagaa, siunnersortimit ikiorneqarnissaq ilaatinneqarpoq. Pikkorissaanerit atuartitsinerillu kommunalbestyrelsip nammineerluni aaqquissuussinnaavai ingerlassinnaallugillu, kisianni kommunalbestyrelse aamma pilersuisunut namminersortunut, Nuna tamakkerlugu inunnik innarluutilinnik sullissivimmu il.il., isumaqatigiissuteqarsinnaavoq.

Imm. 2-mut.

Imm. 2-mi siunnersuutigineqarpoq kommunalbestyrelse inummut innarluutilimmut pikkorissaanerni, atuartitsineri il.il. imm. 1-imi pineqartunut ilaasuni, peqataanissamut aningaasaqarnikkut tapersiisinnaassasoq. Taamaalilluni piumasaqaataavoq, pikkorissaanermik imaluunniit atuartitsinerimik suliaqarneq, aningaasaqarnikkut tapersiivigineqartoq, inummut ulluinnarminik passussisinnaanerulersitsissasoq, ilimagineqartariaqartuussasoq. Pikkorissaanermut akiliummut, angalanermut unnuinermullu kiisalu sulineri aningaasarsiassat annaaneqartussat matussusernissaannut, aningaasartuutini tamakkiisumik ilaannaasumilluunniit matussutissanik, aningaasaqarnikkut tapersiisoqarsinnaavoq.

Imm. 3-mut.

Imm. 3-mi aalajangersagaq siunnersuutigineqartoq malillugu kommunalbestyrelse nuna tamakkerlugu inunnik innarluutilinnik sullissivimmi pikkorissaanerit atuartitsinerlu pillugit ilitserorneqarnissamik piniarsinnaavoq. Assersuutigalugu pikkorissaanernik atuartitsinerimillu neqeroorutissat, aammalu pikkorissaanerit atuartitsinerillu suut innuttaasumut aalajangersimasumut naleqqutissanersut, pillugu ilitserorneqarnissaq piniarneqarsinnaavoq.

§ 22-mut

§ 22-mi siunnersuutigineqarpoq, Inatsisartut inatsisaanni, inunmut innarluutilinnut qanigisaasunut siunnersuisarneq, ilanngullugu atortulersuutit ikiuutaasussat atorneqarnissat kiisalu pikkorissaanernerit atuartitsinerillu immikkuullarissumik nassuiarneqassasut. Naliliisoqarpoq inummut innarluutilimmut qanigisaasut inissisimanertik pillugu, qanigisaasut siunnersorneqarnissamik, pikkorissaanernik il.il. pisariaqartitsisinnaasut. Periarfissaq taanna, § 22-mi nassuiarneqassasoq siunnersuutigineqarpoq.

Kikkut inummut innarluutilimmut qanigisaasut isigineqarsinnaanersut, suliami aalajangersimasumi ataasiakkaatigut naliliineq apeqqutaassaaq. Naliliinermi inummut innarluutilimmut pissusiviusuni atassuteqarneq pingaartinneqassaaq. Aammattaaq isumassuineri inissisimaneq atuuffiillu, pineqartup inummut innarluutilimmut attuumassuteqarfii, pingaartinneqassapput. Taamaalilluni aallaaviatigut pineqartoq aammalu inuk innarluutilik imminnut atassuteqavittuussapput, akuttunngitsumik attaveqatigiittarlutik. Taamaattoq qanigisaasup oqaatsit atorneqarnera ikittuinnarnut tunngatillugu nassuiarneqartariaqanngilaq.

Imm. 1-imut.

Imm. 1-imi aalajangersakkami siunnersuutigineqartumi allassimavoq, kommunalbestyrelse inunnut innarluutilinnut qanigisaasunut siunnersuissasoq. Siunnersuinermit siunertaavoq, ilaatigut qanigisaasut innarluutaasoq aalajangersimasoq pillugu ilisimasaqarnerulernissaannut iluaqusiinissaq, ilaatigut qanigisaasut inuup innarluutillip ulluinnarni inooqatiginerani ingerlalluarnersinnaanissamut tapersorsorneqarnissaat. Siunnersuinerup ilaa tassaasinnaavoq inummut innarluutilimmut qanigisaasutut misigissutsinik suliarinninneq.

Imm. 2-mut.

Imm. 2-mi siunnersuutigineqarpoq, kommunalbestyrelse qanigisaasup tapersorsornissaa aammalu taassuma inummik innarluutilimmik ulluinnarni ikiuunnissamut piginnaasaqarfiinik nukittorsaanissaq siunertaralugu, inunnut innarluutilinnut qanigisaasut pikkorissaanerit atuartitsinernilu il.il. peqataanissaannik neqerooruteqassasoq. Pikkorissaanerit, atuartitsinerit il.il. suut naleqqunnersut, ilaatigut qanigisaasup inissisimanera kiisalu innarluutit suut pineqarnersut, kisiannili aamma neqeroorutaasut, apeqqutaassapput. Tamanna pingaartumik angajoqqaanut innarluutilimmik meeralinnut, kiisalu inunnut, assersuutigalugu qaratsamigut aanaartorneq pissutaalluni, qanittumi innarluuteqalersimasunut qanigisaasunut, naleqqutissaaq. Pikkorissaanerit atuartitsinerillu kommunalbestyrelsip nammineerluni aaqquissuussinnaavai ingerlassinnaallugillu, kisianni kommunalbestyrelse aamma pilersuisunut namminersortunut, nuna tamakkerlugu inunnik innarluutilinnik sullissivimmut il.il., isumaqatigiissuteqarsinnaavoq.

Imm. 3-mut.

Imm. 3-mi aalajangersagaq siunnersuutigineqartoq malillugu kommunalbestyrelsip Inatsisartut inatsisaat manna malillugu imaluunniit inatsisit allat malillugit qanigisaasut ikiorserneqarnissamik pisariaqartitsinersut, imm. 1 malillugu siunnersuinerminut imaluunniit imm. 2 malillugu pikkorissaanerit atuartitsinernullu atatillugu, eqqumaffigissavaa. Tamanna pingaartumik tassaassaaq § 33-mi aalajangersagaq siunnersuutigineqartoq malillugu angerlarsimaffimmi meeqqamik innarluutilimmik pilersuinermit aningaasartuutaanerusunik matussusiinissamik, § 35-imi aalajangersagaq siunnersuutigineqartoq malillugu oqilisaassinissamik imaluunniit § 42-mi aalajangersagaq siunnersuutigineqartoq malillugu nuunnermit ikiorserneqarnissamik, pisariaqartitsineq. Kommunalbestyrelse naliliippat, Inatsisartut inatsisaat manna malillugu tapersiivigineqarnissaq imaluunniit immikkut ittumik tapersiivigineqarnissaq pisariaqartinneqarsinnaasoq, kommunalbestyrelsip tamanna pillugu aalajangiinissaq siunertaralugu suliasamik suliarinninneq aallartissavaa. Inatsisit allat malillugit pisariaqartitsisoqarsimasinnaappat, qanigisaasup kommunimi ingerlatsivik eqqortoq imaluunniit oqartussaasoq eqqortoq qanoq ililluni attaveqarfigisinnaaneraa, qanigisaasup ilitersorneqarnissaa kommunalbestyrelsip isumagissavaa.

§ 23-mut

§ 23-mi nutaajusumi aalajangersakkami siunnersuutigineqartumi, kommunalbestyrelsip kapitali 6 malillugu inunnut innarluutilinnut tapersiissutigisinnaaneraa, killissaliussat

pingaarnertit aalajangersarneqarput. Aalajangersakkat kapitali 6 malillugu tapersiinissamut periarfissanut tamanut tunngassuteqarput.

Imm. 1-imut.

Imm. 1-imi siunnersuutigineqarpoq, inuup pisariaqartitsineranut tamanna pingaaruteqartutut isigineqartariaqarpat, Inatsisartut inatsisaanni kapitali 6 malillugu tapersiinissaq pillugu kommunalbestyrelse aalajangiissasoq. Innuttaasup, taassuma suliami sinniisaata qinnuteqarneratigut imaluunniit kommunalbestyrelsip nammineq ingerlataanik aalajangiisoqarsinnaavoq. Aammattaaq tapersiivigineqarnissamut aalajangersimasumik iluseqartumut piumasaqaatit, taperseeriaaseq pillugu aalajangersakkani ataasiakkaani nassuiarneqartut, aalajangersimasumik iluseqartumik tapersiivigineqarnissamut, naammassineqarsimassasut, piumasaqaataavoq. Tapersiineq inuup pisariaqartitaannut annertuumik pingaaruteqassasoq pillugu piumasaqaatip kingunerisaanik, pisariaqartitsineq sunaluunniit tapersiinermik kinguneqartussaannigilaq. Piumasaqaatigineqarpoq tapersiineq annertumik pingaaruteqarnerisooq nalilersuineq, ilaatigut inuit ataasiakkaat tapersiivigineqarnissamik pisariaqartitsinerat, ilaatigut tapersiinerup aalajangiiffigineqartussap suussusaa, aallaavigalugu pisassasoq. Peqatigisaanik erseqqissarneqassaaq, inuit ataasiakkaat inissisimanerannik nalilersuineq, tapersiinissamut periarfissanut Inatsisartut inatsisaanniittunut sanilliullugu, tamanna siunertaqartutut isigineqartariaqarpat kommunalbestyrelsip tapersiinissamik periarfissaarutsinninnissaanut, sapinngisamik tunngavissarititaasumi siunertaasoq periarfissaqartitsissasoq. Kiisalu kapitali 6 malillugu tapersiivigineqarnissamut tunngavissatut piumasaqaataavoq, inuk innarluuteqassasoq inatsisartut inatsisaanni § 7, imm. 2-mi aalajangersakkami siunnersuutigineqartumi nassuiarneqarsimasutut.

Imm. 2-mut.

Imm. 2-mi aalajangersakkami siunnersuutigineqartumi aalajangersarneqarpoq, inuk innarluutilik inuup pisariaqartitaannik piginnaasaqarneranillu aalajangersimasumik ataasiakkaatigullu nalilersuineq tunngavigalugu tapersiivigineqassanersoq, kommunalbestyrelse aalajangiissasoq. Nalilersuinerup ilaatut siullertut, inuk innarluuteqarnerisooq aallaaviatigut paasinarsisinneqassaaq. Nalilersuineq taanna Inatsisartut inatsisaanni § 7, imm. 2-mi innarluuteqarnerup nassuiaassutaa aallaavigalugu pissaaq. Inuk innarluuteqarnerisooq nalilersuineq, pisariaqartunit annertunerussanngilaq. Inuup innarluutaa ersarissuusinnaavoq, assersuutigalugu inuk avatiminik ataatsimik arlalinnilluunniit amigaateqarluni. Pisuni taamaattuni annertunerusunik misissuinissaq pisariaqanngilaq. Pisuni allani inuup oqaloqatigineqarnera, imaluunniit inuup nakorsap nalunaarutaanik, immaqa allanut atatillugu piniarneqarsimasumik, saqqummiisimanagera, naammassinnaavoq. Pisuni allani nakorsamit imaluunniit allanit misissortinnerit pisariaqassapput. Erseqqissarneqarpoq, inuup innarluuteqarnera imminermini Inatsisartut inatsisaat malillugu tapersiivigineqarnissamut piginnaatitsiviunngimmat.

Naliliisoqarpat inuk innarluuteqanngitsaq, inuk Inatsisartut inatsisaat malillugu tapersiivigineqarsinnaangilaq. Kommunalbestyrelse taamaalilluni innarluuteqannginneq tunngavigalugu, allanik nalilersuinani, aalajangiisnaavoq.

Kommunalbestyrelse naliliippat, inuk innarluuteqartoq, kommunalbestyrelse tulliullugu inuup innarluuteqarnermi tunngavilersugaasumik tapersiivigineqarnissamik pisariaqartitsineranik, kiisalu tapersiinerup qanoq annertussusillip aammalu tapersiinerup qanoq ittup inuup tapersiivigineqarnissamik pisariaqartitsineranik naammassinnissinnaaneramik, nalilersuisoqassaaq. Nalilersuineq taanna pisut ilaanni pisariitsuussaaq, assersuutigalugu inummut tappiitsumut tappiitsunut ajaappiamik tapersiivigineqarnissamik pisariaqartitsisoqartoq naliliinermi. Pisuni allani, inuk paasiniaaffiusumik arlalinnik oqaloqatigineqarluni aammalu immaqa sulianut ilisimasallit nalilersuinerannik piniartoqarluni, annertunerusumik nalilersuinissaq pisariaqartinneqarsinnaavoq. Aalajangiinissamut qaqugukkut naammattumik tunngavissaqalissanersaq, tamatigut suliani ataasiakkaani aalajangersimasunut nalilersuineq apeqquasussaavoq. Nalilersuineq pisariaqartunit annertunerussanngilaq.

Imm. 3-mut.

Imm. 3-mi siunnersuutigineqarpoq, kommunalbestyrelsip tapersiinissaq pillugu aalajangiinnginnerani kommunalbestyrelsip inuk oqaloqatigisimassagaa. Meeraasimappat, angajoqqaatut akisussaasut oqaloqateqarnermi peqataasimassapput. Taamatuttaaq inuk nakkutigineqartoq pineqarsimappat, angajoqqaatut sinniisuusut oqaloqateqarnermi peqataasapput. Oqaloqateqarneq §§ 74-imi aamma 75-imi aalajangersakkat malillugit ingerlanneqassaaq. Suliap qanoq issusaa apeqquaatalluni oqaloqateqarnermi, suliamut attuumassuteqartup tusarniaaffigineqarnissaa pillugu piumasaqaat naammassineqassaaq. Annertunertigut §§ 74-imi aamma 75-imi aalajangersakkanut ataasiakkaanut nassuiaatit innersuussutigineqarput.

Imm. 4-mut.

Imm. 4-mi erseqqissarneqarpoq, aalajangiinerni tunngavilersuinissaq kiisalu aalajangiinerni aalajangiiffigineqartut tamakkerlugit akuersarneqanngippata, naammagittaalliornissamik ilitsersuinissaq pillugit pisortat ingerlatsinerannut inatsisini nalinginnaasuni piumasaqaatit, Inatsisartut inatsisaanni kapitali 6 malillugu tapersiinissaq pillugu kommunalbestyrelsip aalajangiinerinut atuutissasut.

Imm. 5-imut.

Imm. 5-imi siunnersuutigineqarpoq, kapitali 6 malillugu tapersiinissaq pillugu aalajangiisooqareerpat, tapersiinermi siunertaasooq naammassineqarsimaannarnersaq kommunalbestyrelsip ingerlaavartumik malinnaaffigissagaa. Kommunalbestyrelsip ingerlaavartumik malinnaanermi, innuttaasooq Inatsisartut inatsisaat malillugu imaluunniit inatsisit allat malillugit allatut ittumik tapersiivigineqarnissamik pisariaqartitsinersaq, eqqumaffigissallugu pisussaaffigaa. Naliliisoqarpat Inatsisartut inatsisaat manna malillugu

allatut tapersiivigineqarnissaq pisariaqartinneqarsinnaasoq, kommunalbestyrelsi tapersiinnissamik pisariaqartitsineq paasiniarlugu suliassamik suliarinnineq aallartissavaa aammalu aalajangiissalluni. Suliassamik suliarinninnerup aallartinnissaanut pisussaaffeqarneq kommunalbestyrelsimiippoq, aammalu innuttaasoq pisortatigoortumik qinnuteqaammik tunniussissasoq, piomasqaataangilaq. Taamaattoq suliap ingerlanerani aammalu suliassamik suliarinninnerup aallartivinnginnerani, innuttaasup tapersiivigineq pineqartutut iluseqartuq kissaatigineeraa, siusissukkut paasiniarneqassaaq. Naliliisoqarpat innuttaasoq inatsisit allat malillugit tapersiivigineqarnissamik pisariaqartitsisimasinnaasoq, innuttaasup pisariaqartitsinera apeqqutaalluni, innuttaasup oqartussaasoq eqqortoq attaveqarfiginissaata, imaluunniit oqartussaasup eqqortup tapersiivigineqarnissamik pisariaqartitsisimasinnaanera pillugu attaveqarfigineqarnissaata qulakkeernissaanut, kommunalbestyrelse pisussaaffeqarpoq. Oqartussaasoq aalajangiisnnaatitaasoq kommunimi ingerlatsivimmi allamiinnera imaluunniit kommunip avataani oqartussaasuunera apeqqutaatinnagu, pisussaaffeqarneq taanna atuuppoq.

Tapersiineq qanoq akulikitsigisumik malinnaavigineqassanersoq, erseqqissunik killissalersorneqarsinnaangilaq. Akulikissusissaa, innuttaasut ataasiakkaat tapersiivigineqarnissamik pisariaqartitsinera aammalu tapersiinerup suussusaa tunngavigalugit, aalajangersarneqassaaq. Taamaalilluni assersuutigalugu innuttaasoq ataavartumik allanngoranngitsumillu innarluuteqartoq, assersuutigalugu tappiitsut ajaappiaanik atortumik ikiuutaasussamik ikiorserneqarsimappat, akulikitsumik malinnaanissaq piomasqaatigineqartussaangilaq. Pisumi tassani innuttaasup tapersiivigineqarnissamik pisariaqartitsinera akulikitsumik allanngortassasoq, naatsorsuutigineqarsinnaangilaq. Illuatungaartigut inuk skizofrenimik innarluutilik, ingiaqateqartarnissamik ikiorserneqarsimasoq, akulikitsumik malinnaavigineqarnissamik pisariaqartitsisinnaavoq. Malinnaanerup ilusissaanut piomasqaateqanngilaq. Taamaalilluni malinnaaneq assersuutigalugu tapersiinerup ikiorsiissutigineqarneranut atatillugu, inuup aamma suliassamik suliarinnittup assigisaataluunniit akornanni oqaloqatigiinnermi, ingerlaavartumik pisinnaavoq.

Kommunalbestyrelse malinnaanerup ilusissaanut akulikissusissaanullu suliffiup iluani malittarisassamik aalajangersaasinnaavoq, kisianni malittarisassat missingersuinissamut inissaqartitsiviussapput, taamaalilluni innuttaasup aalajangersimasup tapersiivigineqarnissamut pisariaqartitsinera aammalu tapersiineq ikiorsiissutigineqartup pisariaqarnera tunngavigalugu malinnaaneq akulikinnerusumik pisinnaassalluni.

§ 24-mut

Imm. 1-imut.

Aalajangersakkami nutaajusumi siunnersuutigineqarpoq kommunalbestyrelsi inuk innarluutilik inuttut ikiorsiinertut iluseqartumik tapersiinnissamik, angerlarsimaffimmi suliassanut pisariaqartunut aamma nerisassamik sullissinermik tapersiinnissamik, neqeroorfigissagaa.

Tapersiinerup akulikissusaanut, suliani ataasiakkaani inuup tapersiivigineqarnissamik pisariaqartitsineranik ataasiakkaatigut nalilersuineq, tapersiinerit allat inummut ikiorsiissutaasut suunersut, kiisalu suliassat suut inuup imaluunniit inuup ilaqutaasa aamma attaveqarfiisa isumagisarineraat, apeqqutaapput. Kingulliullugu taaneqartumut tunngatillugu tunngavissarititaavoq, inoqutigiinniittut inersimasut allat angerlarsimaffimmi suliassat suliarineqarnerannut peqataasartut. Tapersiineq ataasiakkaatigut qanoq ilusilerneqassanersoq aaqqissuunneqassanersorlu kommunalbestyrelse aalajangiisussaavoq. Tapersiineq aaqqissuunneqassaaq, inuup tamanna kissaatigippagu, inuk sapinngisamik maannamut inigisamini najugaqaannarsinnaangorlugu.

Aalajangersagaq malillugu tapersiinissaq pillugu kommunalbestyrelsip aalajangiinerani allassimasariaqarpoq, tapersiineq qanoq iluseqartoq ikiorsiissutigineqarnerasoq aammalu tapersiivigineqarnissamik pisariaqartitsinermut qanoq ittumut matussusiissanersoq, kiisalu tapersiineq qanoq akulikitsigisumik ikiorsiissutigineqassanersoq. Aalajangersagaq malillugu tapersiinerup ikiorsiissutigineqartup akulikissusaa annertussusaalu immikkut naammagittaalliuutigineqarsinnaavoq.

Aalajangersagaq malillugu tapersiineq imminut ikiornissamut ikiorsiissutitut isigineqassaaq, tassa imaappoq suliassanut inuup innarluuteqarnini pissutigalugu nammineerluni suliarisinnaanngikkallagaanut imaluunniit ataavartumik suliarisinnaanngisaannut imaluunniit ajornakusoortuinnarmik suliarisinnaasaannut tapertaasussatut tapersiinertut. Imminut ikiornissamut ikiorsiisoqarneranut tunngavissinneqassaaq, inuup innarluutillip aamma ikiortaata peqatigiillutik suliassat assigiinngitsut suliarissagaat, taamaalilluni inuk innarluutilik sapinngisamik annertunerpaamik nammineerluni suliassat suliarineqarneranni peqataassalluni.

Aalajangersagaq malillugu tapersiineq pingasunik iluseqartoq ikiorsiissutigineqarsinnaavoq: 1. inummut ikiorsiineq, 2. angerlarsimaffimmi suliassanut pisariaqartunut tapersiissuteqarneq aamma 3. nerisassanik sullissineq.

Inummut ikiorsiinermi isumaavoq suliassanut inummut namminermut attuumassuteqartunut, aammalu inuup innarluuteqarnini pissutigalugu nammineerluni suliarisinnaanngisaannut, ikiorsiineq. Tamanna assersuutigalugu tassaasinnaavoq inuttut eqqiluisaarnissamut ikiorsiineq, ilanngullugit uffarneq, qarngup kigutillu passunneqarnerat, kukiiarneq aamma unngiarneq, atisaajarneq atisalersornerlu, amqip passunneqarnera aamma timimi atortunut ikiuutaasussanut ikiuunneq, ilanngullugit tusartaatit, isarussat, alersit ikorfartuisussat, timip ilaanut taarsiutit, sukarutit aamma alersinik ikorfartuisussanik errorsineq. Inummut ikiorsiineq, ikiorsiinerup peqqinnissaqarfimmit ingerlanneqartussamut, taarsiissanngilaq. Aalajangersagaq manna malillugu ikiorsiineq taamaalilluni paaqqinninnermut suliassanut tunngassuteqanngilaq. Ikiorsiiinnermut inatsisit allat malillugit ikiorsiissutigineqartumut,

ilangullugu angerlarsimaffimmi peqqissaasumit, ataqatigiissaarinerup qulakkeernissaa kommunalbestyrelsip suliassaraa.

Angerlarsimaffimmi suliassanut pisariaqartunut tapersiinermi pineqarput angerlarsimaffimmi suliassanut nalinginnaasunut tapersiineq, ilangullugit atisanik errorsineq, erruineq aamma eqqiaaneq. Inummut nerisassiornermut ikiorneqarnissamik pisariaqartitsisumut, tapersiineq inuup nammineerluni angerlarsimaffiani nerisassiornermut ikiorsiissutigineqarpat, angerlarsimaffimmi suliassanut pisariaqartunut tapersiineq pineqassaaq.

Nerisassanut sullissinertut ilusilimmik tapersiineq inummut innarluutilimmut, innarluuteqarnini pissutigalugu nammineerluni nerisassiorsinnaanngitsumut, aammalu inoqutigiinni nerisassiornermik isumaginnissinnaasumik peqartinnagu, nerisassanik pilersuinermut tunngassuteqassaaq. Nerisassat inuup nammineq angerlarsimaffiani piareersarneqassasut kommunalbestyrelse aalajangiippat, imm. 1, nr. 3, malillugu nerisassanik sullissineq pineqarsimassanngilaq, kisianni imm. 1, nr. 2, malillugu suliassanut tapersiinerup ilaatut isigineqassalluni.

Taamaattoq ersarilluinnartumik ajornartillugu imaluunniit aningaasaqarnikkut naleqquttunut killissat qaangerlugit kommune sullississasoq piumasaqaateqartoqarsinnaanngilaq. Aamma Inuit Innarluutillit pisinnaatitaaffii pillugit Naalagaaffiit Peqatigiit isumaqatigiissutaanni allassimavoq, taanna malillugu nunani tamalaani isumaqatigiissutip naammassineqarnerani isumalluutit periarfissallu nunani pineqartumi periarfissaasut aallaavigineqartariaqartut.

Imm. 2-mut.

Imm. 2-mi siunnersuutigineqarpoq, inuup innarluuteqarnini pissutigalugu suliassaq pineqartoq nammineerluni sularisinnaanngikkaa, imm. 1 siunnersuutigineqartoq malillugu tapersiissutit ilaannik ataatsimik arlalinnilluunniit ikiorserneqarsinnaanissamut piumasaqaataasoq. Inuup nammineerluni suliassaq pineqartoq sularisinnaanera nalilersuinermi qinnuteqartup ataatsimoortumik inissisimanera isummerfigineqassaaq. Taamaattumik matuma siuliani nassuiarneqartutut tunngavissaritinneqarpoq, inuup inoqutaanni ilaasut allat angerlarsimaffimmi suliassanik sularinninnermi peqataassasut. Suliassanut inoqutigiinni ilaasut allat inoqutigiinni ilaanerminni pissusissamisoortumik sularisinnaasaannut sularisariaqagaannullu, aalajangersagaq malillugu tapersiisoqarsinnaanngilaq. Inuup qanigisai il.il. aallaaviatigut tapersiinermi ikiorsiivigineqarnissamut pisinnaatitaanngillat, assersuutigalugu nerisassanik pissarsillutik imaluunniit atisatik errortillugit. Taamaattoq assersuutigalugu tapersiivigineqartup kisimiilluni meeqqat pilersugai, kommunalbestyrelsip tamakkiisumik isiginnittumik nalilersuineq aallaavigalugu naleqquttuutippagu, tapersiinermi ikiorsiivigineqarnermi ilaatinneqarnissaat pillugu immikkut aalajangiisoqarsinnaavoq.

Imm. 1 malillugu tapersiineq timikkut imaluunniit tarnikkut pikkoriffiit allangutsaaliorneqarnissaanut kiisalu inuup innarluuteqarnerata malitsigisaasa annertuut

ikiorsiivigineqarnerannut, iluaqutaassaaq. Kingulliullugu taaneqartoq isumaqarpoq kommunalbestyrelse inuup innarluuteqarnerata malitsigisaannut sunulluunniit ikiorsiinissamut tapersiinissamik pisussaaffeqanngitsoq. Taamaalilluni malittaasut annertuut pineqartussaapput. Malittaasut annertuut qaqugukkut pineqarnersut, suliani ataasiakkaani ataasiakkaatigut nalilersuineq apeqqutaassaaq. Assigiinngissutaanut assersuutitut taaneqarsinnaavoq, inuup innarluuteqarnera pissutaalluni atisanik errorsinerup sivisunerujussuunera, innarluuteqarnerup malitsigisussaagaa, kisianni annertuumik malittaasussaani. Kisiannili inuup errorsinnaannginnera malittaasussaavoq annertoq, imm. 1, nr. 2, malillugu atisanik errorsinermut tapersiivigineqarnissamut pisinnaatitaatitsisussaq.

Imm. 2-mi aalajangersagaq siunnersuutigineqartoq malillugu, tapersiineq sapinngisamik inuup innarluuteqarnerata malitsigisaannut annertuunut taamaallaat ikiorsiissutaassanngilaq, kisianni aamma tamanna ajornanngippat inuup sapinngisamik pitsaanerpaamik piginnaasaqarluni inuunissamut periarfissaannik siuarsaasussaalluni. Taamaattumik tapersiineq sapinngisamik aaqqissuunneqassaaq, inuup siunissami suliasamik aalajangersimasumik taassuminnga tamakkiisumik ilaannaasumilluunniit isumaginnissinnaalernissaa siunertaralugu, inuk innarluutilik suliasanik suliarinninnermi akuutinneqarluni suleqataatinneqarlunilu.

§ 25-imut

§ 25-imi siunnersuutigineqarpoq atortut ikiuutaasussat tapersiissutitut periarfissatut ingerlateqqinneqassasut. Atortunut ikiuutaasussanut tapersiinnermi siunertaavoq, inuit innarluutilit inuiaqatigiinni naligiimmik periarfissaqarnissaat kiisalu innarluuteqarneq pissutigalugu assigiinngisitsinermik pineqarsinnaanerup akerlilerneqarnissaa, tassuuna sapinngisamik tamatigut sunniuteqarluartumillu inuiaqatigiinni peqataatinneqarnissaat ilanngunneqarnissaallu qulakkiissallugu kiisalu tassuunatigut namminersorluni inuuneqarnissamut periarfissaqarnissaa aammalu pineqartup ulluinnarni allanik ikiorneqarani sapinngisamik annertunerpaamik pisinnaalersinneqassaaq.

Kommunalbestyrelsip aalajangersagaq malillugu atortunut ikiuutaasussanut tapersiinissamik pisussaaffeqarneranut tunngaviusumik piumasagaatigineqarpoq, inatsisit allat malillugit atortunut ikiuutaasussanut tapersiisoqarsinnaassanngitsoq, ilanngullugu peqqissutsimut ilinniartitaanermullu inatsisit malillugit. Tassunga atatillugu erseqqissarneqarpoq, Inatsisartut inatsisaat pingaernerunngitsoq, taamaattumik ikiorserneqarnissamik pisariaqartitsineq aallaaviatigut immikkuullarissumi ikiorsiinissamut akisussaasuusumi naammassineqassasooq. Taamaalilluni ilinniartitaanermut suliasaqarfik ilinniartitaanermut suliasaqarfimmi atuartitsinerup inunnit innarluutilinnit atorneqarsinnaaneranut atortunut ikiuutaasussanut tapersiisussaavoq.

Imm. 1-imut.

Imm. 1-imi siunnersuutigineqarpoq kommunalbestyrelse inummut innarluutilimmut pisuni pingasuni atortunik ikiuutaasussamik pissarsinissamut tapersiissasoq. Pissarsinissamut tapersiineq, inuup nammineerluni atortumik ikiuutaasussamik pisinissaanut aningaasaqarnikkut tapersiissutitut, atortumik ikiuutaasussamik atukkiinertut imaluunniit kommunalbestyrelsip inummut atortumik ikiuutaasussamik pisineratigut, ikiorsiissutigineqarsinnaavoq. Pissarsinissamut tapersiineq qanoq pissanersoq kommunalbestyrelsip nammineerluni aaqqissuutissavaa. Nalilersuineri ilaatinneqartut naleqquttut tassaassapput aningaasaqarnerup eqqarsaatigineqarnissaa, piffissaq tunniussiffiusussaq aammalu atortup ikiuutaasussap suussusaa.

Kommunalbestyrelse siullermik, atortoq ikiuutaasussaq annertuumik inuup innarluuteqarnerata malitsigisaannik annertuumik ikiorsiisinnaappat, inummut innarluutilimmut atortumik ikiuutaasussamik pissarsinissamut tapersiisinnaavoq. Atortoq ikiuutaasussaq inuup innarluuteqarnerata malitsigisaannik ikiorsiiginnassanngitsoq, kisiannili atortoq ikiuutaasussaq annertuumik malittaasunik ikiorsiissasoq, piumasaqaataavoq. Annertuujunissaanik tunngavissarititaasoq naammassineqarsimanersoq naliliineq aalajangersimasuuvoq ataasiakkaatigullu pisussaalluni aammalu inuup innarluuteqarnerata malitsigisaannik ikiorsiisinaanissamut atortup ikiuutaasussap pingaaruteqarneranik ataatsimoortumik nalilersuineq tunngavigalugu pissalluni. Nalilersuineri tassani, ilaatigut peqqissutsimut tunngasut, inooqatigiinnermut tunngasut, allatut inuunerminni taamatut inissisimasutut inuunissamik periarfissaqarnermut atortup ikiuutaasussap pingaaruteqarnera, kiisalu atortumit ikiuutaasussamit allanik naleqquttunik taarsiissutissanik peqarnersoq, pingaartinneqassapput.

Kommunalbestyrelse aappaattut, atortup ikiuutaasussap inuup ulluinnarni inuunera annertuumik oqinnerulersissinnaappagu, inummut innarluutilimmut atortumik ikiuutaasussamik pissarsinissamut tapersiissaaq. Matuma siuliani nassuiarneqartut, annertuujuneranik aalajangersimasumik ataasiakkaatigullu nalilersuinissaq tassani pineqarpoq. Nalilersuineri ilaatigut atortup ikiuutaasussap, inuup angerlarsimaffimminiinneranut atatillugu atuuffissaa pingaaruteqarneralu, pingaartinneqassapput. Assersuutigalugu inuup sapinngisamik allanik ikiorneqarani nammineersinnaanissamut periarfissaqarneranut, atortup ikiuutaasussap pingaaruteqarnera pingaartinneqarsinnaavoq. Tamatuma saniatigut innutaasup nammineersinnaanissamut aamma nammineq angerlarsimaffimminiiginnarnissamut periarfissaqaannarneranut, atortup ikiuutaasussap pingaaruteqarnera, pingaartinneqarsinnaavoq. Tamatuma saniatigut allanut inummut ulluinnarni ikiuuttartunut, atortup ikiuutaasussap atuuffii, pingaartinneqarsinnaapput. Tamanna ilaatigut kivitsissutinut tunngatillugu pingaaruteqarpoq. Inuup inooqatigiinnermi atugai aammalu inuunermini inissisimanera, pingaaruteqarneranik nalilersuineri pingaaruteqarput. Taamaalluni assersuutigalugu katissimallugu aappaasoq imaluunniit meeqqat anginerusut angerlarsimaffimmi suliasanik suliarinninnermut naleqquttumik annertussusilimmik ikiuunnissaat, aallaaviatigut tunngavissaritinneqarpoq.

Kommunalbestyrelse pingajuattut, atortoq ikiuutaasussaq inuup inuussutissarsiummik ingerlatsisinnaanissaanut pisariaqarpat, inummut innarluutilimmut atortumik ikiuutaasussamik pissarsinissamut tapersiissaaq. Atortoq ikiuutaasussat inuup innarluutillip suliffeqaannarnissaanut imaluunniit suliffeqalernissaanut iluaqutaasinnaappat, tamanna pingaaruteqartorujussuuvoq. Taamaattumik suliffeqalernissaq siunertaralugu atortumut ikiuutaasussamut tunngatillugu, pingaaruteqarneranik piumasaqaateqanngilaq. Inuk imm. 1, nr. 3-mi aalajangersagaq siunnersuutigineqartoq malillugu atortumik ikiuutaasussamik pisinnaatitaanersoq nalilersuinermi, atortoq ikiuutaasussaq innuttaasup suliffeqarsinnaanissaanut aammalu inuussutissarsiummik ingerlatsisinnaanissaanut pisariaqarnermaq, pingaartinneqassaaq. Taamaalilluni atortoq ikiuutaasussaq innuttaasup suliffeqarsinnaanissaanut aammalu suliffeqaannarnissaanut pisariaqartuusaaq.

Imm. 2-mut.

Imm. 2-mi aalajangersakkami siunnersuutigineqartumi siunnersuutigineqarpoq, atortumik ikiuutaasussamik pissarsinissamut tapersiineq taamaallaat aningaasartuutinut, inuup innarluuteqanngitsup nalinginnaasumik inuttut angerlarsimaffimminilu atugassaannik pissarsinermi akigititanit annertuumik annertunerussutaasunut, ikiorsiisoqarsinnaasoq. Aalajangersagaq annertuumik innarluutillit ikiorserneqartarnerat pillugu Inatsisartut peqqussutaanni § 8, imm. 1-imik ingerlatitseqqiineruvoq. Aalajangersakkami inatsisitigut inissisimanerme allanngortitsinissaq siunertarineqanngilaq.

Imm. 3-mut.

Imm. 3-mi aalajangersagaq siunnersuutigineqartoq, inuk atortumik ikiuutaasussamik pissarsinissamut tapersiivigineqarsimasooq, atortumik ikiuutaasussamik taassuma assinganik pissarsinissamut tapersiivigineqaqqissasooq kommunalbestyrelsip aalajangiisussaanngorluni pisoqarneranut, tunngassuteqarpoq. Tamanna assersuutigalugu pisinnaavoq, atortup ikiuutaasussap nungullarnera pissutaalluni, atortup ikiuutaasussap aserornera pissutaalluni imaluunniit atortup ikiuutaasussap nungunnera pissutaalluni taarserneqartussanngorerani. Aalajangersakkami siunnersuutigineqarpoq kommunalbestyrelsip taamatut pisoqartillugu, aalajangersimasunut ataasiakkaatigullu nalilersuinissaq pillugu § 23, imm. 2-mi aalajangersakkami siunnersuutigineqartumi piumasaqaatit, saneqqussinnaagai. Kommunalbestyrelse tamatumunnga taarsiullugu, inuup innarluutaa annertunerpaatigut allannguuteqanngitsooq, inummit innarluutilimmit uppersarsaaneq tunngavigalugu, aalajangiisinnaavoq. Aalajangersakkami siunertaavoq kommunalbestyrelsip suliassanik suliarinninnerata oqilisarneqarnissaa, taamaalillunilu aamma innuttaasumut atortumik ikiuutaasussamik taarsiisussamut, piffissap suliassamik suliarinniffiusup sivikinnerunissaanik qulakkeerinninnissaq. Aalajangersakkap atorneqarnissaa kissaatigineqarnermaq, imaluunniit tamatumunnga taarsiullugu aalajangersimasunut ataasiakkaatigullu nalilersuinissaq pisariaqartinneqarnermaq, kommunalbestyrelse aalajangiisaaq. Pisortat ingerlatsineranni suliassanik suliarinnitarneq pillugu inatsimmi ilaatigut suliamut attuumassuteqartup tusarniarneqarnissaa pillugu piumasaqaatit kiisalu § 23-mi aalajangersakkami siunnersuutigineqartumi piumasaqaatit allat naammassineqarsinnaassapput.

Imm. 4-mut.

Piginnaatitsissut atortunik ikiuutaasussanik pisinnaatitaanerup killissalersorneqarnera pillugu maleruagassanik aalajangersaanermut atorneqassasoq naatsorsuutigineqarpoq, matumani oqartussaasut allat ilaatigut ilinniartitaanerup aamma peqqinnissamut inatsisini pisussaaffeqarnerat pissutigalugu, atortut ikiuutaasussat suut inatsit manna malillugu tapersiivigineqarsinnaassannginersut ilanngullugit.

§ 26-mut

§ 26-imi siunnersuutigineqartumi inuit annertuumik innarluutillit ikiorserneqartarnerat pillugu nalunaarummi § 11-imi aalajangersakkat ingerlatiinnarneqarnissaat siunnersuutigineqarpoq. Inatsisini inissisimanerup allanngortinneqarnissaa aalajangersakkami siunertarineqanngilaq. Taamaattoq kommunalbestyrelsen atortunik ikiuutaasussanik iluarsaassinermut aserfallatsaaliuinerumullu aningaasartuutunik akiliinissaanut inatsimmi tunngavissap Inatsisartut inatsisaanni allassimanissa, pingaaruteqarsorinarpoq.

§ 27-imit

Imm. 1-imit.

Aalajangersakkami nutaajusumi *imm. 1*-imi siunnersuutigineqarpoq, inuk innarluuteqarnini pissutigalugu kisimiilluni angalaarsinnaanngippat, kommunalbestyrelsen qaammammut nalunaaquttap akunneri 15-it angullugit ingiaqateqartitsinissamik neqerooruteqassasoq. Ingiaqateqartitsineq, inuit innarluutillit inuiaqatigiinni peqataanissamut naligiimmik periarfissaqarnissaasa qulakkeernissaa siunertaralugu, taperseeriaatsit nutaatut siunnersuutigineqarpoq. Peqatigisaanik naliliisoqarpoq, inuit innarluutillit, inummik tapersersortaasussamik pisariaqartitsinngitsut imaluunniit tamanna pisariaqanngitsaq, ingiaqateqarnissamik pisariaqartitsinerat atuuttoq.

Kisimiilluni angalaarsinnaannginneq inuup innarluuteqarneranik tunngaveqassaaq. Paarlattuanik timikkut taamatullu tarnikkut innarluuteqarnermik tunngaveqartumik piginnaaneqannginneq atuussimasinnaavoq. Timikkut innarluuteqarnermut assersuut tassaasinnaavoq inuit nukeerukkiartortut, sanngiillisimasut, qamutit kallerup inneranik ingerlatillit nammineerlutik passussinnaanngitsut. Tarnikkut innarluuteqarnermut assersuutaasinnaavoq inuk ikiorneqarnissamik ima pisariaqartitsitigisoq, piginnaanikillitigisimasoq silassorikkunnaarsimasorlu, inuup kisimiilluni angalaarnissaa isumannaatsuunani. Inuk innarluutilik ingiaqateqarnissamik pisariaqartitsinersaq nalilersuinermi, pineqartumut allatigut ikiorsiinerit, assersuutigalugu tapersersortitit ilusilimmik, mianerineqassapput.

Ingiaqateqartitsinermi pineqartunut ilaapput ingiaqateqarnerpiaq aammalu suliasat toqqaannartumik ingiaqateqarnermut tunngassuteqartut, assersuutigalugu qaavatigut atisalersornissamut ikiuunneq aammalu qamutit kaassuartakkat makitittarneri

peqiteqqittarnerilu. Ingiaqateqarnermi angerlarsimaffimmi suliassat allat isumagineqarnissaat ilaatinneqanngilaq.

Siunnersuutigineqarpoq inuit ingiaqateqarnissamik pisinnaatitaasut, ingiaqataasussaq sumut atorineqassanersoq nammineerlutik toqqarsinnaagaat, tassa imaappoq inuup sumut ingiaqateqarnissaq kissaatigineraa. Taamaalilluni assersuutigalugu ulluinnarni suliassanut nalinginnaasunut ingiaqateqarneq pisinnaavoq, soorlu pisiniarnermut, kisianni aamma kulturikkut aaqjissuussinernut, timersornermut imaluunniit ilaqtariinni nalliuttorsiornermut.

Qaammammut nalunaaquttap akunnerinik 15-inik annerpaaffissaliineq, qaammammut nalunaaquttap akunnerini 15-ini innarluutilik naleqquttumik annertussusilimmik iluaquserneqarsinnaassasut, taamaalillutik inuit innarluutillit naligiimmik atugassaqartitsiviusumik inuiaqatigiinni akuusinnaallutik, aallaavigalugu aalajangersarneqarpoq.

Imm. 2-mut.

Imm. 2-mi siunnersuutigineqarpoq, inuk kimit ingiaqatigineqarnissamik kissaateqarnersoq, inuup innarluutillip nammineq toqqarsinnaagaa. Taamaattoq, inuup tamanna kissaatigippagu, imaluunniit tamanna naleqquttutut isigineqarpat, ingiaqataasussatut naleqquttut nassaarinissaannut kommunalbestyrelse ikiuutissaaq. Kommunalbestyrelsip inuk toqqarneqartoq akuerissavaa atorfinitsissallugulu. Ingiaqataasussap aningaasarsiaqartinneqarnera taamaalilluni kommunalbestyrelsip aamma ingiaqataasussap akornanni isumaqatigiissuteqarneq tunngavigalugu pissaaq. Imm. 5-imi aalajangersakkami siunnersuutigineqartumi inatsimmi tunngaveqartumik, kommunalbestyrelse ingiaqataasussamik atorfinitsitsinissaq sioqqullugu pillarneqarsimaneremut uppernarsaammik aammalu meeqqanut uppernarsaammik piniartassasoq pillugu maleruagassanik aalajangersaanissaq eqqarsaatigineqarpoq. Kommunalbestyrelsip tunngavissarititaasut kinaassusersiunngitsut tunngavigalugit ingiaqataasussamik akuersinissaq atorfinitsitsinissarlutit itigartissinnaavaa. Assersuutigalugu imaassimasinnaavoq inuup pineqaatissinneqarsimmannginnermut uppernarsaataani allassimasoq inuk persuttaasimanermik eqqartuunneqarsimasoq, imaluunniit meeqqanik pinerliisimannnginnermut uppernarsaateqassasoq. Kommunalbestyrelse aammattaq ataasiakkaatigut naliliineq tunngavigalugu isumaqarpat inuup innarluutillip aamma ingiaqataasussatut kissaatigineqartup imminnut atassuteqarnerat inummut innarluutilimmut ajoqusiinnaasoq, kommunalbestyrelsip akuersissuteqarnissaq itigartissinnaavaa. Kommunalbestyrelsip akuersissuteqarnissaq itigartippagu, inuk innarluutilik allamik ingiaqataasussamik toqqaasinnaatitaavoq.

Imm. 3-mut.

Imm. 3-mi siunnersuutigineqartumi, inuk ingiaqateqarani sulinngiffeqarsinnaangippat, sulinngiffeqarnerup piviusunngortinnissaanut inummut innarluutilimmut ingiaqateqarnermut nalunaaquttap akunnerinik ikiorsiinissamut kommunalbestyrelse periarfissaqartinneqassasoq.

Kommunimi innuttaasunut imaluunniit kommunimi innuttasut ilaannut periarfissap taassuma neqeroorutigineessaa kissaatigineqarneraq, kommunalbestyrelsit ataasiakkaat nammineerlutik aalajangiisinaapput. Kommunalbestyrelsip periarfissap taassuma atornissaa kissaatigippagu, ikiorsiinissamut tunngavissarititaasut naleqquttuussapput, aammalu sapinngisamik kinaassusersiunngitsuussallutik.

Imm. 4-mut.

Piginnaatitsissut ingiaqateqarnerup aaqqissuunneqarnera pillugu maleruagassanik aalajangersaanermut atorineqassasooq naatsorsuutigineqarpoq, ilanngullugu ingiaqataasussamik atorfinitsisinissaq sioqqullugu kommunalbestyrelse pineqaatissinneqarsimanermut aamma meeqqanut uppernarsaammik piniassasooq pillugu piimasaqaat.

§ 28-mut

§ 28-imi inigisamik aaqqissuussinerup tapersiissutitut periarfissatut ingerlatiinnarnissaa, siunnersuutigineqarpoq. Inigisamik aaqqissuussinerup tapersiinermi siunertaavoq, innuttaasup sapinngisamik nalinginnaasumik namminersorlunilu inuunneqarnissamut periarfissaqalernissaa, sapinngisamik annertunerpaamik pineqartup ulluinnarni allanit ikiorneqarunnaarsinnissaa kiisalu innuttaasup sapinngisamik nammineq angerlarsimaffimmiinnarsinnaanissaata qulakkeerneqarnissaaa.

Inigisamik aaqqissuussinerup ilaatigut ilaatinneqarsinnaapput inigisamut isertarfinnik pilersitsineq, ilanngullugit silami majorallatarfiit. Aaqqissuussineq aamma assersuutigalugu, inuk immikkut atortunut ikiuutaasussanut ilitsivissamik immikkut pisariaqartitsippat, inigisamut atasunik illuaqqanik pilersitsinissamut ikiorsiissutaasinaavoq. Inissiani attartortittakkani aammalu inissiani nammineq pigisani aaqqissuussinerup tapersiisoqarsinnaavoq. Tapersiineq suliani ataasiakkaani kommunalbestyrelsip ataasiakkaatigut nalilersuinerup tunngavigalugu pissaaq. Inissiami iliuusissatut, taamaallaat iluarsaassinerinnarnut imaluunniit iluarsaassinerup isikkoqartunut, nalinginnaasumik aserfallatsaaliuinerup imaluunniit nutarterinerup, tapersiisoqarsinnaanngilaq. Kommunalbestyrelse aaqqiissutissamut akikinnerpaamut, inuup pisariaqartitaannik naammassinnissinnaasumut, tapersiinissamik taamaallaat pisussaaffeqarpoq. Kommunalbestyrelse amerlanertigut ilaatigut qinnuteqaat, ilaatigullu inuk innarluutilik pillugu peqqissutsimut paasissutissat tunngavigalugit inissiap annikinnerusumik allangortiterneqarnissaa pillugu aalajangiisinaasooq. Tamanna assersuutigalugu alloriusat peerneqarnissaannut, uffarfimmi, tummeqqani il.il. tiggummiviliinernut atuuppoq.

Pisuni allani, inigisamik aaqqissuussinissaq pillugu qinnuteqaat annertunerusumik akisunerusumillu allangortiterinerup imaluunniit ilassusiinerup kinguneqarsinnaalluni, kommunalbestyrelse amerlanertigut inuup innarluutaa qanoq aammalu qanoq annertutigisumik tapersiivigineqarnissamik pisariaqartitsinerup malitseqarnerooq, innuttaasooq allatigut ulluinnarni qanoq nammineernersooq, aammalu pineqartup inuunerup

aaqqissuunnissaanut qanoq kissaateqarnerseq, atituumik nassuiaammik pissarsiniartariaqassaaq.

Imm. 1-imut.

Imm. 1-imi siunnersuutigineqarpoq, piumasaqaatit pingasut naammassineqarsimappata kommunalbestyrelse inummut innarluutilimmut taassuma inigisaata immikkut ittumik aaqqissuunnissaanut tapersiissasoq. Siullertut piumasaqaataavoq inissiap pineqartumut angerlarsimaffittut naleqqunnerunissaanut immikkut aaqqissuussinissaq pisariaqartuussasoq, piumasaqaataavoq. Aappaattut inuk aaqqissuussinermi inigisamini nammineersinnaalersimassasoq, piumasaqaataavoq. Aammattaaq piumasaqaataavoq inuk nammineq angerlarsimaffimmini najugaqassasoq, ilanngullugu najugaqatigiiffimmi imaluunniit najugaqarfimmi illersugaasumi. Inigisap aaqqissuunnissaanut kommunalbestyrelsip tapersiinissaanut, piumasaqaatit pingasut tamarmik naammassineqarsimassapput.

Siullermik siunnersuutigineqarpoq, inissiap pineqqartup angerlarsimaffittut naleqqunnerulernissaanut, aaqqissuussinissaq pisariaqartoq, inigisap aaqqissuunnissaanut tapersiinissamut piumasaqaataasoq. Piumasaqaat naammassineqarsimanersoq, kommunalbestyrelse suliani ataasiakkaani ataasiakkaatigut nalilersuissaaq. Nalilersuinerminu inuup innarluutaa, innarluuteqarneq pisariaqartitsinernik sunik malitseqarnerseq, aammalu innarluuteqarneq aporfinnut sunut, inuup inigisamini misigisartagaannut, tungavilersuutaanersoq, aallaavigineqassapput. Inigisamik aaqqissuussineq allangortinneqarpat, inuup pisariaqartitaannut naleqqiullugu isigalugu, nammineq angerlarsimaffimmiinnermi ineqarnikkut ajoqutissartaasut ikiorsiivigineqarsinnaassasut imaluunniit annertuumik annikillisinneqarsinnaassasut naliliisoqarpat, inigisamik aaqqissuussinissaq pisariaqartutut isigineqassaaq. Innarluuteqarnerup suussusaa imaluunniit annertussusaa aalajangiisuussanngilaq, kisianni inigisap aaqqissuunneqarnera, inuup innarluuteqarnermini nammineq angerlarsimaffimmini ingerlasinnaaneramik qanoq annertutigisumik akimmiffiunersoq aalajangiisuussalluni.

Imm. 1, nr. 2-mi aalajangersagaq siunnersuutigineqartoq malillugu piumasaqaataavoq, inuk aaqqissuussinermi inigisamini nammineersinnaalersinneqassasoq. Tamanna inuit annertuumik innarluutillit ikiorserneqartarnerat pillugu nalunaarummi § 15, imm. 1-imi uniffiit aappaanni piumasaqaammik ingerlatitseqqiineruvoq.

Piumasaqaatit pingajuanni, inuup nammineq angerlarsimaffimmini najugaqartuunissaa, ilanngullugu najugaqatigiiffimmi imaluunniit najugaqarfimmi illersugaasumi, pillugu piumasaqaataasumi, kommunalbestyrelsip ulloq unnuarlu neqeroorummi inuup ineeraanik il.il. immikkut aaqqissuussinermut tapersiinissaq, mattunneqarpoq. inuup innarluutillip aalajangersimasup ulloq unnuarlu neqeroorummiilernissaanut aaqqissuussinermi allangortiterinissaq ulloq unnuarlu neqeroorummi pisariaqarnera apeqqutaatinngagu, tamanna atuuppoq. Piumasaqaat aamma isumaqarpoq inissiani allani, inuup najugaqarfingngisaanni

aaqqissuussinermut tapersiisoqarsinnaangitsoq. Taamaalilluni qanigisaasut inigisaannik aaqqissuussinissamut tapersiisoqarsinnaangilaq.

Imm. 2-mut.

Imm. 2-mi siunnersuutigineqarpoq kommunalbestyrelse imm. 1 malillugu inigisap aaqqissuunnissaanut, taamaallaat aningaasartuutitut inuup innarluuteqanngitsup inigisap aaqqissuunneqarneranut nalinginnaasumik atortagaannit annertuumik annertunerusunut, tapersiisassasoq. Aalajangersagaq annertuumik innarluutillit ikiorserneqartarnerat pillugu Inatsisartut peqqussutaanni § 8, imm. 1-imik ingerlatitseqqiineruvoq.

Imm. 3-mut.

Piginnaatitsissut inigisamik aaqqissuussinertut ilusilimmik tapersiisarnerup aaqqissuunneqarneranut tunngasunik maleruagassanik aalajangersaanermut atorneqassasoq naatsorsuutigineqarpoq, ilanngullugu inuit innarluutillit kommunalbestyrelsimit toqqarneqartumik allaanerusumik, sanasumik allamik atuinissamik periarfissaqarnerat, atortussanik allanik toqqaanissamut, pilersitseqqinnissamut kiisalu inigisap aaqqissuunneqarnerani suliap ingerlanerani piginnaasaqarfinnullu, periarfissaqarnera.

§ 29-mut

§ 29-mi siunnersuutigineqarpoq, qamutitik motorilinnik, taamaattoq biilit ilaanatik, pissarsinissamut tapersiinissamut periarfissaqarneq, Inatsisartut inatsisaanni toqqaannartumik allassimassasoq.

Imm. 1-imut.

Imm. 1-imi aalajangersakkami siunnersuutigineqartumi inuit annertuumik innarluutillit ikiorserneqartarnerat pillugu nalunaarummi § 18, imm. 1-imi aalajangersagaq ingerlateqqinneqarpoq. Erseqqissarneqarpoq, inuk innarluutilik sumiiffinni assartuussissutinik tamanit atorneqartartunik, ilanngullugit taxat, atuffiusinnaangitsuni najugaqarpat imaluunniit ulluinnarni angalaartarpat, kommunalbestyrelsip tapersiinissamut pisussaaffeqarnera tassani pineqartoq.

Imm. 2-mut.

Imm. 2-mi siunnersuutigineqarpoq inuup ataavartumik innarluuteqartuunissaa, piunasaqaataasoq. § 7-imi aalajangersakkami siunnersuutigineqartumi allassimavoq, Inatsisartut inatsisaat manna inunnut innarluutilinnut atuutissasoq siunnersuutigineqartoq, aammalu taakkua tassaasut paasineqassasoq inuit sivisuumik timikkut, tarnikkut, eqqarsartaatsikkut imaluunniit malussarissutsikkut piginnaanikillisimasut, aporfiiit assigiinngitsut ilanngullugit allat assigalugit inuiaqatigiinni tamakkiisumik sunniuteqarluartumillu peqataanissaat akornuserneqarsinnaalluni. Qamutit motorillit suussusaat eqqarsaatigalugu, inuup sivisuumik piginnaanikillisimaannarani, kisianni innarluutaasoq taamaalillunilu piginnanikillisimaneq ataavartuuppat, tapersiissutitut naleqqussorineqarput.

Imm. 3-mut.

Imm. 3-mi siunnersuutigineqarpoq qamutit imm.1-imi aalajangersagaq siunnersuutigineqartoq malillugu pissarsiarineqartussatut tapersiivigineqartut, pillugit ingerlatsinermut aningaasartuutit matussutissaannut, kommunalbestyrelse tapersiissasoq. Aalajangersagaq ilaannakortumik inuit annertuumik innarluutillit ikiorserneqartarnerat pillugu nalunaarummi §§ 19-imi aamma 21-imi aalajangersakkanik ingerlatitseqqiineruvoq. Ingerlatsinermut aningaasartuutit, sillimmasiissutip aningaasartaannut taamatullu aserfallatsaaliuineranut iluarsaassinermullu aningaasartuutitut, tunngassuteqarput. Kommunalbestyrelse, inuk innarluutilik mianersuaalliorujussuarluni imaluunniit piaaraluni ajoqusiinermut pisuusimappat, iluarsaassinissamut tapersiinissaq, atunngissinnaavaa. Sillimmasiinermut tunngatillugu, kommunip nammineq sillimmasiisarnermut immikkoortortaani qamutit sillimmaserneqarnissai kissaatigineqarnersoq, imaluunniit sillimmasiisarfimmi sillimmasiineq pissanersoq, kommunalbestyrelse aalajangersinnaavoq.

Imm. 4-mut.

Piginnaatitsissut qamutitut motorilinnut tunngasut ingerlatsinermut aningaasartuutit matussusernissaannut tapersiinerup annertussusissaa pillugu maleruagassanik erseqqinnerusunik aalajangersaanissamut atorneqassasoq, naatsorsuutigineqarpoq, ilanngullugit ingerlatsinermut aningaasartuutit qanoq paasineqarnissaasa killissalorsorneqarnera aammalu ingerlatsinermut aningaasartuutitut, kommunalbestyrelsip matussusigassarinnngisaannut aningaasartanut killiliussat.

§ 30-mut

§ 30-mi siunnersuutigineqarpoq qamutit motorillit innarluutilimmut aaqqissuunneqarnissaasa, tapersiissutissatut periarfissaanerat, ingerlatiinnarneqassasoq. Qamutit motorillit innarluutilinnut aaqqissuunnissaannut tapersiinissamut siunertaavoq inuit innarluutillit inuiaqatigiinni naligiimmik periarfissaqarnissaat kiisalu innarluuteqarneq pissutigalugu assigiinngisitsinermik pineqarsinnaanerup akerlilerneqarnissaa, tassuuna sapinngisamik tamatigut sunniuteqarluartumillu inuiaqatigiinni peqataatinneqarnissaat ilanngunneqarnissaallu qulakkiissallugu, ulluinnarni allanit ikiorneqarnissamik pisariaqartitsiunnaarnissaa.

Imm. 1-imut.

Imm. 1-imi siunnersuutigineqarpoq, inuk innarluutilik allannortiterisoqanngippat qamutinik atuisinnaanngippat, kommunalbestyrelse qamutit motorillit immikkut ittumik aaqqissuunneqarnissaannut tapersiissasoq, ilanngullugit biilit. Aalajangersagaq malillugu tapersiineq taamaalilluni qamutinik pissarsinissamut tunniunneqassanngilaq, kisianni qamutit inuup pigeriigaasa innarluutilimmut aaqqissuunnissaannut tunniunneqassalluni. Aalajangersakkami siunnersuutigineqartumi siunnersuutigineqarpoq, qamutit allannortiternagit atorneqarsinnaanngippata kommunalbestyrelse tapersiissasoq. Allatigut inatsisinut atuuttunut tunngatillugu allannortitsinissaq siunertarineqanngilaq.

Imm. 2-mut.

Imm. 2-mi siunnersuutigineqarpoq piumasaaqatigineqassasoq inuk ataavartumik innarluuteqassasoq. § 7-imi aalajangersakkami siunnersuutigineqartumi allassimavoq, Inatsisartut inatsisaat inunnut innarluutilinnut atuutissasoq siunnersuutigineqartoq, taamaalillunilu tamanna paasineqassasoq inuit sivisuumik timikkut, tarnikkut, eqqarsartaatsikkut imaluunniit malussarissutsikkut piginnaanikillisimasut, aporfiit assigiinngitsut ilanngullugit, allatulli inuiaqatigiinni tamakkiisumik sunniuteqarluartumillu peqataanissamat, akimmiffiusinnaasumik. Qamutit motoorillit allanngortinneqarnerisa suussusaa eqqarsaatigalugu, tapersiissutitut naleqqussorineqarpoq, inuk sivisuumik piginnaanikillisimaannarani, kisianni innarluutaasoq taamaalillunilu piginnaanikillisimaneq ataavartuussasoq.

Imm. 3-mut.

Piginnaatitsissut aalajangersagaq malillugu qamutit motoorillit immikkut aaqqissuunnissaannut tapersiinerup annertussusissaa pillugu maleruagassanik erseqqinnerusunik aalajangersaanermut atorneqassasoq, naatsorsuutigineqarpoq.

§ 31-mut

§ 31-imi aalajangersakkani siunnersuutigineqarpoq, ataatsimoortumik angallassisarnermik aaqqissuussinerit pillugit aalajangersakkat matuma siuliani taaneqartut ingerlatiinnarneqassasut.

Imm. 1-imut.

Imm. 1-imi siunnersuutigineqarpoq kommunalbestyrelse ataatsimoorussamik angallassisarnermik aaqqissuussinerimi, inummot innarluutilimmut angallassinissamik neqerooruteqarsinnaasoq. §§ 29-mi aamma 30-mi qamutit motoorillit pillugit aalajangersakkat siunnersuutigineqartut paarlattuanik, tassani pisinnaasunut aalajangersagaq pineqarpoq. Tassa imaappoq, kommunalbestyrelse isumaqaruni tamanna kommunimi najukkami pissutsit eqqarsaatigalugit, naleqquttoq, kommunimi tamarmi imaluunniit kommunip ilaani ataatsimoorussamik angallassisarnermut aaqqissuussamik pilersitsinissaq pillugu kommunalbestyrelse aalajangiisinnaasoq. Aalajangersakkami suleriaatsimi atuuttumi allanngortitsinissaq siunertarineqanngilaq.

Imm. 2-mut.

Imm. 2-mi siunnersuutigineqarpoq kommunalbestyrelse ataatsimoorussamik angallassisarnermut aaqqissuussinerimi atugassamik qamutitik motoorilinnik atugassiisinnaasoq. Aammattaaq siunnersuutigineqarpoq aaqqissuussaq peqqinnissaqarfik imaluunniit kattuffik namminersortoq suleqatigalugu pilersinneqarsinnaassasoq. Aalajangersagaq inuit annertuumik innarluutillit ikiorserneqartarnerat pillugu nalunaarummi § 23, imm. 2-mik ingerlatitseqqiineruvoq. Suleriaatsimut atuuttumut tunngatillugu allanngortitsinissaq siunertarineqanngilaq.

§ 32-mut

§ 32-mi siunnersuutigineqarpoq aningaasartuutaanerusut matussuserneqartarnerat inunnt innarluutilinnut tapersiissutissatut periarfissatut ingerlatiinnarneqassasoq. Tapersiissutissatut periarfissaaneranut siunertaavoq, ataasiakkaatigut eqaatsumillu taarsiissutitut ikiorsiinissaq, inuup innarluutillip taassumalu ilaqutarisimasinnaasaasa inuiaqatigiinni naligiimmik periarfissaqarnissaat kiisalu innarluuteqarneq pissutigalugu assigiinngisitsinermik pineqarsinnaanerup akerlilernerneqarnissaa, tassuuna sapinngisamik tamatigut sunniuteqarluartumillu inuiaqatigiinni peqataatinneqarnissaat ilanngunneqarnissaallu qulakkiissallugu.

Imm. 1-imut.

Taamaalilluni *imm. 1*-imi siunnersuutigineqarpoq aningaasartuutaanerusut annertuut matussusernissaannut kommunalbestyrelse inummut innarluutilimmut aningaasaqarnikkut tapersiissasoq.

Aningaasartuutaanerusut matussuserneqarsinnaanersut nalilersuinermi, inuup pineqartup aamma inuit allat taamaaqataanik ukioqartut aammalu taamaaqataanik inuunerminni inissisimaffeqartut akornanni sanilliussisoqassaaq. Aningaasartuutaanerusut assersuutigalugu tassaasinnaapput errorsinermut eqqiluisaarnermullu, atisanut immikkut ittunut, nerisaqarnermut, angalanermut aamma nakorsaatinut. Aningaasartuutit suut matussuserinneqarsinnaanersut, tamakkiisumik allatorneqarsinnaanngillat, tassami aningaasartuutaanerusunut pisariaqartitsineq aammalu inuunermi inissisimaneq inummiit inummut assigiinngitsuummata. Nalilersuinermi inuup sammisaasa annertussusaat, ineqarneranut tunngasut, inuussutissarsiorneranut tunngasut aamma inummut tunngasut, ilaatinneqassapput.

Annertuumik aningaasartuutaanerusut qanoq paasineqassanersoq kiisalu aaqqissuussap erseqqinnerusumik aaqqissuunneqarnera pillugu maleruagassat, *imm. 3*-mi inatsimmi tunngaveqartumik nalunaarummi aalajangersarneqassapput.

Imm. 2-mut.

Imm. 2-mi aalajangersarneqarpoq, innarluuteqarnerup malitsigisaanik aningaasartuuteqarnerunermut taamaallaat tapersiisoqarsinnaasoq, kiisalu aatsaat tamanna inatsisartut inatsisaanni matumani inatsisiniluunniit allani matuneqarsinnaanngikkaangat.

Aningaasartuutaanerusut inatsisit allat imaluunniit Inatsisartut inatsisaanni aalajangersakkat allat malillugit matussuserneqarsinnaanngitsut kisimik matussutissaannut tapersiisinnaaneq pillugu piumasaqaammi erseqqissarneqarpoq, aalajangersagaq malillugu tapersiineq pingaarnerniinngitsoq. Taamaalilluni annertuumik aningaasartuutaanerusunut matussusiisoqannginnerani, pisariaqartitsineq aalajangersakkat allat imaluunniit inatsisit allat malillugit tapersiinikkut matussuserneqarsinnaanersoq, paasiniarneqassaaq. Assersuutigalugu

inigisap aaqqissuunneqarnerani aningaasartuutaanerusut, § 28-mi inigisap aaqqissuunneqarnera pillugu aalajangersagaq siunnersuutigineqartoq malillugu akilerneqassaaq, aningaasartuutaanertuunngitsoq.

Imm. 3-mut.

Piginnaatitsissut annertuumik aningaasartuutaanerusut naatsorsorneqartarnerat pillugu maleruagassanik erseqqinnerusunik aalajangersaanissamut atorneqassasoq naatsorsuutigineqarpoq, ilanngullugit annertuumik aningaasartuutaanerusut qanoq paasineqarnissaannut aningaasartanut killissaliussanik kiisalu aaqqissuussap allaffissornikkut aqunneqarneranut erseqqinnerusumut aalajangersaaneq.

§ 33-mut

Aalajangersakkami nutaajusumi siunnersuutigineqarpoq, meeqqamik innarluutilimmik angerlarsimaffimmi pilersuinermi aningaasartuutaanerusut annertuut matussusernissaannut aningaasaqarnikkut tapersiisoqartassasoq. Aalajangersagaq § 32-mi annertuumik aningaasartuutaanerusut matussuserneqartarnerat pillugu aalajangersakkamut siunnersuutigineqartumut, tapertaassaaq.

Imm. 1-imut.

Aalajangersakkami siunertaavoq, meeqqat innarluutillit, pilersorneqarnerat aningaasartuuteqarnerunermik malitseqarsinnaalluni, immikkut pisariaqartitsisut, ikiorsiivigineqarnissaat. Tassa imaappoq aningaasartuutaanerusut, meeraq innarluuteqarsimangippat, ilaqtariit atugassarinnngisaralui. Taamaalilluni siunertaavoq meeqqap sapinngisamik sivisunerpaamik ilaqtaminiiginnarnissamut periarfissaqarnissaannik qulakkeerinninnissaq, aammalu meeqqap innarluuteqarnerata ajornerulernissaata imaluunniit allanik malitseqalernissaata pinngitsoortinnissaa. Siunnersuutigineqarpoq kommunalbestyrelse, meeqqamut innarluutilimmut angerlarsimaffimmi pilersuinermi aningaasartuutaanerusut annertuut matussuserneqarnissaannut aningaasaqarnikkut tapersiissasoq. Taamaalilluni piunasaqaataavoq, angerlarsimaffimmi pilersuineq pissasoq, aammalu meeraq taamaalilluni assersuutigalugu ulloq unnuarlu neqerorummiinngitsoq. Tapersiinerup oqilisaassinertut iluseqartup, aalajangersagaq malillugu tapersiisinnaaneq, mattutinngilaa. Meeqqap angajoqqaavi avissimappata, kisianni ataatsimoorlutik angajoqqaatut akisussaasuullutik, aammalu meeraq assigiimmik angajoqqaamini tamaginni najugaqartarpat, kommunimi meeqqap inuit allattorsimaffianni nalunaarsorsimaffigisaani kommunalbestyrelsimut aningaasartuutaanerusut annertuut matussutissaannut tapersiinissaq qinnuteqaatigineqassaaq.

Imm. 2-mut.

Aammattaaq imm. 2-mi siunnersuutigineqarpoq, aningaasartuutaanerusut meeqqap innarluuteqarnerata malitsigippagit, aatsaat aningaasartuutaanerusut matussutissaannik tapersiisoqarsinnaasoq. Kiisalu siunnersuutigineqarpoq, aningaasartuutit inatsisit allat imaluunniit Inatsisartut inatsisaanni aalajangersakkat allat malillugit

matussuserneqarsinnaangippata, aatsaat tapersiisoqarsinnaasoq. Taamaalilluni tapersiinissamut periarfissaq pingaaruteqannginnerusuvoq. Taamaalilluni annertuumik aningaasartuutaanerusut matussutissaannik ikiorsiinnginnermi, pisariaqartitsineq aalajangersakkat allat imaluunniit inatsisit allat malillugit tapersiinikkut matussuserneqarsinnaanersoq, paasiniarneqassaaq. Assersuutigalugu inigisap aaqqissuunneqarnerani aningaasartuutaanerusut, § 28-mi inigisap aaqqissuunneqarnera pillugu aalajangersagaq siunnersuutigineqartoq malillugu akilerneqassaaq, aningaasartuutaanertuunngitsaq.

Aningaasartuutaanerusut annertuut qanoq paasineqassanersut, aammalu aaqqissuussinerup allaffissornikkut aqunneqarnera pillugu imm. 3-mi inatsimmi tunngaveqartumik nalunaarummi aalajangersakkat erseqqinnerusut aalajangersarneqassapput. Aalajangersakkamut tassunga aalajangersakkanut ataasiakkaanut nassuiaatit innersuussutigineqarput.

Imm. 3-mut.

Piginnaatitsissut annertuumik aningaasartuutaanerusut naatsorsorneqartarnerat pillugu maleruagassanik erseqqinnerusunik aalajangersaanissamut atorneqassasoq naatsorsuutigineqarpoq, ilanngullugit annertuumik aningaasartuutaanerusut qanoq paasineqarnissaannut aningaasartanut killissaliussanik kiisalu aaqqissuussap allaffissornikkut aqunneqarneranut erseqqinnerusumut aalajangersaaneq aalajangerneqassaaq.

§ 34-mut

Aalajangersakkami siunnersuutigineqarpoq, inuup innarluutillip angerlarsimaffimmi ulluinnarni isumassorneqarneranik isumaginnittumut tapersiinissamik periarfissaqarneq, ingerlatiinnarneqassasoq.

Imm. 1-imut.

Imm. 1-imi siunnersuutigineqarpoq, kommunalbestyrelse inummut, inuup innarluutillip, nammineq angerlarsimaffimmini najugaqartup, ulluinnarni isumassorneqarneranik isumaginnittumut, aningaasaqarnikkut tapersiissasoq.

Isumassuinermik suliassap suussusaa aallaaviatigut tapersiinerup § 24-mi aalajangersakkami siunnersuutigineqartumi pineqartunut ilaasup, assigaa. Pineqartunut ilaatigut ilaapput angerlarsimaffimmi suliassanut pisariaqartunut inummut ikiuunneq tapersersuinerlu. Suliassat pineqartunut ilaasut ilaatigut tassaapput inuttut eqqiluitsuunissamut ikiuunneq, ilanngullugit uffarneq, qarngup kigutillu passunneqarnerat, kukiiarneq aamma unngiarneq, atisaajarneq atisalersornerlu, anartarfiliarneq, ammip passunneqarnera, timimi atortunut ikiuutaasussanut ikiuunneq, soorlu alersit ikorfartuisussat, atisanik errorsineq, erruineq, eqqiaaneq aamma nerisassiorneq. Aallaaviatigut inuk ulluinnarni isumassuinermik isumaginninnermut aningaasaqarnikkut tapersiivigineqartoq, suliassanik § 24-mi aalajangersagaq siunnersuutigineqartoq malillugu tapersiivigineqarsinnaangikkaluartunik, suliaqassaaq.

Tamanna isumaqarpoq aallaaviatigut aalajangersagaq manna malillugu aningaasaqarnikkut tapersiivigineqarlunilu, § 24-mi aalajangersagaq siunnersuutigineqartoq malillugu tapersiivigineqarsinnaanngitsaq. Kommunalbestyrelsip ataasiakkaatigut nalilersuineq tunngavigalugu aallaaviusoq taanna saneqqussinnaavaa aammalu suliassanut immikkuullarissumik killissalersorneqartunut, immikkorluinnaq ittunut § 24-mi aalajangersagaq siunnersuutigineqartoq malillugu tapersiisinnaalluni. Tamanna, inuk innarluutilik ilinniarsimasumit suliarineqartariaqartumik tapersiivigineqarnissamik pisariaqartitsippat, taamaallaat naleqqutissaq. Kommunalbestyrelse aamma oqartussaasut allat attuumassuteqartut, aalajangersagaq manna malillugu aningaasaqarnikkut tapersiisoqarsimanera apeqqutaatinnagu, allatut iluseqartunik tapersiissapput. Aalajangersagaq malillugu isumassuinermut aningaasaqarnikkut tapersiinerup, assersuutigalugu angerlarsimaffimmi peqqissaasoq, peqqinnissaqarfimmit ikiorsiissutaasusaaq, taarsissanngilaa.

Isumassuineq inummut nammineq angerlarsimaffimmini najugaqartumut isumassuinerussasoq, piumasagaataavoq. Taamaalilluni assersuutigalugu, inuk ulloq unnuarlu neqeroruummiippat, aalajangersagaq malillugu tapersiisoqarsinnaanngilaaq.

Aalajangersagaq malillugu tapersiinissamut periarfissaq ukiussarititaasunut killilerneqanngilaaq. Taamaattumik meeqqap innarluutillip angerlarsimaffimmi angajoqqaanit paarineqarneranut, tapersiisoqarsinnaavoq.

Aalajangersagaq qanigisaalluinnartunut, assersuutigalugu angajoqqaanut, inummut innarluutilimmut isumassuinermut, atorneqassaaq.

Imm. 2-mut.

Imm. 2-mi siunnersuutigineqarpoq imm. 1 malillugu inummut inuup innarluutillip ulluinnarni isumassorneqarneranik isumaginnittumut aningaasaqarnikkut tapersiineq, kommunalbestyrelsip inummik atorfinitsitsineratigut ikiorsiissutigineqassasoq. Kommunalbestyrelsip inuup innarluutillip pisariaqartitsinera aammalu Inatsisartut inatsisaat manna imaluunniit inatsisit allat malillugit tapersiinissamut periarfissat allat tunngavigalugit, sapaatip akunneranut nalunaaquttap akunneri atorfinitsitsiviusussat, aalajangersassavai. Nalunaaquttap akunnerisa amerlassusaat, inuup tapersiivigineqarnissamik pisariaqartitsineranik ataasiakkaatigut nalilersuineq, aammalu suliassat suut suliarineqarnissaat, tunngavigalugit aalajangersarneqassapput. Inoqutigiinni ilaasut allat nalinginnaasumik angerlarsimaffimmi suliassanik suliarinninnermi peqataassasut, nalilersuinermi tunngavissarititaasuni ilaatinneqassaaq. Tassalu suliassat nalinginnaasumik inoqutigiinni ilaasut allat pisussaaffigisaasa suliarinissaannut, aningaasaqarnikkut tapersiisoqarsinnaanngilaaq. Tamanna, aalajangersagaq manna malillugu isumassuinermik suliassaq inoqutigiinni ilaasumit imaluunniit qanigisaasumit allamit isumagineqarnera apeqqutaatinnagu, atuutissaq.

Aningaasaqarnikkut tapersiineq kommunalbestyrelsip aammalu ulluinnarni isumassuineramik isumaginnittuusup akornanni isumaqatigiissuteqarnermi, aningaasarsiatut ikiorsiissutigineqassaaq. Aningaasarsiat annertussusaat SIK-mi isumaqatigiissutit malillugit ilinniagaqarsimasuunngitsutut sulisunut akigititat minnerpaaffii sukkulluunniit atuuttut malillugit aalajangersarneqassaaq.

Imm. 3-mit.

Imm. 3-mi siunnersuutigineqarpoq, inuk inoqutigiinni ilaanngitsoq atorfinitsinneqarpat, pineqaatissinneqarsimmannginnermut uppernarsaat piniarneqassasoq.

Taamaalilluni assersuutigalugu angajoqqaat meeqqaminnut innarluutilimmut ulluinnarni isumassuineq isumagippassuk tamatumunngalu aningaasaqarnikkut tapersiivigineqartarpat, pineqaatissinneqarsimmannginnermut aamma meeqqanik pinerliisimannnginnermut uppernarsaat piniarneqartassasoq siunertarineqanngilaq.

§ 35-imut

§ 35-imi siunnersuutigineqarpoq, oqilisaassineq tapersiissutitut periarfissatut ingerlateqqinneqassasoq. Oqilisaassineq tassaatinneqarpoq angerlarsimaffiup avataani inissisimagallarneq, taamaalillutik qanigisaasut nalinginnaasumik isumassuineramik suliassamik isumaginnittuusut, oqilisaanneqassallutik. Oqilisaassivimmiinnerup sivisussusaanut, pisut ataasiakkaat aammalu inuit ataasiakkaat tapersiivigineqarnissamik pisariaqartitsinerat, apequtaassapput. Assersuutigalugu tassaasinnaavoq sapaatip akunnerata naanerani akuttunngitsumik uteqqittartumik inissisimaneq, sulinnigiffeqarluni allamiinneq imaluunniit qaammatini arlalinni sivisussusilimmik allamiinneq. Oqilisaassineq suliassanik ikiorneqarnerup saniatigut allatut ilusilimmik tapersiinertut iluseqarsinnaavoq, ilanngullugu allanngutsaaliuilluni sungiusaaneq il.il.

Oqilisaassinermi aningaasarsiat pillugit aalajangersakkat erseqqinnerusut, aalajangersakkami imm. 4-mi inatsimmi tunngaveqartumik nalunaarummi aalajangersarneqassapput. Aalajangersakkamut matumunnga aalajangersakkanut ataasiakkaanut nassuiaatit innersuussutigineqarput.

Imm. 1-imut.

Imm. 1-imi siunnersuutigineqarpoq, ulluinnarni isumassorneqarneq angajoqqaanit, qanigisaasunit allanit imaluunniit angajoqqaarsianit nammineq angerlarsimaffimmi isumagineqarpat, kommunalbestyrelsip inuk innarluutilik oqilisaassinissamik neqeroorfigissagaa.

Imm. 2-mut.

Kommunalbestyrelsip oqilisaassinermik neqerooruteqarnissamut pisussaaffeqarneranut tunngavissarititavoq, siullermik isumassuineramik suliassaq angajoqqaanut imaluunniit qanigisaasunut allanut isumassuineramik isumaginnittunut, annertuumik suliaqarneruneramik malitseqartoq, aappaattullu angajoqqaat imaluunniit qanigisaasut allat isumassuineramik

isumaginniinnarsinnaanissaannut oqilisaassinissaq pisariaqartoq, tunngavissarititaalluni. Tunngavissarititaasut marluk taakkua inuit annertuumik innarluutillit ikiorserneqartarnerat pillugu nalunaarummi § 29, imm. 1-imi aamma 2-mi piumasaqaatinik ingerlatitseqqiinerupput.

Kommunalbestyrelse § 34-mi aalajangersagaq malillugu tapersiisimassasoq, § 35 siunnersuutigineqartoq malillugu oqilisaassinissamut piumasaqaataanngilaq. § 35-imi aalajangersagaq malillugu tapersiisoqarsimappat, oqilisaassilluni allamiinnermi § 34 malillugu aningaasaqarnikkut tapersiissutaasuni ilanngaatiginnittoqassaaq.

Imm. 3-mut.

Imm. 3-mi siunnersuutigineqarpoq oqilisaassineq Inatsisartut inatsisaanni kapitali 9 malillugu najugaqarfissatut neqeroorummiinnikkut pisinnaasoq, tassa imaappoq najugaqaqatigiiffimmi, najugaqarfimmi illersugaasumi imaluunniit ulloq unnuarlu neqeroorummi. Inuk oqilisaassinermi inissinneqartussaq, najugaqarfissatut neqeroorummi siunnerfigineqartut iluanniitinneqarsinnaassaaq. Ulloq unnuarlu neqeroorummi oqilisaassisoqassappat, kommunalbestyrelsip ulloq unnuarlu neqeroorummi ataatsimiititaliaq innersuussisartoq tassani inissisimanissaq pillugu isumaqatigiissuteqarfigissavaa. Najugaqaqatigiiffimmi imaluunniit najugaqarfimmi illersugaasumi, kommunalbestyrelsimit oqilisaassinissaq pillugu aalajangiisumit allaanerusumit ingerlanneqartumi oqilisaassisoqartussaappat, kommunalbestyrelsit marluusut taakkua akornanni inissisimanissaq pillugu isumaqatigiissuteqartoqassaaq.

Aammattaaq siunnersuutigineqarpoq meeqqanut 18-it inorlugit ukiulinnut tunngatillugu oqilisaassineq Meeqqat tapersersorneqarnissaannut Inatsisartut inatsisaanni § 37 malillugu angajoqqaarsiani kommunimit aaqqissuunneqartuni akuerisaasuni ingerlanneqarsinnaasoq.

Taamaalilluni aalajangersakkami siunnersuutigineqartumi, oqilisaassineq sumi ingerlanneqarsinnaanersoq killissalersuisoqarpoq. Allannortitsinermi siunertaavoq, inuup oqilisaassivigineqartussap, inissisimanerup nalaani torersunik atugaqarluni pitsaassusilimmik isumassorneqarnissaata tapersersorneqarnissaatalu qulakkeerneqarnissaat.

Imm. 4-mut.

Piginnaatitsissut oqilisaassinermut aningaasarsiat pillugit maleruagassanik erseqqinnerusunik aalajangersaanissamut atorneqassasoq naatsorsuutigineqarpoq, matumani aningaasarsiat annertussusaat ilanngullugu.

§ 36-mut

Sammissasaqartitsinissamik neqeroorutitut ilusilimmik tapersiinissamut periarfissaqarneq, ilaatigut § 36-imi aalajangersagaq siunnersuutigineqartoq malillugu illersugaasumik suliffeqartitsinikkut, ilaatigut § 37 malillugu sammissasaqartitsinissamik peqateqartitsinissamullu neqeroorutitut, ingerlateqqinneqassasoq siunnersuutigineqarpoq.

Imm. 1-imut.

Imm. 1-imi siunnersuutigineqarpoq kommunalbestyrelse inummut innarluutilimmut 18-it sinnerlugit ukiulimmut innarluuteqarnini pissutigalugu suliffeqarnermi atugassarititaasut nalinginnaasut tunngavigalugu suliffeqalersinnaangitsumut imaluunniit suliffeqaannarsinnaangitsumut, aammalu inatsisit allat malillugit neqeroorutininik atuisinnaangitsumut, illersugaasumik suliffeqarnissamik neqerooruteqassasoq. Taamaattoq inuit innarluutillit, ulloq unnuarlu neqeroorummiittut ilaatinneqanngillat. Taakkununga tunngatillugu § 47, imm. 1-imi aalajangersagaq siunnersuutigineqartoq malillugu, illersugaasumik suliffeqartinneqarnissamik neqerooruteqarnissamut Naalakkersuisut pisussaaffeqarput.

Aalajangersakkami siunnersuutigineqarpoq inunnut siunnerfigineqartuniittunut illersugaasumik suliffissaqartitsinissamik neqerooruteqarnissaq kommunalbestyrelsip pisussaaffigissagaa.

Aalajangersakkap atuunnerani illersugaasumik suliffissaqartitsinissamik neqerooruteqarnissaq kommunalbestyrelsip pisussaaffigissavaa, kisiannili innuttaasoq neqeroorummik akuerinninnissamut pisussaaffeqartinneqassanani. Innuttaasup illersugaasumik suliffissaqartinneqarnissamik neqeroorfigineqarneq itigartippagu, tamanna inuup allatigut tapersiivigineqarneranut, imaluunniit tapersiivigineqarnissaanut sunniuteqarnerlunermik malitseqartinneqassanngilaq.

Inuk innarluuteqarnini pissutigalugu suliffeqarnermi atugassarititaasut nalinginnaasut tunngavigalugit suliffeqalersinnaassanngitsoq imaluunniit suliffeqaannarsinnaassanngitsoq, piunasaqaataavoq. Suliffeqalersinnaanginneq imaluunniit suliffeqaannarsinnaanginneq innarluuteqarnerinnarmik imaluunniit innarluuteqarnerinnangajammik tunngavilersuutitaqassaaq, aammalu tunngavissani allani, soorlu inooqatigiinnermi ajornartorsiutit, atornerluineq imaluunniit najukkami nalinginnaasumik suliffissaaleqisut amerlanerat, tunngavilersuutitaqassanani. Tamatuminnga aammalu inuk suliffeqalersinnaanginnersoq imaluunniit suliffeqaannarsinnaanginnersoq nalilersuineq, ataasiakkaatigut pissaaq aammalu pisut aalajangersimasut tunngavigalugit nalilersorneqassalluni. Nalilersuinnermi ilaatinneqartut naleqquttut ilaatigut tassaassapput inuup peqqissusaanut tunngasut, inooqatigiinnermut tunngasut aammalu suliffeqartarnikkut misilittagai.

Aammattaaq inuk inatsisit allat malillugit neqeroorutininik atuisinnaassanngitsoq piunasaqaataavoq. Illersugaasumik suliffissaqartitsineq tapersiissutissanut periarfissatut taamaalilluni tapersiinnissamut periarfissanut inatsisit allat malillugit assingusumik siunertaqartunut naleqqiullugu pingaarnertut inissisimangilaq. Tapersiinnissamut periarfissat pingaarnertut assersuutigalugu tassaapput immikkut aaqqissuussaasumik inuusuttunut ilinniagaqarneq, eqaatsumik suliffeqarneq aamma mianersuussamik suliffeqarneq.

Imm. 2-mut.

Imm. 2-mi siunnersuutigineqarpoq kommunalbestyrelse sannavinnik illersugaasunik aamma suliffissanik illersugaasunik, illersugaasumik suliffissaqartitsinerup ingerlanneqarfigisinnaasaannik, pilersitsisinnaasoq ingerlatsisinnaasorlu.

Imm. 3-mut.

Imm. 3-mi siunnersuutigineqartumi aalajangersarneqarpoq, illersugaasumik suliffissaqartitsineq ulloq unnuarlu neqeroorummiinnermut atatillugu sannavimmi illersugaasumi imaluunniit suliffissami illersugaasumi ingerlanneqarsinnaasoq, kommunalbestyrelsip Naalakkersuisut imaluunniit ulloq unnuarlu neqeroorut isumaqatigiissuteqarfigisinnaagaa. Kommunalbestyrelse ulloq unnuarlu neqeroorummut ingerlatsinermut aqutsisuusumut sullissinermut akigititamik Naalakkersuisunit aalajangersagaasumik, akiliissaaq. Isumalluutit sapinngisamik pitsaanerpaamik atorluarneqarnissaasa qulakkeernissaa, aalajangersakkami siunertaavoq. Illoqarfimmi imaluunniit nunaqarfimmi ulloq unnuarlu neqeroorut, ulloq unnuarlu neqeroorummut atasumik illersugaasumik sannaveqarpat, inuit innarluutillit, illoqarfimmi imaluunniit nunaqarfimmi tassani najugaqartutut, sannavimmi illersugaasumi pineqartumi illersugaasumik suliffissaqartinneqarnissaannik neqerooruteqarnissaq, kommunalbestyrelsimut periarfissaassaaq.

Imm. 4-mut.

Imm. 4-mi aalajangersakkami siunnersuutigineqartumi, inuit annertuumik innarluutillit ikiorserneqartarnerat pillugu nalunaarummi § 38, imm. 5, aamma 6, ingerlatinnarneqarpoq. Kommunalbestyrelse taamaalilluni inunnut innarluutilinnut, imm. 1 malillugu illersugaasumik suliffissaqartinneqartunut, suliffeqarnermut aningaasarsianik Naalakkersuisunit aalajangersarneqartunik, tunniussissaaq. Inatsisit atuuttut malillugit nalunaarummi aningaasartat aalajangersimasut aalajangersagaapput. Ingerlaavartumik iluarsisinnaanissaq siunertaralugu siunnersuutigineqarpoq, Inatsisartut inatsisaanni aningaasartanik aalajangersaasoqassanngitsoq, kisianni aningaasartat Naalakkersuisunit aalajangersarneqassasut.

Imm. 5-imut.

Piginnaatitsissut, kommunalbestyrelsip ulloq unnuarlu neqeroorummiinnermut atatillugu sannavimmik illersugaasumik imaluunniit suliffissamik illersugaasumik, illersugaasumik suliffissaqartitsinermut atuineranut akiliutissat annertussusissaasa aalajangersarneqarnerannut, kiisalu imm. 4-mi aalajangersagaq malillugu suliffissaqartinneqarnermi aningaasarsiassat annertussusissaasa aalajangersarneqarnerannut, atorneqassasoq naatsorsuutigineqarpoq.

§ 37-imut

Tapersiinissamut periarfissat sammisassaqaqartitsinermik neqerooruteqarnertut iluseqartut, ilaatigut § 37 malillugu sammisassaqaqartitsinissamik peqateqartitsinissamullu neqeroorutitut,

ilaatigut § 36-imi aalajangersagaq siunnersuutigineqartoq malillugu illersugaasumik suliffeqartitsinertut, ingerlateqqinneqassasoq siunnersuutigineqarpoq.

Imm. 1-imut.

Imm. 1-imi siunnersuutigineqarpoq kommunalbestyrelse inummut innarluutilimmut, inuttut pikkoriffiit, inuunermi atugassarititaasut aamma inuunerup naleqarnerata atuutsiinnarnissaannut imaluunniit pitsaanerulersinnissaannut, sammisassaqaqtitsinissamik peqateqaqtitsinissamullu neqerooruteqassasoq. Taamaattoq ilaatinneqanngillat inuit innarluutilit, ulloq unnuarlu neqeroorummiittut. Taakkununga tunngatillugu sammisassaqaqtitsinissamik peqateqaqtitsinissamullu neqerooruteqarnissamut pisussaaffeqarneq § 47, imm. 1-imi aalajangersagaq siunnersuutigineqartoq malillugu Naalakkersuisuniippoq.

Aalajangersakkami siunnersuutigineqarpoq, inunnut innarluutilinnut sammisassaqaqtitsinissamik peqateqaqtitsinissamullu neqerooruteqarnissamut kommunalbestyrelse pisussaaffeqartoq. Illersugaasumik suliffissaqaqtitsinissaq pillugu aalajangersakkap siunnersuutigineqartup paarlattuanik, sammisassaqaqtitsinissamik peqateqaqtitsinissamullu neqerooruteqarfigineqartussatut siunnerfigineqartut ukioqortussutsikkut killilerneqassasut, siunnersuutigineqanngilaq.

Aalajangersakkap atuunnerani, sammisassaqaqtitsinissamik peqateqaqtitsinissamullu neqerooruteqarnissamik kommunalbestyrelse pisussaaffeqarpoq, kisiannili innuttaasup neqeroorutip akuerinissaanut pisussaaffeqassanngilaq. Innuttaasup sammisassaqaqtitsinissamik peqateqaqtitsinissamullu neqeroorummi peqataanissaq itigartippagu, tamanna tapersiineranut inuup allatigut tigusartagaanut imaluunniit tapersiisarnissamut sunniteqarnerlunermik malitseqaqtinneqassanngilaq.

Imm. 2-mut.

Imm. 2-mi siunnersuutigineqarpoq kommunalbestyrelse ulluunerani ornittakkanik aamma sannavinnik illersugaasunik, sammisassaqaqtitsinissamik peqateqaqtitsinissamullu neqeroorutit ingerlanneqarfigisinnaasaannik, pilersitsisinnaasoq ingerlatsisinnaasorlu.

Imm. 3-mut.

Imm. 3-mi siunnersuutigineqartumi aalajangersarneqarpoq, sammisassaqaqtitsinissamik peqateqaqtitsinissamullu neqeroorutit ulluunerani ornittakkami imaluunniit ulloq unnuarlu neqeroorummiinnermut atatillugu sannavimmi illersugaasumi ingerlanneqarsinnaasut, kommunalbestyrelse Naalakkersuisunut imaluunniit ulloq unnuarlu neqeroorummut isumaqatigiissuteqarsinnaasoq. Kommunalbestyrelse ulloq unnuarlu neqeroorummut ingerlatsineranut aqutsisuusumut sullissineranut akigititamik Naalakkersuisunit aalajangersagaasumik, akiliissaaq. Isumalluutit sapinngisamik pitsaanerpaamik atorluarneqarnissaasa qulakkeernissaa, aalajangersakkami siunertaavoq. Illoqarfimmi imaluunniit nunaqarfimmi ulloq unnuarlu neqeroorut, ulloq unnuarlu neqeroorummut

atasumik ulluunerani ornittagaateqarpat imaluunniit illersugaasumik sannaveqarpat, inuit innarluutilit, illoqarfimmi imaluunniit nunaqarfimmi tassani najugaqartunut sammisasaqartitsinissamik peqateqartitsinissamullu neqeroorutit ulluunerani ornittakkami pineqartumi imaluunniit sannavimmi illersugaasumi ingerlanneqarnissaat, kommunalbestyrelsimut periarfissaassaaq.

Imm. 4-mut.

Piginnaatitsissut, kommunalbestyrelsip ulluunerani ornittakkamik imaluunniit ulloq unnuarlu neqeroorummiinnermut atatillugu sannavimmik illersugaasumik sammisasaqartitsinissamik peqateqartitsinissamullu neqeroorutitut atuisarnissaanut aalajangersaanissamut, atorneqassasoq naatsorsuutigineqarpoq.

§ 38-mut

Aalajangersakkami nutaajusumi, kapitali 7 malillugu inunnut innarluutilinnut kommunalbestyrelsip immikkut ittumik tapersiisarnissaanut pingaarnertigut killissalersuisoqarpoq. § 38-mi aalajangersakkat kapitali 7 malillugu immikkut ittumik tapersiisarnernut assigiinngitsunut tamanut atuupput. Taamaalilluni aalajangersagaq § 23-mi aalajangersakkamut siunnersuutigineqartumut kapitali 6 malillugu tapersiisarnernut tunngasumut, assinguvoq. Immikkut ittumik tapersiinerup suussusaa tunngavigalugu, kommunalbestyrelsip immikkut ittumik tapersiisarneq pillugu suliassanik sularinninneranut § 23 malillugu kommunalbestyrelsip tapersiisarneq pillugu aalajangiinissaanut piunasaqaateqarnernit, annertunerusunik piunasaqaateqartoqarpoq.

Imm. 1-imut.

Imm. 1-imi siunnersuutigineqarpoq, inuup pisariaqartitsineranut tamanna annertuumik pingaaruteqartuut isigineqartariaqarpat, aammalu §§ 39-45-imi aamma §§ 49-51-imi allassimasut immikkut ittumik tapersiissutissat aalajangersimasumik ilusillit ikiorsiissutiginiissaannut piunasaqaatit naammassineqarsimappata, kommunalbestyrelse §§ 39-45-imi aamma §§ 49-51-imi aalajangersakkat malillugit inummut annertuumik innarluutilimmut immikkut ittumik tapersiinissaq pillugu aalajangiissasoq. Taamatuttaaq siunnersuutigineqarpoq, inummut annertuumik innarluutilimmut tunngatillugu tamanna inuup pisariaqartitaannut annertumik pingaaruteqartutut isigineqartariaqarpat, aammalu §§ 46-imi aamma 48-mi piunasaqaatit naammassineqarsimappata, kommunalbestyrelse Kalaallit Nunaanni ulloq unnuarlu neqeroorummiinnissaq pillugu inassuteqaammik suliqaassasoq, takukkit §§ 46 aamma 48.

Aalajangiineq innuttaasumit taassuma suliani sinniisuanit qinnuteqarneq malillugu imaluunniit kommunalbestyrelsip nammineq ingerlataanik, pisinnaavoq.

Tapersiineq inuup pisariaqartitsineranut annertuumik pingaaruteqassasoq pillugu piunasaqaat, isumaqarpoq, pisariaqartitsinerit suulluunniit tapersiivigineqartussaannngitsut. Naatsorsuutigineqarpoq tapersiineq annertuumik pingaaruteqarnersoq naliliineq, ilaatigut inuup tapersiivigineqarnissamik pisariaqartitsinera, ilaatigut tapersiinerup suussusaa

aalajangiiffigineqartussa, aallaavigalugit pissaaq. Peqatigisaanik erseqqissarneqassaaq, siunertaammat, inuit ataasiakkaat inissisimaneranik naliliineq tapersiinissamut periarfissanut Inatsisartut inatsisaanniittunut ataqatigiissillugu, aallaavigalugu tamanna siunertaqartut isigineqartariaqarpat, kommunalbestyrelsip tapersiisinnaajunnaarsinnginnissaanut, tunngavissarititaasut periarfissaqartitsiviussammata.

Aammattaaq kapitali 7 malillugu immikkut ittumik tapersiivigineqarnissamut piunasaqaataavoq, inuk annertuumik innarluuteqartuussasoq. Innarluuteqarnermut oqaatsimut tunngatillugu, tamanna inatsisartut inatsisaanni § 7, imm. 3-mi siunnerfigineqartut pillugit inatsisartut inatsisaanni aalajangersakkami nassuiarneqarpoq. Aalajangersakkamut tassunga aalajangersakkanut ataasiakkaanut nassuiaatit innersuussutigineqarput. Inuit annertuumik innarluutillit paasineqassapput tassaasut inuit annertuumik piginnaanikillisimasut, aammalu piginnaanikillisimaneq inuup innarluuteqarneranik pissuteqartoq. Aammattaaq piunasaqaataavoq, annertuumik piginnaanikillisimaneq inuup ulluinnarni nammineersinnaanissamut periarfissaannik annertuumik killiliisimassasoq. Annertuumik piginnaanikillisimaneq assersuutigalugu kinguneqarsimasinnaavoq, inuup annertuumik nammineq inuttut pisariaqartitsinerminik isumaginnissinnaajunnaarluni, soorlu inuttut eqqiluisarneq aamma nerisarneq, atortunik ikiuutaasussanik atuilluni imaluunniit atuinani kisimiilluni angalasinnaajunnaarluni imaluunniit inunntut allanut attaveqateqarsinnaajunnaarluni.

Imm. 2-mut.

Imm. 2-mi aalajangersagaq siunnersuutigineqartoq, suliani kapitali 7 malillugu immikkut ittumik tapersiisarnermut tunngasuni, kommunalbestyrelsip suliassamik suliarinninneranut piunasaqaatinik, imaqarpoq. Suliaq kommunalbestyrelsip immikkut ittumik tapersiinissaq pillugu aalajangiineranut tunngassuteqarnersoq, imaluunniit kommunalbestyrelsip Kalaallit Nunaanni ulloq unnuarlu neqeroorummiinnissaq pillugu Naalakkersuisunut inassuteqaataanut tunngassuteqarnersoq, apeqqutaatinnagu piunasaqaat atuutissaaq.

Aalajangersagaq malillugu kommunalbestyrelse § 77-imi nassuiarneqartutut qulaajaanermik suliaqassaaq, aammalu tamatumunnga atatillugu minnerpaamik inuk taassumalu angajoqqaatut sinniisua imaluunniit angajoqqaatut akisussaasua kiisalu qanigisai §§ 74-imi aamma 75-mi aalajangersakkat malillugit ataasiarluni oqaloqatigisimassallugit. Tamatuma saniatigut piunasaqaataavoq, kommunalbestyrelse § 79-imi aalajangersagaq malillugu iliuusissatut pilersaarummik suliaqassasoq. §§ 74-imut, 75-imut, 77-imut aamma 79-imut aalajangersakkanut ataasiakkaanut nassuiaatit innersuussutigineqarput. Suliassamik suliarinninnissaq piunasaqaatigineqartoq, inuup immikkut ittumik tapersiivigineqarnissaanut, inuk sapinngisamik pitsaanerpaamik nammineersinnaanissamut aammalu inuiaqatigiinni naligiimmik peqataanissamut periarfissaqalersillugu, inuup tapersiivigineqarnissamik pisariaqartitsineranik sapinngisamik pitsaanerpaamik naammassinnittussamut, tunngavissaliissaaq.

Imm. 3-mut.

Imm. 3-mi aalajangersakkami siunnersuutigineqartumi, immikkut ittumik tapersiinerup nukinginnartumik aallartinnissaanik pisariaqartitsineq naammassiniarniarneqarpoq. Inuup qulaajaaneq aammalu iliuusissatut pilersaarummik suliaqarnissaq utaqqisinnaanagu suliani, aalajangersagaq atorineqarsinnaavoq. Suliani taakkunani immikkut ittumik tapersiineq pillugu kommunalbestyrelse aalajangiisinnaavoq, aammalu tapersiineq immikkut ittoq, qulaajaaneq aammalu iliuusissatut pilersaarut suliarineqarsimangikkaluarpalluunniit, imaluunniit taakkua naammassineqarsimangikkaluarpataluunniit, aallartinneqarsinnaavoq. Assersuutigalugu inuup annertuumik innarluuteqalernerani aammalu immikkut ittumik tapersiivigineqarnissamik tassanngaannartumik pisariaqartitsilernerani, imaluunniit kommunalbestyrelsiq qulaajaanermut atatillugu paasippagu inuup nammineq angerlarsimaffimminiiginnarnissaa illersorneqarsinnaanngitsoq, aalajangersagaq atorineqarsinnaassaaq. Aamma maannamut isumassuineramik suliassamik isumaginnittup, assersuutigalugu angajoqqaap, tassanngaannartumik suliassaq isumagisinnaajunnaarpagu, taamaattumillu ulloq unnuarluni neqeroorummiinnissaq pisariaqartinneqalerluni, aalajangersagaq atorineqarsinnaassaaq.

Kommunalbestyrelse isumaqarpat nukinginnartumik pisariaqartitsisoqalersimasooq, taamaattumillu qulaajaaneq aamma iliuusissatut pilersaarut naammassineqarsimangitsoq immikkut ittumik tapersiinissaq pillugu aalajangiilluni, kommunalbestyrelsiq qulaajaaneq aamma iliuusissatut pilersaarut suliarissavaa naammassissallugulu. Qulaajaanerup aamma iliuusissatut pilersaarutit tikkuarpagu, annertunerusumik tapersiineramik aallartitsisoqassasoq imaluunniit immikkut ittumik tapersiisoqassasoq, imaluunniit inuup immikkut ittumik tapersiineq allatut ittoq pisariaqartippagu, kommunalbestyrelse qulaajaaneq aamma iliuusissatut pilersaarut naammassineqartut tunngavigalugit tamanna pillugu aalajangiissaaq.

Imm. 3-mi aalajangersagaq, qulaajaaneq naammassineqarsimatillugu, kisianni iliuusissatut pilersaarut suli naammassineqarsimatinnagu, aamma atorineqassaaq.

Imm. 4-mut.

Imm. 4-mi aalajangersakkami siunnersuutigineqartumi erseqqissarneqarpoq, aalajangiinermi tunngavilersuinissaq kiisalu aalajangiinermi aalajangiiffigineqartut tamatigit akuersaarneqanngippata naammagittaalliorfissamik ilitersuinissaq pillugit pisortat ingerlatsinerannut inatsisini nalinginnaasuni piumasaaqatit, kommunalbestyrelsiq Inatsisartut inatsisaanni kapitali 7 malillugu immikkut ittumik tapersiinerani, atuutissasut.

Imm. 5-imut.

Imm. 5-imi siunnersuutigineqarpoq, kapitali 7 malillugu immikkut ittumik tapersiinissaq pillugu aalajangiisoqarpat, tapersiinermi siunertaasoq naammassineqarsimaannarnersoq, kommunalbestyrelsiq ingerlaavartumik malinnaaffigissagaa. Kommunalbestyrelse, ingerlaavartumik malinnaanermi tassani, innuttaasoq Inatsisartut inatsisaat malillugu imaluunniit inatsisit allat malillugit allatut ilusilimmik tapersiinissamik pisariaqartitsinersooq,

eqqumaffiginissaanik pisussaaffeqarpoq. Naliliisoqarpat Inatsisartut inatsisaat manna malillugu allatut ilusilimmik tapersiinnissamik pisariaqartitsisoqarsinnaasoq, kommunalbestyrelsip tapersiivigineqarnissamik pisariaqartitsineq paasiniarlugu aammalu aalajangiiniarluni, suliassamik suliarinninneq aallartissavaa. Suliassamik suliarinninnerup aallartinnissaanik pisussaaffeqarneq kommunalbestyrelsimiippoq, aammalu innuttaasoq pisortatigoortumik qinnuteqaammik tunniussisimassasoq piumasaqaataaangilaq. Taamaattoq suliap ingerlanerani siusissukkut aammalu suliassamik suliarinninnerup aallartivinnginnerani, innuttaasup tapersiineq pineqartutut iluseqartoq kissaatiginneraa, paasinarneqassaaq. Naliliisoqarpat innuttaasoq inatsisit allat malillugit tapersiivigineqarnissamik pisariaqartitsisimasinnaasoq, kommunalbestyrelse, innuttaasup pisariaqartitsinera apeqqutaatillugu, innuttaasup oqartussamut eqqortumut attaveqartinnissaata, imaluunniit oqartussaasup eqqortup tapersiivigineqarnissamik pisariaqartitsisinnaaneq pillugu nalunaarfigineqarnissaata, qulakkeernissaanik, pisussaaffeqarpoq. Pisussaaffeqarneq taanna, oqartussaasoq aalajangiisinnaatitaasoq kommunimi ingerlatsiviuppat alla imaluunniit kommunip avataani oqartussaasuuppat, apeqqutaatinnagu, atuutissaaq.

Immikkut ittumik tapersiineq qanoq akulikitsigisumik malinnaavigineqartassanersoq, erseqqissunik killissaliinernik aalajangersaasoqarsinnaangilaq. Akulikissusaa, innuttaasut ataasiakkaat tapersiivigineqarnissamik pisariaqartitsinerat aammalu immikkut ittumik tapersiinerup suussusaa, tunngavigalugit aalajangersarneqartassaaq. Malinnaanermut ilusiliussassanik piumasaqaateqangilaq. Taamaalilluni malinnaaneq, assersuutigalugu inuup aamma suliassamik suliarinnittup assigisaataluunniit akornanni oqaloqatigiinnikkut tapersiinermut atatillugu, ingerlaavartumik pisinnaavoq. Piumasaqaataavoq, malinnaaneq pisimasoq, tamanna qanoq pisimanersoq, aammalu malinnaanerup suna inernerisimaneraa, suliami inummut tunngasumi allattukkani ilanngunneqassasoq. Inunnut Kalaallit Nunaanni ulloq unnuarlu neqeroorummiittunut malinnaaneq, § 13, imm. 1 malillugu inummut tunngasumik nakkutilliinermut atatillugu, ingerlanneqarsinnaavoq.

Kommunalbestyrelse, malinnaanerup ilusaanut akulikissusissaanullu suliffiup iluani malittarisassanik aalajangersaasinnaavoq, kisianni malittarisassat naliliinissamut inissaqartitsissapput, taamaalilluni innuttaasut ataasiakkaat tapersiivigineqarnissamik pisariaqartitsinerat aammalu tapersiissutaasoq ikiorsiissutigineqartoq tunngavigalugu, tamanna pisariaqarpat, malinnaaneq akulikinnerusinnaassalluni.

§ 39-mut

Aalajangersakkami nutaajusumi, kommunalbestyrelsip ulluunerani immikkut neqeroorutini pilersitsisinaanera periarfissiissutigineqarpoq. Ulluunerani neqeroorutit immikkut ittut, ulluunerani neqeroorutit allat meeqqap annertuumik innarluuteqarnerata malitsigisaanik, meeqqap immikkut ittumik tapersiivigineqarnissamut pisariaqartitsineranik naammassinnissinnaangippata, kommunimi ulluunerani neqeroorutinit allanut tapertaasussatut isigineqassapput. Ulluunerani neqeroorutini immikkut ittuni suliassaqtassaavoq, tapersiineq suna meeqqat atuarfianni neqeroorummi tiguneqarsinnaanissaanut

aallartinneqassanersut paasiniarnissaa siunertaralugu, meeqqap alapernaarsorneqarnissaa, ilaatigut perorsaaniikkut tapersiineq, ilanngullugit allanngutsaaliuilluni sungiusarneq, sammisassaqaarneq, isumassorneqarneq allatullu iluseqartumik ikiorneqarneq.

Imm. 1-imut.

Imm. 1-imi siunnersuutigineqarpoq, meeraq innarluuteqarnini pissutigalugu immikkut ittumik tapersiivigineqarnissamik isumassorneqarnissamillu pisariaqartitsippat, ulluunerani neqeroorummi naammassineqarsinnaanngitsumik, meeqqat annertuumik innarluutillit, meeqqat atuarfianni suli atualinngitsutut ukiullit, ulluunerani neqeroorummi immikkut ittumi tiguneqarnissaat, kommunalbestyrelsip neqeroorutigisinnaavaa. Kommunalbestyrelsimut periarfissaq aammalu pisussaaffiunngitsoq, tassani pineqarpoq.

Meeqqap ulluunerani neqeroorummi immikkut ittumi aallartinnissamik neqeroorfigineqarnissaa pillugu kommunalbestyrelsip aalajangiinera, angajoqqaat aammalu oqartussaasut attuumassuteqartut qanimut suleqatigalugit pisariaqarpoq, tassani ilaallutik peqqinnissaqarfik, kiisalu innarluutaasoq pineqartoq pillugu immikkut ilisimasallit allat. Meeqqat, meeqqat atuarfiani atualertussaannngitsutut utoqqaassusillit kisimik tiguneqarsinnaapput.

Imm. 2-mut.

Aammattaaq *imm. 2*-mi siunnersuutigineqarpoq, kommunalbestyrelse ulluunerani neqeroorutunik pilersitsisinnaasoq ingerlatsisinnaasorlu. Ulluunerani neqeroorutip immikkut ittup inini meeqqanut ulluunerani neqeroorummiittunut tikikkuminartumik aaqqissuunneqarnissaat, kommunalbestyrelsip qulakkiissavaa. Kommunalbestyrelsip aamma qulakkiissavaa, ulluunerani neqeroorummi immikkut ittumik sulisussat aalajangersarneqartut, meeqqat innarluutillit tapersiivigineqarnissamik pisariaqartitsinerannik naammassinninnissamut, naammassasut.

Imm. 3-mut.

Imm. 3-mi siunnersuutigineqarpoq ulluunerani neqeroorutit immikkut ittut taakkua pillugit maleruagassanik erseqqinnerusunik aalajangersaanissamut Naalakkersuisut piginnaatinneqassasut. Piginnaatitsissut, kommunalbestyrelsip ulluunerani neqeroorutunik immikkut ittunik ingerlatsineranut nakkutilliinermullu maleruagassanik erseqqinnerusunik aalajangersaanissamut atorineqassasoq, eqqarsaatigineqarpoq. Piginnaatitsissut aamma, ulluunerani neqeroorutitut immikkut ittunut angajoqqaat akiliuteqartarnerat pillugu maleruagassanik aalajangersaanissamut atorineqassasoq, eqqarsaatigineqarpoq. Aammattaaq kommunit ulluunerani neqeroorutit immikkut ittunik pilersitsinerannut ingerlatsinerannullu aningaasalersuinissamut tapiissuteqartarneq pillugu maleruagassanik aalajangersaasoqarsinnaavoq.

§ 40-mut

Aalajangersakkami nutaajusumi, kommunalbestyrelsip klubbimi neqeroorutini immikkut ittunik pilersitsisinaanerat periarfissiissutigineqarpoq. Klubbimi neqeroorut immikkut ittoq, kommunimi sunngiffimmi neqeroorutit allat meeqqap annertuumik innarluuteqarnerata malitsigisaanik, meeqqap tapersiivigineqarnissamik immikkut pisariaqartitaannik naammassinnissinnaanngippata, taakkununga tapertaasussatut isigineqassaaq.

Imm. 1-imut.

Imm. 1-imi siunnersuutigineqarpoq, meeraq innarluuteqarnini pissutigalugu immikkut ittunik tapersersorneqarnissamik isumassorneqarnissamillu pisariaqartitsippat, ulluunerani neqeroorummi naammassineqarsinnaanngitsumik, kommunalbestyrelsip meeraq annertuumik innarluutilik klubbimi neqeroorummi immikkut ittumi tiguneqarnissaanik neqeroorfigisinnaagaa. Tamanna kommunalbestyrelsimut periarfissaassasoq aammalu pisussaaffiussanngitsoq, tassani pineqarpoq.

Kommunalbestyrelsip meeqqap klubbimi neqeroorummi immikkut ittumi tiguneqarnissaa pillugu aalajangiinera, angajoqqaat aammalu oqartussaasut attuumassuteqartut qanimut suleqatigalugit pissaaq, ilanngullugit peqqinnissaqarfik aamma meeqqap atuarfia, kiisalu allat innarluutaasoq annertoq taanna pillugu immikkut ilisimasaqartut. Taamaallaat meeqqat 6-17-inik ukiullit tiguneqarsinnaassapput.

Imm. 2-mut.

Aammattaaq *imm. 2*-mi siunnersuutigineqarpoq, kommunalbestyrelse klubbimi neqeroorutini immikkut ittunik pilersitsisinnaasoq ingerlatsisinnaasorlu. Klubbimi neqeroorutip immikkut ittup inini meeqqanut klubbimi neqeroorummiittunut tikikkuminartumik aaqqissuunneqarnissaat, kommunalbestyrelsip qulakkiissavaa. Kommunalbestyrelsip aamma qulakkiissavaa, klubbimi neqeroorummi immikkut ittunik sulisussat aalajangersarneqartut, meeqqat innarluutillit tapersiivigineqarnissamik pisariaqartitsinerannik naammassinninnissamut, naammassasut.

Imm. 3-mut.

Imm. 3-mi siunnersuutigineqarpoq klubbimi neqeroorutit immikkut ittut taakkua pillugit maleruagassanik erseqqinnerusunik aalajangersaanissamut Naalackersuisut piginnaatinneqassasut. Piginnaatitsissut, kommunalbestyrelsip klubbimi neqeroorutini immikkut ittunik ingerlatsineranut nakkutilliinermullu maleruagassanik erseqqinnerusunik aalajangersaanissamut atorneqassasoq, eqqarsaatigineqarpoq. Piginnaatitsissut aamma, klubbimi neqeroorutinit immikkut ittunut angajoqqaat akiliuteqarnerat pillugu maleruagassanik aalajangersaanissamut atorneqassasoq, eqqarsaatigineqarpoq. Aammattaaq kommunit klubbimi neqeroorutini immikkut ittunik pilersitsinerannut ingerlatsinerannullu aningaasalersuinissamut tapiissuteqartarneq pillugu maleruagassanik aalajangersaasoqarsinnaavoq.

Inuk tapersersortaasussaq, inunnut annertuumik innarluutilinnut immikkut tapersiissutissatut periarfissatut ingerlateqqinneqassasoq, § 41-imi siunnersuutigineqarpoq.

Ingiaqateqartitsinertut tapersiissutitut periarfissamut allaassutigaa, inuk tapersersortaasussaq ingiaqataaginnartussaannngimmat, kisianni perorsaanikkut suliniuteqartussaalluni. Inuup tapersersortaasussap suliassaasa ilaat tassaasinnaavoq, assersuutigalugu kulturikkut aaqjissuussinernut imaluunniit pisiniarnernut ingiaqataaneq, kisianni inuk tapersersortaasooq ingiaqataanermtut perorsaanikkut suliniuteqartussaavoq. Taamaattumik immikkut ittumik tapersiineq inummik tapersersortaasussatut ilusilik, inuk innarluutilik perorsaanikkut tapersersorneqarnissamik pisariaqartitsippat aammalu ingiaqateqarnissaq kisiat pisariaqartissimangippagu, ikiorsiissutigineqassaaq. Inuup tapersersortaasup immikkut ittumik tapersiinertut iluseqarneranik aammalu taamaallaat inunnut annertuumik innarluutilinnut ikiorsiissutigineqarsinnaanerani, tamanna erseqqissarneqarpoq. Inummut annertuumik innarluutilimmut ingiaqateqartitsinertut aamma inummik tapersersortitut ilusilimmik tapersiisoqarsinnaavoq.

Imm. 1-imut.

Imm. 1-imi siunnersuutigineqarpoq kommunalbestyrelse, inummut annertuumik innarluutilimmut, nammineq angerlarsimaffimminiiginnarsinnaanissamut perorsaanikkut tapersersorneqarnissamik pisariaqartitsisumut, inummik tapersersorteqarnissamik neqerooruteqassasoq. Aalajangersagaq inuit annertuumik innarluutillit ikiorserneqartarnerat pillugu nalunaarummi § 24, imm. 1-imik ingerlatitseqqiineruvoq. Taamaattoq aalajangersakkami erseqqissarneqarpoq, perorsaanikkut tapersersorneqarnissamik pisariaqartitsisoqassasoq.

Imm. 2-mut.

Imm. 2-mi inuup tapersersortaasup suliassaasa killissalersorneqarnerat, siunnersuutigineqarpoq. Inuk tapersersortaasooq aalajangersagaq malillugu inummut innarluutilimmut tarnikkut, timikkut inooqatigiinnikkullu ineriartornerani tapersersuissaaq kiisalu inuup ulluinnarni pisassami nammineerluni isumagisinnaanissaannut tapersersuissalluni. Aalajangersagaq inuit annertuumik innarluutillit ikiorserneqartarnerat pillugu nalunaarummi § 25, imm. 1-imik aamma 2-mik ingerlatitseqqiineruvoq.

Imm. 3-mut.

Imm. 3-mi siunnersuutigineqarpoq, kommunalbestyrelsip inummik tapersersortimik immikkut ittumik tapersiinissaq pillugu aalajangiinermini, inuup tapersersortaasussap sapaatip akunneranut nalunaaquttap akunneri tapersersuinermtut atugassai, aalajangersassagai.

Imm. 4-mut.

Imm. 4-mi siunnersuutigineqarpoq kommunalbestyrelse inummik tapersersortaasussamik toqqaassasoq. Inuk innarluutilik qanoq tapersersorneqarnissaminik pisariaqartitsinersoq, taamaalillunilu inuk tapersersortaasussaq sunik piukkunnaateqassanersoq, kommunalbestyrelsip inummik tapersersortaasussamik toqqaanermi pingaartissavaa. Inuup

innarluutillip aamma inuup tapersersortaasussap imminnut tulluarsarneqarneranni, tamatigut ataasiakkaatigut nalilersuineq aallaaviusassaaq.

Aammattaaq siunnersuutigineqarpoq, inuk tapersersortaasussaq tapersersortitut sulinissamut immikkut tunngavissaqassasoq. Tunngavissat immikkut ittut taakkua tassaasinnaapput perorsaasutut ilinniagaqarsimaneq, kisianni aamma tapersersortitut sulinermik imaluunniit suliffinni allani innarluutilinnut suliassaqarfimmut attuumassuteqartuni, misilittagaqarnerusinnaalluni.

Imm. 5-imut.

Imm. 5-imi siunnersuutigineqarpoq, tapersersortit pillugit maleruagassanik erseqqinnerusunik aalajangersaanissamut Naalakkersuisut piginnaatinneqassasut, tassani ilaallutik piukkunnassuseqarnissamut piginnaasaqarfeqarnissamullu piumasagaatit kiisalu aningaasarsianut atorfininnermullu tunngasut.

§ 42-mut

Aalajangersakkami nutaajusumi siunnersuutigineqarpoq, meeqqamut annertuumik innarluutilimmut angajoqqaatut akisussaasup imaluunniit angajoqqaatut akisussaasut marluullutik tamarmik kommunip iluani najukkaminik illoqarfimmut imaluunniit nunaqarfimmut allamut nuunnerani aningaasartuutit tamakkiisumik ilaannaasumilluunniit matussusernissaannut aningaasaqarnikkut tapersiinnissamik, kommunalbestyrelsip neqerooruteqarsinnaaneranut periarfissamik, atuutsitsisoqalissasoq. Aalajangersakkami siunertaavoq kommunalbestyrelsip nuunnermut ikiorserneqarnissamik neqerooruteqarnissamut periarfissaqalersinnissaa, taamaalilluni ilaqutariit annertuumik innarluutilimmik meeraqartut kommunimi sumiiffimmut allamut, meeqqap eqqortumik ikiorserneqarsinnaanissaanut pitsaanerusunik periarfissalimmud, nuunnissamut piviusumik periarfissaqalissallutik. Tamatigut neqeroorutitut iluseqartinneqartassaaq, aammalu kommunalbestyrelsip tungaaniit angajoqqaatut akisussaasup imaluunniit angajoqqaatut akisussaasut marluullutik tamarmik nuunnissaat pinngitsaaliiniartutut iluseqartinneqanngisaannassalluni. Aammattaaq kommunalbestyrelsimut taamaallaat periarfissaavoq aammalu kommunalbestyrelsip aalajangersagaq malillugu aningaasaqarnikkut tapersiinnissaa pisussaaffiunani.

Aaliangersakkami siunnersuutigineqarpoq, kommunalbestyrelsip meeqqamut annertuumik innarluutilimmut angajoqqaatut akisussaasunut, kommunip iluani najukkaminik nuunnissamut aningaasartuutit matussutissaannik, aningaasaqarnikkut tapersiinnissaanissaanut, aningaasaliissuteqarnissamut inatsimmi tunngavissaliisoqassasoq.

Nr. 1-imit - 3-mut piumasagaatit naammassineqarsimappata aatsaat tapersiisoqarsinnaavoq. Taamaalilluni meeqqap tapersiivigineqarnissamik isumassorneqarnissamillu pisariaqartitsinera ilaqutariit maannakkut najugaanni naammassineqarsinnaanngippat imaluunniit ilungersorluni aatsaat naammassineqarsinnaappat, aatsaat nuunnissamut

ikiorsiisoqarsinnaavoq. Aappaattut piumasaqaataavoq, meeqqap Inatsisartut inatsisaat manna malillugu tapersiivigineqarnissamut pisariaqartitsinera, siunissami najugaqarfissatut kissaatigineqartumi pitsaaneruseqarissamut naammassineqarsinnaasoq. Kiisalu pingajuattut piumasaqaataavoq, angajoqqaatut akisussaasut nammineerlutik nuunnissamik kissaatigineqartutit oqaatigisimassagaat. Kingulliullugu taaneqartumut erseqqissarneqassaaq, angajoqqaatut akisussaasut aamma ilaqutariit kissaatigippassuk, nuunnissamut ikiorsiisoqassasoq, aammalu nutaamik najugaqalerneq kommunalbestyrelsimut nalequnnerussasoq tunngavilersuutaassanani.

Nuunnermut aningaasartuutit tamakkiisumik ilaannaasumilluunniit matussutissaannik ikiorsiisoqarsinnaavoq.

§ 43-mut

Aalajangersakkami nutaajusumi siunnersuutigineqarpoq, inuup annertuumik innarluutillip nuna tamakkerlugu inunnik innarluutilinnik sullissivimmi allanngutsaliuilluni sungiusarnissamut neqerooruteqarnissamut, kommunalbestyrelse periarfissaqartinneqassasoq. Allanngutsaliuilluni sungiusaaneq nuna tamakkerlugu inunnik innarluutilinnik sullissivimmiinnermi aammalu ulluinnarluni sungiusarnermi, ingerlanneqarsinnaavoq. Allanngutsaliuilluni sungiusaaneq siunertaavoq, inuup annertuumik innarluutillip piginnaasaqarnerminik aammalu ulluinnarni ingerlalluarsinnaanerminik attassiinnarnissaa. Nuna tamakkerlugu inunnik innarluutilinnik sullissivimmi allanngutsaliuilluni sungiusaaneq sungiusaaqqinnermut, katsorsartinnermut il.il. peqqinnissaqarfimmit isumagineqartumut, taarsiissanngilaq, kisianni allamik siunertaqarluni imaqarlunilu.

Imm. 1-imut.

Imm. 1-imi siunnersuutigineqarpoq kommunalbestyrelse nuna tamakkerlugu inunnik innarluutilinnik sullissivimmi allanngutsaliuilluni sungiusarnissamik inummut annertuumik innarluutilinnik neqerooruteqarnissaq pillugu aalajangiisnaasoq. Nuna tamakkerlugu inunnik innarluutilinnik sullissivimmi allanngutsaliuilluni sungiusarnissamik neqerooruteqarnissaq kommunalbestyrelsimut pisussaaffiliunneqanngilaq, kisianni taamaallaat periarfissaalluni. Piumasaqaataavoq allanngutsaliuilluni sungiusaaneq inuup piginnaasaqarnerminik attassiinnarnissaanut annertuumik pingaaruteqartutut isigineqassasoq. Piginnaasaqarnermik oqarnermi pineqarpoq inuup ulluinnarni nammineersinnaassuseqarnera aammalu nammineerluni imaluunniit atorlutut ikiuutaasussat atorlugit ulluinnarni suliaassanik nalinginnaasunik suliaqarsinnaassuseqarnera.

Imm. 2-mut.

Imm. 2-mi siunnersuutigineqarpoq, kommunalbestyrelsip allanngutsaliuilluni sungiusaaneq pillugu imm. 1 malillugu aalajangiinginnerani, kommunalbestyrelse nuna tamakkerlugu inunnik innarluutilinnik sullissivimmit akuerineqarsimassasoq. Nuna tamakkerlugu inunnik innarluutilinnik sullissivik kommunalbestyrelsimit inassuteqarneq tunngavilalugu akuersissuteqarnissaq pillugu aalajangiisnaaq. Inassuteqaatip imarisai suliamit suliamut,

suliap suussusaa apeqqutaalluni allanngorsarsinnaapput, aammalu imarisai kommunalbestyrelsip aamma nuna tamakkerlugu inunnik innarluutilinnik sullissiviup oqaloqatigiinneranni paasinarsisineqarsinnaapput. Nuna tamakkerlugu inunnik innarluutilinnik sullissiviup akuersissuteqarnissaq pillugu aalajangiinnginnerani, inuup pisariaqartitaasa aamma allanngutsaaliuilluni sungiusaanermi siunertaasup naammattumik paasinarsisineqarsimanissaa, aalajangiisuulluinnartumik pingaaruteqarpoq. Kommunalbestyrelsip inassuteqaataani qulaajaaneq aamma iliuusissatut pilersaarut suliarineqareersut, iluaqutaasumik aallaavigineqarsinnaapput. Kommunalbestyrelsip allanngutsaaliuilluni sungiusaanissamut inassuteqaataa akuerineqassanersoq nuna tamakkerlugu inunnik innarluutilinnik sullissiviup aalajangenera, aalajangiinerunngilaq, kisianni sullissiviup ingerlatsivimmi suliaqarneranut ilaatinneqassalluni.

Imm. 3-mut.

Imm. 3-mi siunnersuutigineqarpoq, kommunalbestyrelse nuna tamakkerlugu inunnik innarluutilinnik sullissivimmi allanngutsaaliuilluni sungiusaaneq pillugu aalajangiinermi saniatigut, aamma allanngutsaaliuilluni sungiusaanermut ilaatillugu, piffissami killilimmi nuna tamakkerlugu inunnik innarluutilinnik sullissivimmiititsinissaq pillugu, aalajangiinnaavoq. Sullissivimmiikkallarnissaq naleqqutissasoq piumasaqaataavoq. Aalajangersakkami siunertaavoq, inuit annertuumik innarluutillit, Kalaallit Nunaanni najugaqarnerisut apeqqutaatinnagu, allanngutsaaliuilluni sungiusaaneq iluaqutigisinnaagaat, qulakkeernissaa. Nuna tamakkerlugu inunnik innarluutilinnik sullissiviup tamanna akuerisimassagaa, aalajangersagaq malillugu sullissivimmiikkallarnissaq pillugu kommunalbestyrelsip aalajangiinissaanut, piumasaqaataavoq.

Imm. 4-mut.

Imm. 4-mi siunnersuutigineqarpoq, innuttamik allanngutsaaliuilluni sungiusaanermik aamma nuna tamakkerlugu inunnik innarluutilinnik sullissivimmik atuinerannut kommunalbestyrelsip akiliinissaanut, akigititamik ukiumut ataasiarlutik aalajangersaanissamut Naalakkersuisut piginnaatinneqassasut.

§ 44-mut

Imm. 1-imut.

§ 44-mi siunnersuutigineqarpoq, najugaqatigiiffimmi ineqarnissamut tapersiinissamut periarfissaq ingerlatiinnarneqassasoq. Siunnersuutigineqarpoq kommunalbestyrelsip najugaqatigiiffimmi ineqarnissamik neqerooruteqarnissaanut piumasaqaatit, Inatsisartut inatsisaanni ataatsimoortinneqassasut. Inuiaqatigiit qanittumiittut isumaqartinneqarpoq kommunip pineqartup iluani. Taamaalilluni siunnersuutigineqarpoq, 1. inuk 18-it sinnerlugit ukioqarpat, 2. inuk innarluuteqarnini pissutigalugu ulluinnarni tapersorneqarnissamik pisariaqartitsippat, 3. inuk innarluuteqarnini pissutigalugu nammineq angerlarsimaffimmini najugaqarsinnaanngippat, 4. inuk nammineersinnaappat, perorsaanikkut suliaassanillu ulluunerani ikiorneqarnissamik taamaallaat pisariaqartitsilluni, aamma 5. inuup pisariaqartitai najugaqatigiiffimmi najugaqarnerani naammassineqarsinnaappata, inuup annertuumik

innarluutillit najugaqatigiiffimmi najugaqarnissamik neqeroorfigineqarnissaanut kommunalbestyrelse pisussaaffeqassasoq. Tapersissutissatut periarfissamut siunertaavoq, inuk nammineq angerlarsimaffimmini tapersiivigineqarluni naammassineqarsinnaasunit annertunerusumik tapersersorneqarnissamik pisariaqartitsisup, toqqissisimanartuni atugaqarluni pisariaqartunut ikiorneqarsinnaanissaata isumassorneqarsinnaanissaatalu qulakkeerneqarnissaat.

Nr. 2-mi aamma 3-mi piumasagaatit inuit annertuumik innarluutillit ikiorserneqartarnerat pillugu nalunaarummi § 39, imm. 1-imik toqqaannartumik ingerlatitseqqiinerupput. Inuk innarluuteqarnini pissutigalugu nammineq angerlarsimaffimmini najugaqarsinnaassanngitsoq pillugu piumasagaammut tunngatillugu, tamanna paasineqassaaq, inuk Inatsisartut inatsisaat manna malillugu tapersiivigineqarluni aamma immikkut ittumik tapersiivigineqarluni nammineq angerlarsimaffimmini nammineersinnaanngitsoq. Taamaattoq innuttaasoq annertuumik tapersiivigineqarluni nammineq angerlarsimaffimminiissinnaagaluartoq, innuttaasup tamanna kissaatigippagu, kommunalbestyrelse najugaqatigiiffimmi ineqarnissamik neqerooruteqarnissamut periarfissaqarpoq. Kommunalbestyrelsimut periarfissaatinneqartoq tassani pineqarpoq, aammalu innuttaasup nammineerluni najugaqatigiiffimmi ineqarnissaq kissaatigissagaa, pisariaqarluni.

Nr. 4-mi piumasagaat ilaannakortumik inuit annertuumik innarluutillit ikiorserneqartarnerat pillugu nalunaarummi § 39, imm. 1-imi kingullermi ilaasumik ingerlatitseqqiineruvoq, taamaattoq erseqqissarneqarpoq, perorsaanikkut suliassatigullu ikiuunnissaq, taamaallaat ulluunerani pisariaqartoq, tassani pineqartoq. Tamanna suleriaasiusunut naapertuuppoq. Taamatuttaaq najugaqatigiiffiit taamaallaat 18-it sinnerlugit ukiulinnik najugaqarfigineqarnerat, suleriaasiusunut naapertuuppoq.

Nr. 5-imi siunnersuutigineqarpoq, inuup pisariaqartitai najugaqatigiiffimmi naammassineqarsinnaassasut, piumasagaataassasoq. Piumasagaat isumaqarpoq, inuup tapersersorneqarnissamik pisariaqartitsinera najugaqatigiiffimmi naammassineqarsinnaanersoq, imaluunniit najugaqarfimmi illersugaasumi ineqarnissamik inuup neqeroorfigineqarnissaa isumaliutersuutigineqartariaqaraluarnersoq, kommunalbestyrelsip, najugaqatigiiffimmi ineqarnissaq pillugu aalajangiinissaq sioqqullugu aammalu naleqqunnerpaamik qulaajaanermut ilaatillugu paasiniassagaa.

Imm. 2-mut.

Aalajangersakkami kommunini isumalluutit sapinngisamik pitsaanerpaamik atorluarneqarnissaannut periarfissaqarneq ammaanneqarpoq. Taamaalilluni aalajangersagaq taanna tunngavigalugu najugaqatigiiffiup, assersuutigalugu najugaqartut ukiui, najugaqartut innarluutaasa suussusaat imaluunniit tunngavissarititaasut naleqquttut allat, aallaavigalugit ataatsimoortitsiviusinnaanera ajornarunnaassaaq.

Imm. 3-mut.

Aalajangersakkami piumasaqaatit kommunalbestyrelsip kommunimi allami najugaqatigiiffimmi inissamik neqerooruteqarsinnaaneranut piumasaqaatigineqartut, maleruagassiivigineqarput.

Siullermik piumasaqaatigineqarpoq inummit innarluutilimmit imaluunniit taassuma angajoqqaatut sinniisuanit akuersissummik piniartoqassasoq. Taamaalilluni kommunalbestyrelsip inuup avatangiisiminut qanittumi najugaqatigiiffimmi inissarsinissamut piumasaqaataanik saneqqutsisinnaanissaanut, inuk tamatumunnga akuersisimassasoq, piumasaqaataavoq.

Kommunalbestyrelsip inuk innarluutilik imaluunniit taassuma angajoqqaatut sinniisua paasissutissanik taassuma, paasissutissanik tunngaveqartumik aalajangiisinnaanissamut pisariaqartitaanik tunissagaa, akuersinissap piniarnerani qulakkeerneqassaaq.

Inuk tamatuma kingorna najugaqatigiiffimmi aalajangersimasumi kommunimi allami inissisimasumi inissap tignissaa pillugu akuersissaaq. Akuersinissamut ilusissanut piumasaqaateqanngilaq, taamaattoq tamanna oqaasiinnakkut oqaatigineqarsimappat sullissisup allakkiatut ilusilimmi akuersineq allassavaa.

Immikkoortoq 2-mi allassimavoq, inuup kommunip angerlarsimaffigisaata najugaqatigiiffimmi aalajangersimasumi inissamik neqeroorfigineqarsinnaalernissaanut, inuup kommunip angerlarsimaffigisaata aamma najugaqatigiiffiup aalajangersimasup inissisimaffigisaani kommunalbestyrelsip akornanni allaganngorlugu saneqqunneqarsinnaanngitsumik isumaqatigiissuteqarsimassasut.

Aalajangersagaq, kommunalbestyrelse najugaqatigiiffinnik kommunalbestyrelsini allani inissisimasuni pilersinneqarsimasunilu piumasaminik atuisinnaannginnera eqqarsaatigalugu isigineqassaaq.

§ 45-imut

Imm. 1-imut.

§ 45-imi siunnersuutigineqarpoq, najugaqarfimmi illersugaasumi ineqarnikkut tapersiivigineqarnissamik periarfissaq, ingerlatiinnarneqassasoq. Siunnersuutigineqarpoq kommunalbestyrelsip najugaqarfimmi illersugaasumi ineqarnissamik neqerooruteqarnissaanut piumasaqaatit Inatsisartut inatsisaanni ataatsimoortinneqassasut. Taamaalilluni siunnersuutigineqarpoq, 1. inuk 18-it sinnerlugit ukioqarpat, 2. inuk innarluuteqarnini pissutigalugu ulluinnarni tapersorneqarnissamik pisariaqartitsippat, 3. inuk innarluuteqarnini pissutigalugu nammineq angerlarsimaffimmini najugaqarsinnaanngippat, 4. inuk najugaqatigiiffimmi neqeroorutigineqarsinnaasunit annertunerusumik tapersorneqarnissamik pisariaqartitsippat, ilanngullugu ulloq unnuarlu tamaat tapersorneqarnissamik pisariaqartitsineq, aamma 5. Inuup pisariaqartitai najugaqarfimmi illersugaasumi ineqarnermi naammassineqarsinnaappata, kommunalbestyrelsip inuk annertuumik innarluutilik najugaqarfimmi illersugaasumi ineqarnissamik

neqeroorfiginissaanut pisussaaffeqassasoq. Tapersiissutissatut periarfissamut siunertaavoq, inuit najugaqaqatigiiffimmi ineqarnerminni aallaaviatigut ikiorsiivigineqarsinnaasunit annertunerusumik tapersersorneqarnissamik pisariaqartitsisut, pisariaqartunut ikiorneqarsinnaaneratt isumassorneqarsinnaanerallu, qulakkeerreqassasoq.

Nr. 4 malillugu piumasaqaataavoq, inuk najugaqaqatigiiffimmi neqeroorutigineqarsinnaasunit annertunerusumik tapersersorneqarnissamik pisariaqartitsisuussasoq, ilanngullugu ulloq unnuarlu tamaat tapersersorneqarnissamik pisariaqartitsilluni. Taamaattoq innuttaasoq annertuumik tapersiivigineqarluni najugaqaqatigiiffimmiissinnaassagaluartoq, innuttaasup tamanna kissaatigippagu, kommunalbestyrelse najugaqarfimmi illersugaasumi ineqarnissamik neqerooruteqarnissamut periarfissaqarpoq. Kommunalbestyrelsimut periarfissaatinneqartoq tassani pineqarpoq, aammalu assersuutigalugu innuttaasup qanigisaannut qaninnerusumi inissisimanagera pissutigalugu, innuttaasup nammineerluni najugaqarfimmi illersugaasumi ineqarnissaq kissaatigissagaa, pisariaqarluni.

Nr. 5-imi siunnersuutigineqarpoq, inuup pisariaqartitai najugaqarfimmi illersugaasumi ineqarnermi naammassineqarsinnaassanngitsut, piumasaqaataassasoq. Piumasaqaatip kingunerisaanik, inuup tapersersorneqarnissamik pisariaqartitsinera najugaqarfimmi illersugaasumi naammassineqarsinnaanersoq, imaluunniit inuup ulloq unnuarlu neqeroorummiinnissamik neqeroorfigineqarnissaa isumaliutersuutigineqartariaqaraluarnersoq, kommunalbestyrelsip, najugaqarfimmi illersugaasumi ineqarnissaq pillugu aalajangiinnginnermi aammalu naleqqunnerpaamik qulaajaanermut ilaatillugu, paasinarsisissavaa.

Imm. 2-mut.

Aalajangersakkami kommunini isumalluutit sapinngisamik pitsaanerpaamik atorluarneqarnissaannut periarfissaqarneq ammaanekarpoq. Taamaalilluni aalajangersagaq taanna tunngavigalugu najugaqarfiup illersugaasup, assersuutigalugu najugaqartut ukiui, najugaqartut innarluutaasa suussusaat imaluunniit tunngavissarititaasut naleqquttut allat, aallaavigalugit ataatsimoortitsiviusinnaanera ajornarunnaassaaq.

Imm. 3-mut.

Aalajangersakkami piumasaqaatit kommunalbestyrelsip kommunimi allami najugaqarfimmi illersugaasumi inissamik neqerooruteqarsinnaaneranut piumasaqaatigineqartut maleruagassiivigineqarput.

Siullermik piumasaqaatigineqarpoq inummit innarluutilimmit imaluunniit taassuma angajoqqaatut akisussaasuanit akuersisummik piniartoqassasoq. Taamaalilluni kommunalbestyrelsip inuup avatangiisiminut qanittumi najugaqarfimmi illersugaasumi inissarsinissamut piumasaqaataanik saneqqutsisinnaanissaanut, inuk tamatumunnga akuersisimassasoq, piumasaqaataavoq.

Kommunalbestyrelsip inuk innarluutilik imaluunniit taassuma angajoqqaatut akisussaasui paasissutissanik taassuma, paasissutissanik tunngaveqartumik aalajangiisinnaanissamut pisariaqartitaanik tunissagaa, akuersinissap piniarnerani qulakkeerneqassaaq. Inuk tamatuma kingorna najugaqarfimmi illersugaasumi aalajangersimasumi kommunimi allami inissisimasumi inissap tigunissaa pillugu akuersissaaq. Akuersinissamut ilusissanut piunasaqaateqanngilaq, taamaattoq tamanna oqaasiinnakkut oqaatigineqarsimappat sullissisup allakkiatut ilusilimmi akuersineq allassavaa.

Immikkoortoq 2-mi allassimavoq, inuup kommunip angerlarsimaffigisaata najugaqarfimmi illersugaasumi aalajangersimasumi inissamik neqeroorfigineqarsinnaalernissaanut, inuup kommunip angerlarsimaffigisaata aamma najugaqarfiup illersugaasup aalajangersimasup inissisimaffigisaani kommunalbestyrelsip akornanni allaganngorlugu saneqqunneqarsinnaanngitsumik isumaqatigiissuteqarsimassasut. Aalajangersagaq, kommunalbestyrelse najugaqarfinnik illersugaasunik kommunalbestyrelsini allani inissisimasuni pilersinneqarsimasunilu piunasaaminik atuisinnaannginnera eqqarsaatigalugu isigineqassaaq.

§ 46-imut

§ 46-imi siunnersuutigineqarpoq, inunnut 18-it sinnerlugit ukiulinnut ulloq unnuarlu neqeroorummiinnertut ilusilimmik tapersiinnissamut periarfissaqarneq, ingerlatiinnarneqassasoq. Aalajangersakkami siunertaavoq inuit innarluutilit, tapersorsorneqarnissamik pisariaqartitsinerpaat, pisariaqartitaannik naammassinniffiusumik, naammattumik immikkullu ilisimannittunit tapersorsorneqarnissaasa qulakkeerneqarnissaa.

Imm. 1-imut.

Imm. 1-imi siunnersuutigineqarpoq, ulloq unnuarlu neqeroorummiinnissamik inassuteqaat pillugu kommunalbestyrelsip aalajangiinissaanut, arlalinnik piunasaqaateqartoqassasoq. Piunasaqaatit Inatsisartut inatsisaanni aalajangersakkami ataatsimi ataatsimoortinneqarnissaat naleqqutsinneqarpoq.

Siullermik siunnersuutigineqarpoq inersimasunut ulloq unnuarlu neqeroorummiinnissamik neqerooruteqarsinnaanissamut, inuk 18-it sinnerlugit ukioqassasoq. Meeraq pineqarpat tamatumunnga taarsiullugu, § 48-mi aalajangersagaq siunnersuutigineqartoq malillugu aalajangiisoqassaaq.

Aappaattut piunasaqaataavoq, inuk innarluuteqarnini pissutigalugu ulluinnarni tapersorsorneqarnissamik pisariaqartitsissasoq, aammalu pingajuattut inuk innarluuteqarnini pissutigalugu nammineq angerlarsimaffimmini najugaqarsinnaanngitsoq. Piunasaqaatit taakkua piunasaqaatinut najugaqatigiiffinnut aamma najugaqarfinnut illersugaasunut tunngatinneqartunut naapertuuttumik nassuiarneqassapput.

Sisamaattut piunasaqaataavoq, inuk najugaqarfimmi illersugaasumi neqeroorutigineqarsinnaasunit annertunerusumik tapersorsorneqarnissamik pisariaqartitsissasoq. Tassani kommunimi najugaqarfimmi illersugaasuni, kommunalbestyrelsip § 55 malillugu pilersuisussaaitaanera eqqarsaatigalugu inummut siunissami qanittumi inissaqartitsiviusinnaasumi, suut tapersiissutigineqarsinnaanersut naliliisoqassaaq. Aammattaaq siunissami najugaqarfimmut illersugaasunut aamma ulloq unnuarlu neqeroorutinut siunnerfiusunut tunngatillugu qalleraattoqassasoq naatsorsuutigineqarpoq. Innuttaasoq najugaqarfimmi illersugaasumi inissiami annertuumik tapersorsorneqarluni nammineersinnaassagaluartoq, innuttaasup tamanna kissaatigippagu, kommunalbestyrelse ulloq unnuarlu neqeroorummiinnissamik neqerooruteqarnissamik periarfissaqarpoq. Tassani kommunalbestyrelsimut periarfissaliunneqartoq pineqarpoq, aammalu assersuutigalugu immikkut ilisimasalinnit tapersorsorneqarnissap periarfissarissaarnerunera imaluunniit innuttaasup qanigisaannut qaninnerusumi inissisimanera pissutigalugit, ulloq unnuarlu neqeroorummiinnissaq innuttaasup nammineerluni kissaatigissagaa, pisariaqarpoq.

Tallimaattut inuup pisariaqartitai ulloq unnuarlu neqeroorummiinnermi naammassineqarsinnaassasut, piunasaqaataavoq. Piunasaqaatip kingunerisaanik, inuup tapersorsorneqarnissamik pisariaqartitai Kalaallit Nunaanni ulloq unnuarlu neqeroorummi naammassineqarsinnaanersut, imaluunniit Danmarkimi ulloq unnuarlu neqeroorummiinnissamik inuk neqeroorfigineqassanersoq isumaliutersuutigineqartariaqaraluarnersoq, kommunalbestyrelsip, ulloq unnuarlu neqeroorummiinnissamut inassuteqaateqarnissaq pillugu aalajangiinnginnermi aammalu naleqqunerpaamik qulaajaanermut ilaatillugu, paasinarsisissavaa.

Imm. 2-mut.

Imm. 2-mi siunnersuutigineqarpoq, ulloq unnuarlu neqeroorummiinnissamik innuttaasoq annertuumik innarluutilik neqeroorfigineqassasoq pillugu aalajangiinnissamut Naalakkersuisut piginnaatitaasut. Aalajangersagaq inuit annertuumik innarluutillit ikiorserneqartarnerat pillugu nalunaarummi § 16-imik ingerlatitseqqiineruvoq. Aalajangersakkami erseqqissarneqarpoq, Naalakkersuisut kommunalbestyrelsimit inassuteqaat tunngavigalugu aalajangiissasut.

Inassuteqaatip imarisai suliamit suliamut allanngorarsinnaapput aammalu suliap suussusaa apeqqaataassalluni, aammalu imarisai kommunalbestyrelsip aamma Naalakkersuisut oqaloqatigiinnerisigut paasinarsisinneqarsinnaallutik. Naalakkersuisut aalajangiinnginneranni, inuup tapersorsorneqarnissamut pisariaqartitsinerat naammattumik paasinarsisinneqarsimanissaa, aalajangiisuusaaq. Kommunilbestyrelsip inassuteqaataani qulaajaaneq aamma iliuisissatut pilersaarut suliarineqareersut aallaavigineqarpata iluaqutaasinnaavoq.

Imm. 3-mut.

Imm. 3-mi siunnersuutigineqarpoq, inuk inersimasunut annertuumik innarluutilinnut ulloq unnuarlu neqeroorummiittoq, inuk pisortanit allanik pilersuinnermut ikiorserneqartanngippat, kaasarfimmiiussanik atisarsiuutissanillu kaasarfimmioqarsinnaatitaasoq. Aalajangersagaq imarisamigut meeqqanut inuusuttunullu kiisalu annertuumik innarluutilinnut ulloq unnuarlu paaqqinniffiit pillugit nalunaarummi § 44, imm. 1-imik ingerlatitseqqiineruvoq. Inatsisartut inatsisaanni aningaasaliissutitigut inatsimmi tunngavissaliisoqarpat, naleqqunnerpaasorineqarpoq.

Imm. 4-mut.

Imm. 4-mi siunnersuutigineqarpoq, kaasarfimmiiussat aamma atisassarsiuutissat pillugit maleruagassanik erseqqinnerusunik aalajangersaanissamut Naalakkersuisut piginnaatinneqassasut. Piginnaatitsissut aningaasartat annertussusissaat, aningaasat atorsinnaasat pillugit, aamma ulloq unnuarlu neqeroorutip perorsaanermik pissuteqartumik aningaasanik uninngatitsinissamik periarfissaqarnera pillugit aalajangersaanermut atorneqassasoq, eqqarsaatigineqarpoq.

§ 47-imut

§ 47-imi siunnersuutigineqarpoq, inunnut annertuumik innarluutilinnut, ulloq unnuarlu neqeroorummiittunut, sammisassaqaqtitsinissamik neqerooruteqarnissap qulakkeernissaa Naalakkersuisut pisussaaffigigaat, ingerlatiinnarneqassasoq.

Imm. 1-imut.

Taamaalilluni *imm. 1-imi* siunnersuutigineqarpoq, inummut annertuumik innarluutilimmut, § 46-imi aalajangersagaq siunnersuutigineqartoq malillugu ulloq unnuarlu neqeroorummiittumut illersugaasumik suliffissaqaqtitsinissamik aamma sammisassaqaqtitsinissamik peqateqaqtitsinissamullu neqerooruteqarnissamik Naalakkersuisut pisussaaffeqartut. Taamaalilluni inersimasunut tunngatillugu pisussaaffeqarneq tassani kisimi pineqarpoq. Naalakkersuisut ulloq unnuarlu neqeroorummut akisussaasuunerat eqqarsaatigalugu, Naalakkersuisut aamma illersugaasumik suliffeqaqtitsinissamik neqerooruteqarnissamik aammalu sammisassaqaqtitsinissamik peqateqaqtitsinissamullu neqerooruteqarnissamik pisussaaffeqartuunissaat naleqqussorineqarpoq. Illersugaasumik suliffeqaqtitsinerup aamma sammisassaqaqtitsinissamik peqateqaqtitsinissamullu neqeroorutit imarisaat pillugit §§ 36-imut aamma 37-imut aalajangersakkanut ataasiakkaanut nassuiaatit innersuussutigineqarput.

Imm. 2-mut.

Imm. 2-mi siunnersuutigineqarpoq Naalakkersuisut sannavinnik illersugaasunik, suliffissanik illersugaasunik aamma ulluunerani ornittakkanik imm. 1 malillugu illersugaasumik suliffeqaqtitsinerup aamma sammisassaqaqtitsinissamik peqateqaqtitsinissamullu neqeroorutit ingerlanneqarfigninnaasaannik, pilersitsisinnaasut ingerlatsisinnaasullu. Aalajangersakkami Naalakkersuisut sannavinnik illersugaasunik, suliffissanik illersugaasunik aamma ulluunerani ornittakkanik pilersitsinissamut ingerlatsinissamullu ataatsimut isigalugu

periarfissaqalersinneqanngillat, kisianni taamaallaat Naalakkersuisut imm. 1-imi aalajangersagaq siunnersuutigineqartoq malillugu pisussaaffimminik naammassinnissinnaanissaa siunertaralugu, taamaattunik pilersitsinissamut ingerlatsinissamullu periarfissinneqarlutik. Taamaattoq § 36, imm. 3-mi, aamma § 37, imm. 3-mi, aalajangersakkat siunnersuutigineqartut malillugit kommunalbestyrelsip aamma Naalakkersuisut imaluunniit ulloq unnuarlu neqeroorutip, inuit innarluutillit ulloq unnuarlu neqeroorummiingitsut sannavimmi illersugaasumi, suliffissami illersugaasumi imaluunniit ulluunerani ornittakkami Naalakkersuisunit pilersinneqarsimasumi ingerlanneqartumilu neqeroorummik atuisinnaanera pillugu isumaqatigiissuteqarnissaat ajornanngilaq. § 36, imm. 3-mi, aamma § 37, imm. 3-mi aalajangersakkanut ataasiakkaanut nassuiaatit innersuussutigineqarput.

Imm. 3-mut.

Imm. 2-mi aalajangersakkamut siunnersuutigineqartumut nangissutigalugu aamma imm. 3-mi siunnersuutigineqarpoq, inummut ulloq unnuarlu neqeroorummiittumut illersugaasumik suliffeqartitsineq aamma sammisassaqartitsinissamik peqateqartitsinissamullu neqerooruteqarneq sannavimmi illersugaasumi, suliffissami illersugaasumi imaluunniit ulluunerani ornittakkami, kommunalbestyrelsip §§ 36-imi aamma 37-imi aalajangersakkat siunnersuutigineqartut malillugu ingerlataani, ingerlanneqarsinnaasoq, Naalakkersuisut kommunalbestyrelse isumaqatigiissuteqarfigisinnaagaat. Naatsorsuutigineqassaaq Naalakkersuisut Kommunalbestyrelsillu ataasiakkaat isumaqatigiissutaat malillugit Naalakkersuisut kommunalbestyrelsimut sullissinermut akigititamik akiliissasut. Aalajangersakkami siunertaavoq, isumalluutit sapinngisamik pitsaanerpaamik atorluarneqarnissaasa, qulakkeernissaa. Kommunalbestyrelse illoqarfimmi imaluunniit nunaqarfimmi sannavimmik illersugaasumik imaluunniit ulluunerani ornittakkamik ingerlatsippat, inuit innarluutillit, illoqarfimmi imaluunniit nunaqarfimmi tassani ulloq unnuarlu neqeroorummiittut, sannavimmi illersugaasumi imaluunniit ulluunerani ornittakkami pineqartumi illersugaasumik suliffeqartinneqarnissaannik imaluunniit sammisassaqartitsinissamik peqateqartitsinissamullu neqerooruteqarfiginissaannik Naalakkersuisut periarfissaqassapput.

Imm. 4-mut.

Imm. 4-mi siunnersuutigineqarpoq, inunnut innarluutilinnut, imm. 1-imi aalajangersagaq siunnersuutigineqartoq malillugu illersugaasumik suliffeqartinneqartunut suliffeqarnermut aningaasarsiassanik Naalakkersuisut tunniussissasut. Aalajangersakkami inuit illersugaasumik suliffeqartinneqartut aammalu ulloq unnuarlu neqeroorummiittut, inunnut illersugaasumik suliffeqartinneqartunut aammalu najugaqatigiiffimmi imaluunniit najugaqarfimmi illersugaasumi nammineq angerlarsimaffimmini najugaqartunut, naliigiissinneqarput. Aalajangersagaq malillugu Naalakkersuisut, suliffeqarnermi aningaasarsiat annertussusissaat aalajangersartussaavaat.

Imm. 5-imut.

Aalajangersakkami aalajangersarneqarpoq, Naalakkersuisut illersugaasumik suliffissaqartitsinerup aamma sammisassanut peqateqarnissamullu neqeroorutini atuinermut, imm. 3 naapertorlugu, akigititassanik ukiumut ataasiarlutik aalajangersaasassasut tamanullu saqqummiussisassasut.

§ 48-mut

§ 48-mi siunnersuutigineqarpoq, meeqqap 18-it inorlugit ukiullip annertuumik innarluutillip ulloq unnuarlu neqeroorummiinnissamut periarfissaqarnera, ingerlatiinnarneqassasoq. Taamaattoq meeqqat innarluutillit ulloq unnuarlu neqeroorummiittarnerat aalajangersakkami immikkoortumi sammineqassapat, tamanna naleqqutsinneqarpoq.

Imm. 1-imut.

Imm. 1-imi siunnersuutigineqarpoq, imm. 1, nr. 1-3-mi piumasaqaatit naammassineqarsimappata, meeqqap annertuumik innarluutillip ulloq unnuarlu neqeroorummiinnissaanut inassuteqarnissaq pillugu kommunalbestyrelse aalajangiissasoq. Tamatum kingorna siullermik piumasaqaataavoq, meeraq ullut tamaasa piginnaasassaminut annertuumik imaluunniit tulluarsakkamik tapersersorneqarnissamik imaluunniit isumassorneqarnissamik tapersersorneqarnissamillu angerlarsimaffimmi naammassineqarsinnaangitsumik, pisariaqartitsissasoq, ilanngullugu aamma Inatsisartut inatsisaat manna imaluunniit inatsisit allat malillugit tapersersorneqarluni. Meeqqap pisariaqartitai angerlarsimaffimmi naammassineqarsinnaanersoq nalilersuinermi, kommunalbestyrelsip aamma oqartussat allat meeqqap pisariaqartitat naammassiniarlugit tapersiinnissamut periarfissaqarnerat kisimi pingaartinneqassanngilaq, kisiannili aamma angerlarsimaffimmi periarfissat pingaartinneqassallutik, tassa imaappoq meeqqap tapersersorneqarnissamik pisariaqartitaa naammassisinnaanissaannut angajoqqaatut akisusaasut aamma isumassuisut allat piginnaasaqarnerat, isumalluutaat aamma kissaataat. Kommunalborgbestyrelsip nalilersuineri ataasiakkaamut tunngassaaq aammalu meeqqap tapersersorneqarnissamik pisariaqartitsinera aalajangersimasoq aammalu angerlarsimaffimmi pissutsit aalajangersimasut aallaavigineqassallutik, ilanngullugit suliffissaqartitsinikkut aamma inooqatigiinnermut tunngasut.

Aappaattut piumasaqaataavoq, meeqqap tapersersorneqarnissamik isumassorneqarnissamillu pisariaqartitsinera ulloq unnuarlu neqeroorummiinnermi naammassineqarsinnaasoq. Piumasaqaatip kingunerisaanik, meeqqap tapersersorneqarnissamik pisariaqartitai Kalaallit Nunaanni ulloq unnuarlu neqeroorummi naammassineqarsinnaanersut, imaluunniit Danmarkimi ulloq unnuarlu neqeroorummiinnissamut suliamik ingerlatitsinermik aallartitsisoqassasoq isumaliutersuutigineqartariaqaraluarnersoq, kommunalbestyrelsip, ulloq unnuarlu neqeroorummiinnissamut inassuteqaateqarnissaq pillugu aalajangiinneginnermi aammalu naleqqunerpaamik qulaajaanermut ilaatillugu, paasinarsisissavaa.

Pingajuattut piumasaqaataavoq meeqqap meeqqanut annertuumik innarluutilinnut ulloq unnuarlu neqeroorummiilernissaanut angajoqqaatut akisusaasut akuersisimassasut.

Akuersinermik piniarnermi qulakkeerneqassaaq, kommunalbestyrelsip meeqqamut innarluutilimmut angajoqqaatut akisussaasut paasissutissanik, taakkua paasissutissiinermik tunngaveqartumik aalajangiisinaanissamut pisariaqartitaannik, tunissagai.

Akuersinissamut ilusissamut piumasaaqateqanngilaq, taamaattoq tamanna oqaasiinnartigut oqaatigineqarpat, sullissisup akuersineq allakkiatut ilusilimmik allassavaa.

Imm. 2-mut.

Imm. 2-mi siunnersuutigineqarpoq, meeqqap annertuumik innarluutillip ulloq unnuarlu neqeroorummiinnissamik neqeroorfigineqarnissaa pillugu aalajangiinissamut Naalakkersuisut piginnaatitaasut. Aalajangersagaq inuit annertuumik innarluutillit ikiorserneqartarnerat pillugu nalunaarummi § 16-imik ingerlatitseqqiineruvoq. Aalajangersakkami erseqqissarneqarpoq, kommunalbestyrelsimit inassuteqaat tunngavigalugu Naalakkersuisut aalajangiissasut.

Inassuteqaatip imarisai suliamit suliamut allanngorarsinnaapput aammalu suliap suussusaa apeqqutaassalluni, aammalu imarisai kommunalbestyrelsip aamma Naalakkersuisut oqaloqatigiinnerisigut paasinarsisinneqarsinnaallutik. Naalakkersuisut aalajangiinnginneranni, inuup tapersorneqarnissamut pisariaqartitsinerat naammattumik paasinarsisinneqarsimanissaa, aalajangiisuusaaq. Kommunalborgestyprelsip inassuteqaataani qulaajaaneq aamma iliuusissatut pilersaarut suliarineqareersut aallaavigineqarpata iluaqutaasinnaavoq.

Imm. 3-mut.

Imm. 3-mi siunnersuutigineqarpoq, meeraq meeqqanut annertuumik innarluutilinnut ulloq unnuarlu neqeroorummiittoq, kaasarfimmiiussanik atisarsiutissanillu kaasarfimmioqarsinnaatitaasoq. Aalajangersagaq imarisamigut meeqqanut inuusuttunullu kiisalu annertuumik innarluutilinnut ulloq unnuarlu paaqqinniffiit pillugit nalunaarummi § 44, imm. 1-imik ingerlatitseqqiineruvoq. Inatsisartut inatsisaanni aningaasaliissutitigut inatsimmi tunngavissaliisoqarpat, naleqqunnerpaasorineqarpoq.

Imm. 4-mut.

Imm. 4-mi siunnersuutigineqarpoq, kaasarfimmiiussat aamma atisassarsiutissat pillugit maleruagassanik erseqqinnerusunik aalajangersaanissamut Naalakkersuisut piginnaatinneqassasut. Piginnaatitsissut aningaasartat annertussusissaat, aningaasat atorsinnaasat pillugit, aamma ulloq unnuarlu neqeroorutip perorsaanermik pissuteqartumik aningaasanik uninngatitsinissamik periarfissaqarnera pillugit aalajangersaanermut atorineqassasoq, eqqarsaatigineqarpoq.

§ 49-mut

§ 49-mi siunnersuutigineqarpoq inuit annertuumik innarluutillit Kalaallit Nunaata avataani inissinneqarnissaannut periarfissaq ingerlatiinnarneqassasoq. Aalajangersakkami

siunertaavoq, inuup immikkut ilisimasaqarfiusumik tapersersorneqarnissamik pisariaqartitsinera Kalaallit Nunaanni naammassineqarsinnaanngippat, inuup taamaakkaluartoq Kalaallit Nunaata avataani pisariaqartunik neqeroorutininik neqeroorfigineqarsinnaanera, qulakkeerneqassasoq. Erseqqissarneqarpoq, Kalaallit Nunaanni pisariaqartunut tapersersuinissamut periarfissaarussimassasoq.

Imm. 1-imut.

Imm. 1-imi siunnersuutigineqarpoq, inuup 18-it sinnerlugit ukiullip annertuumik innarluutillip Kalaallit Nunaata avataani ulloq unnuarlu neqeroorummiinnissamik neqeroorfigineqarnissaa pillugu Naalakkersuisut aalajangiisinaanannut, piumasaqaatit arlallit aalajangersarneqassasut. Siullermik siunnersuutigineqarpoq, inuk ulluinnarni innarluuteqarnini pissutigalugu annertuumik tapersersorneqarnissamik pisariaqartitsissasoq. Aappaattut piumasaqaatigineqarpoq, inuk innarluuteqarnini pissutigalugu nammineq angerlarsimaffimmini najugaqarsinnaanngitsoq. Pingajuattut piumasaqaatigineqarpoq, inuup tapersersorneqarnissamik pisariaqartitai Kalaallit Nunaanni najugaqatigiiffimmiinnermi, najugaqarfimmi illersugaasumiinnermi imaluunniit ulloq unnuarlu neqeroorummiinnermi naammassineqarsinnaanngitsut, tamatumunngalu nangissutigalugu inuup pisariaqartitsinera aatsaat Kalaallit Nunaata avataani ulloq unnuarlu neqeroorummiinnermi naammassineqarsinnaasut. Piumasaqaatinut kingulliullugit taaneqartunut marlunnut tunngatillugu kommunalbestyrelse suliassamik sularinninnerminut ilaatillugu Kalaallit Nunaanni tapersiinnissamut periarfissat aammalu tapersiinnissamut periarfissat ataqatigiissillugit misissornissaannik, pisussaaffeqarpoq. Tamanna aamma tapersiinnissamut periarfissanut kommunip avataani inissisimasunut atuuppoq. Periarfissarsiorneq Naalakkersuisut suleqatigalugit ingerlanneqarsinnaavoq.

Ulloq unnuarlu neqeroorutip qanoq ittut Kalaallit Nunaata avataani inissiivigineqartassanersut, piumasaqaatinik erseqqinnerusunik aalajangersaasoqanngilaq.

Imm. 2-mut.

Imm. 2-mi siunnersuutigineqarpoq, inuup annertuumik innarluutillip Kalaallit Nunaata avataani ulloq unnuarlu neqeroorummiinnissamik neqeroorfigineqarnissaa pillugu, Naalakkersuisut aalajangiissasut. Naalakkersuisut kommunalbestyrelsimit inassuteqaat tunngavigalugu akuersissuteqassapput. Inassuteqaatip imarisai suliमित suliमत allanngorarsinnaapput aammalu suliap suussusaa apeqqutaassalluni, aammalu imarisai kommunalbestyrelsip aamma Naalakkersuisut oqaloqatigiinnerisigut paasinarsisinneqarsinnaallutik. Naalakkersuisut aalajangiinnnginneranni, inuup tapersersorneqarnissamut pisariaqartitsineranut imm. 1-imi piumasaqaatit taaneqartut naammattumik paasinarsisinneqarsimanissaa, aalajangiisuussaaq. Kommunalborgestypelcip inassuteqaataani qulaajaaneq aamma iliuusissatut pilersaarut sularineqareersut aallaavigineqarpata iluaqutaasinnaavoq. Aammattaaq tapersiinnissamut periarfissat siusinnerusukkut aallartinniarneqartaraluartut, taakkualu tunngavigalugit inuup

pisariaqartitsinerata naammassinissaanut naammassimanngitsut, pillugu paasissutissat sukumiisut allassimassapput.

Imm. 3-mut.

Imm. 3-mi siunnersuutigineqarpoq, Kalaallit Nunaata avataani ulloq unnuarlu neqeroorummiinneq pillugu maleruagassanik erseqqinnerusunik aalajangersaanissamut Naalakkersuisut piginnaatinneqassasut. Piginnaatitsissut ilaatigut suliassanik sularinninnermi suleriaatsit, malinnaaneq aamma angerlartitsinnermi suleriaatsit pillugit maleruagassanik aalajangersaanermut atorneqassasut eqqarsaatigineqarpoq.

§ 50-imut

§ 50-mi siunnersuutigineqarpoq, meeqqap annertuumik innarluutillit Kalaallit Nunaata avataani inissinneqarsinnaaneranut periarfissaq, ingerlatiinnarneqassasoq. Aalajangersakkami siunertaavoq, pisuni immikkorluinnaq ittuni, meeraq immikkut ilisimasaqartunit tapersorsorneqarnissamik pisariaqartitsinera Kalaallit Nunaanni naammassineqarsinnaatinagu, meeraq taamaakkaluartoq Kalaallit Nunaata avataani neqeroorutunik pisariaqartunik neqerooruteqarfigineqartarnissaata, qulakkeernissaa. Inatsisartut inatsisaanni meeqqat aamma inersimasut innarluutillit, Kalaallit Nunaata avataani inissinneqarnissamik pisariaqartitsisut, immikkoortissimanissaat naleqqutsinneqarpoq. Erseqqissarneqarpoq, Kalaallit Nunaanni pisariaqartumik tapersiivigineqarnissamut periarfissat, ilanngullugit Kalaallit Nunaanni sumiiffinni allani, tamarmik periarfissaarussimassasut.

Imm. 1-imut.

Imm. 1-imi siunnersuutigineqarpoq, meeqqap annertuumik innarluutillip Kalaallit Nunaata avataani ulloq unnuarlu neqeroorummiinnissaanik neqerooruteqarnissaq pillugu Naalakkersuisut aalajangiisinnaaneranunt, piumasaqaatit arlallit aalajangersarneqassasut. Siullermik siunnersuutigineqarpoq meeraq ulluinnarni piginnaaneqarfinnut annertuumik imaluunniit tulluarsakkamik tapersorsorneqarnissamik pisariaqartitsissasoq imaluunniit isumassorneqarnissamik katsorsarneqarnissamillu annertuumik pisariaqartitsissasoq. Meeqqap pisariaqartitai angerlarsimaffimmi naammassineqarsinnaanersut nalilersuinnermi, kommunalbestyrelsip aamma oqartussaasut allat meeqqap pisariaqartitaasa naammassinissaanut tapersiinnissamut periarfissaqarnerat kisimi pingaartinneqassanngilaq, kisianni aamma angerlarsimaffimmi periarfissat pingaartinneqassallutik. Tassa imaappoq meeqqap tapersorsorneqarnissamik pisariaqartitaanut angajoqqaatut akisussaasut aamma isumassuisut allat piginnaasaqarfii nukissat meeqqallu kissaataat naammassineqarsimassapput. Kommunalborgbestyrelsip nalilersuinnera ataasiakkaanut tunngassaaq aammalu meeqqat aalajangersimasumik tapersorsorneqarnissamik pisariaqartitsinera aammalu angerlarsimaffimmi pissutsit aalajangersimasut aallaavigineqassallutik, ilanngullugit sammisasaqartitsinnermut aamma inooqatigiinnermut tunngasut.

Aappaattut piunasaqaatigineqarpoq, meeqqap pisariaqartitai Kalaallit Nunaanni ulloq unnuarlu neqeroorummiinnermi naammassineqarsinnaanngitsut. Pingajuattut piunasaqaataavoq, meeqqap pisariaqartitai Kalaallit Nunaata avataani ulloq unnuarlu neqeroorummiinnermi aatsaat naammassineqarsinnaassasut. Kommunalbestyrelse suliassamik sularinninnerminut ilaatillugu Kalaallit Nunaanni tapersiinissamut periarfissat aammalu tapersiinissamut periarfissat ataqatigiissillugit misissornissaannik, pisussaaffeqarpoq. Tamanna aamma tapersiinissamut periarfissanut kommunip avataani inissisimasunut atuuppoq. Periarfissarsiorneq Naalakkersuisut suleqatigalugit ingerlanneqarsinnaavoq.

Ulloq unnuarlu neqeroorutip qanoq ittut Kalaallit Nunaata avataani inissiivigineqartassanersut, piunasaqaatinik erseqqinnerusunik aalajangersaasoqanngilaq.

Imm. 2-mut.

Imm. 2-mi siunnersuutigineqarpoq, meeqqap annertuumik innarluutillip Kalaallit Nunaata avataani ulloq unnuarlu neqeroorummiinnissamik neqeroorfigineqarnissaa pillugu, Naalakkersuisut akuersissutigissavaat. Naalakkersuisut kommunalbestyrelsimit inassuteqaat tunngavigalugu akuersissuteqassapput. Inassuteqaatip imarisai suliavit suliavit allanngorarsinnaapput aammalu suliavit suussusaa apeqqutaassalluni, aammalu imarisai kommunalbestyrelsip aamma Naalakkersuisut oqaloqatigiinnerisigut paasinarsisinneqarsinnaallutik. Naalakkersuisut aalajangiinnnginneranni, meeqqap tapersorsorneqarnissamut pisariaqartitsineranut imm. 1-imi piunasaqaatit taaneqartut naammattumik paasinarsisinneqarsimanissaa, aalajangiisuussaaq. Kommunalbestyrelsip inassuteqaataani qulaajaaneq aamma iliuusissatut pilersaarut sularineqareersut aallaavigineqarpata iluaqutaasinnaavoq. Aammattaaq tapersiinissamut periarfissat siusinnerusukkut aallartinniarneqartaraluartut, taakkualu tunngavigalugit meeqqap pisariaqartitsinerata naammassinnaanut naammassimannngitsut, pillugu paasissutissat sukumiisut allassimassapput.

Imm. 3-mut.

Imm. 3-mi siunnersuutigineqarpoq, Kalaallit Nunaata avataani ulloq unnuarlu neqeroorummiinneq pillugu maleruagassanik erseqqinnerusunik aalajangersaanissamut Naalakkersuisut piginnaatinneqassasut. Piginnaatitsissut ilaatigut suliassanik sularinninnermi suleriaatsit, malinnaaneq aamma angerlartitsinermi suleriaatsit pillugit maleruagassanik aalajangersaanermut atorneqassasut eqqarsaatigineqarpoq.

§ 51-imut

Aalajangersakkami nutaajusumi siunnersuutigineqarpoq, piginnaanngorsarnissaaq imaluunniit peqqissartinnissaaq siunertaralugu, kommunalbestyrelse inummut annertuumik innarluutilimmut Kalaallit Nunaata avataani inissinneqarallarnissamik neqerooruteqarsinnaanermut periarfissinneqassasoq.

Imm. 1-imut.

Imm. 1-imi siunnersuutigineqarpoq, inuk innarluuteqarnerminut tunngatillugu piginnaangorsarnissamik imaluunniit peqqissarnermi suliniuteqarfigineqarnissamut pisariaqartitsippat, inuup annertuumik innarluutillip ulloq unnuarlu neqeroorumiinnissamik, efterskolimiinnissamik imaluunniit Kalaallit Nunaata avataani assingusumik neqeroorfigineqarnissaa pillugu kommunalbestyrelse innersuussisinnaasoq. Piumasaqaataavoq inuup pisariaqartitsinera Kalaallit Nunaanni naammassineqarsinnaassanngitsoq, assersuutigalugu inuup innarluutaa pillugu immikkut ilisimasassanik pisariaqartunik ilisimasaqartoqannginnera pissutigalugu. Aalajangersagaq malillugu neqerooruteqarneq meeqqanut aamma inersimasunut annertuumik innarluutilinnut pisinnaavoq. Kommunalbestyrelsip aalajangersagaq malillugu inissiigallarnissamik innersuussutaa tunngavigalugu, Naalakkersuisut akuersissuteqassapput.

Aalajangersagaq malillugu assersuutigalugu efterskolimi immikkut ittumi imaluunniit Københavnimi Tappiitsunut isigiarsuttunullu Institutimi inissiigallarnerusinnaavoq.

Aalajangersagaq Inatsisartut inatsisaata sinneratulli, inatsisit allat saniatigut periarfissaavoq. Tamanna ilaatigut isumaqarpoq, efterskolimut immikkut ittumi atuarnissamut ilinniartitaanermut inatsisit malillugit tapersiisoqarsinnaappat, tapersiineq ilinniartitaanermut inatsisit malillugit pissasoq aammalu aalajangersagaq manna malillugu pissanngitsoq.

Imm. 2-mut.

Imm. 2-mi siunnersuutigineqarpoq, Kommunalbestyrelsip Kalaallit Nunaata avataani inissiigallarnissamik inummut annertuumik innarluutilimmut neqerooruteqarnissaaq pillugu inassuteqaataa tunngavigalugu, Naalakkersuisut akuersissuteqassapput. Inassuteqaatip imarisai suliamit suliamut allanngorarsinnaapput aammalu suliap suussusaa apeqqutaassalluni, aammalu imarisai kommunalbestyrelsip aamma Naalakkersuisut oqaloqatigiinnerisigut paasinarsisinneqarsinnaallutik. Naalakkersuisut aalajangiinnginneranni, inissiigallarnissamut siunertaasup aammalu *imm. 1*-imi piumasaqaatit taaneqartut naammassineqarsimanerisa, naammattumik paasinarsisinneqarsimanissaa, aalajangiisuussaaq. Kommunalbestyrelsip inassuteqaataani qulaajaaneq aamma iliuusissatut pilersaarut suliarineqareersut aallaavigineqarpata iluaqutaasinnaavoq.

Imm. 3-mut.

Imm. 3-mi siunnersuutigineqarpoq, aalajangersagaq malillugu Kalaallit Nunaata avataani inissiigallarnissaaq pillugu maleruagassanik erseqqinnerusunik aalajangersaanissamut Naalakkersuisut piginnaatinneqassasut. Piginnaatitsissut ilaatigut inissiigallarnerusut sivilisussusissaa pillugu maleruagassanik aalajangersaanermut atorineqassasoq naatsorsuutigineqarpoq.

§ 52-mut

Aalajangersakkami nutaajusumi, inuup innarluutillip pinerluttuliornermut inatsisini suliassamut atatillugu pinerluttoqarsimatillugu suliame ulloq unnuarlu neqeroorummi matoqqasumi inissiisoqarsinnaaneranut, periarfissiisoqarpoq.

Aalajangersakkami siunertaavoq inuup innarluutillip nakkutigineqarnissaanut, taarsiullugu Kalaallit Nunaanni ulloq unnuarlu neqeroorummi isumannaallisakkami inissinneqarsinnaanerata qulakkeerneqarnissaa.

Siullermik siunnersuutigineqarpoq, inuk innarluutilik eqqartuussisaatsimut inatsimmi § 358, § 361, imm. 2, nr. 3 naapertorlugit, malillugu inuk innarluutilik angerlarsimaffimmi naleqquttumi imaluunniit ulloq unnuarlu neqeroorummi isumannaallisagaasumi ingerlanneqassasoq, eqqartuussivik aalajangersimappat, ulloq unnuarlu neqeroorummi isumannaallisagaasumi inissiisoqarsinnaassasoq.

Aappaattut siunnersuutigineqarpoq, eqqartuussisaatsimut inatsimmi § 359, § 361, imm. 2 nr. 3 naapertorlugit. malillugu inuk innarluutilik angerlarsimaffimmi naleqquttumi imaluunniit ulloq unnuarlu neqeroorummi isumannaallisagaasumi inissinneqarsinnaassasoq, eqqartuussivik aalajangersimappat, inissiisoqarsinnaassasoq.

§ 53-imut

Aalajangersakkami nutaajusumi, eqqartuussaanagerup pillarneqaatigineqarneranut atatillugu inuup innarluutillip ulloq unnuarlu neqeroorummi isumannaallisagaasumi inissinneqarsinnaaneranut periarfissiisoqarpoq. Aalajangersakkami siunertaavoq inuup innarluutillip, eqqartuussaanagermini pillagaasussaq Kalaallit Nunaanni pillagaanagermini ulloq unnuarlu neqeroorummi isumannaallisagaasumi inissinnaanissaata qulakkeerneqarnissaa.

Inuup innarluutillip eqqartuussaalluni pillagaanagerminut atatillugu ulloq unnuarlu neqeroorummi isumannaallisagaasumi inissinneqarnera, pinerluttulerinermut inatsimmi § 234 malillugu Pinerluttunik isumaginnittoqarfimmut aqutsisunit aalajangiineq malillugu pissaaq.

§ 54-imut

§ 54-imi siunnersuutigineqarpoq najugaqaqatigiiffik najugaqarfissatut neqeroorutitut ingerlatiinnarneqassasoq. Najugaqaqatigiiffik toqqissisimanartumik atugaqarluni nammineq inigisatut neqeroorutaassaaq, tassani inuk, nammineq inigisamini najugaqarsinnaanissamut annertuallaamik tapersiivigineqarnissamik pisariaqartitsisoq, tapersorneqarsinnaassalluni.

Imm. 1-imut.

Imm. 1-imi siunnersuutigineqarpoq, kommunalbestyrelsip najugaqaqatigiiffinnik pilersitsinissamut piginnaatitaanerata ingerlateqqinneqassasoq. Kommunalbestyrelse taamatuttaaq najugaqaqatigiiffinnik ingerlatsisuuvoq aammalu najugaqaqatigiiffiup atorunnaarsinneqarnissaa pillugu aalajangiisinnaassasoq, aalajangersakkami erseqqissarneqassasoq, siunnersuutigineqarpoq. Aammattaaq najugaqaqatigiiffik ulluunerani

najugaqartunut tapersersuinissamik neqerooruteqassasoq, erseqqissarneqassasoq, siunnersuutigineqarpoq.

Imm. 2-mut.

Imm. 2-mi siunnersuutigineqarpoq kommunalbestyrelsip kommunimi ataatsimi tassani najugaqaqatigiiffinnik pisariaqartunik amerlassusilimmik peqarnissaata qulakkeernissaanut pisussaaffeqarnera, ingerlatiinnarneqassasoq. Taanna inuit annertuumik innarluutillit ikiorserneqartarnerat pillugu nalunaarummi § 40, imm. 1-imi inatsimmi atuuttumi allassimavoq. Aalajangersakkami inatsisini inissisimanerup allangortinneqarnissaa siunertarineqanngilaq.

Imm. 3-mut.

Imm. 3-mi aalajangersagaq siunnersuutigineqartoq, inuit annertuumik innarluutillit ikiorserneqartarnerat pillugu nalunaarummi § 40, imm. 2-mik ingerlatitseqqiineruvoq. Aalajangersakkami inatsisini inissisimanerup allangortinneqarnissaa siunertarineqanngilaq.

Imm. 4-mut.

Imm. 4-mi aalajangersagaq siunnersuutigineqartoq inuit annertuumik innarluutillit ikiorserneqartarnerat pillugu nalunaarummi § 41-imik ingerlatitseqqiineruvoq. Aalajangersakkami inatsisini inissisimanerup allangortinneqarnissaa siunertarineqanngilaq.

Imm. 5-imut.

Imm. 5-imi siunnersuutigineqarpoq, najugaqaqatigiiffinnut maleruagassanik erseqqinnerusunik aalajangersaanissamut, Naalakkersuisut piginnaatinneqassasut, ilanngullugit aaqqissugaanera, pisortaqaqarnera, ingerlatsineq aamma missingersuusiorneq naatsorsuusiornerlu, kiisalu najugaqaqatigiiffimmi sulisunut pisortanullu pillagaasimanermut uppersaammik aamma meeqqanik pinerliisimannginnermik uppersaammik piniartarneq. Aalajangersagaq ilaatigut najugaqartut uffarfimmik perusersartarfimmillu atugassaqaqarnissaat, najugaqaqatigiiffiup missingersuusiornera, najugaqaqatigiiffiup aningaasaqarnerata kommunip aningaasaqarneranit allamit immikkoortinneqarnissaa kiisalu sulisunik atorfinitsitsinnginnermi pillagaasimanermut uppersaammik piniartarneq pillugit maleruagassanik aalajangersaanermut atorneqassasoq, naatsorsuutigineqarpoq.

§ 55-imut

§ 55-imi siunnersuutigineqarpoq najugaqarfiit illersugaasut neqeroorutitut ingerlatiinnarneqassasut.

Najugaqarfiit illersugaasut toqqissisimasumik atugaqarluni nammineq inigisatut neqeroorutaassapput, tassani inuit ulloq unnuarlu tamaat tapersersorneqarnissamik pisariaqartitsisut, tapersersorneqarsinnaassallutik.

Imm. 1-imut.

Imm. 1-imi kommunalbestyrelsip najugaqarfinnik illersugaasunik pilersitsinissamut

piginnaatitaanera ingerlatiinnarneqassasoq, siunnersuutigineqarpoq. Kommunalbestyrelse taamatuttaaq najugaqarfinnik illersugaasunik ingerlatsisuussasoq, aammalu najugaqarfiup illersugaasup atorunnaarsinneqarnissaa pillugu aalajangiisinnaassasoq, aalajangersakkami erseqqissarneqassasoq siunnersuutigineqarpoq.

Imm. 2-mut.

Imm. 2-mi kommunalbestyrelsip kommunimi ataatsimi tassani najugaqarfiit illersugaasut pisariaqartunik amerlassuseqarnissaannik qulakkeerinninissamut pisussaaffeqarnera, ingerlatiinnarneqassasoq siunnersuutigineqarpoq. Taanna inuit annertuumik innarluutillit ikiorserneqartarnerat pillugu nalunaarummi § 43, imm. 1-imi inatsimmi atuuttumi allassimavoq. Aalajangersakkami inatsisini inissisimanerup allanngortinneqarnissaa siunertarinqanngilaq.

Imm. 3-mut.

Imm. 3-mi aalajangersagaq siunnersuutigineqartoq inuit annertuumik innarluutillit ikiorserneqartarnerat pillugu nalunaarummi § 43, imm. 2-mik ingerlatitseqqiineruvoq. Aalajangersakkami inatsisini inissisimanerup allanngortinneqarnissaa siunertarinqanngilaq.

Imm. 4-mut.

Imm. 4-mi aalajangersagaq siunnersuutigineqartoq, inuit annertuumik innarluutillit ikiorserneqartarnerat pillugu nalunaarummi § 44-mik ingerlatitseqqiineruvoq. Aalajangersakkami inatsisini inissisimanerup allanngortinneqarnissaa siunertarinqanngilaq.

Imm. 5-imut.

Imm. 5-imi siunnersuutigineqarpoq, najugaqarfinnut illersugaasunut maleruagassanik erseqqinnerusunik aalajangersaanissamut, Naalakkersuisut piginnaatinneqassasut, ilanngullugit aaqqissugaanera, pisortaqaqarnera taakkualu ilinniagaqarsimanissaat, sulisut katitigaanerat, ingerlatsineq aamma missingersuusiorneq naatsorsuusiorterlu, kiisalu najugaqarfinni illersugaasuni sulisunut pisortanullu pillagaasimanermut uppernarsaammik aamma meeqqanik pinerliisimannginermut uppernarsaammik piniartarnej. Aalajangersagaq ilaatigut najugaqartut uffarfimmik perusersartarfimmillu atugassaqaqarnissaat, najugaqarfiup illersugaasup missingersuusiortarnera, najugaqarfiup aningaasaqarnerata kommunip aningaasaqarneranit allamit immikkoortinneqarnissaasa kiisalu sulisunik atorfinitsitsinnginnermi pillagaasimanermut uppernarsaammik aamma meeqqanik pinerliisimannginermut uppernarsaammik piniartarnej pillugit maleruagassanik aalajangersaanermut atornejqassasoq, naatsorsuutigineqarpoq.

§ 56-imut

Imm. 1-imut.

Imm.1-imi aalajangersakkami inatsisitigut inissisimanerup allanngortinneqarnissaa siunnersuutigineqarpoq, najugaqaqatigiiffinnut aamma najugaqarfinnut illersugaasunut malittarisassat akuersissuteqarfigineqartarnerannut piginnaatitaaneq kommunalbestyrelsimit

Naalackersuisunut nuunneqarluni. Peqatigisaanik akuersissuteqartarnek, najugaqarfissatut neqeroorutip malittarisassaannuinaq tunngasoq, tamatumunnga taarsiullugu najugaqatigiiffiit aamma najugaqarfiit illersugaasut akuersissuteqarfigineqartartussanngorlugit, annertusineqarpoq.

Imm. 2-mut.

Imm. 2-mi siunnersuutigineqarpoq najugaqatigiiffinnut aamma najugaqarfinnut illersugaasunut akuersissuteqartarnermut, kiisalu akuersissuteqarnerup utertinnissaanik periarfissaqarnermut maleruagassanik erseqqinnerusunik aalajangersaanissamut, Naalackersuisut piginnaatinneqassasut. Akuersissuteqarnissamut Inatsisartut inatsisaanni §§ 54, imm. 5, aamma 55, imm. 5, malilugit maleruagassat naammassineqarsimanissaat, piumasqaataavoq.

§ 57-imut

Innuttaasup kommunimi allami inissinneqarnissaa pisariaqarsimatillugu, innuttaasumut innarluutilimmut kommune angerlarsimaffiusoq, innuttaasup najugaqatigiiffimmiinneranut imaluunniit najugaqarfimmi illersugaasumiinneranut akiliisussaatitaasoq, pillugu tunngaviusoq aalajangersakkami siunnersuutigineqartumi erseqqissarneqarpoq.

Innuttaasup innarluutillip kommunimi allami najugaqatigiiffimmiinnissamik imaluunniit najugaqarfimmi illersugaasumiinnissamik neqeroorfigineqarnissaanut periarfissaq, qanittumiinnissamut tunngaviusoq eqqarsaatigalugu isigineqassaaq. Tunngavissaatinneqarpoq inuit innarluutillit nammineq angersimaffimmini nammineersinnaanngitsut, innuttaasup nammineq angerlarsimaffigisaani sumiiffimmut sapinngisamik qaninnerpaamiittumi najugaqatigiiffimmiinnissamik imaluunniit najugaqarfimmi illersugaasumiinnissamik neqeroorfigineqassasut.

Aalajangersakkami kommunit najugaqatigiiffinni aamma inissiani illersugaasuni inissanik pisariaqartumik amerlassusilinnik pilersitsinissamut pilersuisussaatitaanerannik, takukkit siunnersuummi §§ 54, imm. 2, aamma 55, imm. 2, pisussaajunnaarsinneqanngillat, kisianni taamaallaat kommunip angerlarsimaffigisap akiliisussaatitaanerata erseqqissarnissaa siunertaavoq. Tassani pingaartumik eqqarsaatigineqarput, *qaqutigoortumik* innuttaasup kommunimi allami inissinneqarnissaa pisariaqarsimatillugu, assersuutigalugu innuttaasup piffissami naleqquttumi inissinneqarnissamik neqeroorfigineqarnissaa ajornarsimappat, imaluunniit pisumi aalajangersimasumi atugassanik imaluunniit immikkut ittunik ilisimasanik pisariaqartunik neqerooruteqarnissaq periarfissaqarsimanngippat.

Imm. 2-mut.

Aalajangersakkami siunnersuutigineqarpoq inuup kommunip avataani najugaqatigiiffinnut najugaqarfinnulluunniit nuunnissamik neqeroorfigineqarnermigut nuunnissaanut kommunalbestyrelse pisussaaffeqartoq najugarisamit nuunnermi aningaasartuutigineqartut matussusernissaannut neqerooruteqassalluni.

Aalajangersakkami siunnersuutigineqarpoq, inuk kommunimi allami najugaqaqatigiiffimmi najugaqarfimmiluunniit najugaqarnissaanik neqeroorfigineqarpat nuunnermi aningaasartuutit matussusernissaannut kommunalbestyrelse tapersiinissamik neqerooruteqassasoq.

Aalajangersakkap siunertarivaa inuup innarluutillup kommunimut allamut nuunnissaa, tassani najugaqaqatigiiffiit najugaqarfiilluunniit atugassanik imaluunniit immikkut ittunik ilisimasanik pisariaqartunik neqerooruteqarsimappata nuutinneqarnissamik periarfissiinissap qulakkeerneqarnissaa.

§ 58-mut

Aalajangersakkami nutaajusumi siunertaavoq, kommunimi najugaqarfissatut neqeroorutini pikkorissuseqartumik ingerlatsinerup aammalu immikkut ilisimasaqarnerup annertusitinnissaata qulakkeerneqarnissaa siunertaralugu, kommunini ataasiakkaani kommunimi suleqatigiinnissamut ataatsimiititaliamik pilersitsisoqarsinnaassasoq.

Imm. 1-imut.

Imm. 1-imi kommunalbestyrelsit suleqatigiinnissamut ataatsimiititaliamik, kommunimi najugaqaqatigiiffinnit aamma najugaqarfinnit illersugaasunit tamanit imaluunniit aalajangersimasunit ilaasortaqaqartumik, kiisalu immikkuullarissunit allanit, najugaqaqatigiiffinni aamma najugaqarfinni illersugaasuni najugaqartut pillugit tamakkiisumik isiginnittumik suliniuteqarnerup ataqatigiissaarneqarnerani akuutinneqartussatut naleqqussorineqartunit ilaasortaqaqartumik, pilersitsisinnaanerat, inatsimmi tunngavissalerneqarpoq.

Najugaqarfissatut neqeroorutit akornanni suleqatigiinnerup siuarsarneqarnissaa, aalajangersakkami siunertaavoq pingaaruteqartoq, taamaattumik kommunimi najugaqaqatigiiffiit aamma najugaqarfiit illersugaasut tamarmik sapinngisamik suleqatigiinnissamut ataatsimiititaliami aallartitaqassasut imm. 1-imi siunnerfigineqarpoq.

Suleqatigiinnissamut ataatsimiititaliaq aamma innarluutilinnut ingerlatsivimmit, meeqqanut inuusuttunullu ingerlatsivimmit, ilinniartinnit, politiinit aamma peqqissutsimut suliassaqaqarfimmit, aallartitaqarfiusinnaavoq. Allattukkat tamakkiisuunngillat, taamatullu suleqatigineqartartut pineqartut aallartitaqarnissaat piumasqaataanngilaq. Aalajangiisuusooq tassaavoq, suleqatigiinnissamut ataatsimiititaliaq sulianut naleqquttumik ilisimasalinnik aamma inunnik, inuit innarluutillit pillugit tamakkiisumik isiginnittumik suliniuteqarnermi, ilaasunik ilaasortaqaassasoq, taamaalilluni oqalliffissaq pilersinneqassalluni, tassani misilittakkat ilisimasallu oqaloqatigiissutigineqarsinnaallutik.

Suleqatigiinnissamut ataatsimiititaliamut siunertaavoq, immikkuullarissut akimorlugit suleqatigiinnerup ataqatigiissaarinerullu siuarsarneqarnissaat kiisalu inunnut innarluutilinnut ataasiakkaanut tamakkiisumik isiginninnerusumik suliniuteqarnerup qulakkeerneqarnissaa. Suleqatigiinnissamut ataatsimiititaliami inuit innarluutillit periaatsimut ataatsimoortumut

ineriartortuarnerusumik naapitsisarnermik misigisaqartarnissaannut peqataanissaat siunertaavoq.

Suleqatigiinnissamut ataatsimiititaliami ilaatigut sullissiviit peqataasut akornanni ataatsimut isigalugu suleqatigiinneq kiisalu suliani aalajangersimasuni ataqatigiissarineq, oqallisigineqarsinnaapput.

Sullissiviit akuusut aamma inuit suliaqartut ingerlaavartumik suliassaqaarfiit akimorlugit suliat ingerlanerannik kiisalu ilisimasat misilittakkallu paasissutissiissutigineqartarnerannik ingerlaavartumik pitsanngorsaaniarsarissasut, ilaatigut siunnerfigineqarpoq.

Aalajangersakkami *imm. 2*, paasissutissanik paarlaasseqatigiittarneq pillugu maleruagassanik issuaaneruvoq, ilanngullugit paasissutissat inummut tunngasut suliarineqarnerat pillugu inatsisip Kalaallit Nunaannut atuutsinneqalernissaa pillugu peqqussummi §§ 6-imi aamma 7-imi aalajangersarneqartutut, paasissutissat inummut tunngassuteqarlutik mianernartut.

Imm. 3-mut.

Aalajangersakkami *imm. 3*-mi aalajangersarneqarpoq, *imm. 2*, naapertorlugi, akuersinissaq tunniukkumaneqanngippat, imaluunniit allanik pissuteqartumik akuersinissaq piniarneqarsinnaanngippat, suliami pisut, ilanngullugit inuup inatsisitigut isumannaatsuunissaa eqqarsaatigalugu, tamanna pisariaqartippasuk, inummut paasissutissat, ilanngullugit paasissutissat inummut tunngallutik mianernartut, paarlaasseqatigiissutigineqarsinnaapput.

Imm. 3, *imm. 2*-mi ilaatinneqanngitsunut tunngassuteqarpoq, taamatuttaarlu aamma paasissutissat inummut tunngasut suliarineqarnerat pillugu inatsisip Kalaallit Nunaannut atuutsinneqalernissaa pillugu peqqussummi tunngaviusunik ingerlatitseqqiinerulluni.

§ 59-*imut*

Aalajangersakkami siunnersuutigineqarpoq inatsisit atuuttut ingerlatiinnarneqassasut, tassani taamaattoq siunnersuummi ulloq unnuarlu neqeroorummik oqartarneq atorineqarluni, annertuumik innarluutillit ikiorserneqartarnerat pillugu Inatsisartut peqqussutaanit paaqqinniffimmik oqartarnerup, atorunnaarneqarnissaa toqqarneqarluni.

Imm. 1-*imut*.

Aalajangersakkami *imm. 1*-imi inuit annertuumik innarluutillit aamma inuit annertuujunngitsumik innarluutillit, immikkoortinneqarput. Immikkoortitsinermut tunngaviusooq tassaavoq ulloq unnuarlu neqeroorummiinnissamut siunnerfigineqartut tasaanerat inuit, najugaqarfinni illersugaasuni naammassineqarsinnaasunit annertunerusumik tapersiivigineqarnissamut pisariaqartitsisut.

Imm. 2-*mut*.

Aalajangersakkami *imm. 2*-mi siunnersuutigineqarpoq, ulloq unnuarlu neqeroorummut maleruagassanik erseqqinnerusunik aalajangersaanissamut Naalakkersuisut pisussaaffilerneqassasut. Maleruagassat *imm. 2* naapertorlugu aalajangersarneqartut, maleruagassaassapput ilaatigut ulloq unnuarlu neqeroorutit pilersinneqarnissaanut, aaqqissugaanerannut, pisortaqaqnerannut, ingerlanneqarnerannut kiisalu missingersuusiortarnerannut naatsorsuusiortarnerannullu killissaliussassanik aalajangersaanissamik siunertaqartut. Tassaasinnaapput inatsisitigut ilusilersuineq, illumi maleruagassat, siunertaanik siunnerfigineqartullu nassuiarneqarnerannut, innersuussisarnermut, sulisut katitigaanerannut, pisortanut akisussaaffinnullu tunngasunut, aningaasaqarnikkut ingerlatsinerneqarnerannut, aaqqissuussinerneqarnerannut, kiisalu ulloq unnuarlu neqeroorummi pissutsit immikkut ittut pillugit maleruagassat. Pissutsit immikkut ittut ilaatigut ulloq unnuarlu neqeroorutit ataasiakkaat najugaqartut pinerluteqarsimanerminni eqqartuunneqarsimasut ulloq unnuarlu alapernaarsorneqarnerannik pilersitsinissamut periarfissanut tunngassuteqarsinnaapput, tassani ulloq unnuarlu neqeroorummi matoqqasumiinnissaq piumasaqaataanani. Matuma siuliani allassimasut taamaallaat assersuutaapput ilitsersuissutaasut. Allattukkat tamakkiisuunngillat.

§ 60-mut

Imm. 1-imut.

Aalajangersakkami *imm. 1*-imi ulloq unnuarlu neqeroorutit isumannaallisakkat, matut silarliit igalaallu parnaaqatinnissaat akuerisaalluni ulloq unnuarlu neqeroorutit pilersinneqarnissaannut ingerlanneqarnissaannullu inatsimmi tunngavissaq ilanngunneqarpoq. Ulloq unnuarlu neqeroorutit isumannaallisakkamut siunnerfigineqartut tassaapput inuit innarluutillit, pinerluttulerinerneqarnerannut inatsimmik unioqqutitsisimasutut pasineqartut imaluunniit eqqartuunneqarsimasut pinerluttulerinerneqarnerannut inatsimmik unioqqutitsisimasutut, aammalu eqqartuussivik imaluunniit pinerluttunik isumaginnittoqarfik ulloq unnuarlu neqeroorummi isumannaallisakkami inissiinnissaq pillugu aalajangiisimalluni, takukkit §§ 52 aamma 53.

Isumaginninnermut suliassaqarfiup iluani pissaanermik atuinnermut maleruagassaqarpoq.

Tamatuma saniatigut ulloq unnuarlu neqeroorutit isumannaallisakkanik pilersitsinerneqarnerannut, aaqqissuussinerneqarnerannut, ingerlatsinerneqarnerannut kiisalu missingersuusiortarnerannut naatsorsuusiortarnerannullu, siunnersuummi § 59 naapertorlugu, tunngatillugu ulloq unnuarlu neqeroorutit nalinginnaasutut maleruagassanik malinniffiususaapput.

§ 61-imut

Siunnersuummi aalajangersagaq inatsisinik atuuttunik allanngortitsineruvoq annertusititsinerullunilu, tassani Isumaginninnermut Pisortaqarfik siusinnerusukkat ulloq unnuarlu paaqqinniffinnut inunnik innarluutilinnik siunnerfeqartunut siunertanut aalajangersakkamik akuersissuteqartussaasimavoq.

Imm. 1-imut.

Siunnersuummi *imm. 1* ulloq unnuarlu neqeroorut siunissami Naalackersuisunit akuersissuteqarfigineqartassasoq pillugu piumasaqaammik imaqarpoq.

Akuerineqarsinnaanissamut ulloq unnuarlu neqeroorutip tunngavissarititaasut erseqqinnerusumik aalajangersagaasut, Naalackersuisut aalajangersakkami matumani *imm. 2* naapertorlugu Naalackersuisunit aalajangersarneqartut, naammassisimassavai. Pinngitsoorani naatsorsuutigineqarpoq, ulloq unnuarlu neqeroorutip akuersissuteqarnermut tunngavissarititaasut naammassisimaannangippagit, ulloq unnuarlu neqeroorut akuersissummik tunniunneqareersumik arsaarneqarsinnaasoq.

Imm. 2-mut.

Imm. 2 akuersissuteqarfigineqarnissap angusinnaanissaanut tunngavissarititaasunut ulloq unnuarlu neqeroorutip naammassisimasassaannut maleruagassanik aalajangersaanissamut Naalackersuisut pisussaaffeqarnerannik, imaqarpoq. Akuersissuteqarnissamut tunngavissarititaasut assersuutigalugu tassaasinnaapput aaqqissugaaneranut, pisortaqaarneranut taakkualu ilinniagaqarsimanissaannut, sulisut katitigaanerannut, ingerlatsinermut aamma missingersuusiornermut naatsorsuusiornermullu, sulisunut pisortanullu pineqaatissinneqarsimmannginnermut uppernarsaammik aamma meeqqanik pinerliisimannnginnermut uppernarsaammik piniartarnermut il.il. piumasaqaatit. Erseqqissarneqarpoq allattukkat tamakkiisuunngimmata.

§ 62-imut

Aalajangersakkami nutaajusumi siunertaavoq, ulloq unnuarlu neqeroorutini ataasiakkaani, ulloq unnuarlu neqeroorumi pikkorissutsit aamma immikkut ilisimasaqarnerit annertusitinnissaat siunertaralugu suleqatigiinnissamut ataatsimiititaliamik pilersitsisoqassasoq.

Imm. 1-imut.

Imm. 1-imi suleqatigisartakkat, suleqatigiinnissamut ataatsimiititaliami aallartitaqarsinnaasut, allattorneqarput.

Suleqatigiinnissamut ataatsimiititaliamut siunertaavoq, immikkuullarissut akimorlugit suleqatigiinnerup ataqatigiissaarinerullu siuarsarneqarnissaat kiisalu inunnut innarluutilinnut ataasiakkaanut tamakkiisumik isiginninnerusumik suliniuteqarnerup qulakkeerneqarnissaa. Suleqatigiinnissamut ataatsimiititaliamut taamaalilluni siunertaavoq, inuit innarluutilit periaatsimut ataatsimoortumut ineriartortuarnerusumik naapitsisarnermik misigisaqartarnissaannut peqataanissaq.

Suleqatigiinnissamut ataatsimiititaliami ilaatigut sullissiviit peqataasut akornanni ataatsimut isigalugu suleqatigiinneq kiisalu suliani aalajangersimasuni ataqatigiissarineq, oqallisigineqarsinnaapput. Siunertaavoq suleqatigiinneq pillugu oqaloqatigiinnikkut, immikkuullarissut akimorlugit qalleraannerit, innuttaasunut annertuumik innarluutilinnut

tamakkiisumik suliniuteqarnerup naapertuutinngitsortaasa, eqaannerulersinneqarnissaat. Aammattaaq siunertaasoq pingaaruteqartoq tassaavoq, immikkuullarissut ataasiakkaat misilittakkanik ilisimasanillu avitseqatigiinnikkut, innuttaasut annertuumik innarluutillit ataatsimut isigalugu inuunerannut pitsaannerusumik paasinnissinnaalissasut. Taamaattumik ilisimasanik avitseqatigiinnerup aamma suleqatigiinnermut ilaatinneqarnissaa pingaaruteqarpoq.

Imm. 2-mut.

Aalajangersagaq *imm. 2*, paasissutissanik paarlaasseqatigiittarneq pillugu maleruagassanik issuaaneruvoq, ilanngullugit paasissutissat mianernartut inummut tunngasut suliarineqarnerat pillugu inatsisip Kalaallit Nunaannut atuutsinneqalernissaa pillugu peqqussummi §§ 6-imi aamma 7-imi aalajangersarneqartut.

Imm. 3-mut.

Imm. 3, akuersititsinissaq pillugu, *imm. 2* naapertorlugu, tunngavissarititaasumut ilaatinneqanngitsunut tunngavoq. Aalajangersakkap malitsigisaanik, suliami pisut, ilanngullugu inuup pisinnaatitaaffinnut misigissuseqarneranik mianerinninnissaq, tamanna pisariaqartippassuk, inummut paasissutissat inuk akuersiteqqaarnagu paarlaasseqatigiissutigineqarsinnaapput. Aalajangersakkami paasissutissat inummut tunngasut suliarineqarnerat pillugu inatsisip Kalaallit Nunaannut atuutsinneqalernissaa pillugu peqqussummi tunngaviusut, takukkit §§ 5 aamma 6, ingerlatiinneqarput aammalu tamatumunnga naapertuuttumik nassuiarneqassalluni.

§ 63-imut

Imm. 1-imut.

Aalajangersakkami *imm. 1*-imi aalajangersarneqarpoq kommune angerlarsimaffigisaq inuit innarluutillit ulloq unnuarlu neqeroorummiinnerannut akiliisussaataasoq, aammalu akigititaq ulloq unnuarlu inissiiviusumut ataatsimut aningaasartaqartillugu naatsorsorneqassasoq. *Imm. 1*, annertuumik innarluutillit ikiorserneqartarnerat pillugu Inatsisartut peqqussutaat nr. 7, 3. november 1994-imeersumi, tamatuma kingorna allannguuteqartartumi § 16 a-mik ingerlatitseqqiineruvoq.

Imm. 2-mut.

Imm. 2 malillugu kommunalbestyrelsip inuit innarluutillit ulloq unnuarlu neqeroorummiinnerannut akiliutissaannut akigititamik ukiut tamaasa Naalakkersuisut aalajangersaasassapput. Akigititaq aningaasartuutit ulloq unnuarlu neqeroorutip ingerlanneqarneranut malittaasut, aallaavigalugit aalajangersarneqassaaq. Ulloq unnuarlu neqeroorutinut tamanut aammalu inunnut annertuumik innarluutilinnut immikkoortortanut tamanut, ataasiakkaatut akigititamik aalajangersaasoqassaaq. Akigititaq atuuttoq isumaginninnermi aningaasat ikiorsiissutaasartut atuuttut pillugit kaajallaasitami,

Namminersorlutik Oqartussat nittartagaanni tamanut saqqummiunneqartartumi, allassimassapput.

§ 64-imut

Imm. 1-imut.

Siunnersuummi *imm. 1*-imi Inatsisartut peqqussutaanni § 17 a, imm. 1 ingerlateqqinneqassasoq siunnersuutigineqarpoq.

Ukiumoortumik nalunaarummi siullermik pingaarnertullu ingerlatanut pingaaruteqartunut, ukiumi qaangiuttumi ingerlanneqarsimasunut nassuiaammik suliaqarnissaq siunertaavoq.

Ukiumoortumik nalunaarummi, politikikkut oqartussaasut allallu soqutigisallit paasisaqartinnissaat, suut aallartissimaneraat piviusunngortissimaneraallu, kiisalu paaqqinniffiit ataasiakkaat naatsumik takussutissinnissaat siunertaavortaaq. Siunnersuummi allanngortitsinissaq siunertarineqanngilaq.

Imm. 2-mut.

Imm. 2-mi Naalackersuisut ukiumoortumik nalunaarutinit maleruagassanik aalajangersaanissamut piginnaatitaanerat ilanngullugit tunniussinissaq, ilusissaa imarisaalu pillugit ingerlateqqinneqarput

§ 65-imut

Aalajangersakkami nutaajusumi, Naalackersuisut ulloq unnuarlu neqeroorutinit suliaasaqarfimmi periusissamik suliaqarnissamik pisussaaffilerneqarput. Inunnut annertuumik innarluutilinnut suliaasaqarfimmi pissusiviusut ineriartornerannik malinnaasumik, aammalu immikkut ilisimasaqarnerup annertunerulernissaanut iluaqutaasumik, ulloq unnuarlu neqeroorutit ingerlaavartumik ineriartortinneqarnissaasa qulakkeerneqarnissaat siunertaavoq.

Imm. 1-imut.

Siunnersuummi *imm. 1*-imi p ulloq unnuarlu neqeroorutinit suliaasaqarfimmi ukiut sisamakkaarlugit periusissamik nutaamik suliaqarnissamut, kiisalu periusissaq nuna tamakkerlugu ulloq unnuarlu neqeroorutinit tunngassuteqassasoq, Naalackersuisut pisussaaffilerneqarnissaat, siunnerfigineqarpoq. Ulloq unnuarlu neqeroorutinit periusissamik ingerlaavartumik suliaqarnissamut siunertaavoq, ulloq unnuarlu neqeroorutit suliaqarnerisa pitsaanagerusumik pilersaarusiorneqarneranut aaqqissuunneqarneranullu peqataanissaq kiisalu suliaasaqarfimmi maannakkut ajornartorsiutaasunut pisariaqartitsinermullu tunngatillugu eqqumaffiginninnerulernissap aamma annertunerusumik immikkut ilisimasaqarnissap qulakkeernissaa.

Imm. 2-mut.

Aalajangersakkami *imm. 2*-mi, ulloq unnuarlu neqeroorutinit periusissami ilanngunneqarsinnaasunut, suliaasaqarfimmi aalajangersimasunik assersuusiortoqarpoq. Assersuutit allanneqartut periusissami ilanngunneqassapput, tamakkiisumik allattugaanngillat.

Suliassaqarfiit suut maannakkut ineriartornermik takutitsinersut aammalu anigorniagassat aalajangersimasut suunersut, aamma suliassaqarfimmi piffissami pineqartumi annertuumik innarluutilinnut suliassaqarfimmi pilersussatut naatsorsuutigineqarnersut, isummerfiginerannik periusissaq imaqartinneqartariaqarpoq. Naalakkersuisut sapinngisamik pitsaanerpaamik ulloq unnuarlu neqeroorutit suliaqarnerannut pilersaarusiorsinnaanerat pitsanngorsaasinnaanerallu, aalajangiisuulluinnartumik pingaaruteqarpoq, assersuutigalugu suliassaqarfinni pisariaqartitsiviunerpaasuni, siunnerfigineqartunut aalajangersimasunut ulloq unnuarlu neqeroorummik pilersitsinikkut.

Imm. 3-mut.

Aalajangersakkami *imm. 3*-mi kommunalbestyrelsini aamma ulloq unnuarlu neqeroorutini pisortanik periusissamik suliaqarnermi akuutitsinissamik, Naalakkersuisut pisussaaffilerneqarput. Siunertaavoq ilaatigut mianerisassat aalajangersimasut eqqumaffigineqarnissat kiisalu kommunit aamma ulloq unnuarlu neqeroorutit misilittagaasa aamma piffissami aggersumi pitsanngorsaattissatut siunnersuutaasa, ilanngunneqarnissat.

§ 66-*imut*

Imm. 1-*imut*.

Aalajangersakkami *imm. 1*-imi tikeraarluni angalanissamut periarfissaqarneq pillugu maleruagassat, inunnut innarluutilinnut ataasiakkaanut piumasaaqatitaqanngitsumik pisinnaatitaaffinngorlugit, allanngortinneqarput.

Imm. 1 malillugu inuk innarluutilik, 18-it sinnerlugit ukiulik, aammalu pineqartup angerlarsimaffigisaata avataani najugaqaqatigiiffimmiittoq, § 54 naapertorlugu, najugaqarfimmi illersugaasumiittoq, § 55 naapertorlugu imaluunniit ulloq unnuarlu neqeroorummiittoq, § 59 naapertorlugu, sumiiffimmut angerlarsimaffigisaminut akiliunneqarluni ukiumut ataasiarluni tikeraarluni angalanissamut pisinnaatitaavoq. Aalajangersakkami siunertaavoq inuit sumiiffiup angerlarsimaffigisamik avataaniittut, sumiiffimmut angerlarsimaffigisaminnut atassuteqarnerminnik attassiinnarnissaannik ikiorneqarnissat. Sumiiffimmik angerlarsimaffigisamik oqarnermi illoqarfik imaluunniit nunaqarfik, inuup najugaqarfissatut neqeroorummut nuunnissaa sioqqullugu, inuup innarluutillip najugaqarfisaa, tikeraarluni angalanissamut tunngavilersuutigineqartoq, innersuussutigineqarpoq. Pissutsit allat, ilanngullugu inuup innarluutillip inuttut atassuteqarfii, naliliinermi ilanngunneqarsinnaapput. Sumiiffik sorleq inuup angerlarsimaffigisaatut taaneqartoq, pineqartup najugaqarfissatut neqeroorummiilernissani sioqqullugu annertunerpaamik atassuteqarfigineraa, aalajangiisuussaaq.

Imm. 2-*mut*.

Imm. 2-mi aamma siunnersuutigineqarpoq qanigisaasut inuup innarluutillip tikeraarluni angalaninnaatitaaneranut ilaatinneqarnissamut periarfissaq ilanngunneqassaq. Qanigisaasut tikeraarluni angalanissamut periarfissaqarnerat inuup innarluutillip periarfissaqarneranut taarsiullugu angalaneruvoq. Taamaalilluni tunngavissaritinneqarpoq qanigisaasut tikeraarluni

angalanissamut pisinnaatitaanermi ilaatinneqarsinnaasut, inuk nammineerluni tikeraarluni angalanissamik atuisinnaanngimmat. Aaqquissuussineq assersuutigalugu qitornamut 18-it sinnerlugit ukiulimmut angajoqqaat tikeraarnissamut ikiorsernissaannut atorneqarsinnaassaaq.

Imm. 3-mut.

Aalajangersakkami imm. 3-mi siunnersuutigineqarpoq, meeqqanut inuusuttunullu innarluutilinnut ulloq unnuarlu neqeroorummiittunut, sumiiffimmut angerlarsimaffigisamut imaluunniit angajoqqaat najugaannut ukiumut marloriarluni tikeraarluni angalanernut, erseqqissumik piunasaqaatitaqanngitsumillu pisinnaatitaaffiliineq atuutsinneqalissasoq. Marloriarluni tikeraarluni angalanissamik pisinnaatitaaneq 18-inik ukioqalernissaq tikillugu ilanngullugulu atuutissaaq.

Aalajangersakkami tamanna ataasiakkaatigut nalilersuinermi meeqqamut pitsaanerpaajusutut isigineqarpat, meeqqap ulloq unnuarlu neqeroorummut tikeraarnissaa siunertaralugu, angajoqqaatut akisussaasut, imaluunniit qanigisaasut allat tamatumunnga taarsiullugu tikeraarluni angalanissamut periarfissineqarput. Najugaqartut 18-it sinnerlugit ukiullit assigalugit, meeqqat innarluutillit inuusuttullu tikeraarlutik angalanerannut siunertaavoq, inuup nunamut sumiiffimmut angerlarsimaffigisaminut atassuteqarnerminik attassiinnarnissaa. Taamaalilluni aamma meeqqat inuusuttullu 18-it inorlugit ukiullit aallaaviatigut, tikeraarlutik angalanerat sumiiffimmut angerlarsimaffigisamut ingerlassaaq. Taamaattoq tikerarnerup meeqqap/inuusuttup sumiiffiani ingerlanneqarpat, qaqutigoortumik meeqqap imaluunniit inuusuttup pisariaqartitsineranut naapertuunnerunersoq, ataasiakkaatigut nalilersuinissamut periarfissaqarnerup attatiinnarneqarnissaa, aalajangersakkami kissaatigineqarpoq.

Angajoqqaatut akisussaasunut attaveqarnerup naleqquttup attatinnarnissaanut tamanna pisariaqartoq naliliisoqarpat, meeraq 18-it inorlugit ukiulik imaluunniit meeqqamut angajoqqaatut akisussaasut, pingajussaannik tikeraarluni angalanissamik akuerineqarsinnaapput. Pingajussaannik angalanissaq pisariaqarnerusoq, meeqqap imaluunniit inuusuttup aamma angajoqqaatut akisussaasut imminnut attaveqarnerat ataasiakkaatigut nalilersuiffigineqarnera malillugu aalajangerneqassaaq. Tikeraarluni angalaqqinnissamut tunngavissarititaavoq, angalaneq, inummut tunngasut aammalu tapersiinerup suussusaata ataasiakkaatigut nalilersorneqarnerat aallaavigalugu inuup tapersiivigineqarnissamik pisariaqartitsineranut, naapertuutinngitsutut isigineqassanngitsoq.

Imm. 4-mut.

Imm. 4-mi aalajangersakkat, takukkit *imm. 1*, *imm. 2*, *aamma imm. 3*, aamma inuit innarluutillit Kalaallit Nunaata avataani inissisimasut pineqartunut ilaatilerlugit, annertusitinneqarput. Aalajangersakkami siunnersuutigineqarpoq, inuit annertuumik innarluutillit ikiorserneqartarnerat pillugu Namminersorlutik Oqartussat nalunaarutaat malillugu tikeraarluni angalanissamut periarfissaqarnerup, inunnut innarluutilinnut

Danmarkimi inissimasunut tunngatinneqarneranit, aamma tunngaviatigut Kalaallit Nunaata avataani nunat tamaasa pineqartunut ilaatilerlugit, allangortinneqassasoq.

Aammattaq aalajangersakkami erseqqissarneqarpoq inuk innarluutilik 18-it aamma 24-t akornani ukiulik, Kalaallit Nunaata avataani ulloq unnuarlu neqeroorummiikkallartoq, inuit 18-it sinnerlugit ukiullit ukiumut ataasiarlutik akiliunneqarlutik tikeraarlutik angalanissamut taamaallaat periarfissaqassasut aalajangersakkami matumani *imm. 1*-ip killiliinermik imaqarnera apeqqutaatinnagu, akiliunneqarluni marloriarluni tikeraarluni angalanissamut pisinnaatitaasut. Assersuutigalugu ulloq unnuarlu neqeroorummiikkallarnermi, takukkit siunnersuummi § 51-imut nassuiaatit.

Imm. 5-imut.

Aalajangersakkami *imm. 5*-imi aalajangersarneqarpoq, inuk 18-it sinnerlugit ukiulik innarluutilik, 18-inik ukioqalereermermi kingorna ukiunit 10-nit sivisunerusumik ulloq unnuarlu neqeroorummiissimasoq, sumiiffimmut angerlarsimaffigisaminut ukioq allortarlugu ataasiarluni tikeraarluni angalanissamut pisinnaatitaasoq.

Taamaattoq inuup tamanna suli kissaatigippagu sumiiffimmut angerlarsimaffigisamut atassuteqarnerup attatiinnarsinnaanissaanut aalajangersakkami periarfissiisoqarpoq.

Imm. 6-imut.

Aalajangersakkami *imm. 6*-imi erseqqissarneqarpoq, tikeraarluni angalanerit, inuup pineqartup angerlarsimaffigisaanut sapinngisamik qaninnerpaamut angalanermut tunngassuteqartut, taamaattoq angalanerup ilai ataasiakkaat naleqqutinngitsumik annertuumik isumalluutinik atuinermik imaluunniit ajoqutissartaqarnermik atugaqarfigneqannginnissaat eqqarsaatigalugu, ilanngullugu sumiiffimi angerlarsimaffigisami pisariaqartunik atortorissaaruteqannginnera pissutigalugu.

Imm. 7-imut.

Imm. 7-imi innersuussutigineqarpoq, tikeraarluni angalanermut ataatillugu aningaasartuutitut akiliisussaatitaaneq kommunimi angerlarsimaffigisami kommunalbestyrelsip pisussaaffigigaa. Angalanermut aningaasartuutit tamarmiusut, ilanngullugit ingiaqataasut pisariaqartumik amerlassusillit angalanermut unnuinermullu aningaasartuutaannut, ullut unnuallu angalaffiusunut, tikeraarluni angalanerup sivisussusaani aningaasartuutit akiliisussaatitaanermi pineqartunut ilaapput. Taamaattoq allassimavoq kommunalbestyrelsip akiliisussaatitaanera annerpaamik ullut unnuallu 9-t tikeraarluni angalanermut killeqartoq. Tikeraarluni angalanerup aallartinnerani naammassineranilu piffissaq angalaffiusoq, ulluni unnuanilu 9-ni naatsorsuinermi ilaatinneqanngilaq.

Imm. 8-mut.

Imm. 8 tikeraarluni angalanerup aamma aningaasartuutinik akiliinerup aaqqissuunneqarnerat pillugu maleruagassanik erseqqinnerusunik aalajangersaanissamut piginnaatitsissummik imaqarpoq. Assersuutigalugu taakkua ingiaqataasup angalaneranut ataatillugu aningaasartuutit

pillugit maleruagassanut tunngassuteqarsinnaapput, ilanngullugit assersuutigalugu ullormusiassat, ingiaqataanermut ajunngitsorsiassat aamma qanigisaanani ingiaqataanermi sulinermi aningaasarsiassanik annaasaqarneq. Tamatuma saniatigut maleruagassanik, kia tikeraarluni angalanermi ingiaqatigissaneraani, inuit innarluutillit sapinngisamik namminneerlutik aalajangiisarnissaannik qulakkeerinnittumik, imaluunniit inuk nammineerluni aalajangiisinnaanngippat, angajoqqaatut akisussaasut imaluunniit angajoqqaatut sinniisup akuutinneqarneratigut, inuup soqutigisai qanoq isumannaarneqassanersut, aalajangersaanissaq naleqqussinnaavoq. *Imm. 7*-imi piginnaatitsissut naapertorlugu maleruagassat, tamatuma saniatigut kommunip angerlarsimaffigisap immikkut ittumik tapersiinermi iliuusissamut, assersuutigalugu nutserisumik ikiorteqarnissaq, ikiorsiinissamut periarfissaannut, tunngassuteqarsinnaapput.

§ 67-*imut*

Imm. 1-imut.

Aalajangersakkami *imm. 1*-imi inuit innarluutillit, pineqartup sumiiffimmi angerlarsimaffigisaata avataani najugaqatigiiffimmiittut, najugaqarfimmi illersugaasumiittut imaluunniit ulloq unnuarlu neqeroorummiittut, qanigisaasut annertuumik napparsimanerannut, toqunerannut ilisaanerannullu ataatillugu angalanissamut pisinnaatinneqarput. Annertuumik napparsimanermi pineqartunut ilaapput ilaatigut kræftimik nappaatit annertuut amerlanersaat aamma qaratsami tinusoornerit aalajangersimasut, uummammi nappaatit annertuut aalajangersimasut aamma uummammi qaratsami taqqatigut nappaatit, timip atortuini unittoorneq taartissamik ikkussinissaq pisariaqartinneqalerluni, sianiutikkut nappaatit ajorsiertortut aalajangersimasut, ataavartumik isigisaarunneq, tusaasaarutivinneq. Allattukkat tamakkiisuunngillat. Itisiliisumik allattukkanut innersuussutigineqarsinnaavoq Naalakkersuisut: Qanigisaasut qaninnerpaat annertuumik napparsimanerat aamma/imaluunniit toqunerat ilisaanerallu pillugit ilitsersuut.

Angalanissamik pisinnaatitaaneq, inuk nunap killeqarfiisa iluanni avataanniluunniit inissisimanersaq apeqputaatinnagu, atuuppoq. Angalanissaq aalajangersagaq manna malillugu akuerineqartoq, siunnersuummi § 66 naapertorlugu tikeraarluni angalanissamik pisinnaatitaanermut sunniinngilaq.

Imm. 2-mut.

Imm. 2-imi aalajangersarneqarpoq, kommunalbestyrelse qanigisaasut annertuumik napparsimanerannut, toqunerannut ilisaanerannullu tikeraarluni angalanermut ataatillugu, § 66, *imm. 7* malillugu maleruagassat malillugit aningaasartuutinut akiliisussaataasoq.

Imm. 3-mut.

Imm. 3 malillugu, inuk annertumik napparsimalerpat imaluunniit immikkut ittunut nalliuttorsiornernut atatillugu, assersuutigalugu 18-inik ukioqalerluni inuuisiornermi, katinermi assigisaanniluunniit, inummut innarluutilimmut, sumiiffiup angerlarsimaffigisap avataani najugaqarfissatut neqeroorummiittumut kommunimi angerlarsimaffigisami

kommunalbestyrelse, inuup qanigisaannut qaninnerpaanut angalanissamut tapersiinissamik neqerooruteqassasoq.

Imm. 3 naapertorlugu tapersiineq qanigisaasumut ataatsimut arlalinnulluunniit ikiorsiissutigineqassaaq, kisianni ikiorsiissutip kommunip ikiorsiissutiginiisaanut pisussaaffeqanngilaq. Kommunalbestyrelsip *imm. 3* malillugu tapersiisinnanissaanut tunngavissaritinneqarpoq, inuup tikeraarneqartup siunnersuummi § 66-imi inunnut pineqartunut ilaasuunissaa. Tikeraarluni angalanissamut tapersiineq tamatuma saniatigut nalliuttunut annernut atatillugu ikiorsiissutigineqarsinnaavoq, taassuma ataani akunnaatsuliilluni inuuissiortoornermut, kuisittoornermut, apersortitsinermit, katittoornermut, 25-liilluni katiffissiornermut ilisinernullu.

Imm. 4-mut.

Imm. 4, tikeraarluni angalanerup aaqqissuunneqarnera aamma tassunga aningaasartuutininik akiliisarneq pillugit maleruagassanik aalajangersaanissamut Naalakkersuisunut piginnaatitsissummik, imaqarpoq. Maleruagassat § 66, *imm. 8*-mi piginnaatitsissutitulli pissutsinut tassaniittut assinginut tunngassuteqarsinnaapput, aalajangersakkamut nassuiaatit naapertorlugit.

§ 68-imut

Aalajangersagaq malillugu illerfiup assartorneqarnissaanut tamakkiisumik ilaannaasumilluunniit matussutissatut tapersiineq, najugaqartoq sumiiffiup angerlarsimaffigisap avataani najugaqarfissatut neqeroorummiinnermini toquppat, najugaqartumut siunnersuummi § 66-imi pineqartunut ilaasumut kommunimi angerlarsimaffigisami kommunalbestyrelsimit ikiorsiissutigineqassaaq. Kommunalbestyrelse tapersiinissamik pisussaaffeqanngilaq, kisianni toqukkut qimaguttup imaluunniit taassuma qanigisaasa sumiiffimmi angerlarsimaffigisami ilisinissaq kissaatigalugu oqaatigisimappagu aammalu ataasiakkaatigut tapersiinissaq pissutsit pisariaqartippassuk, tamakkiisumik ilaannaasumilluunniit matussusiinissaq isumaliutersuutigineqarsinnaavoq. Aalajangersagaq Kalaallit Nunaanniinaq atuutinngilaq, taamaattumik naalagaaffeqatigiinnerup iluaniit nunanillu allaniit Kalaallit Nunaannut illerfimmik angallassinissamut akiliutissamik ikiorsiisoqarsinnaavoq.

§ 69-imut

Inuup innarluutillip tapersiivigineqarnissamut pisariaqartitsinera piffissap ingerlanerani ajornerulersimanersoq imaluunniit pitsaanerulersimanersoq apeqqutaatinnagu, inuit innarluutillit inuup sukkulluunniit pisariaqartitsineranut naapertuuttumik tapersiivigineqarnissaasa qulakkeerneqarnissaa aalajangersakkami siunertaavoq.

Imm. 1-imut.

Aalajangersakkami aalajangersarneqarpoq, Inatsisartut inatsisaat manna malillugu tapersiinerup ingerlasoq siunertaminut iluaqutaanissaa kommunalbestyrelsip

akisussaaffigigaa, taamaattumillu inunnut ataasiakkaanut tapersiinerup ingerlaavartumik naleqqussarneqarnissaa nakkutigisussaallugu, taamaalilluni inuit innarluutilit ataasiakkaat tapersiivigineqassallutik, inuup ataasiakkaatut pisariaqartitsineranik tunngavissiinissamik siunertaqartumik. Inuup innarluutilip tapersiivigineqarnissamik pisariaqartitsinera allanngorsimansoq, taamaalilluni kommunalbestyrelse nammineq aallartitaminik ukiumut arlaleriarluni nalilersuinissaminik anguniagaqartariaqarpoq, inuup innarluutaa nalilerneqanngippat ataavartuusoq allanngujaatsuusorlu allanngornissaanillu ilimanaateqanngitsoq. Inuk innarluutilik tapersiinerup allanngortinneqarnissaanik pisariaqartitsilluni inissisimasoq kommunalbestyrelsip eqqumaffigilerpagu, apeqqutaatinnagu kingullermik nalilersuinermit qaammatit arfinillit ingerlareersimannikkaluarpataluunniit, kommunalbestyrelse pisariaqanngitsumik kinguarsaanani, tapersiinermit iliuusissat aalajangersimasut suut inuup pisariaqartissimassanera nalilersornissaanut, pisussaaffeqarpoq. Inuk innarluutilik, tapersiivigineqarnissamut pisariaqartitsinerup allanngorneranik misigisaqartoq, tamatuma saniatigut nammineq iliuuseqarluni, pineqartoq annertunerusumik tapersiivigineqarnissamut pisinnaatitaanersoq isummertoqarnissaa pillugu qinnuiginninnissamut periarfissaqarpoq. Qinnuiginninneq akuerineqartoq, tapersiinnissamut nalilersuineq allanngortinneqartoq aalajangersimasuussanersoq, aammalu inuup saaffiginninneranut atatillugu tapersiivigineqarnissamik pisariaqartitsivinnerit allat kommunalbestyrelsip paasippagit, apeqquteqarneq aalajangersimasoq taanna annertunerusunik tapersiinermit iliuuseqarnissamut pissutissaqalersitsinersoq, nalilersornissaanut taamaallaat kommunalbestyrelse pisussaaffeqarpoq. Taamaattoqarpat kommunalbestyrelsip taakkua nalilersuinermit ilaatissavai.

Imm. 2-mut.

Imm. 2-mi aalajangersarneqarpoq, imm. 1 naapertorlugu kommunalbestyrelsip ilisimalerpagu inuk innarluutilik tapersiivigineqarnissamik pisariaqartitsinermini allanngortoqarneranik misigisaqartoq, kommunalbestyrelse inummut tapersiinerup allanngortinnissaa pillugu aalajangiinnissamut pisussaaffeqarpoq. Tapersiinerup allanngortinnissaa pillugu aalajangiineq kapitali 6-imi aamma 7-imi maleruagassat malillugit aalajangiiffigineqassaaq.

Imm. 3-mut.

Imm. 3-mi aalajangersarneqarpoq, tapersiinerup allanngortinneqarnissaa pillugu aalajangiisoqassanersoq nalilersuinermit atatillugu, kommunalbestyrelsip inuk innarluutilik aamma inuup angajoqqaatut sinnisua imaluunniit angajoqqaatut akisussaasui, tusarniaaffigissagaa. Kommunalbestyrelse taamaalilluni kommunimi sulisut atorfeqartut imaluunniit sulianut sularinnittartut allat suliatigut nalilersuinerat taamaallaat tunngavigalugu, tapersiinerup allanngortinneqarnissaa pillugu aalajangiisinnaangilaq. Inuk innarluutilik suliami tusarniaaffigineqassaaq. Tusarniaaneq oqaloqatigiinnikkut ingerlanneqassaaq.

Imm. 4-mut.

Imm. 4-mi aalajangersarneqarpoq, tapersiinermi iliuusissat, inummut innarluutilimmut tapersiissutitut ikiorsiissutigineqartut, taakkununga siunnerfiusoq anguneqarpat *unitsinneqassasut*. Tapersiinermi iliuusissatut siunnerfiusoq, inuk tapersiivigineqarnissamik pisariaqartitsisoq, tapersiinermi iliuusissaq pineqartoq atornagu nammineersinnaalerpat, anguneqarsimasinnaavoq. Assersuutigalugu allanngutsaaliuilluni sungiusaanerup malitsigisaanik tamanna pisimasinnaavoq, imaluunniit tapersiinermi iliuusissat annikinnerusut siunertamut naleqqussimanerat pissutaasinnaalluni.

Kommunalbestyrelse tapersiinermi iliuusissat unitsinneqarnissaat pillugu aalajangiinermi nalilersuisinnaavoq, inummut innarluutilimmut tapersiineq allatut iluseqartoq, maannamut tapersiissutaasumut taarsiullugu atorneqalersinnaanersoq. Pineqartup inissisimaneranik ataasiakkaatigut nalilersuinerup malitsigisaanik, inuk tapersiivigineqarnissamik suli pisariaqartitsippat, pineqartup pisariaqartitsineranik isumannaarinissamut pisariaqartutut nalilerneqartumik, inuup naleqquttumik tapersiivigineqarnissaa, kommunalbestyrelsip isumagissavaa.

Imm. 5-imut.

Imm. 5-imi aalajangersarneqarpoq, kapitali 7 malillugu immikkut ittumik tapersiinerup unitsinneqarnissaa pillugu aalajangiisoqannginnerani inummut innarluutilimmut iliuusissatut pilersaarummik kommunalbestyrelse suliaqarsimassasoq. Iliuusissatut pilersaarummik suliaqarnissamut ilaatigut siunertaavoq, inuup innarluutillip immikkut ittumik tapersiivigineqarnissamik, kapitali 7 naapertorlugu, pisariaqartitsiunnaarsimasutut nalilerneqartup, ineriartornermini suli tapersorsorneqarnerata qulakkeernissaa.

§ 70-imut

Aalajangersakkami siunertaavoq, inuup innarluutillip inersimasup ulloq unnuarlu neqeroorummiinnerata unitsinneqarnissaa pillugu kommunalbestyrelsip aalajangiinerata, mianerisassat attuumassuteqartut isiginiarlugit, kinaassusersiunngitsumik nalilersuineq tunngavigalugit pinissaata, qulakkeernissaa.

Imm. 1-imut.

Aalajangersakkami imm. 1 malillugu kommunalbestyrelsip piffissami misissuiffiusumi, tassalu inissiinerup unitsinneqarnissaa pillugu aalajangiisoqarsinnaanissaa sioqqullugu, pissutsit pingaaruteqartut sisamat paasinarsisissimassagai piumasaqaatigineqarpoq.

Pissutsit normuni 1-imit -4-imut allattorneqarput.

Nr. 1-imut

Inuup ulloq unnuarlu neqeroorummit angerlartinneqarnerata kingorna, inuup innarluutillip § 1 naapertorlugu inuup pisariaqartitsineranik naammassinninnissamut pisariaqartumik kapitali 6 naapertorlugu tapersiivigineqarnerata, imaluunniit kapitali 7 naapertorlugu immikkut ittumik

tapersiivigineqarnerata, ingerlaannarnissaanik qulakkeerinninnissamut kommunalbestyrelsip pisussaaffeqarneranik, aalajangersagaq imaqarpoq.

Nr. 2-mut

Ulloq unnuarlu neqeroorummit angerlartinneqareernerup kingorna inuit innarluutillit atugarissaaginnarnissaannut ineriartortinneqaannarnissaannullu, siunnerfilimmik aamma tamakkiisumik isiginnittumik suliniuteqarnermik qulakkeerinnissumik, iliuusissatut pilersaarummik suliaqarnissamik kommunalbestyrelsip pisussaaffeqarnera aalajangersakkap imaraa. Angerlartitsinissaq sioqqullugu, taassuma nalaani kingornalu suliassat tamaasa sioqqutsisumik paasinarsisissimallugit aammalu inummut innarluutilimmut aamma angerlarsimaffimmi pisariaqartitanut isummersorsimalluni kommunalbestyrelsip piffissaagallartillugu peqqissaarussisimanerani, angerlartitsinerup piareersarneqareersimanissaa – aamma allaganngorlugu - aalajangersakkami matumani qulakkeerneqassaaq, aammalu taamaattumik iliuusissatut pilersaarut, inuup taassuma angajoqqaatut sinniisuata angerlartitsineq pillugu paasissutissilluarnissaanut aammalu tamatuma pinnginnerani piffissaqartitsiviulluartumik suliap ingerlaneranut inerniliussanullu kommunip naatsorsuutigisaqarneranut, kommunalbestyrelsimit atorneqarsinnaassalluni.

Nr. 3-mut

Aalajangersakkami siunertaavoq, ulloq unnuarlu neqeroorummiinnerup unitsinneqarnissaa pillugu aalajangiisoqannginnerani, inuk innarluutilik, imaluunniit taassuma angajoqqaatut sinniisua misissuinnermut ilaatillugu tusarniarneqassasoq.

Oqaloqatiginninneq ingerlanneqarsimasoq aammalu inuk innarluutilik aamma angajoqqaatut sinniisuusoq tassunga tunngatillugu qanoq oqaaseqarsimanersut, kommunalbestyrelsip uppersarsinnaassavaa. Tamanna assersuutigalugu oqaloqateqarnerup allaganngorlugu imaqaarniliorneratut iluseqarsinnaavoq. Kommunalbestyrelse inuup innarluutillip kissaataanik malinninnissamik pisussaaffeqanngilaq, kisianni inuup oqariartuutai kommunalbestyrelsip aalajangiinerani ilaatinneqassapput.

Inuk innarluutilik sivilisunerusumi inissinneqarsimasoq pineqarpat, inuup angerlartinneqareernerup kingorna piffissami aalajangersimasumi siusinnerusukkut ulloq unnuarlu neqeroorummiiffiusumi sulisunut imaluunniit najugaqartunut attaveqartiinnarnissaa iluaqutaassanersoq, kommunip isumaliutersuutigippagu, naleqqutissaaq.

Nr. 4-mut

Kommunalbestyrelse ulloq unnuarlu neqeroorummit allaganngorlugu oqaaseqaammik piniassasoq aalajangersakkami piumasaqaatigineqarpoq. Oqaaseqaat inissiinerup unitsinneqarnera pillugu aalajangiinnermut kiisalu inuup innarluutillip ataatsimut isigalugu atugarissaarnerata killiffianik aammalu inuk angerlarsimaffiup avataaniinnissamik iluseqartumik tapersiivigineqarnissamik suli pisariaqartitsinersoq, inissiiviusup isummerneranik imaqassaaq.

Imm. 2-mut.

Imm. 2-mi aalajangersarneqarpoq, ulloq unnuarlu neqeroorutip oqaaseqaammimi, imm. 1 nr. 4 naapertorlugu, inassutigippagu, inuk innarluutilik ulloq unnuarlu neqeroorummiiginnassasoq, pissutsit taakkua pillugit una tamakkerlugu inunnik innarluutilinnik sullissivik oqaaseqaateqassaaq. Pisoq taanna suliassamik suliarinninnerup nalaani pissaaq, tassalu kommunalbestyrelsip angerlartitsinissaq pillugu aalajangiinissaa sioqqullugu. Ataatsimiititaliap oqaaseqaataa taamaalilluni piffissatigut kommunalbestyrelsip angerlartitsinissaq pillugu aalajangiinissaa sioqqullugu tunniunneqassaaq. Angerlartitsinissaq pillugu inaarutaasumik kommunimi aalajangiisoqarnissaa, angerlartitsinissamut soorunami utaqqineqassaaq nuna tamakkerlugu inunnik innarluutilinnik sullissivimmit oqaaseqaat, aalajangiisoqarnerani kommunalbestyrelsimut pisussaaffiliinngilaq, kisianni kommunalbestyrelsip oqaaseqaat aalajangiinissaq sioqqullugu naliliinermini, ilaatissavaa.

Imm. 3-mut.

Inuup innarluutillip aamma ulloq unnuarlu neqeroorutip angerlartitsinissamut piareersarnissamut piffissaqarnissaat qulakkeerniarlugu aalajangersagaq ilanngunneqarpoq, kisianni aamma inuup angerlarsinnaalinnginnerani tapersiinermi iliuusissat suliarineqartussat iluarsineqareersimassapput.

Aalajangersagaq angerlartitsinernut minnerpaamik ilimasaarinnermi piffissaliinertut paasineqassaaq, aammalu minnerpaaffissanut aalajangersagaalluni, taamaattumik kommunalbestyrelse sivilunerusumik angerlartitsinissamut ilimasaaraluni nalunaaruteqarnissaanut akornutaanani. Assersuutigalugu inuk innarluutilik Kalaallit Nunaata avataani inissinneqarsimasoq angerlartinneqartussanngorpat, imaluunniit inuk imaluunniit angerlarsimaffik angerlartitsinissamut sivilunerusumik pitsaanerusumik piareersartussaappat, sivilunerusumik ilimasaarinissaq naleqqussinnaavoq.

Inuk pineqartoq, taassuma angajoqqaatut sinniisua kiisalu ulloq unnuarlu neqeroorut, angerlartitsinissaq pillugu ilimasaarinnermik tigusaqarsimasussaapput. Kommunilbestyrelsip ulloq unnuarlu neqeroorut imaluunniit inuk angerlartitsinissaq pillugu taamaallaat ilimasaarsimappagit, sioqqutsisumik minnerpaamik sapaatit akunnerini 12-imi ilimasaarinissamut piimasaqaat naammassineqarsimassanngilaq. Sapaatit akunneri 12-it taakkua ulloq angerlartitsinissaq pillugu nalunaaruteqarnerup, suliaqartuusumut pingasunit taaneqartunit kingulliusumut apuunnera aallarnerfigalugu kisinneqassapput, aamma suliaqartuusooq kingulleq tassaasimagaluarpat inuk nammineq. Nalunaaruteqarneq apuussimasoq, kommunalbestyrelsip uppersartussaavaa.

Taamaattoq inuk innarluutilik eqqarsaatigalugu imaluunniit mianerisassat annertut allat, ilimasaarinissamut piffissamut killissaliussap saneqqunneqarnissaanik pisariaqartilerpasuk, ilimasaarinissamut killissaliussaq saneqqunneqarsinnaavoq.

Imm. 4-mut.

Kalaallit Nunaata avataani ulloq unnuarlu neqeroorummiinnermut tunngatillugu, kommunimi angerlarsimaffigisami kommunalbestyrelse, angerlartitsinissaq pillugu aalajangiineq pitinnagu, Kalaallit Nunaata avataani kommunimit najugaqarfiusumit nassuiaammik piniassasoq, aalajangersakkami aalajangersarneqarpoq. Ilimasaarinissaq pillugu imm. 3-mi aalajangersakkat taamatuttaaq atuupput.

§ 71-imut

Kommunalbestyrelsip meeqqamut innarluutilimmut ulloq unnuarlu neqeroorummiinnerup, § 59 naapertorlugu, unitsineqarnissaa pillugu aalajangiinerata, mianerisassat naleqquttut isiginiarlugit kinaassusersiunngitsumik nalilersuineq tunngavigalugu pinissaata, qulakkeernissaa, aalajangersakkami siunertaavoq.

Imm. 1-imut.

Aalajangersakkami imm. 1-imi piunasaqaatigineqarpoq kommunalbestyrelsip piffissami misissuiffiusumi, tassani inissiinerup unitsineqarnissaa pillugu aalajangiisinnaalernissaq sioqqullugu, pissutsit pingaarutillit 6-it paasinarsisissimassagai.

Pissutsit normuni 1-6-imi allattorneqarput.

Nr. 1-imut

Meeqqap ulloq unnuarlu neqeroorummit angerlartinneqarnerata kingorna, meeqqap § 1 naapertorlugu pisariaqartitsineranik naammassinninnissamut pisariaqartumik, meeqqap innarluutillip kapitali 6 naapertorlugu tapersiivigineqarnerata, imaluunniit kapitali 7 naapertorlugu immikkut ittumik tapersiivigineqarnerata, ingerlaannarnissaanik qulakkeernissamut kommunalbestyrelsip pisussaaffeqarneranik, aalajangersagaq imaqarpoq.

Nr. 2-mut

Pingaartumik ulloq unnuarlu neqeroorutip angerlarsimaffiullu akornanni qajassuussisumik ikaarsaarnissamut iluaqusiinissaq siunertaralugu, meeqqamut imaluunniit angajoqqaatut akisussaasunut tapersiinermi iliuusissaasinnaasunik neqerooruteqartoqassanersoq isummertoqarnissaa qulakkeerniarlugu, aalajangersagaq ilanngunneqarpoq.

Meeraq sivisunerusumik inissinneqarsimappat, kommunip isumaliutigisinnaavaa, iluaqutaassanersoq, meeqqap angerlartinneqareernermini inissisimaffigisimasaminut atassuteqaannarnissaa.

Nr. 3-mut

Ulloq unnuarlu neqeroorummit angerlartinneqareernerup kingorna meeqqap innarluutillip atugarissaaginnarnissaanut ineriartortinneqaannarnissaanullu, siunnerfilimmik aamma tamakkiisumik isiginnittumik suliniuteqarnermik qulakkeerinnissumik, iliuusissatut pilersaarummik suliaqarnissamik kommunalbestyrelsip pisussaaffeqarnera aalajangersakkap

imaraa. Angerlartitsinissaq sioqqullugu, taassuma nalaani kingornalu suliassat tamaasa sioqqutsisumik paasinarsisissimallugit aammalu inummut innarluutilimmut aamma angerlarsimaffimmi pisariaqartitanut isummersorsimalluni kommunalbestyrelsip piffissaagallartillugu peqqissaarussisimanerani, angerlartitsinerup piareersarneqareersimanissaa – aamma allaganngorlugu - aalajangersakkami matumani qulakkeerneqassaaq, aammalu taamaattumik iliuusissatut pilersaarut, meeqqap aamma angajoqqaat angerlartitsineq pillugu paasissutissilluarnissaanut aammalu tamatuma pinginnerani piffissaqartitsiviulluartumik suliap ingerlaneranut inerniliussanullu kommunip naatsorsuutigisaqarneranut, kommunalbestyrelsimit atorneqarsinnaassalluni.

Nr. 4-mut

Aalajangersakkami siunertaavoq, angerlarsimaffiup avataani inissiinerup unitsinneqarnissaa pillugu aalajangiisoqannginnerani, misissuinermut ilaatillugu meeraq tusarniarneqassasoq.

Oqaloqateqarnek assersuutigalugu suliassanik sularinnittup meeraq tikillugu imaluunniit oqarasuaatikkut oqaloqatigineratigut, pisinnaavoq. Oqaloqateqarnek ingerlanneqarsimasut , aammalu meeraq qanoq oqaaseqarsimanersoq, kommunalbestyrelsip uppersarsinnaassavaa. Tamanna assersuutigalugu oqaloqateqarnerup allaganngorlugu imaqarniliorneratut iluseqarsinnaavoq.

Meeraq angerlartinneqarpat, tamanna meeqqamut aamma angajoqqaanut annertuumik allanngortitsisarpoq. Angerlartitsineq iluatsitsiviulluarnersoq, angerlartitsineq peqqissaartumik pilersaarusiortlugu ingerlanneqarnerasoq, aammalu meeraq kiisalu angajoqqaat naleqquttumik angerlartitsinermut piareersarsimanersut, apeqqutaavoq. Meeraq suliap ingerlaneranik oqaloqateqarnermi ingerlaavartumik paasitinneqartarluni, suliap ingerlatinnera, meeqqap angerlartinneqartussanngornerminik toqqissisimasutut misigisimaneranut tamanna iluaqutaasinnaavoq. Suliap ingerlanerani soorunami meeqqap ukioqqortussusaa inerisimassusaalu eqqarsaatigineqassapput.

Nr. 5-imut

Kommunalbestyrelse ulloq unnuarlu neqeroorummit allaganngorlugu oqaaseqaammik piniassasoq aalajangersakkami piumasqaatigineqarpoq. Oqaaseqaat inissiinerup unitsinneqarnera pillugu aalajangiinermut kiisalu meeqqap ataatsimut isigalugu atugarissaarnerata killiffianik aammalu meeraq qanoq annertutigisumik tapersiivigineqarnissamik suli pisariaqartitsinersoq, inissiiviusup isummerneranik imaqassaaq.

Nr. 6-imut

Aalajangersakkami aalajangersarneqarpoq, meeqqap taamatullu angajoqqaatut akisussaasut imaluunniit qanigisaasut allat angerlartitsinissamut piareersimalluarnissaat, aammalu tamatumunnga iliuusissatut pilersaarut, imm. 1, nr. 3, naapertorlugu paasissutissinneqarsimanissaat kommunalbestyrelsip akisussaaffigigaa aammalu inissiiviusup kisimi qulakkeerneqarsimanissaa suliassarinnigikkaa. Aalajangersarneqarpoq

angerlartitsinissamut meeqqap aamma angajoqqaat piareersarnissaat kommunalbestyrelsip pisussaaffigigaa. Meeqqap ulloq unnuarlu neqeroorummiinneranit angerlartinnissaa sioqqullugu, meeqqap aamma angajoqqaatut akisussaasut angerlartitsinissamut piareersartinnissaat kommunalbestyrelsip akisussaaffigaa. Meeqqap kiisalu angajoqqaatut akisussaasut angerlartitsinissamut piareersartinneqarnissaat qanoq naleqqunnerpaatinneqarnersoq, kommunalbestyrelsip nalilertussaavaa. Piareersartitsineq ilaatigut meeqqap oqaloqatigineratigut pisinnaavoq, tassani kommunalbestyrelsip meeraq angerlartitsinerup ingerlanissaa pilersaarutigineqartoq pillugu oqaluttuutissavaa. Angerlartitsinerup pinnginnerani meeqqap angerlarsimaffimmut angajoqqaanullu ataasiarluni arlaleriarluniluunniit pulaarnissamut periarfissaqarnissaa, amerlanertigut naleqqutissaaq. Pingaaruteqarpoq meeraq inissisimalernissaminut piareersarnissaanut aammalu maannamut inissiiviusumi meeqqat aamma inersimasut inuulluaqqulluarnissaannut periarfissaqarnissaa.

Angajoqqaatut akisussaasut imaluunniit meeqqamut qanigisaasut allat, angerlartitsinerup ingerlanissaanik pilersaarutigineqartut pillugit naleqquttumik pikkorissartinnissat imaluunniit angajoqqaatut akisussaasut imaluunniit qanigisaasut allat oqaloqatiginissaat kommunalbestyrelsip toqqarsinnaavaa. Kommunalbestyrelsip meeqqap angerlartinneqarnerani piareersarnissaq aamma tapersiinissaq pillugu ulloq unnuarlu neqeroorummut isumaqatigiissuteqarpat, tamanna naleqqutissaaq. Ulloq unnuarlu neqeroorut amerlanertigut angerlartitsinerup atatillugu aammalu piffissami tamatuma kingorna, meeqqamut tapersiinissamut naleqqulluartsuussavaa.

Imm. 2-mut.

Ulloq unnuarlu neqeroorutip oqaaseqaammuni, imm. 1, nr. 5, naapertorlugu, inassutigippagu, meeraq ulloq unnuarlu neqeroorummiiginnassasoq, pissutsit taakkua pillugit nuna tamakkerlugu inunnik innarluutilinnik sullissivik oqaaseqaateqassaaq. Pisoq taanna suliassamik suliarinninnerup nalaani pissaaq, tassalu kommunalbestyrelsip angerlartitsinissaq pillugu aalajangiinissaa sioqqullugu. Ataatsimiititaliap oqaaseqaataa taamaalilluni piffissatigut kommunalbestyrelsip angerlartitsinissaq pillugu aalajangiinissaa sioqqullugu tunniunneqassaaq. Angerlartitsinissaq pillugu inaarutaasumik kommunimi aalajangiisoqarnissaa, angerlartitsinissamut soorunami utaqqineqassaaq nuna tamakkerlugu inunnik innarluutilinnik sullissivimmit oqaaseqaat, aalajangiisoqarnerani kommunalbestyrelsimut pisussaaffiliinngilaq, kisianni kommunalbestyrelsip oqaaseqaat aalajangiinissaq sioqqullugu naliliinermi, ilaatissavaa.

Imm. 3-mut.

Meeqqap innarluutillip aamma ulloq unnuarlu neqeroorutip angerlartitsinissamut piareersarnissamut piffissaqarnissaat qulakkeerniarlugu aalajangersagaq ilanngunneqarpoq, kisianni aamma meeqqap angerlarsinnaalinnginnerani tapersiinermi iliuusissat suliarineqartussat iluarsineqareersimassapput.

Aalajangersagaq angerlartitsinernut minnerpaamik ilimasaarinermi piffissaliinertut paasineqassaaq, aammalu minnerpaaffissanut aalajangersagaalluni, taamaattumik kommunalbestyrelse sivisunerusumik angerlartitsinissamut ilimasaaraluni nalunaaruteqarnissaanut akornutaanani. Assersuutigalugu meeraq Kalaallit Nunaata avataani ulloq unnuarlu neqeroorummiittoq angerlartinneqartussanngorpat, imaluunniit meeraq imaluunniit angerlarsimaffik angerlartitsinissamut sivisunerusumik pitsaanerusumik piareersartussaappat, sivisunerusumik ilimasaarinissaq naleqqussinnaavoq.

Meeraq pineqartoq, angajoqqaatut akisussaasut kiisalu ulloq unnuarlu neqeroorut, angerlartitsinissaq pillugu ilimasaarinermik tigusaqarsimasussaapput. Kommunalbestyrelsip ulloq unnuarlu neqeroorut imaluunniit meeraq angerlartitsinissaq pillugu taamaallaat ilimasaarsimappagit, sioqqutsizsumik minnerpaamik sapaatit akunnerini 12-ini ilimasaarinissamut piumasagaat naammassineqarsimassanngilaq. Sapaatit akunneri 12-it taakkua ulloq angerlartitsinissaq pillugu nalunaaruteqarnerup, suliaqartuusumut pingasunit taaneqartunit kingulliusumut apuunnera, aallarnerfigalugu kisinneqassapput, aamma suliaqartuusoq kingulleq tassaasimagaluarpat inuk nammineq. Nalunaaruteqarneq apuussimasoq, kommunalbestyrelsip uppersartussaavaa.

Taamaattoq meeraq eqqarsaatigalugu imaluunniit mianerisassat annertut allat, ilimasaarinissamut piffissamut killissaliussap saneqqunneqarnissaanik pisariaqartilerpassuk, ilimasaarinissamut killissaliussat saneqqunneqarsinnaavoq. Aningaasaqarnikkut mianerisassat sapaatit akunnerini 12-ini killissaliinerup saneqqunneqarnissaanut tunngavilersuutigineqarsinnaanngillat

Imm. 4-mut.

Kalaallit Nunaata avataani ulloq unnuarlu neqeroorummiinnermut tunngatillugu, kommunimi angerlarsimaffigisami kommunalbestyrelse, angerlartitsinissaq pillugu aalajangiineq pitinnagu, Kalaallit Nunaata avataani kommunimit najugarisamit nassuiaammik piniassasoq, aalajangersakkami aalajangersarneqarpoq. Ilimasaarinissaq pillugu imm. 3-mi aalajangersagaq taamatutaaq atuuppoq.

§ 72-*imut*

Imm. 1-imut.

Imm. 1-imi aalajangersarneqarpoq, kommunalbestyrelsip tapersiinissaq imaluunniit immikkut ittumik tapersiinissaq pillugu sulianik sunniuteqarluartumik suliarinninnermi sunniuteqarluartumik sulinissamut pisussaaffeqartoq, taamaalilluni suliat pisariaqanngitsumik sivitsuuttooqqunagit.

Imm. 2-mut.

Aalajangersakkami *imm. 2*-mi aalajangersarneqarpoq, suliassa qarfimmi suliassanik suliarinninnermi kommunit qanoq sullississanersut, kommunalbestyrelsit ataasiakkaat aalajangiisinnaasut. Piffissamut suliassanik suliarinninnermut atorneqartartumut

tunngatillugu, sullissinerup qaffasissusaa qanoq ittoq naatsorsuutigisinnaanerlugu, inuup innarluutillip piffissamut killissaliinerit aqqutigalugit paasissavaa. Kommunalbestyrelsit killeqanngitsumik piffissamut killissaliinerit piumasaannarminnik aalajangersaasinnaanerannik, aalajangersagaq malitseqassanngilaq, tassami tamatumani pisortat ingerlatsivianni ileqqorissaarneq malinneqartussaammat, tassalu piffissap naleqquttup iluani aalajangiisoqarsimassasoq, aammalu suliaassanik suliarinninneq sapinngisamik sukkanerpaamik pissasoq piumasaqaateqarmat, imm. 1 naapertorlugu.

Imm. 1-imi sulianik pisariaqanngitsumik sivitsortitsinissamik inerteqquteqarnerup malitsigisaanik, piffissamut killissaliussat suliaqarnermi tapersiinerup suussusaa apeqqutaalluni, allanngorartussaapput.

Imm. 3-mut.

Aalajangersakkami *imm.* 3-mi aalajangersarneqarpoq, suliame aalajangersimasumi suliassaq piffissamut killissaliussap iluani suliarineqarsinnaanngippat, kommunalbestyrelsip qinnuteqartoq tamanna pillugu, kiisalu aalajangiineq qaqugu pisinnaassanersoq pillugu, allakkatigut nalunaarfigissavaa.

§ 73-*imut*

Imm. 1-*imut*.

Imm. 1-imi aalajangersakkami siunertaavoq, inuup innarluutillip ikiorserneqarnissaa, pineqartup tapersiivigineqarnissamik pisariaqartitsineranut atorneqarsinnaasoq, ajornannginnerulersinneqassasoq. Apeqqummut imaluunniit tapersiivigineqarnissamik qinnuteqaammut atatillugu ikiorsiinissamut tapersiinissamullu periarfissaanik tamaginnik misissuinissamik kommunalbestyrelsip pisussaaffeqarnera, aalajangersakkami aalajangersarneqarpoq.

Imm. 2-*mut*.

Imm. 2-mi aalajangersakkami aalajangersarneqarpoq, immaqa suliassa qarfinni allani, qinnuteqartup pineqartup pisariaqartitaannut naleqqussinnaasunik, inatsisit allat naapertorlugit ikiorsiinissaq tapersiinissarlu neqeroorutigineqarnerasoq, kommunalbestyrelsip sapinngisamik misissussagaa. Tamanna assersuutigalugu peqqinnissamut suliassa qarfimmi imaluunniit ilinniartitaanermut suliassa qarfimmi pisinnaavoq.

§ 74-*mut*

Imm. 1-*imut*.

Aalajangersakkami *imm.* 1-imi immikkoortunik pingaarnernik piviusunngortitsineruvoq, Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaanni politikikkut aaqquusisnerutigullu aalajangiinissanut suliat ingerlaneranni inuit innarluutillit imminnut tunngasunik aalajangiinerni akuutinneqarnissamut periarfissaqartariartut. Inuup isummani oqaatigisinnaappagu, inuk killilersugaanngitsumik isummaminik oqaatiginninnissamut pisinnaatitaanerminik qulakkeerissunneqassasoq, Inuit innarluutillit

pisinnaatitaaffii pillugit Naalagaaffiit Peqatigiit isumaqatigiissutaanni tunngaviusumi pineqarpoq.

Inuk innarluutilik aalajangersakkap imarisai malillugit suliani tamaginni aammalu suliap suliarineqarnerata nalaani sukkulluunniit oqaaseqaateqarnissamut periarfissaqarpoq. Taamaattoq inuk innarluutilik oqaaseqaateqarnissamik pisussaaffilerneqanngilaq, taamatullu inuup allanit sinniiseqarnissaa imaluunniit ikiorteqarnissaa, aalajangersakkami akornuserneqanngilaq.

Kommunalbestyrelsip inuup innarluutillip kissaatai imaluunniit isumai malissagai, piunasaqaataanngilaq, kisianni inuup piginnaasaqarnera inerisimassusaalu apeqqutaatillugu pingaartinneqassallutik.

Oqaloqateqarnermi aalajangiinissamut naatsorsuutigineqartumut inuup innarluutillip nammineq isumaa ersarissitinneqassaaq. Misissuinermit atatillugu inuk oqaloqatigineqarsimagaluartoq, aamma tapersiinermi iliuusissat pillugit aalajangiisoqannginnerani, oqaloqateqarneq ingerlanneqassaaq. Tamatumunnga tunngavilersuutaasoq tassaavoq, inuit aalajangiinissamik eqqarsaatigineqartup imarisaanut aalajangersimasumut isummaminnik saqqummiussinissamut periarfissaqarnissaasa pingaaruteqarnera.

Imm. 2-mut.

Aalajangersakkami *imm. 2*-mi aalajangersarneqarpoq, oqaloqateqarneq pitsaassusilimmik ataqqinnittumillu ingerlanneqassasoq, aammalu inuup nammineq suliami isummaminnik saqqummiussineranik kinguneqassasoq. Oqaloqateqarnerup ilusissaanut piunasaqaateqanngilaq. Taanna inuup tikillugu oqaloqatiginnerani, oqarasuaatikkut, videolink aqqutigalugu allatulluunniit ingerlanneqarsinnaavoq. Inuup innarluutillip isumai paasinarneqassapput, aammalu isummersuutit inuup ukioqqortussusaanut, inerisimassusaanut piginnaaneqarneranullu naapertuuttumik, isumaginninnermi suliaqarnerup ingerlaqqinnerani, naleqquttumik pingaaruteqartillugit, ilanngunneqassallutik.

Inunnut timikkut tarnikkulluunniit piginnaanikillisisamasunut, aalajangiinermi inuit taakkua isumaasa ilanngunneqarnissaa qulakkeerniarlugu, immikkut mianerinninnissaq imaluunniit periaatsit immikkut atornissaat, pisariaqarsinnaavoq. Piginnaaneqarneq aamma inerisimaneq uuttuutigalugit kommunalbestyrelse naliliisinnaavoq, inuup inissisimanini paasisimaneraa aammalu isummat isummersuutillu inuup oqaloqateqarnerup nalaani saqqummiussaasa kingunissai paasisimaarinerai.

Imm. 3-mut.

Aalajangersakkami *imm. 3* inissisimanermit tunngasutut paasineqassaaq, taamaalillunilu tamanna inummut pitsaanerpaassasoq naliliisoqarpat aammalu tamanna allatigut isumanerlunnartortaqaarsorineqanngippat, tassani angajoqqaatut sinniisuusoq

akuersiteqqaarnagu inuup innarluutillip oqaloqatiginissaanut kommunalbestyrelsimut periarfissiissutaalluni.

Imm. 4-mut.

Aalajangersakkami *imm. 4* imm. 1-imi maleruagassamut pingaarnermut ilaatinneqanngitsunut tunngavoq. Nalornissuteqarnermi, inuup innarluutillip isummani saqqummiussinnaassaneraa kommunalbestyrelsip nalornissutigalugu, kommunalbestyrelsip pineqartoq misilillugu oqaloqatiginiassavaa. Oqaloqateqarnerup nalaani paasinarsippat, inuup isummani oqaatigisinnaanngikkai, oqaloqateqarneq unitsinneqarsinnaavoq.

Oqaloqateqarnerup inuk naleqqutinngitsumik inissisimalersillugu pisoqarsinnaavoq. Pisuni taakkunani inuup mianerineqarnissaa, pineqartup tusarniarneqarnissaanut imaluunniit akuutinneqarnissaanut aalajangiisuusumik akerliunersoq, ataasiakkaatigut nalilersuisoqassaaq. Nalilersuinermi, oqaloqateqarnerup ingerlanneqarnera inummut iluaqutaanani ajoqutaaginnassanersoq, ilaatinneqassaaq. Tamanna assersuutigalugu inuup innarluutillip oqaaseqarnissani kissaatiginagu erseqqissumik oqaatigalugu pisoqarnerani, pisinnaavoq.

Pisut ilaanni aalajangersimasuni oqaloqateqarnerup ingerlanneqarnissaa inummut innarluutilimmut iluaqutaassanngilaq. Tamatumunnga pissutaasinnaavoq inuup inerisimannginnera imaluunniit piginnaaneqannginnera, pineqartup inissisimanini paasisimanagu, aammalu isummaminik imaluunniit isummersuutiminik saqqummiussisinnaassanani. Inuk assersuutigalugu illersorti ikiorsiullugu oqaloqatigineqarnermini isummaminik saqqummiussisinnaanera periarfissaqarpat, oqaloqateqarneq ingerlanneqartariaqarpoq.

Inuup innarluutillip oqaloqatigineqarnera ingerlanneqanngippat, allatut aalajangiinermut inuup isumaata pissarsiariniarnissaanut kommunalbestyrelse pisussaaffeqarpoq. Oqaloqateqarneq sooq ingerlanneqarsimannginnersoq tunngavilersuutitalerlugu suliami allasimassaaq. Tassani allanneqartariaqarpoq, inuk oqaloqatigineqarsimanngippat, inummut periarfissat qanoq paasinarsisimanersut.

§ 75-*imut*

Imm. 1-*imut*.

Aalajangersakkami imm. 1-imi, meeqqanut innarluutilinnut tunngassuteqartumi, immikkoortunik pingaarnernik piviusunngortitsineruvoq, Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaanni politikkikkut aqqissuussinertigullu aalajangiinissanut suliat ingerlaneranni inuit innarluutillit imminnut tunngasunik aalajangiinerni akuutinneqarnissamut periarfissaqartariartut. Inuup isummani oqaatigisinnaappagu, inuk killilersugaanngitsumik isummaminik oqaatiginninnissamut pisinnaatitaanernik qulakkeerissunneqassasoq, Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaanni tunngaviusumi pineqarpoq.

Meeraq innarluutilik aalajangersakkap imarisai malillugit suliani tamaginni aammalu suliap suliarineqarnerata nalaani sukkulluunniit oqaaseqaateqarnissamut periarfissaqarpoq. Taamaattoq meeraq innarluutilik oqaaseqaateqarnissamik pisussaaffilerneqanngilaq, taamatullu meeqqap allanit sinniiseqarnissaa imaluunniit ikiorteqarnissaa, aalajangersakkami akornuserneqanngilaq.

Kommunalbestyrelsip meeqqap kissaatai imaluunniit isumai malissagai, piunasaqaataanngilaq, kisianni meeqqap ukioqqortussusaa, inerisimassusaa aammalu piginnaasaqarnera malillugit pingaartinneqassallutik.

Oqaloqateqarnermi aalajangiinissamut naatsorsuutigineqartumut imaluunniit meeqqap innarluutillip nammineq isumaa ersarissitinneqassaaq. Misissuinermit atatillugu meeraq oqaloqatigineqarsimagaluartoq, aamma tapersiinermi iliuusissat pillugit aalajangiisoqannginnerani, oqaloqateqarneq ingerlanneqassaaq. Tamatumunnga tunngavilersuutaasoq tassaavoq, meeqqat aalajangiinissamik eqqarsaatigineqartup imarisaanut aalajangersimasumut isummaminnik saqqummiussinissamut periarfissaqarnissaasa pingaaruteqarnera.

Imm. 2-mut.

Aalajangersakkami *imm. 2*-mi aalajangersarneqarpoq, oqaloqateqarneq pitsaassusilimmik ataqqinnittumillu ingerlanneqassasoq, aammalu meeqqap nammineq suliami isummaminnik saqqummerneranik kinguneqassasoq. Oqaloqateqarnerup ilusissaanut piunasaqaateqanngilaq. Inuk tikillugu oqaloqateqarnertut, oqarasuaatikkut, videolink aqqutigalugu allatulluunniit ingerlanneqarsinnaavoq. Meeqqap isumai paasinarneqassapput, aammalu isummersuutit meeqqap ukioqqortussusaanut, inerisimassusaanut piginnaaneqarneranullu naapertuuttumik, isumaginninnermi suliaqarnerup ingerlaqqinnerani, naleqquttumik pingaaruteqartillugit, ilanngunneqassallutik.

Meeqqanut timikkut tarnikkulluunniit piginnaanikillisimasunut, aalajangiinnermi meeqqap isumaasa ilanngunneqarnissaa qulakkeerniarlugu, immikkut mianerinninnissaq imaluunniit periaatsit immikkut atornissaat, pisariaqarsinnaavoq. Piginnaaneqarneq inerisimaneq ukioqqortussuserlu uuttuutigalugit kommunalbestyrelse naliliisinnaavoq, meeqqap inissisimanini paasisimaneraa aammalu isummat isummersuutillu meeqqap oqaloqateqarnerup nalaani saqqummiussaasa kingunissai paasisimaarinerai.

Imm. 3-mut.

Aalajangersakkami *imm. 3* inissisimanermit tunngasutut paasineqassaaq, taamaalillunilu tamanna meeqqamut pitsaanerpaassasoq naliliisoqarpat aammalu tamanna allatigut isumanerlunnartortaqaarsorineqanngippat, tassani angajoqqaatut akisussaassut akuersiteqqaarnagit meeqqap oqaloqatiginissaanut kommunalbestyrelsimut periarfissiissutaalluni.

Imm. 4-mut.

Aalajangersakkami *imm. 4* imm. 1-imi maleruagassamut pingaarnermut ilaatinneqanngitsunut tunngavoq. Nalornissuteqarnermi, meeqqap isummani saqqummiussinnaassaneraa kommunalbestyrelsip nalornissutigalugu, kommunalbestyrelsip meeraq oqaloqatiginiarsarissavaa. Oqaloqateqarnerup nalaani paasinarsippat, meeqqap isummani oqaatigisinnaanngikkai, oqaloqateqarneq unitsinneqarsinnaavoq.

Oqaloqateqarnerup meeraq naleqqutinngitsumik inissisimalersillugu pisoqarsinnaavoq. Pisuni taakkunani meeqqap mianerineqarnissaa, pineqartup tusarniarneqarnissaanut imaluunniit akuutinneqarnissaanut aalajangiisuusumik akerliunersoq, ataasiakkaatigut nalilersuisoqassaaq. Nalilersuinermi, oqaloqateqarnerup ingerlanneqarnera meeqqamut iluaqutaanani ajoqutaaginnassanersoq, ilaatinneqassaaq. Tamanna assersuutigalugu meeqqap oqaaseqarnissani kissaatiginagu erseqqissumik oqaatigalugu pisoqarnerani, pisinnaavoq.

Pisut ilaanni aalajangersimasuni oqaloqateqarnerup ingerlanneqarnissaa meeqqamut iluaqutaassanngilaq. Tamatumunnga pissutaasinnaavoq meeqqap inerisimannginnera imaluunniit piginnaaneqannginnera, meeqqap inissisimanini paasisimanagu, aammalu isummaminik imaluunniit isummersuutiminik saqqummiussisinnaassanani. Meeqqap assersuutigalugu inuk toqqissisimanarisaa imaluunniit illersorti ikiorsiullugu oqaloqatigineqarnermini isummaminik saqqummiussisinnaanera periarfissaqarpat, oqaloqateqarneq ingerlanneqartariaqarpoq.

Meeqqap innarluutillip oqaloqatigineqarnera ingerlanneqanngippat, allatut aalajangiinermut meeqqap isumaata pissarsiariniarnissaanut kommunalbestyrelse pisussaaffeqarpoq. Oqaloqateqarneq sooq ingerlanneqarsimannginnersoq tunngavilersuutitalerlugu suliame allassimassaaq. Tassani allanneqartariaqarpoq, meeraq oqaloqatigineqarsimanngippat, meeqqap periarfissat qanoq paasinarsisimanersut.

§ 76-imut

Aalajangersakkami siunnersuutigineqarpoq, inummut tapersiinissaq imaluunniit immikkut ittumik tapersiinissaq pillugu aalajangiinermut atatillugu inummut innarluutilimmut illersorteqarnissamik neqerooruteqarnissamut kommunalbestyrelse pisussaaffeqartoq. Inuk illersortaanissamut suliamut ilisimasaqarluni tunngavissaqartoq tassaasinnaavoq, inuk ukiorpassuarni isumaginninnermut innarluutilinnullu suliassaqrifiup iluani sulisuusimasoq, assersuutigalugu ingerlatsivimmi suliassanik sularinnittartut, imaluunniit inuk inatsisilerituutut, isumaginninnermi siunnersortitut, immikkut perorsaasutut assigisaannilluunniit ilinniarsimasoq. Pingaarnepaajuvoq inuk illersortitut sulisussaq sulianut ilisimasaqarnikkut misilittagaqarnikkullu inuit innarluutillit pisinnaatitaaffiinik aamma isumaginninnermi periaatsimut ilisimasaqartuussasoq.

Nr. 1-imut

Inuit innarluutillit kapitali 6 naapertorlugu tapersiisarneq imaluunniit kapitali 7 naapertorlugu immikkut ittumik tapersiisarneq pillugu apeqqutinik suliarinninnermut atatillugu ikiorserneqartarnissaat, aalajangersakkami qulakkeerneqarpoq.

Illersortip kommunalbestyrelsimi tapersiinissaq pillugu suliap suliarineqarnerata nalaani, inuit innarluutillit pisinnaatitaaffii pillugit ilitersorsinnaassagai, kiisalu isumaginninnermi periaatsimi qanoq ataqatigiittoqarnersoq aammalu inuk tassani qanoq ingerlassanersoq pillugu inuk oqaluttuussinnaassagaa, naatsorsuutigineqarpoq.

Inuup oqartussamik attuumassuteqartumik ataatsimeeqateqarnerata nalaani tapersersornissaanik illersortip periarfissaqarnissaa, pingaaruteqarpoq. Inuup apeqqutit pineqartumut suliamullu attuumassuteqartut tamaasa ataatsimiinnerup nalaani saqqummiunnissaannut periarfissaqarnissaa, illersortip qulakkeersinnaassavaa. Suliap ingerlanera tamaat illersorti peqataasinnaavoq, aammalu suliami aalajangiisoqannginnerani inuup innarluutillip tusaaneqarnissaata, aammalu inuup isumaasa oqartussaasumut saqqummiunneqarnissaasa qulakkeernissaanut ikiutissasoq naatsorsuutigineqarluni.

Nr. 2-mut

Inuk innarluutillik Inatsisartut inatsisaanni matumani kapitali 6 aamma 7 naapertorlugit tapersiinissaq aamma immikkut ittumik tapersiinissaq pillugu kommunalbestyrelsip aalajangiinerata naammagittaalliuutiginnissaanik kissaateqartoq, aalajangersagaq manna naapertorlugu, naammagittaalliummik suliaqarnermut aammalu Isumaginninnermi Naammagittaalliuuteqartarfimmut tunniussinnermut, § 84 naapertorlugu, illersortimit ikiorneqarnissamik pisinnaatitaavoq.

Inuup innarluutillip periarfissaqarfiisa naammagittaalliummi ilaatinneqarnissaat, kiisalu naammagittaalliuutip suliarineqarnissaa aammalu maleruagassat piffissamullu killiliussat naapertorlugit tunniunneqarnissaa, illersortip isumagissavaa.

Nr. 3-mut

Aalajangersakkami aalajangersarneqarpoq, inuup innarluutillip illersorteqarnissamik pisinnaatitaanera, suliap ingerlanera tamaat atuutissasoq, ilanngullugu aamma kommunalbestyrelsip inatsisartut inatsisaanni matumani kapitali 6 aamma 7 naapertorlugu tapersiinissaq imaluunniit immikkut ittumik tapersiinissaq pillugu aalajangiinerata naammagittaalliuutigineqarneranik Isumaginninnermi Naammagittaalliuuteqartarfiup suliarinninneranut atatillugu tapersersuinissamut.

Inuup tusaaniarneqarnera aammalu paasissutissat isummersuutillu pineqartumut suliamullu attuumassuteqartut, naammagittaalliuutip Isumaginninnermi Naammagittaalliuuteqartarfimmut suliakkiunnissaanut tunngaviusut, tamarmik saqqummiunnissaannut periarfissaqarsimanera, illersortip qulakkeersinnaassavaa. Tamatuma saniatigut paasissutissat, pineqartup

naammagittaalliuuteqartarfimmit tigusaasa inuup innarluutillip paasisimagai, qulakkiissallugu illersortip suliaassaraa.

Imm. 2-mut.

Imm. 2.-mi aalajangersakkami Naalakkersuisut illersortinut maleruagassanik erseqqinnerusunik aalajangersaanissamut periarfissinneqarput, ilanngullugit toqqaasarneq, aningaasarsiaqartitsineq, pinerluuteqarsimanginnermut uppersaammik piniartarneq, kiisalu piukkunnassutsinut piginnaasaqarnernullu piumasagaatit suut piumasagaatigineqassanersut.

Illersortinik toqqaasarneq pillugu maleruagassani ilaatigut, Meeqqat tapersorsorneqarnissaannut Inatsisartut inatsisaat meeqqanut illersortinik toqqaasarnermut aaqqissuussineq assigalugu, illersortit kommunalbestyrelsimut tunngatillugu attuumassuteqanginnissaat qulakkeerseqassaaq.

§ 77-*imut*

Imm. 1-*imut*.

Kapitali 7 malillugu inuk innarluutilik immikkut ittumik tapersorsorneqassasoq isumaqartoqarpat, imm. 1 malillugu kommunalbestyrelse qulaajaanermik inummut innarluutilimmu suliaqassaaq. Inuk annertuumik innarluuteqarpat, § 7-*imut* nassuiaatit naapertorlugit, aammalu tapersiineq inummut annertuumik pingaaruteqartutut isigineqartariaqarpat, inuk kapitali 7 malillugu immikkut ittumik tapersiivigineqarnissamik pisariaqartitsisoq ilimagineqartariaqarpoq. Qulaajaanermi siunertaasoq tassaammat, inuup pisariaqartitaannut naapertuuttumik aammalu inuup ineriartorneranut iluaqutaasussamik kommunalbestyrelsip suliniuteqarnissamik katiterisinnaanissaanut ikiunnissaq, qulaajaaneq ingerlanneqassasoq ersarissumik aallaaviusaaq.

Ilaatitsinnginnermut aalajangersagaq, qulaajaaneq ersarissumik pisariaqanngitsoq, killilersuisumik nassuiarneqassaaq. Inuk siusinnerusukku immikkut ittumik tapersiinnermik aalajangersimasumik suussusillimmik ikiorserneqarsimappat, qulaajaaneq ingerlanneqartariaqanngilaq. Inuup innarluutaa taamaaginnarsimappat, aammalu tapersiinnermik pisariaqartitsineq allannguuteqarsimanani, immikkut ittumik tapersiinnermut taassuma assinganut nutaamik aalajangiisoqassaaq.

Imm. 2-mut.

Aalajangersakkami *imm. 2.-mi* aalajangersarneqarpoq, qulaajaaneq sapinngisamik inuk innarluutilik peqatigalugu, inuk nakkutigineqartuusimappat taassuma angajoqqaatut sinniisua, meeraq pineqarsimappat tassunga angajoqqaatut akisussaasut, kiisalu isumassuisut allat, suleqatigalugit ingerlanneqassasoq. Pisariaqartitsinernut taakkununga naapertuuttumik suliniuteqarnissap katiterneqarnissaa siunertaralugu, inuup tapersiivigineqarnissamik pisariaqartitsinerata erseqqinnerusup paasinarsinneqarnissaa qulaajaanermi siunertaavoq. Qulaajaanerup nalaani inuk innarluutilik, imaluunniit inuit taaneqartut taakkua ilai

attuomassuteqartut allat, inummut tunngasunik peqqissaartumik qulaajaanermut immersueqataasinnaasut, akuutinneqarnissaat ajornarsimappat, taakkua qulaajaanerup nutarterneqarnissaa siunertaralugu kingusinnerusukkut akuutinneqarnissaat anguniarneqartariaqarpoq.

Imm. 3-mut.

Imm. 3 malillugu qulaajaaneq pisariaqartunit annertunerussanngilaq, qulaajaaneq pissutsinut inuup innarluutillip tapersiivigineqarnissamik pisariaqartitsineranut tunngaviusutut ilimagineqartunut taamaallaat isummorsorfiusaaq. Inuk innarluutilik, tapersiivigineqarnissamik pisariaqartitsinerup aalajangersimasup malitsigisaanik, immikkut ittumik tapersiivigineqarnissamik qinnuteqarpat, taamaalilluni qulaajaanermi tapersiivigineqarnissamik pisariaqartitsineq taanna kisimi aallaaviusaaq. Kommunalbestyrelsip qulaajaanermut atatillugu piginnaanikillismanerit allat, tapersiivigineqarnissamik pisariaqartitsinerup pissutaasinnaasut paasippagit, imm. 1 aamma imm. 2 qulaajaanermut maleruagassat eqqarsaatigalugit, kommunalbestyrelsip taakkua tapersiinissamut ilaatittariaqarpai.

Imm. 4 naapertorlugu aalajangersagaq, tamatuma saniatigut qajassuussinissamik tunngavissarititaasumik imaqarpoq, taassuma malitsigisaanik inuup tapersiivigineqarnissamik pisariaqartitsinerata qulaajaaneqarnera, inummut qulaajaavigineqartumut sapinngisamik annikinnerpaamik ajoqutissartaqartillugu ingerlanneqassalluni, taamaattoq paasisat naammattut pissarsiarineqassapput. Periaatsit assigiinngitsut arlallit qulaajaanermik taamatut tamakkiitigisumik kinguneqarsinnaappata, periaaseq inummi innarluutilimmit pineqartumit, annikinnerpaamik akuliuttutut misigisimaneqartoq, toqqarneqartariaqarpoq.

Imm. 4-mut.

Qulaajaanerup annertussusaa, ataqatigiissumik tamakkiisumillu isiginnittumik suliniuteqarnermut tunngavigineqarsinnaalluni naammassasoq, *imm. 4*-mi aalajangersarneqarpoq. Isumaginninnermut inatsisit malillugit taamatullu naalakkersuisoqarfinni suliassaqarfiit allat iluanni, assersuutigalugu peqqinnissamut suliassaqarfik, ilinniartitaanermut suliassaqarfik il.il., inatsisit malillugit tapersiinerimi iliuusissat suut inummut innarluutilimmut neqeroortigissallugit naleqqutissanersoq, qulaajaanermut atatillugu isummerfigineqassaaq.

Imm. 5-imut.

Aalajangersakkami *imm. 5*-imi pissutsinut kommunalbestyrelsip qulaajaanermut atatillugu nalilersugassaannut allattuiffimmi allattuisoqarpoq. Allattuiffik tamakkiisumik allattuiffigineqarpoq. Immikkoortup matuma siuliani nassuiarneqartutut, tamanna qulaajaanerup naammattup suliarinissaanut pisariaqarpat, allattuiffik malinneqassaaq. Paarlattuanik imm. 3 naapertorlugu kommunalbestyrelsip pissutsit attuomassuteqanngitsut qulaajaanermi ilaatissanngilai.

Imm. 6-imut.

§ 79 naapertorlugu, qulaajaaneq tunngavigalugu allaganngorlugu iliuusissatut pilersaarut suliarineqassaaq, tassani inummut innarluutilimmut siunnerfilimmik aamma tamakkiisumik isiginnittumik suliniuteqarnissaaq qulakkeerneqassaaq. Taamaalilluni allassimavoq iliuusissatut pilersaarummi qulaajaaneq aallaavigineqassasoq.

Imm. 7-imut.

§ 38 imm. 3 naapertorlugu tapersiissutinut iliuusissaagallartut pillugit aalajangiineq ingerlaannassanersoq imaluunniit atorunnaassanersoq pillugu, kommunalbestyrelse qulaajaanermut atatillugu isummissasoq, *Imm. 7*-imi aalajangersarneqarpoq.

Inuup innarluutillip tapersiivigineqarnissamut pisariaqartitsinera, utaqqiisaasumik tapersiinissaaq pillugu aalajangernerup nalaanut naleqqiullugu allanngorsimasooq, qulaajaanermut atatillugu eqqumaffigineqalersimappat, assersuutigalugu tapersiinissamut iliuusissat naammagunnaarsimanerat pissutigalugu, imaluunniit pisariaqarunnaarsimanerat pissutigalugu, utaqqiisaasumik tapersiinerup allanngortinneqarnissaa imaluunniit atorunnaarsinneqarnissaa pillugu aalajangiinissaaq ilaatigut pisariaqalersinnaavoq.

Tamatuma saniatigut, inuk pineqartoq, angajoqqaatut sinniisua imaluunniit angajoqqaatut akisussaasut, pineqartup tapersiinissamut isumaa pillugu tusarniarneqassasut, piunasaqaammik aalajangersagaq imaqarpoq. Kommunalbestyrelsip uppersarsinnaassavaa oqaloqateqarneq ingerlanneqarsimasooq, aammalu inuk innarluutilik angajoqqaatut sinniisualu tassunga atatillugu qanoq oqaaseqarsimanersut. Tamanna assersuutigalugu oqaloqateqarnerup allaganngorlugu imaqarniliorneqarneratut iluseqarsinnaavoq. Inuup innarluutillip kissaataasa malinnissaannut kommunalbestyrelse pisussaaffeqanngilaq, kisianni inuup oqaaseqaatai kommunalbestyrelsip aalajangiineranut ilaatinneqassapput.

Imm. 8-mut.

Nuna tamakkerlugu inunnik innarluutilinnik sullissiviup kommunalbestyrelsimit qinnuigineqarnermini imm. 1 naapertorlugu inunnut innarluutilinnut tunngatillugu suliani immikkut pisariusuni qulaajaanermik suliaqarsinnaanera periarfissaqartoq, *Imm. 8* naapertorlugu aalajangersarneqarpoq.

Qulaajaanerpiaq kommunalbestyrelsip periarfissaqarfiginngisaannik tunngavissaqarnissamik pisariaqartitsiviusooq, ilanngullugu immikkut ilisimasaqarluni piginnaasaqarnerit, aalajangersakkami naatsorsuutigineqarpoq.

Imm. 9-mut

Inummut innarluutilimmut tunngasunik qulaajaaneq, tapersiineq imaluunniit immikkut ittumik tapersiineq qanoq annertutigisooq aallartinneqassanersoq aalajangiinermut tunngavigineqassaaq, *Imm. 9*-mi aalajangersakkami aalajangersarneqarpoq. Qulaajaanermut aallaaviusooq tassaavoq nalilersuinissaaq, inuk innarluutilik immikkut ittumik

tapersiivigineqarnissamik pisariaqartitsinersoq, kisianni qulaajaanermut atatillugu kapitali naapertorlugu tapersiinissamik pisariaqartitsisoqartoq eqqumaffigineqalersimappat, qanoq pisoqaraluarpalluunniit qulaajaaneg tunngavigalugu tapersiinissaq taamatut ittoq pillugu aalajangiisoqarsinnaavoq.

Imm. 10-mut.

Imm. 10-mi maleruagassanik erseqqinnerusunik aalajangersaanissamut piginnaatitsissummut aalajangersagaq, tamanna ilaatigut qulaajaanerup ingerlaneranut piffissanut qularnaveeqqutinut, qulaajaanermik ingerlatsisinnaaneq pillugu maleruagassanut, assersuutigalugu qulaajaaneg tamarmi sumiiffimmi ataatsimi ingerlanneqarsinnaasoq, imaluunniit qulaajaanerup ingerlanneqarnerata ilusissaanut piumasaqaatinut, assersuutigalugu inuk tikillugu ataatsimeeqatigalugu, qulaajaanerup ingerlanneqarneranut, ilusaanut imarisaannullu kiisalu suliap ingerlaneranut piffissaliussatigut piumasaqaatinut aamma qulaajaanerup naammassinissaanut, tunngassuteqarsinnaavoq.

§ 78-*imut*

Imm. 1-*imut*.

Aalajangersakkami *imm. 1* meeqqanut innarluutilinnut tunngasumik qulaajaanermut tunngassuteqarpoq. § 77-imi qulaajaaneg pillugu maleruagassat aamma meeqqanut innarluutilinnut tunngassuteqarput.

Meeqqamut innarluutilimmut qulaajaanermut atatillugu, meeraq inatsisit allat malillugit, Meeqqanik ikiorsiisarneq pillugu inatsisartut inatsisaat malillugu tapersiivigineqartarnersoq misissorneqassaaq. Inatsisit allat naapertorlugit tapersiisarneq pillugu paasissutissat, meeqqamut tunngasunik aammalu tapersiinissamut pisariaqartitsinermut tassunga atasumik qulaajaanermi ilaatinneqassapput. Meeqqap innarluutillip inatsisit allat malillugu tapersiivigineqartarnera, inatsiartut inatsisaannit manna malillugu tapersiivigineqarsinnaatitaaneramik killiliinngilaq. Inatsisartut inatsisaat manna malillugu tapersiineq, inatsisartut inatsisai allat malillugit tapersiinermut, tapertaassaaq, aammalu aatsaat inuup innarluutillip inatsisit allat malillugit tapersiivigineqarnissamik pisariaqartitsinera naammassineqarsinnaangippat, atuutissalluni.

§ 79-*imut*

Imm. 1-*imut*

Aalajangersakkami aalajangersarneqarpoq, inummut innarluutilimmut tapersiinissaq pillugu aalajangiisoqannginnerani, iliuusissatut pilersaarummik allaganngorlugu suliaqarnissamut kommunalbestyrelse pisussaaffeqartoq. Iliuusissatut pilersaarummik suliaqarnermi, kommunalbestyrelsip inummut innarluutilimmut suliniuteqarnissamut siunnerfiit sukumiisumik isumaliutersuuteqarfigissagai, taamaalillunilu aallaqqaammullu tapersiinissaq naapertuunnerpaaq aallartinneqassasoq, qulakkeerreqassaaq. Tamatumunnga ilaatillugu, tapersiinermi iliuusissat suut aallartinneqassanersut, aammalu inummut siunnerfiit qanoq anguneqassanersut, kommunalbestyrelsip isumaliutersuutigissavaa.

Iliuusissatut pilersaarut suliniuteqarnermut tunngatillugu aalajangersimasuussaaq aammalu ataasiakkaamut tunngatillugu inummut innarluutilimmut ataatsimut taassumalu pisariaqartitaannut tunngatillugu suliarineqassalluni. Iliuusissatut pilersaarummi inuk kiisalu taassuma angajoqqaatut sinniisua kiisalu angajoqqaatut akisussaasui attuumassuteqartut il.il., suliniuteqarnermut pilersaarummi malinnaanissamut aammalu inuup anigorniagassaannik aaqqiiniarnermi eqeersimaartumik peqataanissamut, periarfissineqassapput. Taamatullu iliuusissatut pilersaarut inummut suliniuteqarnermi, tapersersorti imaluunniit isumassuisut allat taarsissagaluarpata, ingerlaavartitsinissamut ineriartortitsinissamullu periarfissanik imaqassaaq.

Iliuusissatut pilersaarummut siunertaavoq inummut innarluutilimmut siunnerfilimmik aammalu tamakkiisumik isiginnittumik suliniuteqarnerup qulakkeerneqarnissaa.

Taamaaliornikkut inuup innarluutillip suliniuteqarnermut tapersersuinissaata, aammalu angajoqqaatut sinniisup allallu isumassuisut suliniuteqarnermut akuersaarnissaasa, ataqqinninnissaasa tapersersuinissaasalu qulakkeernissaa, annertunerpaamik taamaaliornikkut kissaatigineqarpoq. Suliniuteqarnerup tamakkiisumik isiginnittuusinnaanissaanut, ilaatigut isumalluutit suut inummi innarluutilimmi kiisalu inuup qanigisaasa qaninnerpaat akornanni atuunnersut, isummerfigineqassaaq.

Aalajangersakkami imm. 1, nr. 1-5-imi qanoq pisuni kommunalbestyrelse iliuusissatut pilersaarummik suliaqarnissamik pisussaaffeqarnerseq, allatorneqarput. Qulaajaanermut uiggiullugu aammalu iliuusissatut pilersaarummik suliaqarnermut atatillugu tapersiinermi iliuusissanik, iliuusissatut pilersaarummik suliaqarnissamik piumasagaateqarfigineqartunik, imm. 1, nr. 2, aamma 3. naapertorlugit, aallartitsinissaq imaluunniit atorunnaarsitsinissaq pillugu aalajangiisoqarpat, tamatumani iliuusissatut pilersaarutip qanoq issusaa apequtaalluni, iliuusissatut pilersaarummik nutaarluinnarmik suliaqarnissamut taarsiullugu, iliuusissatut pilersaarutip paasissutissanik immikkuullarissunik nalilersuinernillu taakkunanga, tapersiinermi iliuusissatut atasunik, nutarterneqarnissaa naammassaaq.

Imm. 2-mut.

Imm. 2-mi aalajangersarneqarpoq iliuusissatut pilersaarummi inuit innarluutillit ataasiakkaat aamma pissutsit tassunga tunngasut aalajangersimasut, aallaavigineqassasut. Iliuusissatut pilersaarut, siunertaasup allassimaneranit, annertunerussangilaq. Ilaatigut tassaniippoq, misissuinermi sapinngisamik annertunerpaamik ilisimasat pigineqareersut ilaatinneqartariaqartut, assersuutigalugu inunnit isumassuisunit peqqinnissaqarfimmeersunillu tassunga atasunit imaluunniit allanit inummut tunngasunik ilisimannittunit.

Imm. 3-mut.

Imm. 3-mi aalajangersarneqarpoq, iliuusissatut pilersaarutip minnerpaamik imarisassaannut pitsaassusissatut piumasagaatit immikkuullarissut allatorneqassasut. Aalajangersakkami

siunnerfigineqarpoq iliuusissatut pilersaarut tamakkiisumik isiginnittumik aqutsinermi sakkussaassasoq, siunnerfittut aalajangersarneqartut angunissaannik aallussiviulluni, peqatigisaanillu suliap ingerlanerani nakkutiginninnissaq aammalu inuup tapersiivigineqarnissamik pisariaqartitsinerani isumaginninnissamik qulakkeerissalluni. Iliuusissatut pilersaarut eqqumaffigineqartussanik immikkoortunik aalajangersaaviussaaq, inuit innarluutillit ataasiakkaat periarfissaannut killeqarnerannullu naleqqussagaasunik.

Aalajangersagaq paasineqassaaq iliuusissatut pilersaarut ingerlaavartumik kommunalbestyrelsimit nutarterneqartassasoq, aammalu suliniuteqarnerup sunniuteqarnera aamma tapersiinermi iliuusissatut naleqqunnerat, ingerlaavartumik kommunalbestyrelsimit nalilersorneqartassasoq, naatsorsuutigineqartoq. Iliuusissatut pilersaarut sammiviliisussatut kiisalu ineriartortuatumik allangorartinneqarsinnaasumillu sakkussatut, inunnut innarluutilinnut tapersiinissaq pillugu inassutigineqartunut aallarniutaasumik tunngaviliisussatut, atorneqassasoq naatsorsuutigineqarpoq, kiisalu inummut tapersiinermik suliniuteqarnerup sunniutaasa, taassuma tapersiinissamik pisariaqartitsinerani allangortitsisarnera ilutigalugu, ingerlaavartumik nutarterneqartassalluni. Taamaattumik iliuusissatut pilersaarut killiffimmut allakkiatut allangortannigitsutut, inuup ineriartorneranut pisariaqartitaannullu malinnaatinneqannigitsutut, isigineqartariaqannigilaq. Iliuusissatut pilersaarut ineriartornermut allakkiatut ineriartortinneqartuutussatut, ingerlaavartumik ineriartortinneqartussatut, isigineqassaaq. Iliuusissatut pilersaarut, suliarineqarnerata nalaani inuup pisariaqartitaannik pisoqalisunik takutitsiviusumik, immaqa ineriartornerup kingusinnerusukkut pisariaarutsissimasaanik, inummut innarluutilimmut suliniuteqarnerup nikinnaveertinnissaannut, pisoqataatinneqassannigilaq. Iliuusissatut pilersaarut siunissami ineriartortuutut ineriartortitsinissamut sakkussatut atorneqassaaq, ingerlaavartumik nalilersorneqartussaassalluni aammalu inuup maannakkut pisariaqartitsinera aallaavigalugu kommunalbestyrelsimit nutarterneqartassalluni. Iliuusissatut pilersaarut aammattaaq piffissap suliniuteqarfiusup ingerlanerani inummut annertunerusumik imaluunniit allatut tapersiinissamut inassuteqarnissamut, atorneqassaaq. Inuup innarluutillip pisariaqartitsinera allangorsimasinnaavoq, taamaattumillu iliuusissatut pilersaarut aamma, ingerlaavartumik nalilersoqqinneqartarluni aammalu pisariaqarpat allangoriartortinneqarluni allangortinneqartassaaq, taamaalilluni suliniuteqarnissaq tassani inassutigineqartoq aamma tapersiinermi iliuusissatut inassutigineqartut, tamatigut inuup maannakkut ineriartornissamut pisariaqartitaannut tunngavissiissallutik.

Iliuusissatut pilersaarut peqatigisaanik suleqatigiinnermi, suliassaqarfinnut akisussaasuusut, tamakkiisumik suliniuteqarnermi ilaatinneqartut assigiinnigitsut akornanni, kiisalu suliassanik suliarinnittut ataasiakkaat, inuup nammineq, pineqartup ilaqaataasa aammalu inuit inummut tunngatillugu suliniuteqartussat akornanni pitsaassusilimmik suleqatigiinnissamut iluaqutaasinnaalluni, sakkussatut naleqquppoq. Iliuusissatut pilersaarut, suleqataasut siunertanik aammalu tapersiilluni suliniuteqarnermi siunnerfigineqartunik paaseqatigiinnissaannut ataqatigiissitsisutut atorneqassasoq, naatsorsuutigineqarpoq,

taamatullu iliuusissatut pilersaarummi allassimassaaq, inuk tapersiivigineqarnersoq aammalu inatsisit suut malinneqarnersut.

Imm. 4-mut.

Aalajangersakkami *imm. 4*-mi aalajangersarneqarpoq, iliuusissatut pilersaarummik suliaqarneq sapinngisamik inuk nammineq, taassuma angajoqqaatut sinniisua aamma isumassuisut allat, kiisalu meeraq tassani pineqarpat angajoqqaatut akisussaasut oqaloqatigalugit aamma suleqatigalugit ingerlanneqassasoq. Inuk aallaaviatigut nammineq isummaminik isummersuutiminillu oqaatiginnissinnaanissamut periarfissaqassaaq, pineqartup piginnaasaqarnera, ukioqqortussusaa inerisimassusaaq peqqissaartumik mianerineqassallutik.

Imm. 5-imut.

Inissiiviusup iliuusissatut pilersaarummik paasitinneqarsimanissaa, najugaqarfissatut neqeroorummi inissiinerup ingerlanerata naleqarneranut pissarsiaqarfiginissaanullu pingaaruteqarpoq. Iliuusissatut pilersaarummik ilisimanninneq siunnerfilimmik suliniuteqarnermut iluaqutaassasoq naatsorsuutigineqarpoq, tassani suleqataasut akuutinneqartut tamarmik anguniakkat assigiit angunissaannik sulissutiginnissallutik. Taamaaliornermi tamakkiisumik isiginnittumik suliniuteqarnissamut tunngaviusut eqqarsaataasut, aamma najugaqarfissatut neqeroorummi piviusunngortinneqarnissaa, qulakkeerneqassaaq.

Imm. 6-imut.

Aalajangersakkami *imm. 6*-imi aalajangersarneqarpoq kommunalbestyrelsip iliuusissatut pilersaarutaa inummut innarluutilimmut pineqartumut, kiisalu taassuma angajoqqaatut sinniisuanut aamma angajoqqaatut akisussaasuinut, tunniunneqassasoq, aammalu kommunalbestyrelsip tamatigut pineqartoq, iliuusissamik pilersaarummik tunineqartoq, iliuusissatut pilersaarut pillugu ilisimatittassagaa. Tamanna inummut ilitersuisussaataitanerup annertusineqarnera pillugu maleruagassatut paasineqassaaq. Ilisimatitsineq oqaatsit aammalu periaaseq inuup piginnaasaqarneranik, utoqqaassusaanik inerisimassusaaanillu il.il. mianerinnittoq atorlugit pissaaq, taamaalilluni inuup attaveqatigiissutigineqartut paasissallugit.

Imm. 7-imut.

Aalajangersakkami *imm. 7*-ip malitsigisaanik Naalakkersuisut iliuusissatut pilersaaruttip ilusaa imarisaalu, kiisalu suliap ingerlaneranut piffissatigut piumasaqaatit aamma naammassinninnissaaq pillugit maleruagassanik erseqqinnerusunik aalajangersaassapput, assersuutigalugu qulaajaanerup inaarutaasup naammassinissaa sioqqullugu, iliuusissatut pilersaarut ullut aalajangersimasumik amerlassusillit iluanni aallartinneqassasoq naammassineqassaaq.

§ 80-mut

Imm. 1-imut.

Ulloq unnuarlu neqeroorut iliuusissatut pilersaarummi aalajangersarneqartumi aallaaveqartumik, ukiumut minnerpaamik ataasiarluni ineriartortitsinissamut pilersaarummik suliaqartassasoq, aalajangersakkami *imm. 1*-imi aalajangersarneqarpoq.

Iliuusissatut pilersaarutip siunertaa aamma siunnerfii aallaavigalugit, ineriartortitsinissamut pilersaarut perorsaaniqut sulinerup nassuiarneqarneranik imaqaassaaq, tassani qulakkeerneqassalluni iliuusissatut pilersaarummi siunnerfiit pingaarnerit naammassineqarnissaat. Inunnut innarluutilinnut, ulloq unnuarlu neqeroorummiittunut tamaginnut ineriartortitsinissamut pilersaarutitik suliaqartoqassaaq.

Imm. 2-mut.

Naalakkersuisut ineriartortitsinissamut pilersaarutit ilusissaat imarisassaallu pillugit maleruagassanik erseqqinnerusunik aalajangersaanissamut, aalajangersakkami *imm. 2*-mi piginnaatinneqarput. Taakkua innuttaasup ulloq unnuarlu neqeroorummiinneranut suna siunertaanersoq kiisalu assersuutigalugu piginnaasaqarfinnik inerisaasumik suliniuteqarnerit imaluunniit sammisaqartitsinerit allat, innuttaasup ulluinnarni inuunermi pitsaanerusumik nammineersinnaaneranik inerisaasussat, aaqqissuunneqartarnerannut, tunngassuteqarsinnaapput.

§ 81-imut

Imm. 1-imut.

Ulloq unnuarlu neqeroorutip inuup innarluutillip ulloq unnuarlu neqeroorummiinnermini ineriartornera pillugu kommunalbestyrelse ilisimatittassagaa, aalajangersakkami *imm. 1*-imi aalajangersarneqarpoq. Ilisimatitsissut minnerpaamik killiffimmut nalunaarusiatut iluseqartillugu nassiunneqartassaaq.

Aammattaaq aalajangersarneqarpoq, inuup peqqissusaanut imaluunniit inooqataaneranut tunngasuni annertuumik allanngortoqarpat imaluunniit tamanna naatsorsuutigineqartariaqarpat, ulloq unnuarlu neqeroorutip kommunalbestyrelse piaartumik ilisimatissagaa. Aalajangersagaq *imm. 2*-mut tapertaavoq, taanna malillugu ulloq unnuarlu neqeroorut ukiup affakkaarlugu ataasiarluni killiffimmut nalunaarusiamik nassiussisussaalluni. Allannguutit annertuut assersuutigalugu tassaasinnaapput, inuup piginnaasaqarnera tassangaannartumik annertuumik sanngiillisoq, inuup pissusilersortarnera allanngortoq aammalu sakkortuumik imminoriarnissaa aarlerinaateqartoq, tassangaannartumik napparsimalersoq imaluunniit assersuutigalugu timikkut tarnikkullu innarluuteqalerluni imaluunniit innarluuteqarnera allanngorluni misissorneqartoq il.il. Allannguutit annertuut aamma makkuusinnaapput inuup ilaqaatanut tunngasut imaluunniit attaveqarfiinut tunngasuusinnaapput, assersuutigalugu angajoqqaatut sinniisusooq imaluunniit qanigisaasoq alla, ilanngullugu isumassuisut, toqukkat qimaguppat. Allattukkat tamakkiisuunngillat. Ulloq unnuarlu neqeroorutip inummut tunngasuni allannguutit annertuut suulluunniit pillugit kommunalbestyrelse ilisimatissavaa.

Imm. 2-mut.

Ulloq unnuarlu neqeroorut siullerpaamik, inuup ulloq unnuarlu neqeroorummiilernerata kingorna kingusinnerpaamik qaammatit pingasut qaangiunneranni, killiffimmut nalunaarusiamik kommunalbestyrelsimut nassiussissasoq, aalajangersakkami *imm.* 2-mi aalajangersarneqarpoq. Tamatuma kingorna killiffimmut nalunaarusiaq ingerlaavartumik nutarterneqartassaaq aammalu ukiup affaani ataasiarluni kommunalbestyrelsimut nassiunneqartassalluni.

Killiffimmut nalunaarusiaq, inuup innarluutilip atugarissaarneranut ineriartorneranullu ataatsimut isigalugu isummerfiunermi saniatigut, aamma immikkuullarissumik inuup iliussissatut ineriartortitsinermullu pilersaarutaasa imarisaannut sanilliullugu, inuup killiffia pillugu kommunalbestyrelsimut paasissutissiiviusaaq.

Imm. 3-mut.

Aalajangersakkami *imm.* 3-mi Naalackersuisut, inummut innarluutilimmut, ulloq unnuarlu neqeroorummiittumut killiffimmut nalunaarusiap ilusissaa imarisassaaq pillugit maleruagassanik erseqqinnerusunik aalajangersaanissamut, piginnaatinneqarput. Assersuutigalugu innuttaasoq innarluutilik ulloq unnuarlu neqeroorummi ukiorpassuarni inissisimappat, assigiissaartumik iluseqartitsinissaaq naleqqutissaaq.

§ 82-*imut*

Imm. 1-*imut*.

Kommunalbestyrelsip inuk innarluutilik, kapitali 6 aamma 7 naapertorlugit tapersiivigineqarnissamik imaluunniit immikkut ittumik tapersiivigineqarnissamik innersuunneqartussaaq, paasissutissanik inummut tunngasunik, inuup tapersiivigineqarnissamik pisariaqartitsinerata aalajangersarnissaanut pisariaqartutut isigineqartunik, tunniusseqqullugu, piumaffigisinnaagaa, aalajangersakkami *imm.* 1-imi aalajangersarneqarpoq.

Tamatuma saniatigut aalajangersarneqarpoq, peqqissutsimut paasissutissanik, inuup tapersiivigineqarnissamik pisariaqartitsineranik aalajangersaanissamut pisariaqartunik, pissarsinissaaq siunertaralugu, kommunalbestyrelsip inuk nakorsamit misissortissasoq piumaffigisinnaagaa.

Aalajangersagaq pinngitsaaliissummik misissortitsinissamik, periarfissiinngilaq.

Imm. 2-mut.

Aalajangersakkami *imm.* 2-mi aalajangersarneqarpoq, inummut innarluutilimmut tunngasut, inuup tapersiivigineqarnissamik pisariaqartitsineranik aalajangersaanissamut attuumassuteqartut pillugit paasissutissanik piniarnissamut, kommunalbestyrelse inummit innarluutilimmit akuersisummik peqassasoq. Taamaattoq, taakkua inuup soqutigisai pingaaruteqartut illersornissaannut pisariaqarpata, pineqartup nammineq imaluunniit

inatsisitigut akuersisinnanani, paasissutissanik attuumassuteqartunik piniarnissaq aalajangersakkami periarfissaqartinneqarpoq.

§ 83-*imut*

Imm. 1-*imut*.

Aalajangersakkami *imm. 1-imi*, tapersiinnissaq pisariaaruppat, kommunalbestyrelsip inummut innarluutilimmut tapersiinnermik unitsitsinissamik imaluunniit allanngortitsinissamik pisussaaffeqarnera pillugu § 69 annertusarneqarpoq.

Aalajangersakkami aalajangersarneqarpoq, inuk Inatsisartut inatsisaat manna malillugu tapersiivigineqartoq, inummut, peqqissutsumut inooqatigiinnermullu tunngasut, inuup kapitali 6 aamma 7 naapertorlugit tapersiivigineqarnissamut imaluunniit immikkut ittumik tapersiivigineqarnissamut pisinnaatitaaginnarnissaanut pingaaruteqartut, pillugit kommunalbestyrelsimut paasissutissiisussaataasoq. Paasissutissiisussaataaneq paasissutissanut tamaginnut, pineqartup tapersiivigineqarsinnaatitaaneranut pingaaruteqarsinnaasunut, tunngassuteqarpoq. Paasissutissiisussaataanermi aamma angajoqqaatut sinniisuusoq imaluunniit angajoqqaatut akisussaasut, pineqartunut ilaapput.

Imm. 2-*mut*.

Imm. 2-mi, inummut, tapersiissutaasumik pisariaqartitsisimannngitsumut, § 69 *imm. 4* naapertorlugu, tapersiisoqarsimatillugu, tapersiissutigineqartoq utertillugu akilernerqassasoq piunasaqarnissamut kommunalbestyrelse piginnaatinneqarpoq. Kommunalborgestypelsip tapersiissutaasup utertillugu akilernissaanik piunasaqarsinnaaneranut piunasaqaataavoq, tapersiissutaasumut pisinnaatitaajunnaarsimaneq, inuup, taassuma angajoqqaatut sinniisuata imaluunniit angajoqqaatut akisussaasuisa ilisimasimassagaat. Taamaalilluni aatsaat piffissamit, tapersiissutaasoq pisariaarussimasoq, inuup pineqartup ilisimalerneranit tapersiissutaasoq utertillugu akilernerqassasoq piunasarineqarsinnaalissaaq.

Imm. 3-*mut*.

Naalackersuisut tapersiissutaasup *imm. 2* naapertorlugu pisussaataitanani tiguneqartarsimasup, utertillugu akilernerqarnissaa pillugu maleruagassanik aalajangersaasinnaasut, aalajangersakkami *imm. 3-mi* aalajangersarneqarpoq. Maleruagassat taakkua assersuutigalugu, inuit pineqartut qaqugukkut ilisimasaqalersimassanerannut, utertillugu akiliinissamut piffissatigut maleruagassanut, ingerlatsinermut il.il. tunngassuteqarsinnaapput.

§ 84-*imut*

Imm. 1-*imut*.

Naammagittaalliornerit pillugit inatsisit atuuttut ingerlatiinnarneqassasut, *Imm. 1-imi* siunnersuutigineqarpoq. Taamaalilluni isumaginninnerup aqunneqarnera aaqqissuusaaaneralu pillugit Inatsisartut peqqussutaanni maleruagassat atuuttut atorneqassapput.

Imm. 2-mut.

Imm. 2-mi siunnersuutigineqarpoq inuk innarluutilik taassumalu suliame sinniisuusitaa naammagittaalliummik tunniussinissamut nuna tamakkerlugu inunnik innarluutilinnik sullissivik siunnersorneqarnissamik ilitsersorneqarnissamillu qinnuteqarsinnaasut.

Aalajangersagaq inatsimmi pisussaaffiliunneqartumik naammagittaalliornissamut ilitsersorneqarnissamut, aalajangiinerni tamaginni ilaatinneqartussamut, taarsiullugu atuutsinneqassanngilaq.

Imm. 3-mut.

Imm. 3-mi siunnersuutigineqarpoq Isumaginninnermi Naammagittaalliuteqartarfik Inatsisartut inatsisaat manna malillugu aalajangiinerup naammagittaalliutigineqarneranik sularinninnerminut ilaatillugu nuna tamakkerlugu inunnik innarluutilinnik sullissivimmit oqaaseqaammik piniarsinnaavoq. Tamatumani suliani ataasiakkaani immikkut pisariusuni immikkut ilisimasalimmit nalilersuineramik pissarsinissamik Isumaginninnermi Naammagittaalliuteqartarfik periarfissinneqarpoq. Isumaginninnermi Naammagittaalliuteqartarfik aamma nuna tamakkerlugu inunnik innarluutilinnik sullissivik oqaaseqaammik piniarnermut atatillugu inummut paasissutissanik paarlaasseqatigiissinnaapput. Isumaginninnermi Naammagittaalliuteqartarfiup aamma nuna tamakkerlugu inunnik innarluutilinnik sullissiviup akornanni inummut paasissutissanik paarlaasseqatigiittoqarsinnaalernissaa sioqqullugu, suliame pineqartunit akuersissummik piniartoqassaaq.

§ 85-*imut*

Aalajangersagaq nutaajuvoq.

Imm. 1-*imut*.

Aalajangersakkami *imm. 1*-imi kommunalbestyrelsit ataasiakkaat innarluutilinnut siunnersuisoqatigiinnik pilersitsinissamut pisussaaffilerneqarput, aammalu siunnersuisoqatigiit suliassai piginnaasaqarfiilu aalajangersarneqarlutik. Inunnut Innarluutilinnut Siunnersuisoqatigiinnut siunertaavoq inunnut innarluutilinnut suliassaqarfimmi tunaartassat pingaernerit sularineqarnissaat, aammalu ilaatigut kommunalbestyrelsip inunnut innarluutilinnut politikkiani aamma suliassaqarfimmi allaffissornikkut aqutsineranik ineriartortitsinermi eqeersimaartumik sulinissamik suliqaarnissaq, kiisalu kommunimi politikkikkut apeqqutini siunnersuineramik ikiuunnissaq siunertarineqarluni. Inunnut Innarluutilinnut Siunnersuisoqatigiit aamma apeqqutit nalinginnaanerusunut tunngasut oqallisigisinnaavaat aammalu politikkikkut taamatullu allaffissornikkut suliniutissanut siunnersuuteqarsinnaallutik.

Imm. 2-mut.

Aalajangersakkami *imm. 2*-mi aalajangersarneqarpoq, Inunnut Innarluutilinnut Siunnersuisoqatigiit suliniutit inunnut innarluutilinnut tunngassuteqartut tamaasa pillugit

tusarniartarnissaannik kommunalbestyrelse pisussaaffeqartoq, tassani ilaalluni innarluutilinnut politikki. Tusarniaasussaataaneq taamaallaat ataatsimut isigalugu suliniutinut tunngassuteqarpoq, tassami imm. 3 naapertorlugu Inunnut Innarluutilinnut Siunnersuisoqatigiit pisuni aalajangersimasuni inuit ataasiakkaat pillugit suliassanik suliarinninnissamut piginnaatitaanngimmata.

Imm. 3-mut.

Aalajangersakkami *imm. 3*-mi erseqqissarneqarpoq, Inunnut Innarluutilinnut Siunnersuisoqatigiit sulianut inunnut tunngasunut oqallittarfiunngitsut, taamaattumik siunnersuisoqatigiit inunnut ataasiakkaanut tunngasuni allagaatinik takunnitsitseqqusaanngillat, taamatullu innarluutilinnut siunnersuisoqatigiit naammagittaalliuutinik suliassanik ataasiakkaanik suliarinnissinnaanatik. Inunnut ataasiakkaanut tunngasut aalajangersimasut, ataatsimut isigalugu apeqqutitut isikkoqartunik pissutissaqalersitsisimappata, innarluutilinnut siunnersuisoqatigiit ataatsimut isigalugu isummersinnaapput, aammalu ajornartorsiummut ataatsimut isigalugu apeqqutitut isikkoqartumut tassunga taamaallaat isummersinnaallutik.

Imm. 4-mut.

Aalajangersakkami *imm. 4*-mi inunnut innarluutilinnut siunnersuisoqatigiit katitigaanerat maleruagassiivigineqarpoq. Piumasaqaataavoq inunnut innarluutilinnut siunnersuisoqatigiit amerlaqatigiinnik amerlassusilinnik ilaasortaqaqtillugit pilersinneqassasut, innarluutillit kattuffii aallartitaqassallutik, aamma kommuninit aallartitanik imaluunniit kommunip soqutigisaannut sinniisussatut saqqumisunit ilaasortaqaqassalluni. Ilaatigut kommunalbestyrelse inunnut innarluutilinnut siunnersuisoqatigiinni aallartitaqassaaq. Taamaalilluni inunnut innarluutilinnut siunnersuisoqatigiit naligiissitsiviupput.

Imm. 5-imut.

Aalajangersakkami *imm. 5*-imi aalajangersarneqarpoq, kommunalbestyrelse inunnut innarluutilinnut siunnersuisoqatigiinnut pisariaqartillugu allattoqarfitsigut ikiuutissasoq. Allattoqarfitsigut ikiorteqarnerup, ilaatigut ataatsimiinnerit ingerlanneqarnissaannut aggersaanissamut aammalu ataatsimiinnerit ingerlanneqarneranni ikiuunnissamut kiisalu ataatsimiinnerit imarisaat pillugit imaqarniliornermut paasissutissiinermullu il.il. atorneqarnissaa siunertarineqarpoq.

Imm. 6-imut.

Aalajangersakkami *imm. 6*-imi Naalakkersuisut ilaatigut inunnut innarluutilinnut siunnersuisoqatigiit suleriaasii, aningaasarsiaqartinneqarneri pillugit, kiisalu ataatsimiititaliap sulianik paasinarsisitsinissamut suliarinninnissamullu atugassaannik immikkut ilisimasalinnit oqaaseqaatinik piniartarneq il.il. pillugit maleruagassanik erseqqinnerusunik aalajangersaanissamut, piginnaatinneqarput.

§ 86-*imut*

Aalajangersagaq nutaajuvoq.

Imm. 1-imut.

Aalajangersakkami *imm. 1*-imi, kommunimi inunnut innarluutilinnut tapersiisarnermi sapinngisamik qaffasinnerpaamik pitsaassuseqartitsinissap qulakkeerneqarnissaa siunertaralugu, kommunalbestyrelsip inunnut innarluutilinnut politikkimik ataqatigiisumik ilusilersuinissamut pisussaaffeqarnera, aalajangersarneqarpoq. Ataqatigiisooq paasineqassaaq tassaasoq, kommunimi inunnut innarluutilinnut tapersiinnermut atatillugu, pisortat suliassaqarfii immikkuullarissut akimorlugit, qanoq sapinngisamik pitsaanerpaamik sullissisoqartassanersoq, inunnut innarluutilinnut politikki isummertoqarnissaa. Inunnut innarluutilinnut politikki, ilaatigut innarluutilinnut suliassaqarfimmi suliniutit pillugit suliassaqarfii immikkuullarissut akimorlugit suleqatigiinnissamut, ilaatigut innuttaasut innarluutilit sivisunerpaamik namminneq angerlarsimaffimminniiginnarsinnaanissaannut kommunimi sullissinnermut siunnerfinnut il.il., tunngassuteqarsinnaavoq.

Imm. 2-mut.

Aalajangersakkami *imm. 2*-mi, kommunalbestyrelsip kommunip innarluutilinnut politikianik, § 86 naapertorlugu, suliaqarnermut atatillugu inunnut innarluutilinnut siunnersuisoqatigiinnut tusarniaasarnissamik pisussaaffeqarnera, erseqqissarneqarpoq.

Imm. 3-mut.

Aalajangersakkami *imm. 3*-mi aalajangersarneqarpoq, innarluutilinnut politikki allaganngorlugu ilusilersorneqassasoq aammalu kommunip nittartagaani tamanut saqqummiunneqassasoq. Tamanna inunnut innarluutilinnut politikkip kommunimi innuttaasunit tamaginnit pissarsiarineqarsinnaaneranut, iluaqutaassaaq.

Imm. 4-mut.

Aammattaaq kommunalbestyrelsip, aalajangersakkami *imm. 4* naapertorlugu, innarluutilinnut politikki suliarineqartoq pillugu Naalackersuisut ilisimatissavai.

Aalajangersakkami Naalackersuisut nuna tamakkerlugu inunnut innarluutilinnut periusissamik suliaqarnissaq siunertaralugu kommunimi innarluutilinnut suliassaqarfimmi sukkulluunniit paasisimaarinninnissaasa qulakkeerneqarnissaa siunertaavoq.

Imm. 5-imut.

§ 87 naapertorlugu aalajangersakkami *imm. 5*-imi aalajangersarneqarpoq, inunnut innarluutilinnut politikki sivisunerpaamik ukiut sisamakkaarlugit iluarsineqartassasoq. Inunnut innarluutilinnut politikkip iluarsisarneranut siunertaavoq, ullutsinnut naleqquttumik inunnut innarluutilinnut politikkeqarnissap qulakkeerneqarnissaa, kiisalu inunnut innarluutilinnut politikkimik, kommunimi sullissinnermut siunnerfinnik ingerlaavartumik aalajangersaaviummik, peqarnissaq. Inunnut innarluutilinnut politikki pitsaassutsinut malitassat pillugit siunnerfinnik imaqarsinnaavoq.

§ 87-imut

Aalajangersagaq nutaajuvoq.

Imm. 1-imut.

Aalajangersakkami *imm. 1* kommunalbestyrelsip tapersiisarnermut kommunip innuttaasunut innarluutilinnut ikiorsiissutigisagaannut, pitsaassusissanut malitassanik aalajangersaanermik, imaqarpoq. Pitsaassusissanut malitassat atortutigut tapersiisarnermut tunngasut, assersuutigalugu teknikkikkut atortut ikiuutaasussat qanoq akulikitsigisumik taarserneqartassanersut, taamatullu atortutiguunngitsaq tapersiisarnermut, assersuutigalugu tapersersortit sulianut piginnaasaqarfii imaluunniit ingiaqataasartut nalunaaquttap akunneri atortagassaanut attuumassuteqarsinnaapput.

Pitsaassusissanut malitassat inatsimmi killissaliussat iluaniissapput. Taamaalilluni pitsaassusissanut malitassanik, piumasaqaatinik naammassinninngitsunik, imaluunniit inatsimmi suliassaqarfiup avataaniittunut, aalajangersaanissamut inatsimmi tunngavissaliisoqanngilaq.

Imm. 2-mut.

Aalajangersakkami *imm. 2*-mi aalajangersarneqarpoq, kommunalbestyrelsip Inatsisartut inatsisaat manna malillugu tapersiisarnernut tamanut imaluunniit aalajangersimasumik suussuseqartunik piviusunngortitsisarnernut pitsaassusissanut malitassanik aalajangersaasoqarnissaa pillugu kommunalbestyrelse aalajangersaasinnaavoq. Taamaalilluni inunnut innarluutilinnut tapersiissutinut tamanut, kommunimi ikiorsiissutigineqartartunut, pitsaassusissanut malitassanik aalajangersaanissaq pisussaaffiunngilaq. Assersuutigalugu najugaqariaatsinut najugaqaqatigiiffinnut kiisalu najugaqarfinnut illersugaasunut pitsaassusissanut malitassanik aalajangersaasoqarpat naleqqutissaaq.

Pitsaassusissanut malitassat inatsimmi killissaliussat iluaniissapput. Taamaalilluni pitsaassusissanut malitassanik, piumasaqaatinik naammassinninngitsunik, imaluunniit inatsimmi suliassaqarfiup avataaniittunut, aalajangersaanissamut inatsimmi tunngavissaliisoqanngilaq.

Imm. 3-mut.

Aalajangersakkami *imm. 3*-mi aalajangersarneqarpoq, *imm. 1* aamma *2* malillugit pitsaassusissanut malitassat allaganngorlugit suliarineqassasut aammalu kommunip nittartagaani tamanut saqqummiunneqassasoq kiisalu Isumaginninnermut Aqutsisoqarfimmut ilisimatitsissutitut nassiunneqassasut.

Tamanut saqqummiussineq, pitsaassusissanut malitassat inunnut tapersiivigineqarsinnaatitaasunut pisinnaatitaaffittut isikkoqarnissaannut, iluaqutaassaaq. Pitsaassusissanut malitassat tamatuma saniatigut kommunalbestyrelsip inunnut innarluutilinnut politikkiata ilaatut tamanut saqqummiunneqassapput.

Imm. 4-mut.

Aalajangersakkap qulakkiissavaa Naalakkersuisut qaquguluunniit inunnut innarluutilinnut suliassaqarfimmi nuna tamakkerlugu pitsaassutsinut malitassat pillugit tamakkiisumik isiginninnissaat.

Imm. 5-imut.

Aalajangersakkami *imm. 4*-mi aalajangersarneqarpoq, pitsaassusissanut malitassat sivisunerpaamik ukiut marlukkaarlugit iluarsineqartassasut. Iluarsisarnermi aalajangersakkami matumani piumasqaatit naammassineqassapput. Pitsaassusissanut malitassat ullutsinnut naleqquttuunissaasa qulakkeerreqarnissaat, pitsaassusissanut malitassanik iluarsisarnermi siunertaavoq.

Imm. 6-imut.

Imm. 6-imi, pitsaassusissanut malitassat, *imm. 1* naapertorlugu, pillugit maleruagassanik aalajangersaanissamut inatsimmi tunngavissaq, aalajangersarneqarpoq. Tamanna inunnut innarluutilinnut sulianut ilisimasaqarnerup annertussusaanut, kommuni innuttaminut innarluutilinnut neqeroorutigisinnaasaannut, pingaaruteqarpoq.

§ 88-imut

Imm. 1-imut

Aningaasartuutit assigiinngitsut Inatsisartut inatsisaat aammalu peqqussutit Inatsisartut inatsisaat naapertorlugu aalajangersagaasut naapertorlugit, aalajangersagaasut, qanoq aningaasalersorneqassanersut, aalajangersakkami maleruagassiivigineqarpoq. Aalajangersakkami siunnersuutigineqarpoq Inatsisartut inatsisaat manna naapertorlugu inunnut innarluutilinnut tapersiinermt atattillugu aningaasartuutit tamaasa akilernissaannut kommunit pisussaaffeqartut.

Imm. 2-mut

Aalajangersakkami aalajangersarneqarpoq ulloq unnuarlu neqeroorutinut aningaasalersuineq akigititamik akiliuteqarnikkut ingerlanneqassasoq, taamaalilluni oqartussaasoq inissiisoq inissanut ataasiakkaanut ulloq unnuarlu paaqqinniffimmi atukkaminut akiliisassalluni.

Imm. 3-mut

Ulloq unnuarlu neqeroorummik pilersitsinissamut ingerlatsinissamullu kina aningaasaqarnikkut akisussaasuunersoq aalajangersakkami maleruagassiivigineqarpoq.

Imm. 4-mut

Najugaqatigiiffinnik aamma najugaqarfinnik illersugaasunik pilersitsinermt ingerlatsinermullu kina aningaasaqarnikkut akisussaasuunersoq aalajangersakkami maleruagassiivigineqarpoq.

Imm. 5-imut

Naalackersuisut nunani allani ingerlatsivimmi oqartussanik allanik isumaqatigiissuteqarsinnaasut aalajangersakkami aalajangersarneqarpoq, tassani iliuuseqartussaataaneq aammalu inatsit malillugu tapersiinnernut aallartinneqartunut aningaasartuuteqarnermut atatillugu utertillugit akiliisarneq pillugu maleruagassat erseqqinnerusut aalajangersarneqassallutik. Isumaqatigiissutit taakkua, inuk Kalaallit Nunaanni oqartussaasut tapersiinissamik iliuuseqarnerisigut Kalaallit Nunaata avataani inissinneqarpat, isumaqatigiissutigineqarsinnaapput.

§ 89-imut

Imm. 1-imut

Kommunit meeqqanut innarluutilinnut § 48 malillugu aammalu inunnut innarluutilinnut 18-it sinerlugit ukiulinnut § 49 malillugu kommunip iliuuseqarneratigut ulloq unnuarlu neqeroorutini inissinneqartunut kommunit akiliuteqartarnissaat aalajangersakkami maleruagassiivigineqarpoq. Taakkununga kommunit akigititamut akiliutissaat ulloq unnuarlu inissiiviusoq ataaseq aningaasartalerlugu naatsorsorneqassaaq.

Imm. 2-mut

Aalajangersakkami aalajangersarneqarpoq, ulloq unnuarlu neqeroorut najugaqartuminut kaasarfimmiussanik atisassarsiutissanillu tunniussisassasoq, taamaattumillu kommunalbestyrelsip taakkua tunniuttassanngikkai. Ulloq unnuarlu neqeroorutip akigititat Naalackersuisunit aalajangersarneqartut, aammalu ukiumoortumik akigititanut kaajallaasitami iluarsineqartartut, Naalackersuisunit saqqummiunneqartut, tungavigalugit kaasarfimmiussat atisassarsiutissallu tunniuttassavai.

Imm. 3-mut

Kaasarfimmiussat atisassarsiutissallu aningaasanit kommunip imm. 1 malillugu paaqqinniffimmut akilertagaannit, ulloq unnuarlu neqeroorummi najugaqartunut tunniunneqartassapput. Kommune taamaalilluni kaasarfimmiussanut atisassarsiutissanullu matussutissanik paaqqinniffimmut aningaasanik annertunerusunik akiliisassanngilaq. Aningaasartat taakkua allatut oqaatigalugu ulloq unnuarlu akiliummi ilaareerput.

Imm. 4-mut

Aalajangersakkami Naalackersuisut imm. 1-imi taaneqartumut akigititamut akiliutissamut maleruagassanik erseqqinnerusunik aalajangersaanissamut piginnaatinneqarput. Aningaasartuutit suut kommunip akiliutaani ilaatinneqannginnersut maleruagassat ilaatinneqarput. Ulloq unnuarlu paaqqinniffiit siunissami aamma Naalackersuisut ulloq unnuarlu paaqqinniffiup akigititamut akiliutinik kommuninit tiguneqartunik atuineranut aningaasaqarnikkut nakkutilliisussaataanera, akuersaartussaassavaat.

Imm. 5-imut

Aalajangersakkami Naalackersuisut najugaqaqatigiiffinnut aamma najugaqarfinnut illersugaasunut Inatsisartut inatsisaat manna naapertorlugu pilersinneqartunut aningaasaqarnikkut nakkutilliinissamut piginnaatinneqarput.

Imm. 6-imut

Naalackersuisut imm. 2 malillugu kaasarfimmiussat atisassarsiutissallu pillugit maleruagassanik erseqqinnerusunik aalajangersaasinnaapput, ilanngullugu tunniussisarneq, aningaasartat annertussusaat aalajangersarneqassapput.

§ 90- imut

Imm. 1-imut

Akigititat inatsit naapertorlugu aalajangersagaasut qaqugukkut iluarsineqartassanersut tamanullu saqqummiunneqartassanersut, aalajangersakkami aalajangersarneqarpoq.

§ 91-imut

§ 91-imi inatsisit atuuttut ingerlatiinnarnissaat siunnersuutigineqarpoq. Taamaattoq aalajangersakkami pineqartunut ilaapput kisitsisitigut paasissutissat inunnet innarluutilinnut tunngassuteqartut taamatullu inunnet annertuumik innarluutilinnut tunngassuteqartut.

Imm. 1-imut.

Aalajangersakkami *imm. 1*, inuit annertuumik innarluutillit amerlassusaat, innarluutit suussusaat, ukioqqortussutsit agguarsimanerat uuttuutaasussallu allallu pillugit, suliassaqarfimmi ineriartornerup malinnaaffigisinnaanissaanut pingaaruteqartunik, Naalackersuisut ingerlaavartumik pissarsisinnaanissaannut, ilanngunneqarpoq. Kommunalbestyrelsimut tunngatillugu kisitsisitigut ilisimasat taakkua innarluutilinnut suliassaqarfiup iluani pilersarusiornermut tunngavissaliisinnaapput.

Imm. 2-mut.

Aalajangersakkami *imm. 2*-mi Naalackersuisut kisitsisitigut paasissutissat taakkua il.il., imm. 1 naapertorlugu, annertussusissaat pillugu aammalu taakkua qanoq nutarterneqartassanersut nassiunneqartassanersullu pillugu, maleruagassanik aalajangersaanissamut inatsimmi tunngavissalernerqarput. Maleruagassat nalunaarummi aalajangersarneqassasut naatsorsuutigineqarpoq. Tassani kisitsisitigut paasissutissat nassiunneqartartussat qanoq issusillit, kiisalu qanoq akulikitsigisumik, aammattaaq kisitsisitigut paasissutissat taakkua qanoq nutarterneqartassanersut nassiunneqartassanersullu aalajangersarneqassasut naatsorsuutigineqarpoq.

§ 92-imut

Aalajangersagaq nutaajuvoq.

Imm. 1-imut.

Inatsisartut inatsisaat naapertorlugu ingerlatsivimmi oqartussatut kommunalbestyrelsip pisussaaffiisa naammassineqarnissaanni annertuumik imaluunniit arlaleriarlugu sumiginnarneqarneranni imaluunniit peqqissaarunneqannginneranni, Naalakkersuisut kommunalbestyrelsip pinngitsaaliissummik akiliisinneqarnissaanik pisussaaffiliisinnaasut aalajangersakkami *imm. 1*-imi aalajangersarneqarpoq.

Kommunalbestyrelsimut pisussaaffiliineq aamma pinngitsaaliissummik akiliisitsinerit akilersinniarneqarnerat il.il. politiit aqutigalugit pissanngilaq, kisianni pisortat ingerlatsinerannut inatsisitigut aamma inuinnaat akornanni eqqartuusseriaaseq aqutigalugit pissalluni.

Imm. 2-mut.

Aalajangersakkami *imm. 2*-mi aalajangersarneqarpoq, § 92 naapertorlugu pinngitsaaliissummik akiliisitsinerit Nunap karsianut tutsinneqassasut.

§ 93-imut

Aalajangersakkami matumani siunnersuutigineqarpoq misileraanernut tunngatillugu inatsisit atuuttut ingerlatiinnarneqassasut, taamaalilluni kommunalbestyrelse misileraanermik pilersitsisinnaalluni, tassani inuit innarluutillit tapersiissutissatut periarfissat, Inatsisartut inatsisaanni matumani allassimasut saniatigut, tapersiissutinik neqeroorfigineqarsinnaallutik. Kommunalbestyrelse taamaallaat Naalakkersuisut akuersissuteqarnerat malillugu tapersiisarnermut aqqissuussamik pilersitsisinnaavoq, taamatullu atugassarititaasut misileraanermut piumasaqaatigineqartut malinneqanngippata, misileraanerit suulluunniit unitsinneqarsinnaassapput. Misileraanernut aalajangersimasunut, erseqqinnerusumik killissalorsorneqartunut taamaallaat akuersissuteqartoqarsinnaavoq.

Misileraanerup nakkutilliivigineqarnissaanut pisinnaatitaaneq pillugu aalajangersakkanik akuersissuteqarnermi aalajangersaasoqarsinnaavoq.

Misileraanermut aalajangersakkanut siunertaavoq ilaatigut kommunimi neqeroorutini ineriartortitsinerup nukittorsarneqarnissaa, ilaatigullu isumalluutininik pitsaanagerusumik atuinissamut tunngavissaliinissaq. Pisariaqarpoq nalinginnaasumik misileraanerup nalaani neqeroorutininik allanik peqarnissaq, siunnersuummi taaneqartuni aammalu misissuilluni misileraanerup aallartinnissaanut akuersissuteqartoqassasoq, ikiorsiissutit aningaasalersuinerlu pillugit immikkut ittumik akuersinissamut aallartisaasoqassasoq akuersissuteqartoqassasorlu misileraanerit aalajangersakkat allat misilittagaasut takutippaat. Misileraaneq sulianik ilisimasaqarnikkut illersorneqarsinnaasoq aammalu aningaasaqarnikkut piujuarsinnaasoq taamatullu suliassanik aalajangersimasunik misileraanermut ataqatigiissinneqarsinnaassasoq, akuersissuteqarnissamut piumasaqaataavoq.

§ 94-imut

Imm. 1-imut.

Imm. 1-imi siunnersuutigineqarpoq Inatsisartut inatsisaat manna ulloq 1. januar 2019 atuutilissasoq.

Ulloq atuutsitsilerfissaq, siunnersuutip Inatsisartuni suliarineqarsinnaanissaa aammalu atuutilernissaa sioqqullugu piffissaqartitsiviulluartumik akuerineqarsinnaanissaa eqqarsaatigalugu aalajangersarneqarpoq. Nalunaarutinik ilitsersuutinillu suliaqarnermik malitseqartitsisoqartussaassaaq, kiisalu kommuniti inunnut innarluutilinnut suliaqarfimmi sullissisunut, inunnut innarluutilinnut suliaqarfimmi attuumassuteqartunut allanut pikkorissartitsinerit ingerlanneqartussaassallutik, taamaalilluni inatsit atuutilerpat, suliaqarfimmi sulisut inatsit nutaaq ilisimallualereersimassavaat.

Imm. 2-mut.

Annertuumik innarluutillit ikiorserneqartarnerat pillugu Inatsisartut peqqussutaat nr. 7, 3. november 1994-imeersoq, kiisalu piffissami 1994 – 2010-mi allannguutissatut peqqussutit katillugit tallimat, atorunnaarsinneqassasut, aalajangersakkami *imm. 2*-mi aalajangersarneqarpoq.

Malugineqassaaq Annertuumik innarluutillit ikiorserneqartarnerat pillugu Inatsisartut peqqussutaat nr. 7, 3. november 1994-imeersoq § 29-mi aalajangersarneqarmat, inuit timimikkut eqqarsartaatsimikkulluunniit annertuumik innarluutillit isumagineqarnerat pillugu Inatsisartut peqqussutaat nr. 9, 15. oktober 1979-meersoq tunngavigalugu annertuumik innarluutilittut nalunaarsorneqarsimasut, peqqussummi tassani kapitali 2-mi aalajangersakkat apeqqutaatinnagit, peqqussut taanna malillugu ikiorserneqarsinnaammata.

Siunnersuummi matumani aalajangersakkap taassuma ingerlateqqinneqarnissaa naleqqutinngitsutut isigineqarpoq, tassami aalajangersakkamut ilaatigut tunngaviummat, inuit annertuumik innarluutillit ikiorserneqarsinnaanissaannut ukiunut annerpaaffiliilluni killissaliussamik ilaatigullu inuit annertuumik innarluutilittut nalunaarsorneqarnerat tunngavigalugit ikiorsiinissaq qulakkeerneqassasoq, aalajangersaasoqarmat. Siunnersuummi matumani inuit innarluutillit tapersiivigineqarnissaannut ukiunut annerpaaffiliilluni killissaliussamik aalajangersaasoqanngilaq aammalu inuit innarluutillit tapersiivigineqarnissaannut nalunaarsuinissaq siusinnerusukkat aalajangersagaasoq, pisariaqanngilaq.

Imm. 3-mut.

Imm. 3-mi siunnersuutigineqarpoq, allaffissornikkut maleruagassat *imm. 2*-mi taaneqartumi Inatsisartut peqqussutaanni inatsisitigut tunngaveqartumik aalajangersagaasut, taakkua maleruagassanik Inatsisartut inatsisaanni matumani imaluunniit Inatsisartut inatsisaanni allani inatsimmi tunngaveqartumik aalajangersagaasunik, taarserneqarnissamik imaluunniit atorunnaarsinneqarnissamik tungaanut, atuutiinnassasut.

